

《淡然轩集》 (明) 余继登 撰

钦定四库全书

集部六

淡然轩集

别集类五

明

提要

臣等谨案淡然轩集八卷明余继登撰继登字世用交河人万历丁丑进士官至礼部尚书谥文恪是集分奏疏二卷序记三卷志铭及杂文二卷诗一卷继登卒后其友人冯琦选而刻之继登当神宗朝以灾异屡见上疏极陈一切诛求开采之害民者又请神宗躬郊庙册元子停矿税撤中使时将讨播州杨应龙因请罢四川矿税以佐兵食复上言近者天地人皆不和怨毒凝结臣子不能感动君父故天地人皆以非常之变警悟陛下不可恬不为意云云语皆切中时弊其疏具载此集中诗文则应酬之作未免失于刊削然大抵平正淳实无万历中佻薄之习亦尚不失典型也

乾隆四十五年五月恭校上

总纂官 (臣) 纪昀 (臣) 陆锡熊 (臣) 孙士毅

总校官 (臣) 陆费墀

●钦定四库全书

淡然轩集卷一

(明) 余继登 撰

○疏

修史疏一

为纂修正史事臣惟正史之体纪表传志悉备纪志以载国家之政典但稽考于朝廷即可备史臣之纂述列传以载一代之人物必博访于四海乃可协众人之公评伏蒙皇上先允辅臣陈于陛之请勅谕儒臣纂修本朝正史以垂启佑又允辅臣王铎爵等之议行令郡国购求海内典籍以备纂修德意甚盛臣以庸愚滥厕副总裁之末自二十二年八月内开局以来日与诸臣在馆翻阅中秘副录搜求故实将以次辑为志表帝纪等书无容别议惟是自开国以至于今二百余年间祖宗道化之隆国家人才之盛应运而兴光映后先其应载列传者不可胜数矣第人众则其势必涣时久则其事易湮若全凭秘录之隐括则志其畧未志其详欲兼采野记之纪闻多传其疑非传其信苟非闻见之博安能纪述之公伏乞勅下礼部移文直隶并各省提学官转行所属各府州县地方其有硕辅名卿德业彰著者首先辑录此外有立朝大节生平卓行表表在人耳目者不拘官秩崇卑一并收采至于名儒良吏孝子贞妇与夫隐逸方伎之流可备纪载者逐一查访或详录其家乘或博询之乡评务要明白开具当时行事实迹编成书册送部备考若

有生不齿于时歿无闻于后者不许徇情滥褒致淆公论定为期限载入考成庶臣等得以藉手次第编摩不至耽延岁时虚糜廩餼矣奉圣旨礼部知道

修史疏二

为俯循职掌敬陈修史一二未定事宜伏候圣裁以昭大信以光大典事臣惟代之有史攬摭故实脩载册书明示将来用垂法戒非一人之书而天下之公也非一时之书而万世之公也故是非虚实之间子不得私诸其父臣不得私诸其君而后可以言公今诸臣奉命纂修首先帝纪行且就草矣臣窃即帝纪而言有不可不自为一纪者有不必为纪者不可不自为一纪者建文君是已可不必为纪者恭穆献皇帝是已夫建文之号当复诸臣详言之皇上已允行之矣然附载太祖高皇帝纪之末终觉未妥臣尝考阅实录思成祖所以改建文五年为三十五年者盖缘即位之初欲以子继父为名不欲以叔继侄为名故为是权宜之举耳非有明诏革除之也乃后修史者不達圣祖之意遂于建文元年以后书其年而削其号并削其行事之迹故此数年间独纪靖难事而不纪所靖之难为何事若有所曲讳者今幸已复其号似当搜罗故牒采集传闻详载当时所用之人所行之事别为少帝之纪是是非非明白无隱则靖难之兵有名圣祖之心益白夫以圣祖所不自讳所不必讳者而臣子乃欲强为之讳非以天奉圣祖也且事须有实直道难枉今野史所记已多失真若不及今明为之纪令后世以久愤之心信传疑之语则史臣之失职不足惜如圣祖何臣谓不可不自为一纪者此也至献皇帝积德累仁笃生神圣遂垂万世不拔之基然其发祥之长亦不过如德懿熙仁四祖止耳四祖不纪而独为献皇帝立纪岂惟臣子之心不安即皇上之心亦必不安岂惟皇上恐献皇帝在天之灵亦且有踧踖不自安者矣况纪号献皇帝而所书者乃弘治正德之年纪名为帝而所载者乃藩王之事皇上以为于义于例当耶否耶且自古由藩封入继大统者非一人试考史书未见有为其祖父作帝纪者彼非不能纪不欲以私害公耳臣窃以为四祖事只宜附见于太祖高皇帝纪之前献皇帝事只宜附见于世宗肃皇帝纪之前或别起一例亦宜与列圣帝纪有别庶使名实不紊体裁不紊不然以献皇帝之子孙臣庶欲纪则纪矣如天下后世之公议何臣诚不忍使万世之下有非议圣朝者谓可不必纪者此也凡此皆非臣下所敢擅定者伏乞勅下辅臣会同总裁纂修诸臣商议允当上请圣明裁决行令载笔之臣有所遵守天下后世颂皇上之至公无私如天如地真有高出寻常万万者而于正史为益光矣

捐俸以资赈济疏

臣等近接邸报见九卿大臣辞俸助赈荷蒙皇上俯从其奏且明谕五品以下不许辞臣等窃思人臣之立朝也若诏禄计官固分厚薄至同忧共念何间崇卑况以势所不及而言四品以上俸资虽厚岂能遍数州数郡之民以势所可及而言五品以下禄入虽微亦可活匹夫匹妇之命值此甚灾之日又当极匮之时皇上忧民且为旰食宫闈悯旱皆已助赈凡在臣工敢安常禄且臣等职居禁近既未尝历郡邑睹艰难情状而绘郑监

门之图官守闲曹又无能亲职事得龟勉勤劳而效富青州之策执经累岁启沃无由待诏频年优游何补即无事犹当夺禄岂拙时乃可素餐因此不自揣量愿捐俸薪以佐涓滴伏乞圣慈勅下该部准照在京堂上官一体辞捐则臣等愚心不愧愚分少安矣奉圣旨准捐俸户部知道

捐俸助工疏

兹遇皇居鼎新工力浩大阁部诸臣各疏捐俸以济工役臣职列闲曹从叨岁俸在无事之日尚且深愧素餐岂兴役之时乃敢坐安常禄即较大臣之俸不无厚薄而原臣子之心何分彼此愿照例捐俸一年少资工费宦迹靡定安敢远及岁时禄入有常窃欲少输涓滴伏乞圣慈特勅户部将该支俸银扣解工部收贮应用以见臣子不敢安常之义不忘趋事之忱奉圣旨户部知道

火灾疏一

为遇灾修省恭请圣明临御讲筵并献愚忠以备采择以回天意事兹者干清宫灾臣伏睹皇上明降手札思愆咎之未尽深引过以自责是皇上警惧悔悟之心至真至切数年以来臣下所欲得之于皇上所不能必得之于皇上者而天出灾变以感动之矣夫皇上英明果毅具尧舜之资近乃不乐说言似未扩其舍己从人之度者特圣心偶未之悟耳一旦翻然猛省惕然觉悟必不敢复以莫违之成心忽难谏之天意是舍旧图新之大机也昔人有言台諫所不敢言者讲臣得言之臣待罪讲幄叨糜廩禄平时既无能启沃主心遇变又不能陈说愀然不惟负皇上抑且负天故敢少竭其愚臣讲臣也犹忆供事之初皇上时御经筵非寒暑不辍日御讲筵非风雨不免因窃自思以皇上至神至圣岂二三儒绅片时讲诵即能有补于万一而皇上留心问学如此者毋亦谓亲宦官宫妾不如接贤士大夫之雍容处秘殿深宫不如居广厦细旃之敛饬耽醉饱醲鲜不如味圣贤理义之隳永乐声色谀佞不如闻格言法语之砭箴乎是故自古人君讲读日勤则志气日清而处事咸得其当讲读日懈则志气日隳而处事多失其平皇上何不反躬自思以今昔而并观之也昔讲读时昧爽临朝者陛下也今岁不一御矣夫人君象日日一日不照临人且骇异十日而不见日将翘首东望不胜抑郁无聊之思为人臣子而终岁不一睹天颜其瞻天仰日之心当何如者此犹其小者耳下不见上则所为上交者不得不凭章奏而章奏又有时而不行上不接下则所为下交者不得不凭批答而批答又有时而不下苟有炆灶之奸中扃外闭如国事何知皇上在御必无此事傥圣子神孙中刚明稍有不及皇上者而引今日为故事则权不旁落政即下移是皇上作法也岂以明圣而虑不及此也昔讲读时遇早步祷者陛下也今不一至郊矣夫郊祀不亲已非古人昭事之意岂有目睹天心谴怒至于焚毁宸居震惊圣躬视旱灾为孰切者犹然不一诣郊坛深陈自怨自艾之诚以祈天佑而仅止于遣官恭代岂以代者之恭即能谢天谴而回天怒乎未可必也此时而不亲郊更无望亲郊时矣昔讲读时时享斋居者陛下也今不一入庙矣臣窃度之方被灾时皇上所望于九庙神灵之保护者岂不甚切而九庙神灵所

为默佑于冥冥之中者岂不甚力幸无事矣乃惜咫尺之劳不躬诣祖考之前一申报谢岂惟皇上之心不能自安即列祖在庙之灵不能不望于皇上也昔讲读时推心以委大臣坦懷以任羣臣而今不然矣中有所主辅臣不能申其说意有所移九卿无能捄其败言疑其私人疑其党大寮既因之而虚位庶官亦因之以另推自古未有堂陛隔絕如此其甚者也夫皇上养士二十四年于兹矣岂生于今者尽懷私植党而无一可信可倚者乎亦薄于视士矣夫国家事如人一身血脉有所不周则必有壅阏痿痺之患今上蓄疑以待下下懷疑以事上至令腹心之臣惶惑而不敢断耳目手足之臣逡巡而莫知所措陛下谁与治天下乎非所以示一体之谊成泰交之风也昔讲读时起用建言之臣优容直諫之士而今不然矣言官而言既怒其言而显斥之不言又怒其不言而槩斥之当事者斥不当事者亦斥用者既斥斥者不许复用故两月来无敢以言进者其心岂真以朝无阙政可遂相安于无言不过畏陛下之积怒不敢言耳夫不言极易事耳然人臣之利非社稷之福也今修省之日正不讳之时臣恐在朝之臣争欲发愤懣効忠诚而言未必悉当词未必悉婉皇上倘复厌其烦怒其激则諫道从此遂塞而陛下之善念阻矣惟陛下辨言之公私以为从违因以辨人之公私以为用舍不可槩以为言耳而槩视之也昔讲读时亦曾惩一二宦寺而罚止遽遣罪不株连今何如矣疑心一生视左右尽若可怒怒心一起视左右尽皆可刑鞭朴之惨满前征逮之使载道夫此辈岂不欲委曲承顺少得皇上之欢心其逆圣意而被严谴者摄于威也夫摄之以威则愈不及而愈见其难堪寬之以情自无不及而自见其可恕惟皇上布大德赦小过治有罪释无辜使人不惧死孰不感恩当死而生感恩必甚由是肘腋■〈执上目下〉御其爱戴皇上当有甚于皇上之自爱者矣陛下亦何惮而不为此也凡此皆行事之偶失而其原皆起于圣志之未清其本皆由于圣学之久废故臣惓惓以勤讲读为修省之要务也然臣不独言之惟望皇上行之且亟行之夫闻之而能行行之而能亟于行是真能悔悟者也人情初悟初悔皆能奋励而渐久渐怠不免忽忘故臣愿陛下之亟行之也昔秦穆霸国之君汉武多欲之主而秦誓之书轮台之诏载之经史为后世美谈皇上倘不以臣言为迂而力行之则天下万世颂明天子者为禹为汤而高出秦穆汉武之上矣

火灾疏二

为感时効忠敬陈致灾之由伏乞圣明省览改图以消天变事兹者干清宫灾圣德谦冲引咎自责羣臣仰体圣心备陈修省之要矣臣复何言臣备员讲幄执经而事陛下每览经书所载古昔帝王即当太平无事之日而战兢惕厉恒如天之无亲而民之罔懷者何若是其凜凜也盖知君者天之子也君虽尊常当畏天天者民之天也民虽微常能动天故曰小心翼翼昭事上帝又曰天视自我民视天听自我民听今岁一执珪璧事上帝而陛下不亲也天授陛下以大位而岁时虚之不一御也第诿之曰调摄夫果调摄也明明在上必自知之不然天无怒乎先后进言诸臣皆天生贤才为世用者陛下槩以为私而斥之且禁锢之矣恐间有忠肝义胆忧治危明之士抑郁而无所告不免仰天而叹

也岁额岁增孰非民力有司请损之而不可得不得不厚敛以充之严刑以迫之彼穷困之民鬻妻鬻子而无所告不免仰天而叹也左右■〈执上目下〉御一逆圣意动加鞭朴鞭朴不已必致死亡彼当垂死亡之时而无所告不免仰天而叹也罚奸惩恶法何可废彼其株连漫引之众诬服于拷讯之下而无所告不免仰天而叹也天以天下臣民付之陛下乃监观四方日闻叹息愁苦之声天无怒乎天之怒陛下不以言其儆戒陛下亦不以言时出敌国外患以谴告之而陛下不悟也又出水旱盗贼以谴告之而陛下又不悟也于是举紫宸太微皇上万万年所深居静摄优游逸豫之地一旦付之烈焰之中天之怒亦甚而其仁爱亦切矣伏愿陛下敬天之怒体仁爱之心惕然思翻然悔悟急下罪己之诏深陈既往之愆改弦解网与天下更始则不俟崇朝而臣庶腾欢帝天悦豫两间交泰和气薰蒸变灾为祥其事甚易而其效甚速也今宸居既毁行且鼎新陛下不以此时收拾人心遽欲糜其财而劳其力恐易动之势成而难谏之天复有大可畏者矣皇上圣神当自明知而臣犹敢喋喋者亦讲诵陈说职掌当如此耳

火灾自陈疏

为因灾省咎自陈不职乞赐罢斥以回天变事兹者昊天威怒宸居荡焚皇上自引咎愆臣寮各陈瘵旷况如臣者猥以謏陋洊沐宠荣八载讲帷廿年清秩虽从诸臣之后屡陈劝讲之章而天听弥高清光愈远执经而待志欲效夫涓埃倚席不谈功何裨于尺寸且行能浅薄不堪领袖词林兼学术空踈安望总裁史局素食真惭廩禄赤绂玷班行深知策足之不前自分乞身之已后希赐罢免用戒踈庸岂惟深荷皇恩亦可少答天谴奉圣旨余继登着照旧供职吏部知道

患病疏一

为患病不能供职乞恩放还以便调理事臣以一介草茅荷蒙皇上简置词林晋侍讲幄以至今官二十有一年矣臣虽至愚极陋亦思竭涓埃之力以仰答天地之仁臣之志也缘臣七八岁时父母连丧兄长先亡将养无人饮食失节以是平生善病壮年尚可支持四十以后病即委顿每延医诊视谓臣气血两虚病不在肢体间当早屏居摄治不治将深臣窃意不然故数年来每遇病疾疮痍但注籍服药痊可即出未敢言去自今年春复病内伤饮食减少臣犹自忽略谓可幸无事至三月三十日忽尔头目眩痛手足酸软痰壅胸膈两肋如割复延医诊视皆言是元气久虚痰火凝结表里皆邪触处悉病兹欲东补西攻无此妙剂惟有谢事归田从容补养元气或万有一分之愈臣始悔臣过于自信不早听良医之言以至狼狈如此也然无及矣夫人疾痛则呼天呼父母臣早失父母陛下天也是以不得不哀鸣于陛下之前况臣职厕讲筵非养病之地佐司邦礼非养病之官若使床褥呻吟尚糜廩禄则臣心愈不安而臣病愈深危亡可旦夕见也伏希天恩怜悯广开好生之德即放生还早就医药倘延一日之生即皇上一日之赐也奉圣旨余继登系日讲官着在任调理供职吏部知道

患病疏二

为患病益深调理无效再恳天恩放还以延残喘事臣先以病乞归奉圣旨余继登系日讲官着在任调理供职吏部知道钦此臣伏睹纶音感极而泣即强自奋励延医治药比常加倍服食期在必愈岂知脾胃久弱药饵难调服药既频脾胃益弱始犹不能运化汤粥今并不能运化药剂矣臣始叹欲强者心不能强者命不得已再乞怜于君父之前臣资虽蠢愚性非懒惰自入仕以至于今二十余年间未尝告假一日告病一日以偷安里中岂以今官阶渐崇职任渐大又有修史诸务顾欲托病以求安岂人情哉况臣历正三品俸几二年二个月苟可勉强支持需以岁月或得徼皇上之宠命为祖父之光荣为人臣子孰无是心而臣亦不能待也此又岂人情哉陛下可以谅臣之病苦矣臣伏枕气结词不能达千祈万恳惟望皇上慈悲怜悯早赐生还而已臣即不能报陛下愿臣子子孙孙嵩祝圣寿于无疆也奉圣旨余继登着遵前旨调理供职吏部知道

恭慰疏

万历二十四年七月十三日臣等伏闻仁圣懿安康静皇太后崩逝大小臣民无不哀痛号呼情如丧妣矧皇上至孝因心合万国以奉长乐之欢二十余年矣一旦违养其悲痛又当何如者恭惟皇上一身宗社臣民之主所系至重又况静摄之时岂宜哀伤之过伏望仰遵遗诏少抑圣情以慰海内之心以成天子之孝臣等下情无任惓惓奉圣旨览奏慰知道了礼部知道

自陈疏

为奉职无状乞赐罢黜以警旷官事臣一介草茅待罪礼曹逋病逋起碌碌无所短长已一年余矣顷以科场之事臣部仪制司郎中张世才为科臣指摘虽科臣忠厚疏中明言左右堂不及知若为臣开罪者但臣备员堂官岂可尽诿曰此尚书郎中事而与己全不干涉乎彼时不敢有言者惧涉庇护之嫌且以是非听部院以处分听朝廷耳今世才已蒙圣恩薄示调罚矣如臣独膺颜以无罪无事自居岂人臣难进易退之义哉夫人或可以恕臣而臣则不可以自恕况同部而不与其事同事而不与其罚均之无可解者伏望皇上扩天地之量宽雷霆之威将臣特赐罢免以为苟禄旷职不善调停者之戒别选贤能以佐邦礼臣虽窜身田里养痾林泉皆皇上之极恩而微臣之厚幸也奉圣旨余继登着照旧供职吏部知道

谢羊酒钞锭疏

为恭谢天恩事万历二十六年四月日伏蒙圣恩以臣三年考满钦遣御前答应牌子李虎賚赐原封钞二千贯羊一只酒十瓶到臣私寓臣谨焚香望阙叩头祇领讫伏念臣章句凡儒草茅贱士遭逢圣主叨厕词林执经讲帷何有沃心之益备员卿佐深惭典礼之司虚糜未効一筹荏苒已惊三载自井幽黜敢望明恩乃荷圣慈特加宠锡发内庭之镪楮勤中使以传颁醇醪分玉府之珍肥矜出大官之畜儒绅增重蓬户生光敢不竭弩力于涓埃仰以答鸿仁于天地奉圣旨览奏谢知道了礼部知道

覆谥法疏

为触事陈言恳乞圣明采纳以明公论以定国是事祠祭清吏司案呈奉本部送礼科抄出京畿道监察御史乔璧星题臣不佞待罪西台十有三载缄口咋舌非不可悠悠待迁顾臣言官以言为职者也持禄需次臣实耻之属者一二时事义激于衷辄敢不揣黥劣敬为我皇上陈之试垂听焉一议谥法夫谥以易名最号巨典二百年来清议黷之故有谥在百年之后者有在数十年之后者有幸获而数罢者皇明臣谥类钞可镜已迩来人心不古毁誉失真彬彬实副盛名者虽十九乎然亦有阿附江陵而谥者矣有春部多疵而谥者矣近有行事差可其心孔艰而谥者矣又有谥与人不相符合者矣诸如此类更仆难数要之妍媸溷淆褒贬错乱何以风宇内而劝来许耶谓宜勅下礼部除世远论定者无用别议外将二十年以来获谥诸臣开造书册送九卿科道衙门矢心天日逐一评品亲注某也应谥某也应夺某也应改某也遗漏应补各牘列实迹封送该部类奏恭候皇上予夺务俾真正纯白之士胥被华袞之荣而负慝作伪之徒不得售其欺世盗名之计诛奸雄于既往劝生者于方来鼓舞世道之一大机括也臣愚谬谓谥法之当议者如此等因奉圣旨该部看了来说钦此又该礼科署科事左给事中罗栋等题为循职掌采公评摘举缺谥名臣以彰幽隐以昭激劝事臣等伏惟公谕着而后国典重羣议定而后臣鉴明我国家磨砺臣工意至深矣生也高下其官品有爵以馭幸死也轩轻其人品有谥以易名爵有时穷而谥无时穷故谥为至重爵犹可奸而谥不可奸故谥为至公谥者行之迹也大行受大名细行受细名非独以彰往昔亦将以劝来兹据大明会典内一欵大臣应得谥而遗漏者不论远近许科道官从公举奏近该京畿道御史乔璧星条议谥法大约感时触事见易名之典重故不厌精详追慕前修见盖棺之论定无嫌博取皇上勅下部议寮采参订于下而是非不谬圣明独断于上而与夺无私在斯一举矣惟议谥关礼科职掌安敢无言台臣议举其近者臣等请并及其远者谨以故老之所传说史乘之所纪载有助绩最茂品格最高昭昭在人口吻间者二人兵部尚书兼右都御史伍文定太子太保兵部尚书毛伯温是也文定少喜谈兵长多奇节当宸濠发难之日倡义先登遂倾其巢穴挺身奋击立尽其鲸鲵战不逾时而元恶就擒社稷几危而复安文定之功伐万世犹凭之矣伯温声着西台名留全楚当交趾作孽之秋余勇可贾深入其险阻先声所警遂易其狡心兵不血刃而酋长乞降荒服已携而复附伯温之威名四裔亦畏之也考其当年文定与王守仁实共死生伯温与韩雍可称伯仲今守仁得谥文成韩雍得谥襄毅二臣寂寂独至今未补窃以为折冲御侮甲冑有劳之谥法当亟议矣学问甚正出处甚明彰彰在人耳目间者二人吏部左侍郎张元祯南京刑部右侍郎吴悌是也元祯识洞本源接濂洛关闽之正脉动成爻象陈禹汤文武之吁谟雅受知于孝庙独不合于宰臣入仕垂五十年在朝仅九阅岁士大夫想望其风采比于祥麟瑞凤非虚誉也吴悌接统象山溯渊源于立大玩易涑水妙进退于观时由循吏而抗节西台避权贵而屏居里第入仕三十余年闲居二十余载士君子评论其气象拟于岳峙渊澄非过情也考其当年元祯与罗伦共相规切吴悌与罗洪先妙解静修今罗伦得谥文庄洪先

得谥文恭二臣亦寂寂至今未补窃以为勤学好问避远不义之谥法当亟议矣其它若都御史鲁穆希心玄旷羔羊之节久而不渝兵部尚书郭宗皋敦尚风节姜桂之性老而愈烈金都御史杨继宗天植忠孝尤确守四知之家法大理寺卿夏时正学成恬澹乃超慕孤山之高踪刑部尚书李迁厯宦途四十年而家无长物礼部侍郎田一儒居词林二十载而人无间言大理寺卿陈恪之清修絶俗尚宝司卿孟秋之高洁迈羣中允郭希颜以忠諫杀身庶吉士邹智以直言贬职御史刘台之执持风纪中允张元忭之不愧科名以上诸臣合于例而应得谥者或循例议补格于例而不得谥者或破格议与似亦未可靳也夫明兴二百四十年以来海宇为一天下如此其广也而臣等所举甚狭俊又在列人才如此其多也而臣等所举甚寡岂其责备太过而故以褊浅狭隘之心靳名贤华袞之荣哉亦为知识有限不敢以揣摩疑似之见轻国家命名之典也大抵知人实难而定谥尤难之难举生平之行业总括于一二字之间以一时之议论流被于千百世之远可不慎与不然则俄而议与又俄而议夺若吴时来之已事虽快人心亦伤国体不若慎重自今日之为得也皇上量同天地明并日月伏乞勅下礼部以臣等闻见所已真者与采取所未备者仍照台臣之议开具书册分送九卿科道等官博加咨访必羣议尽協如权衡尺度之分明众口具调如醎淡甘苦之齐一然后议覆上请施行则功德既已湮没者倏然着迹于千古声名既已澌灭者煜然生色于九原岂独为昔日之诸臣荣乃实为今日之诸臣劝也于世道未必无关系矣等因奉圣旨谥法乃国家激劝大典以彰前贤以励后进以定万世之公论这所奏着礼部从公看议访实具奏以凭裁夺亦有谥之美恶未当其人查来俱改正行钦此钦遵通抄到部送司案呈到部看得朝廷立谥法以助刑赏之所不及其来久矣古人严于惩恶故名曰幽厉即孝子慈孙不能改焉其后则善恶并谥瑕瑜不掩如郑羲之谥文灵萧瑀之谥贞褊非善者谥而恶者不谥也夫善谥以善恶谥以恶故不敢借公典而徼私恩流弊至今贤者予谥不肖者不复予谥故人存幸得之心竞肆鑽求之计以致易名之典不足为砺世之资今二臣先后具奏或明指其人或暗指其人或主于予或主于夺无非集思布公之意第以一二字而槩一人之生平以一二人而评四海之人品闻见未广妍媸易淆有私其所好好而不知其恶者有私其所恶恶而不知其美者又有中无定见随人口吻以为短长者心各有主喙各争鸣使非尽付之公评何以能调乎众口合无依二臣所奏恭候命下容臣等将万厯元年至今凡诸臣已得谥者尽行查出开寫文册分送九卿詹翰科道诸臣令其虚心详议若应谥而未谥者除科臣罗栋所疏姓名开具分送外其余人众难于徧查者果诸臣有真知灼见不妨明白开列如某当谥即明书行事如何公正心术如何粹白某不当谥亦明书行事如何谬戾心术如何奸邪只许指实条具勿拘对偶勿用浮词勿以私好而过为褒獎勿以私恶而过为议评勿如矮人观场而随声附和候通送到部类集具奏某官应予即明注系某官所议至应夺者亦然统候圣明裁夺倘所议不当日后被指摘得实者将原议官一并议处庶予一人而众皆知荣夺一人而众皆知辱贤奸不淆于身后劝惩可裨于

将来矣再照议谥系本部职掌类奏系言官条陈伏奉明旨着礼部从公看议访实具奏以凭裁夺夫类奏则不须看议看议则不专类奏应类应看竟当何从予夺所关嫌怨易起更乞圣明酌定先下臣等遵奉施行奉圣旨依拟行令九卿等官虚心详议应谥的准与补谥若已谥的果于羣议不协方许改正追夺毋得过于苛求以伤朝廷锡予之典其议谥类奏系你部里职掌以后还照旧行

请补礼卿疏一

为礼卿久缺恳乞圣明亟赐简用以重邦礼事臣惟国家设置六卿分曹而治均不可缺而礼部所司则朝廷之典礼藩府之名封诸司之文移四裔之朝贡由至重至巨以暨至繁至琐无日无之一日缺人则一日废事非代庖者所能独胜也自本部尚书范谦于二十五年十月内病故至今几九月矣廷推上请未蒙点用然犹有署部事左侍郎刘楚先与臣二人办理尚且支持为难今楚先又奉钦依回籍闲住止臣一人在部臣识既庸愚才复短浅且年来多病气血耗伤又当日撰讲章恭进睿览即使勉强驱策不免支东遗西顾此失彼臣今不早言坐待部务废弛彼时陛下罪臣亦已晚矣况廷推诸臣皆在朝在野资深望重之贤伏乞皇上念礼曹非缺官之地宗伯非久缺之官钦点一员掌管部事庶倡率有人诸司振饬庶事不至停阁而典礼以次举行矣

请补礼卿疏二

为部务繁重摄理非宜再恳圣明简用正卿以重典礼事臣窃惟国之有礼犹墙之有干也部之有尚书犹衣之有领也不植其干则无所约束而礼不立不振其领则无所提挈而礼不行故自古帝王及我祖宗即至圣至神亦未有能废秩宗之官者诚重之也今本部缺尚书几一年矣当臣初署印时即具疏以请未蒙批发窃意皇上自有圣裁当无俟臣下之烦渎者乃两经会推伏候至今未得钦命臣实惶惧臣至愚极陋素望轻微又自去年三月患病至于六月血气耗伤形容憔悴夫望轻则上下有所未孚病久则精神有所不及日复一日渐恐废阁且查旧例礼部尚书未有兼讲读者非不欲兼以其有章奏之查覆文移之裁决事至繁巨势不能兼也夫尚书不能兼讲读之事臣待罪讲读当日撰讲章进呈御览而顾能兼摄尚书之事乎故署印可暂必不可久也况四裔使臣其以进贺入贡至者岁时相望远人不知圣意所在但见终年竟岁缺尚书不补将妄意堂堂天朝无一人堪为宗伯者传之四方岂不辱朝廷而羞天下之士夫耶伏乞天恩亟点尚书主管部事庶司官有倡率之人事务无废弛之弊朝廷收会通之效愚臣免瘵旷之愆

考察自陈疏

为自陈不职乞赐罢斥以重计典事万历二十七年复当大计羣吏臣备员卿贰例当自陈伏念臣草茅寒贱遭遇圣明待罪讲帷循资而至今职分量久已逾矣窃自惟学术空疎才识短浅不堪佐礼况堪代庖此人人所共知也疾病牵纏气血耗损形容憔悴手足重迟此人人所共见也臣之不职无能逃于众人之耳目况能逃于日月之照临哉

是臣旷职最甚幽黜最宜伏乞天恩特赐罢免以明臣愚瘵官之罪以示清朝计吏之公臣即归老林泉苟延残喘皆皇上恩德也奉圣旨余继登直讲署礼学行素优着照旧供职不准辞吏部知道

覆雷火疏

为巡视事祠祭清吏司案呈奉本部送内府抄出兵科等衙门左给事中等官桂有根等题臣等本日黎明同赴慈庆宫点闸工程接得燕山前卫指挥佾事于大朝手本禀称本月二十八日晚刻落雨太庙内雷击槐树火光直出本监员役用水洒灭等情到臣等亲到被击树下看验树上火燃形迹及地下灰木数块是的臣等奉命巡视皇城则禁垣以内事体均当举奏窃意今春多方乏雨麦秋早稿我皇上竭诚祈祷雨泽皇意肫肫为民百官万姓莫不感激诵德乃比日阴云聚散不时膏雨将沛未普昨晚电光闪烁雷声迅烈且击破太庙内大树一株就中火起则雷霆之所震动九庙之灵将必悚然不宁我皇上惊闻之际亦必有惕然軫念者矣第雷火起自玄冥臣等何敢以恍惚之说上烦圣听盖尝得之古籍有云阴阳和而后雨泽降天人孚而后阴阳调皇上临御以来敬天法祖何所不极兹者雨旸愆期雷霆迅发可徒委于气数之适然而不思以修省图回也乎臣意庆赏刑威总关天心而匹夫匹妇均属天鉴我皇上聪明睿知儆乘万几之暇穆然深思求所以整肃纲纪登庸众正休养元元则圣明上格天眷自是雨旸时若年穀顺成国家有道之长端在是矣伏惟圣衷裁察等因奉圣旨太庙雷火击树上天仁爱示警朕心深切惕然遣官告祭奉安及修省事宜便着择日具仪来奏礼部知道钦此钦遵抄出到部送司案呈到部伏念臣等典礼之臣奉职无状不能叶和神人致雷火示警祖庙震惊圣心兢惕罪在臣等复何敢逃除祭告奉安择日另行具题外其合行修省事宜相应照例题请恭候命下严行各衙门大小臣工痛加修省自本月十三日为始各青衣角带于本衙门办事停刑禁屠俱三日本部仍行文南京礼部令其传谕诸司各修职业共图消弭臣等窃惟修省有文有实而弭灾以实不以文彼青衣办事停刑禁屠修省之文也请以修省之实为皇上陈之易曰雷出地奋豫先王以作乐崇德殷荐之上帝以配祖考故天子主天地宗庙之祀此礼之至重者我皇上不亲郊庙积有岁时矣每常遣代谀以静摄九重深密静摄与否臣下不得而知祖考鉴临知之必真果常摄而常代也宜无不可者不然祖考之神宁无望于陛下乎合无今次恭请圣驾亲诣太庙祭告以慰安祖考之灵此修省之实也祖宗之心欲圣子神孙本支繁盛故定为十六岁成婚之期遵行至今未之敢越今皇长子睿龄十八已越期矣选婚一事于二十六年十二月既已告之祖考乃遣官候旨日久未报祖宗之神宁无望于陛下乎伏乞特遣中使选择淑女以备演习礼仪举行吉典此又修省之实也天下者祖宗百战所辛苦经营之天下也人民者祖宗二百余年所培养生息之人民也民安则天下安天下安则祖宗之心安近来奸民妄窥朝廷时献矿税皇上戒之以勿扰而此辈不能勿扰非乐于扰民也不扰民则无所得利且恐伏欺罔之诛耳今海内萧条民穷彻骨椎骨吸髓何能久堪乃抚按言之而

不听科道言之而不听大小诸臣言之而不听各疏言之而不听合疏言之而不听至引祖制以折人言祖宗时岂无矿课然有则开无则止不以累民亦岂无税课然税有处课有额不许琐及民间常用之物徃牒可稽也若信亡頼之小人违士大夫之公议使祖宗之人民恒扰而不宁祖宗之天下危殆而不安祖宗之神能无望于陛下乎今三春亢旱四海饥荒皇上焦劳祈祷而并霖未渥怒霆先震天与祖宗之意可知已伏乞明诏大臣条上恤民事宜奏请圣裁稍布宽大之恩用苏闾阎之困以明示我皇上遇灾思咎畏天畏祖宗之意安民安天下之心此又修省之实也夫霆怒气也火兵象也人怨于下天怒于上循理度势必有穷苦之民弄兵于潢池之中者民情既涣联属甚难祸乱已形收拾不易此时而犹泄泄然循修省之弥文欲以应变而回天岂可得哉奉圣旨是奏内事关朕躬的已知道了祭告奉安暂遣官恭代你每大小臣工各要恪修本等职业实心匡济时艰共图消弭以回天意毋得徒饰虚文

皇长子婚礼疏一

为大礼踰期未奉俞旨敬竭悃诚再申恳请事臣等因皇长子年已长成例当举行冠婚大礼于二十四年十一月内循职掌按故事具疏上请伏俯候旨未敢聒激至踰三月乃敢于二十五年二月内复申前请至今候旨又踰月矣夫使事在可已臣等虽至愚昧何敢仰渎圣听顾礼有不容不举而时有不可再迟者此皇上所明知也皇上神圣于国家典故无不览阅亦曾见祖宗时有皇长子年十六岁而不冠者乎不选婚者乎臣等职司典礼若复缄默不言倘皇上责臣等以何不敦请致令过时之罪臣等即百口亦无以自解矣因此不避烦琐斋沐申请伏乞皇上万几之暇少赐省览或特降玉音或将前疏批发令臣等遵奉择日举行上以慰九庙神灵之望下以顺四海臣民之心臣等不胜惓惓恳祈之至疏上不报

皇长子婚礼疏二

为仰遵明谕俯循职掌恳乞圣明早选淑女以备举行婚礼事臣等于本年五月十六日伏覩圣谕内阁览卿等所奏俱已悉知皇长子言及冠婚祖宗礼制天伦亲情朕岂不欲早得传行但念皇长子素稟清弱所以迟缓者正要培养丰厚诚爱重之意今春至夏朕屡召皇长子暨诸皇子问察习学之功见皇长子气质比与去岁渐加充实且书仿对句颇有进益朕甚嘉悦皇长子欲先行三加冠礼次及册立选婚朕思今未正名封而行加冠之礼冠服不便前已有旨况二宫不日落成待焕然一新行此大典庶嘉礼有所天下传闻以便臣民具瞻若其束髮之冠湏待选有婚仪择日冠巾与婚笄同行此亦旧制也谕卿等知之欵此臣等庄诵纶音罔不举手加额踊跃叹服仰见我皇上天性至爱睿虑周详庆宸居之落成在迩大礼之举行有日矣臣等伏思册立冠婚典最弘巨一切仪章犹可从容备办惟是选婚一节则非旦夕可就者盖民间女子年近十五多已婚配如都城遴选未必相当须博求于比直河南山东诸处差遣往返动经数月习■〈女间〉礼节又歴多时及今图之犹虑延缓倘不预选一旦两宫告成有误吉期皇上责典礼

之臣何不早请臣等即百口无以自解者用是罄竭悃诚斋沐上请伏乞圣慈允俞亟赐差官选择务得贤淑以光大典至于合用冠服仪仗等物亦乞勅各该衙门先期造办俟两宫既竣方新九重壮丽之观而三礼并行式慰四表臣民之望则主器得人国本永固和气毕萃于庭闱喜颂交驩于海宇其为宗社无疆之福莫大于此矣奉圣旨知道了

皇长子婚礼疏三

为选婚奉旨未荷允行仰恳圣慈蚤赐遣官以求淑德以光大礼事先该臣等于七月内题为仰遵明谕俯循职掌恳乞圣明蚤选淑女以备举行婚礼事奉圣旨知道了钦此臣等窃念思出慈父命由大君皇上既知礼之必不可复迟时之必不可复缓自将特降谕旨不俟臣下喋喋矣乃几及三月未蒙传示皇上万几虽烦必不遗忘至此无亦以典礼重大必待敦请再三然后行之以示慎重之意耶夫二宫落成行此大典圣谕宣布昭如日星近见工科都给事中韩学信题为大工繁巨工程不宜延缓恳乞立限责成以图节省以肃禁近事该工部覆奉圣旨是着内外总理提督等官上紧催儆毋得故为延缓冒费钱粮钦此窃料在工诸臣既奉严旨孰敢不夙夜从事仰副圣心是大工之成已可计日乃选婚之事尚未差官自今及春为时几何臣恐势将无及已臣继登自知诚不足以格主言不能以动天故两请简用尚书庶藉德望之臣可効赞襄之力而稽延日久会推无期若有所待而自诿有所诿而不言此人臣不忠之罪臣不敢也故敢罄竭愚悃仰祈天听臣等典礼之臣以行为职不但以言为职故不但望皇上知之实望皇上行之伏乞恩命蚤赐允行博求淑质用备嘉耦使轮奂聿新之日圣驾还御之时即首举册立冠婚诸大吉礼则宫闱之乐事并于一时而臣民之欢声腾于四海矣臣等曷胜激切屏营稽首顿首千祈万恳之至疏上不报

皇长子婚礼疏四

为钦奉圣谕事万历二十六年十一月二十七日臣等于文华门接出圣谕朕惟册立分封东宫及诸亲王此乃祖宗训章大典嫡庶长幼一定自有次序缘因皇长子禀质清弱气体未充况皇后年在妙冲又屡遭不讳大难故不得已迟缓少俟耳非有别意乱危家国昨者大行皇妣之服已满虽无三殿其二宫不日落成皇长子龄已过期体已充足尔该部便具选婚旧仪来看其册立并加冠礼少候二宫落成之日行朕又思三皇子五皇子六皇子七皇子俱已长成若再少待恐又费一番事不若亦于二宫完日一并加冠分封庶免烦扰内皇三子皇五子年岁稍长待分封之日可着出阁讲书亲近儒臣朝夕训诲以开蒙塞礼部知道钦此钦遵臣等随查大明会典大明集礼诸书但载皇太子纳采问名以后诸仪其选婚旧仪未经开载窃惟纳采等六礼俟选有淑女之后容臣等开注上请今先将选婚合行事宜酌议开列恭候圣裁计开一请圣谕一道晓谕官民人等有女子年十四至十六容貌端庄性资纯美者报名在官以俟选择一行钦天监选择遣官选婚吉期一先期遣官以皇长子选婚告奉先殿行翰林院撰告文光禄寺备祭品如仪一请钦遣司礼监官二员给与勅书二道以便行事一本部遵奉圣谕出榜张挂京

城内外官民之家先将淑女花名报官待选次咨都察院转行直隶八府并河南山东南京鳳阳淮安徐州等处地方官预将淑女报官以待遣官次第选择一各处选中淑女令其父母伴送到京所在有司给与应付脚力一各官开送到日本部照例题请钦命司礼监官赴诸王馆选择一诸王馆选中女子恭候命下备查各父母身家有无违碍具揭报部转送司礼监查照仍行钦天监择吉具题进内看选恭候钦定命下施行一行各该衙门先期备办婚礼合用物料奉旨是其选淑女着在里八府及南京河南山东刷选其鳳阳淮安徐州免其刷选

皇长子婚礼疏五

为钦奉圣谕事先该臣等开具皇长子选婚事宜上请奉圣旨是其选淑女着在里八府及南京河南山东刷选其鳳阳淮安徐州免其刷选钦此已经出榜晓谕及通行各该衙门钦遵外今据钦天监手本开称择到本年十二月十三日卯时遣官祭告奉先殿十六日午时遣官前去选择等因前来所有原奉钦依钦遣司礼监官二员伏乞钦定给与勅书二道分投前去各该地方选择緣系钦奉圣谕事理未敢擅便谨题请旨奉旨刷选淑女自着在京城内外及里八府差官刷选南京河南山东罢写勅与他

皇长子婚礼疏六

为钦奉圣谕事先该臣等于万曆二十六年十二月初九日题请钦遣司礼监官刷选淑女奉圣旨刷选淑女自着在京城内外及里八府差官刷选南京河南山东罢写勅与他钦此钦遵臣等即通行晓谕移咨都察院转行五城御史及里八府令将官民之家逐一用心体访以副皇上慎重大礼之意今据中兵马等司开报各淑女名氏造册呈送到部料八府淑女亦应节次报官伏乞钦命司礼监官二员先自京城次及里八府分投选择緣系钦奉圣谕事理臣等未敢擅便谨题请旨奉旨京城淑女少待里八府报到之日一并差官刷选

皇长子婚礼疏七

为钦奉圣谕事先该臣等于本年二月初八日题请钦遣司礼监官将五城报到淑女先行刷选次及里八府等因奉圣旨京城淑女少待里八府报到之日一并差官刷选钦此已经札行各府将报名在官淑女造册开报前来以凭题请差官前往选择续据真定府于本年三月初五日呈报淑女一十八名顺德府于本月初七日呈报淑女二十四名大名府于本月初九日呈报淑女三十七名顺天府于本月十四日呈报淑女一百四十七名保定府于本月二十一日呈报淑女一百七名永平府于本月二十二日呈报淑女十五名河间府于本月三十日呈报淑女二十八名广平府于四月初十日呈报淑女三十一名各文册俱已到部相应题请伏乞钦遣司礼监官领勅前来将五城及里八府报名淑女一并选择务得淑贤以光大礼緣系钦奉圣谕事理臣等未敢擅便谨题请旨不报

皇长子婚礼疏八

为选婚候旨日久未报恳乞圣明蚤赐遣官以昭大信以释羣疑事臣等因淑女报名在部两次题请遣官未奉明旨大小臣工不能无疑多向臣言欲各具疏催请者臣等伏念我皇上方以忧旱祈祷焦思动火若复章奏纷纷不无烦扰不若臣等循职掌虔诚申恳我皇上至圣至明知时之不可再迟礼之不可再缓必有毅然允行者矣况我祖宗家法以十五岁选婚十六岁成婚非无谓也盖以人年十六则情窦日开防闲日难是以即欲保爱其体尤欲曲体其情故立此一定之制俾圣子神孙万世遵行而不越耳皇长子睿龄今已十八越期亦二载矣皇上天性至爱与列圣同符可独深爱之而不深体之耶况人主举事不但仰法乎前尚当顾虑其后今诸皇子已渐长成以次当婚矣不知至期将从十六成婚之旧制乎抑十八尚尔延缓如今日乎欲如旧制情恐有难于或异欲如今日势恐有难于尽同不知皇上于清夜燕间之暇亦曾念及于此否也今士庶之家睹其子之成立即至贫窶者犹思称贷以遂其室家之情为嗣续之计父母之心不约而同岂以我皇上见皇长子之气体日充而不思蚤得佳妇以遂关雎之愿以衍麟趾之祥也况及今刷选得人犹须按旧制演习礼仪非数月不能闲熟比及闲熟两宫已告成矣此时若再稽迟岂不有悞明谕三礼并行之期臣等典礼之臣何所逃罪且在册淑女嫁既不敢选又无期不无喁喁仰望之心今连日风霾雨泽欲降而不降天心欲回而未回皆是屯膏之象伏望皇上断自宸衷特遣中使及时选择上以完国家吉庆之典下以释臣民猜疑之心臣等曷胜惓惓祈恳之至二十七年閏四月十七日上二十日传奉圣谕昨礼部奏京城并里八府报到淑女京城的着司礼监太监宋坤八府着司礼监监官邵从仁各供事该部知道

皇长子婚礼疏九

为遵明谕循职掌恳乞申饬督理诸臣早完大工以举大礼事万历二十六年十一月二十七日臣等于文华门接出圣谕朕惟册立分封东宫及诸亲王此乃祖宗训章大典嫡庶长幼一定自有次序缘因皇长子禀质清弱气体未充况皇后年在妙冲又屡遭不讳大难故不得已迟缓少俟耳非有别意乱危国家昨者大行皇妣之服已满虽无三殿其二宫不日落成皇长子龄已过期体已充足尔该部便具选婚旧仪来看其册立并加冠礼少候二宫落成之日行朕又思三皇子五皇子六皇子七皇子俱已长成若再少待恐又费一番事不若亦于二宫完日一并加冠分封庶免烦扰内皇三子皇五子年岁稍长待分封之日可着出阁讲书亲近儒臣朝夕训诲以开蒙塞礼部知道钦此臣等恭绎纶音于二宫落成而曰不日非谓以岁月期也于皇长子而曰龄已过期亦非谓可以岁月待也乃自奉谕之后又一年矣淑女之选已钦定矣臣等每随诸臣阅视工程见两宫虽有次第尚须修饰今天气渐寒若再耽延又待明春则二宫之落成岂但不日而皇长子之年龄益复过期何以慰我皇上明旨所云少待之心乎伏乞严谕在工诸臣上紧督理催造使工程早完一日则我皇上早还御一日早行册立之礼以培宗社之安早举婚媾之仪以衍本支之庆且诸皇子早得分封各具冠服随皇长子趋拜于前此宫闈极

欢极乐之盛事而普天臣民同欢同乐之至愿也疏入不报

辞尚书疏

为异常恩命自揣难胜恳乞圣慈俯容辞免以安愚分以重邦礼事本月初十日该吏部题为南北大僚多缺会推候旨日久恳乞圣明亟赐点用以全国体以图治安事奉圣旨陈藻升户部尚书余继登升礼部尚书赵焕改南京吏部尚书郝杰改南京兵部尚书参赞机务写勅与他叶向高升南京礼部右侍郎臧惟一升南京兵部右侍郎未点的另推来欵此臣继登不胜感激不胜惶惧伏念臣穷乡下士弱植浅衷学术原自空疎性资又复迂拙荷蒙皇上拔置讲帷十有一年矣空懷犬马之心毫无启沃之益旷官奚补窃禄足羞不意我皇上以两年不轻授人之宗伯而举以畀臣岂以臣尚堪驱策冀効铅刀一割之用乎臣近年以来气血因多病而日耗精神緣久病而日衰特以承乏署事未敢乞身勉强目前已虑不支冒进崇阶益复难任况同推诸臣以资则先于臣以望则重于臣而臣独以寡昧之才得之能自安乎且宗伯班高南省主典神人今天灾地震人变物妖踵报叠至人神怨恫礼乐废壞风俗薄恶教化陵夷此何等时而可以不肖之臣肩三礼之任哉臣闻德薄而位高者危力小而任重者仆与其既危既仆然后从陛下乞有罪之身孰若知止知足蚤自控辞于君父之前也伏乞皇上俯鉴愚衷收回成命俾臣仍以旧职勉効驰驱庶上不伤陛下知人之明下亦遂愚臣审己之素臣曷胜倦切仰祈之至奉圣旨卿器重学醇讲帷着绩简司邦礼出自朕衷宜遵成命供职不准辞吏部知道

淡然轩集卷一

●钦定四库全书

淡然轩集卷二

（明）余继登 撰

○疏

请朝贺疏

为时届中秋天增圣寿恭请圣驾临御以伸臣子嵩祝微忱事臣等窃惟人主之尊即天也天覆帔万物故万物无一日不愿望见乎天人主覆帔羣工故羣工无一日不愿望见人主从皇上深居以来无论常朝之规已成旷仪即万寿朝贺亦皆传免然曰静摄则瞻养为重不敢以礼文而轻劳起居也自我皇上御楼受俘大小臣工仰瞻圣体充和遥聆圣音清遠莫不欢忻讚颂以为静摄之效如此由此可望以时御门复视朝之旧典矣乃以时渐溽暑又复暂辍今圣寿之期正值中秋之候不暄不寒至清至爽天下诸司暨四裔朝贺使臣梯山航海而至者咸思快睹天颜拜舞祝颂于廷伏望皇上至期一御文华殿朝见羣臣俾得遂其瞻天祝圣之私则于圣躬未为甚劳而传之郡国以及蛮貊无不欢呼歌咏诵励精之志如日方升祝冈陵之寿与天同久矣

年终彙奏灾异疏

为彙奏灾异事祠祭清吏司案呈节奉本部送礼科抄出巡抚宁夏等处地方赞理

军务都察院右副都御史杨时宁题称宁夏卫于本年正月初五日己初二刻地震有声从西北方动起往东南方去讫又该巡抚山东等处地方都察院右佥都御史尹应元等题称登州府文登县于本年正月初八日未时地震自东南而起西北而落二十一日寅时地震有声房屋摇动自西北而起东南而落福山县莱阳县亦于正月初八日午未时分地震房屋摇动又该巡按福建监察御史徐兆魁题称漳州府于本年正月十六日药局内不知何故响震一声局内火药一万零八百斤尽从声中烧去局有一枯井已久不用上有二大石盖压亦飞三百余步一落韭菜巷陈举人书房长三尺半厚八寸一落吴儒士家长四尺厚一尺药局碎毁看药三人尸飞局外周围居民房屋五十六间尽倒压死男妇连前三人共二十九名口伤者更多又该巡抚辽东地方赞理军务兼管备倭都察院右佥都御史张思忠题称海州参将营中军潘一元督造鸟銃等器于本年二月十四日辰时在炉正行打造内鸟銃一杆鸣有大声至午时方止锦州大福堡于本年三月初九日戌时城门上东西棹杆顶上起火许久方落又该总督蓟辽保定等处军务兵部尚书兼都察院右副都御史邢玠等题称宁远兴水县堡镇远台于本年三月初九日夜一更时分本台棹杆三根顶上起火齐鸣初十日午时孤山台新石嘴台棹杆起火齐鸣又沙河堡狄家台椽木冲堡黄土台俱于初九日酉时分棹杆上起火闻有响声又该南京守备等衙门司礼监太监等官邢隆等题称金川门马草场于本年三月十五日卯时大雨雷电交作本场草堆上突然起火将经手马草一堆计五万尽行烧毁讫又该巡抚甘肃等处地方赞理军务都察院右都御史兼兵部左侍郎田乐题称西宁道古浪地方于本年五月初六日戌时分本城东门楼大钟连鸣三阵每阵约有十数余声又该巡抚山东等处地方督理营田提督军务都察院右佥都御史尹应元等题称兖州府委千户高镇远等监造军器有鐵匠李彦弘等炉内打造神鎗已成于本年五月十七日入炉煅光至本日未时分炉内闐然有声取出用锤打造其炉犹鸣二刻方止六月十一日未时省城地震自东南起往西北去讫又该提督雁门等关兼巡抚山西地方都察院右佥都御史魏允贞等题称平阳府临汾县于本年五月二十三日申时地震从西北来东南去微声河津县于五月二十五日未时地震自西北起东南去有声蒲州于六月十五日寅时地震浮山县于七月初一日未时地震有声如雷自东北来西南去并无摇动官民房屋又该整饬蓟州等处边备兼巡抚顺天等府地方兵部左侍郎兼都察院右副都御史李頤题称喜峯路于本年六月十七日午时喜董四十一号台上层东角雷震一声火光大作将神器房揭散火药火箭尽数喷出炸倒墙堞其木料俱未烧毁又该提督军务巡抚浙江等处地方都察院右佥都御史刘元霖题称绍兴府萧山县明月坊居民贾大经家于本年六月二十九日起更时分灶前并水阁板上透出鲜血约高尺许洒开血迹拾数处凝于板上地下者约血一二升之数又于中堂香火前地板上亦出血一搭楼板亦透血三四处洒开血点无数凝于楼板上约二三升之数一刻方止又该总理河道提督军务兼管漕运太子少保工部尚书兼都察院右副都御史杨一魁等题称碭山县于本

年七月二十八日因黄河水涨县治被淹士民俱避于堤上又该巡抚大同地方赞理军务都察院右副都御史房守士等题称大同镇神机库于本年九月初九日辰时忽从库内响声如雷将库顶五间击碎砖瓦乱飞墙壁一并翻裂倾倒黑气升天自辰至巳方散并无火光烟臭将磁缸一百个内盛火药九千一百五十一斤三两药线三万七千一百一十一根尽数飞化无存本库竹篓内盛贮硫黄一千八百七十四斤一十二两丝毫未动满城房屋动摇震塌邻近官民房屋一百二十六间震死宗室充熒一位遠近军民史景鹤等九名口震伤男妇王保等二十五名口库内地基陷裂又该整饬蓟州等处边备兼巡抚顺天等府地方兵部左侍郎兼都察院右副都御史李頤等题称喜峯路琵琶稍六十四号台忽于本年十月十六日午时天降大雪蓦从西北楼角旋风大作响声震地即将旗杆刮折楼内上层火光四出随有左右邻台齐救不及将本楼火药火箭烧毁鎗炮铅子等器见在军兵人口俱各无伤等因节奉圣旨礼部知道该部知道钦此钦遵陆续抄出到部送司案候在卷今照年终相应一并类奏案呈到部臣等切惟和洽神人宗伯之职今尚书经岁缺人臣等消弭无术灾异之来明示失职之咎敢不思咎省躬勉自策励复思皇上为天之子惟天于皇上其仁爱为最深亦惟皇上于天其感格为最速乃类奏之章无岁不上谕戒之旨无岁不下而今岁四方所报二气舛错之状视徃岁殆有甚焉者岂皇上所为格天之道不在于修省之虚文欤书曰天视自我民视天听自我民聽天之高遠也而视聽皆寄于民是民者弱而不可忽者也今近自畿辅遠及郡国百姓之苦于征调苦于催榷苦于织造苦于开采之类者各欲以情仰诉于皇上而不可得计惟有仰天而诉耳天不言故出此变异以告陛下也夫人情愁苦之极鬱为无聊无聊之民易动难安昔汉臣徐乐以民困而主不惜下怨而上不知为有国者之大戒今民之苦极矣又加以旱■〈叹，目代口〉之灾十室九空万一有揭竿斩木之夫乘之而起易动之势一呼百应诚可寒心故臣等每接奏报寝食不宁若尚欲修举故事泄泄然以空言而回天意岂不难哉伏望皇上敬天之怒畏天之威勅下大小臣工以爱民之实心为应天之实事事有便于民者明知之明与兴之有不便于民者明知之明与除之下勿过疑乎上有所顾忌而不言上勿过疑乎下有所寝阁而不报绎大学入悖出悖之旨勿倡施夺之风体有子民足君足之言深察相关之义当此履端之候共存寬恤之心俾四海九州各安田里而无叹息愁苦之声则人心悦豫天意感通有不反灾为祥者臣等请服欺罔之罪矣岁所上繁词套语皆皇上所厌闻者故臣等不敢复渎宸聰敬以天人相与之说进惟圣明留意焉奉圣旨今年灾异频仍朕览类奏仰承上天仁爱之意深用惊惕你每各衙门大小臣工都要痛加修省尽心修职以祈时和民安毋事虚文

止矿税疏

为播酋猖獗益甚蜀地残破可虞恳乞圣明慰民心寬民力以佐兵食以保方隅事臣等昨接邸报见四川巡按御史赵标报称六月二十一日杨应龙提兵八万攻陷綦江县城遊击等官尽皆杀死等因臣等不胜惊骇应龙叢尔小丑即数年肆虐未敢遠离巢

穴乃一旦亲率苗蛮深入内地至于攻屠邑城杀戮将士此必有川中小民为之向导为之内应者故敢仗羽翼而狂逞无忌耳维此小民皆陛下之赤子也不为朝廷用以讨逆贼而反为贼用此岂乐于从逆哉盖蜀之民若极矣采木则有砍伐之苦拽运之苦采矿则有供给之苦赔累之苦榷税则有搜括之苦攘夺之苦皇上以为不忍加派于民而姑取之于地也不知人固爱财地亦爱宝矿砂不足不得不求足于民故岁进之矿银什七皆小民之脂膏而差官之私橐不与焉此势之必至者也皇上以为不忍加派于民而姑取之商贾也不知商贾不通则财货不流物价沸腾则百姓困敝京师且然何况遐方此又势之必至者也愚民何知既已丧其乐生之心计无所之遂谓不若从贼或可延旦夕之命耳杨酋性本强悍而又益以无聊之民则其势日盛蜀民久已怨恨而况附彼方张之寇则其毒日深今陛下闻綦江之残破重庆之危急必不肯坐视而不救夫救急非可以虚声恐喝也势必须兵兵行必须饷今何处征兵乎欲调之贵州而贵州已败伤矣欲调之陝西而强敌积怨日不忘报秋高马肥防御为急顾此失彼恐非完计欲调之广西云南湖广诸省而兵政废弛之久所在无兵若驱乌合之兵以救燃眉之急未有能济者也欲俟东征之兵则刘綎所将半多杨姓恐皆逆族且綎不能禁其沿途之生事而乃欲仗之以成事即綎亦自知其不可其以病告非得已也又何处得饷乎欲发之官帑而买办之需万千无措年例之发什九未给欲取之本省而府库空虚闾里萧条公私无遗上下俱困欲取之邻省则处处开矿处处抽税民生处处憔悴民心处处悲愁思乱之民而复加以重征之扰是为杨酋驱民也故我皇上即日责枢臣以发兵日责计臣以转饷日假督抚之臣以便宜然无米而炊难望疗饥徒手而搏难以赴鬪此亦圣明之所洞见也夫兵非天降饷非神输皆民力之所为也为今之计莫若收拾我之人心解散贼之党与停止四川之矿税取回原遣之官民使开山凿石之輩尽为称干比戈之徒赔矿给税之余悉佐秣马厉兵之费宽我无知之众赦其胁从之诛则羣情慰悦士气欢腾既喜转祸又幸更生将人自为战家与为敌或可少须时日以俟大兵之集乎不然恐目前之祸不止綦江而已且古之御寇者尝不足而示之以有余故虞诩增灶道济量沙今敌人不惜金帛以约结中国之人其络绎道途潜伏都城者不知其几而我今日以匱乏而开矿明日以匱乏而抽税彼敌人闻之将谓中国果空乏如是岂不益生轻侮之心益肆凭陵之志哉且皇上方将捐数十百万之饷以救此方之倒悬而何爱于数万之矿税况皇上曾念贵州方用兵免其榷税今四川屠戮之惨危亡之状岂但贵州知圣慈必为之动念也臣等书生不知兵事主忧臣辱故敢献其愚虑如此伏冀俯赐留神地方幸甚臣民幸甚

覆杨止庵疏

为文体日壤士习渐移恳祈勅谕儒臣申明祖制尊圣谕辟邪说以维世道人心事仪制清吏司案呈奉本部送礼科抄出南京通政使司通政使杨时乔题臣闻世道泰人心正则尚行世道否人心邪则尚言是以孔子致知躬行先行后言为学以理言道别无新奇异说杨墨慕孔子为儒者师不知仁义之理以为我兼爱为言孟子以作心害政作

政害事等于洪水猛兽辟之然此其为害犹在外不关心身似于浅近辟之无难家语先子与孔子同时未必的乃其说指人身玄牝为窍致虚守静专气致柔为功其后流于烧炼采取飞升符术则老氏以为外道者也汉后佛氏兴其说主戒律轮回因果慈悲福田利益其后指人心虚灵为窍单传直指见性成佛作上乘不修善不为恶无障碍无人我相为功视前戒律诸法则释氏以为外道者也自二说兴人反向于内求养生者得之收摄心身其实无修身存心治家国天下之功与孔子异宋儒所谓以之养生愈疾则可以之为道则不可若以为道则所为似是而非弥近理而大乱真者也凡汉唐宋君臣惑于飞升烧炼采取轮回因果福益恒至于殒身败国此其为害亦粗浅能惑庸众自单传直指一入则贤智高明者先惑深信然犹幸其学老者名老氏学禅者名释氏不与儒者混为一途又推尊孔子在二氏上不敢以敌言又不敢借孔子语文其说至宋张九成参释宗果禅始有欲改头换面说向儒家其后则有参宗果徒得光单传直指忽悟此心之无所不通遂以一悟入圣不俟修为阶级最称易简直捷宋儒程颢程颐张载朱熹忧之始力辟之程颐表章六经四书朱熹注之传注者自孔子传周易彖辞象辞始朱子法之一随其原文章句之原字解释之明其旨趣非别立一意如今时驱圣言以就已意者也洪惟我太祖高皇帝首以传注颁庠序训士成祖文皇帝首集经书大全羽翼传注令士非此不言不行凡有一言一行及于老禅者即不录即有释老之宫之人则亦居于方外令其于山林焚修不与于名教以故二百数十余年议论正道德一风俗美纪纲肃士人发为文章及科试文字皆浑厚正大可谓盛矣正嘉间始有因养生悟二氏之说竟如所谓改头换面说向儒家者顾犹言孔子不敢直认为释老而亦未常以其说搀入于文章数年来始有直以释老之说为孔子之说又以禅老在孔子上直搀入于文章如科举文字者又以传注为支离而其言惟以讲为学会众聚徒即是不事修为阶级以知为道血气心知即是不事躬行循理一切皆归于禅老后学皆不以经书为本领内则心无所主外则其言不归于禅老则归于庄列子史文体遂坏矣所庆者今诸士皆从幼学时诵习传注先入渐摩者尚正犹之不差自今不习传注为始数十年将有内而心空外发于文行于政事者皆空文字亦空流弊有难言者历年礼臣题覆科道部寺诸臣屡疏正文体端士习蒙圣谕勅下改正仰见遵祖制崇圣训至意昨丁酉今戊戌乡会试诸臣试录前后序皆言此意欲尊孔子辟邪说犹未见士子翕然信从则新奇异说方兴喜新好奇乐异者众亦清本澄源者未讲也臣谓清本澄源者则以先进者后学传习之师世教者使民兴行之机兹无论他所即今南都所称先进世教有大可慨者则原任参政罗汝芳是也汝芳臣乡先達聪明才辨英发世称才士性度温和寬厚与物无忤世称长者早讲学师事颜钧其志行相似世称理学养生师事方士胡清虚谈烧炼采取飞升僧玄觉谈因果福益尤精于单传直指人心见性成佛上乘以慈悲不计较无障碍无我人相为圣学方士禅流尊为教师臣尝慕其风度且善养生愈疾及闻其守宁国日集诸生会文讲学民讼者至则令其趺跏公庭敛目观心学佛自慈悲为善一时士悦之僧道徒归之不吝

库藏里甲供饷馈赠故归者如市及库藏侵缺推官李惟观征里甲代偿抚按谢登之等参论凡政务法纪悉宽吏书通同为奸贻害蓐檐于时臣里亲监生戴珍为南陵县丞初官被访珍以金带篋银馈赠即受而服之珍固感之每为臣言臣心偕里人薄之及后守东昌参政云南置印公堂任吏书门役共享票牌混发百弊以生赍捧入都则科道交章论之及归请托上官先后名守沈子木林烺许孚远前令黄道年以其烦数厌之游南都诸臣尊礼尝以私干尚书传希摯每见士夫辄言三十三天凭指箕仙称吕纯阳自终南山日寄书至子从丹师毙于广自言其日左右欲见即出于时名贤如周世选为通政李三才为主事亲闻之晚与藩府征逐饮食致誉甘草游扬州处声乐之所其徒称为圣之和江省抚按访问地方人才于参议徐用检乃讲学心交则以混于声色报参议王问臣从游谈玄则以有民讼之报儒臣罗洪先者移书非之邓元锡痛哭规之见存也江省名贤录至不公者亦不录忽世有以理学臣刻录者既非其行即所谓学亦借孔子言仁孝言心性实则专于烧炼采取直指人心见性成佛证圣敢以禅学在孔子上究其归则杨墨为我兼爱老和光同尘释慈悲不着相又轻施好夺违道干誉正孔孟之所深辟者也特以于养生有可取尔今天下好言养生因其以养生即为圣学其说自由自便其功易简直捷不待于孔子修德改过徙义工夫一讲即在孔子上所以世或从之近南都有称之为师作祠祀之以祖述宪章名之作为文字刻之南都士大夫居此宦此有学行者甚众必不为所误特恐此说一起将来者不知而门户开标榜立将任情兴为悦乐执意见为操持以贿赂干请为通達党同伐异为辅仁以行谊礼节为土苴以清议公论为妄语宋儒所谓本以利心得来学者亦以利心向之利势相尚士习渐移文体益壞渐入清谈后难拯维凡有识者皆惧之而主此说者不顾也臣至卑下素矢天日不敢轻出一言议一人乃言及世所谓理学者大非忠厚顾为世道人心计窃附不直则道不见之谊言之顾臣言轻微不足信旧在南京兵部左侍郎许孚远大理寺少卿李三才寺丞张鸣冈皆贤可问也前此抚按科道诸臣参疏在省掖者可查也乃臣又有僭陈焉孔子之教本与老释异趣请今诸臣讲学惟遵孔子为科式文字惟遵传注若以养生为老则曰老释则曰释若唐宋名臣哲士裴休富弼刘器之张九成者谈禅而不混于儒亦可法者也如此乃孔子与释老各不相混一斯圣祖崇圣训辟邪说初制可复天下皆知尚躬行不尚空言世道人心以维也惟在圣明勅下礼部一申明之间尔若臣鄙妄无所逃罪又不敢自恕也等因奉圣旨礼部知道钦此钦遵抄出到部送司案呈到部看得南京通政使杨时乔所疏大意在维世道正人心而所指清本澄源者在辟邪说所指为邪说之魁者则原任参政罗汝芳也汝芳于万历五年讲学于都城之外为科道所劾我皇上褫其职令致仕去矣不意其徒目之为圣人尊之在孔子之上不俟奏请辄建祠于南京都会之地招集徒众哆口肆谈故时乔有感而为此疏今汝芳已死无可论者但疏中辟邪崇正之论有关世道臣等敢竟其说惟陛下裁择焉窃惟尧舜在上契为司徒所为教民者人伦而已三代迭兴庠序学校之教亦不越此孔子万世帝王之师所以告君者不过君臣父子

夫妇兄弟朋友之達道知仁勇之達德修身治人治天下国家之常经实理实行原无他竒周末杨墨之言始盈天下孟轲忧而辟之唐尚佛老韩愈忧而辟之宋有单传直指一悟入圣之论程朱诸儒忧而辟之我太祖法古帝王兴道致治既设太学以教于京师设乡学以教于天下又惧学者惑于异说无所适从颁布经书集注于学宫俾之讲习我成祖复择诸儒论说有裨圣经者纂为大全以羽翼之故成弘以前学者各守其师说而无诡异之谈仕者各守其官箴而无诡异之行心志既定邪伪难惑正德之末始有倡为异学者大槩用佛氏之微言以愚惑人耳目厌常喜新者多徃从之一入其门则共相游扬共相推挽欲名则得名欲利则得利以是智愚贤不肖靡然景从所至千百为羣高谈渺论曰吾学直捷不烦修为曰吾道广大无所障碍公然谓传注为支离谓经书为糟粕谓躬行实践为迂腐谓人伦物理为幻妄谓纪纲法度为桎梏谓礼义廉耻为虚伪惟一了此心则市金可攫处子可搂荡检踰闲皆为率性总谓无伤反道乱德败俗伤化此正古人所必辟者而新学小生转益信从崇尚之或杂入于讲义或明入于文章名曰新说谕之不从禁之不止遂使二祖所表章者几为伪学所废阁圣明之世岂宜有此大蠹且今天下兵日弱财日匱民日穷法纪日弛政事日废正頼真实任事之臣振饬而维持之而此辈习为讹謬壞人心术异日逢世不以空言塞责即以虚文罔上欲其修政立事任重致远胡可得哉臣等职司教化每切隐忧详时乔所疏服其有见敢此覆请恭候命下容臣等移文南京礼工二部查时乔所指私建祠宇在于何处即为拆毁勿误后人仍移文都察院转行直隶提学御史及各该巡按徧行各提学官地方中但有罢闲官员山人方士学佛学仙者听其于山林空寂之处各修其业有于通都大邑中聚徒至数十人者即行驱逐其不由抚按具题擅立书院祠宇者即行禁约并禁坊间所刻离经叛道新说诸书不许鬻卖士子行文务依二祖所颁示集注大全为主而参以蒙引存疑诸书各阐理道勿杂禅机提学校文务取不背经义纯正典雅者童儒仍用新说者不准入学生员仍用新说者径自黜革至于乡试会试行文知会一体遵行有仍前不遵者容臣部及该科指实参治庶异说渐熄圣学自明士心既定士习自端国家将来或可收得人之效矣

陝西山异疏

为边镇孤悬灾兆异常恳乞圣明预饬文武边臣修省戒备以保疆场以弭天变事祠祭清吏司案呈奉本部送准巡抚陝西等处地方赞理军务都察院右都御史兼兵部右侍郎贾待问咨称该巡按陝西监察御史吴楷会稿万曆二十七年八月三十日据临巩兵备道副使荆州俊呈据临洮府呈本月二十日据狄道县声称本月十八日城东五里地名毛家坡官路北山高二百余丈午时崩裂一半长一里其下冲成一沟山南旧有居民耕地忽涌出大小山五座约高二十余丈等情到府该知府王曰然即亲诣其地拘集土民问其緣由有本地居民吐称未崩之先每夜山下火光四出其内有声如雷稍稍又闻有鼓乐之音如此者十数夜至十八日遂有此变緣系异常灾异理合呈报緣由到道等因转呈到职职一见之不胜骇愕夫山主于静动且非宜况于崩乎又况高者陷入

于地而卑者涌出为山乎考之载籍沙鹿兆变应在于韩之役陵谷变迁诗悯西周之衰皆咎征也方今圣明在上宜祲祥叠见而顾有此咎征诚可惶惧且临洮何地也密迩边方番民杂处土瘠风寒五穀少植加之以灾沴频仍民不堪命正项钱粮既多逋负今且无市而征税无洞而包矿民情汹汹相率逃窜似此灾异非常其患不浅等因会稿到职案查先据该道呈报前来会题间今准前因该职会同巡按陝西监察御史吴楷议照变不虚生灾必有应洮镇北接松山西冲边徼近闻敌人窥伺为谋叵测徃虽仰仗天威扫空松山大获奇捷然和双被剉每懷报复经此大创蓄愤必深其王之来岂真送佛僧哉善后计当早图见灾尤宜省惧除职等痛自修省及严行各该将吏更加戒备外伏乞勅下兵部议请天语申饬大小边臣奉行惟谨或可以消灾变于无形而保疆场于孔固再乞圣明轸念边方灾民特罢矿税以苏子遗无驱而资敌人此尤职等之上愿也为此除具题外理合移咨查照施行等因到部送司案呈到部臣等不胜惊愕此变异之应恐不止陝西之一隅而消弭之道恐不止边备之一事也臣等稽之往牒惟唐垂拱二年新丰县露台乡忽涌山出高二十余丈此其咎应载在史册我皇上所明知也说者谓天气不和而寒暑隔人气不和而赘疣生地气不和而堆阜出方今星躔失度水旱降灾迅雷震击火光时发太白昼见甚且经天此天气不和之极矣凿山开矿裂地求砂坤元苞孕之气发泄而无余造化含蓄之精流铄而不韞以至地不能固脉而山崩金不能生水而川竭坤不能奠维而地震此地气不和之极矣闾阎穷困复加之以必不能止之诛求帑藏空虚复责之以必不能供之珍寶言利之小人蚁聚剥民之中使鸱张徒役枕藉于巉巖流离悲号于道路民命危如累卵世变纷如乱丝东师未起疮痍西蜀复遭锋镝都城之奸细潜伏畿辅之盗贼公行识者寒心忠言逆耳中外太隔上下不交此人气不和之极矣戾气凝而不散怨毒结而成形无怪乎赘疣堆阜之突然而出也夫山者高而在上地者卑而在下山忽崩而成沟地忽起而成山陵谷变迁高卑易位是阴乘阳邪干正下叛上之象推理度势必将有草野奸雄乘民之怨斩木揭竿起而与国家为难者夫天下幸无事耳一旦有事则藏怒蓄忿之民易动土崩瓦解之势立成是皆羣臣所屡言者陛下不垂清聽并羣臣者陛下之子也臣子之诚不能动君父故言愈数而听愈厌陛下者天之子也天以此非常之变感悟陛下尚可恬然不以为意乎汉臣董仲舒有言国家将有失道之败天乃先出灾害以譴告之不知自省又出怪异以警惧之尚不知变而伤败乃至此天心仁爱人君而欲止其乱也伏愿陛下体仁爱之心切伤败之惧急为社稷之图早建国家之本忍难割之欲察导谏之奸蠲无艺之征罢流毒之使扩转圜之度备台諫之员通臣民之情开壅阏之路然后勅下臣工共加修省俾各守正奉公输忠报主安民厚下积饷练兵寧绸缪于未事之先勿周章于多事之日庶乎豫悦人心转回天意若复泄泄然以天变为不足畏人言为不足惜恐天怒人离变故百出追悔已晚收拾甚难勿罪臣等今日不言也

皇长子大礼公疏

为阳律已回普天称庆仰恳圣慈明示大礼吉期以便遵行事臣等近年以来屡承谕旨有曰皇长子龄已过期体已充足者有曰择吉冠巾与婚笄同行者有曰其册立并加冠礼少候二宫落成之日行者有曰三皇子五皇子六皇子七皇子俱已长成一并加冠分封庶免烦扰者恭绎纶音仰度圣意必谓今岁夏秋之间二宫可以落成耳不意工程浩大尚有一二修饰未完者而大工又暂停矣今兹一阳来复岁序将新臣等稽之祖制揆之明谕有万万不容再缓者盖祖宗以来举行婚礼必于春时而欲行冠婚以正始必先册立以正名由今及春为时几何而纶命尚未焕发仪章尚未豫备诚恐临时迟误非所以仰体圣怀光昭令典也况淑女之选已经数月皇长子睿龄明春十九知我皇上天性至爱其于室家之愿必有惓惓更切者臣等受国厚恩义难缄默不敢不请又不敢连章累牍致烦天听故敢合辞以请伏愿明勅该部选择吉期明勅各该衙门制办册笄冠服仪仗等物俟元正之后首举册立之礼随举冠婚之礼并举诸皇子分封加冠之礼诸礼并举百福骈臻此宗庙社稷之大庆而中外臣民之大愿也

黑龙王庙复命疏

为钦奉圣谕事先该礼部以金山黑龙王庙并霖应祷加封庙号潭名立碑纪功题请遣官前往潭所相视碑基奉圣旨是着侍郎余继登吕鸣珂去钦此臣等遵旨于二十六日蚤陛辞西行一路阴云四合细雨淋漓比至祠下天日开霁近祠村民闻臣等至皆扶老携幼拥列道侧欢呼向臣等言今春不雨麦已将稿穀种未布百姓已无生理幸赖皇上慈悲为民虔祷至诚格神时雨应祈旬日以来麦尽吐穗穀尽布种有秋可望其感戴皇仁如天如地真有莫能名言者臣等窃喜我皇上一念为民真心遂能感神感民至于如此充此心也即尧舜熙皞盛治无难致矣进至庙中见真人张国祥率朝天宫道士正在庙中建谢雨斋醮臣等祇诣龙神起视祠宇见正殿三楹建在山顶庙貌整严规制工丽问之乃万历十三年我皇上临幸后所重修者臣等因同国祥上下相视庙前至庙门隙地一段深一丈五尺阔五丈三尺庙门外右为向下阶级门左隙地一段止深一丈二尺八寸不足立碑建亭又下一层有三碑亭并列其中一碑乃成化二十二年二月宪宗纯皇帝御制碑碑身高四尺二寸阔二尺一寸下面石座计四层共高四尺九寸左面一碑乃万历十四年三月皇上为圣母慈圣宣文明肃皇太后制祷雨龙潭灵应碑碑身高六尺五寸阔二尺六寸石座高二尺三寸阔三尺五寸右面一碑亦同时我皇上御制祷雨灵应碑碑身碑座俱与左一座同碑亭三座各方一丈五尺又下一层左为龙潭右为隙地一段深三丈阔二丈八尺此处立碑建亭正与皇上先所立碑亭在上一层者相对况龙王庙在上龙潭在旁足仰称我皇上纪述功德之意此去又下一层即为大门门外不遠即为潭水所汇处以南又皆僧舍佛殿去庙潭稍遠不堪作基臣等谨具述所看视据实开奏伏希皇上宸断如果前地相应立碑乞勅下工部募工礲石择吉建立奉圣旨工部知道

册立疏

为阳春在迩恭请蚤示册立冠婚之期以便举行事臣等待罪礼曹今典礼之大莫有过于册立冠婚者夫册立公典也公则宜公言之故臣等曩随九卿科道合疏以请未敢琐渎天听伏候纶音又踰月矣縁系臣部职掌安敢缄默以误大典敢披沥上请惟陛下垂聽焉夫礼者圣王縁人情而为之者也礼有所当行者圣人不能违夫时情有所当体者慈父尤当念其子今皇长子亲则皇上之元子也册立社稷之本也婚礼人道之始冠礼成人之始也三礼并举我皇上明谕于一年之前而臣等不能将顺于一年之后犹可以为人臣乎且臣等在部岁见宗室中有当封当婚者按例而请臣等按例而覆皇上无弗与者夫不吝推恩于宗室之子而顾不早推恩于皇长子臣等知其必不然也数年以来君父之成命未颁臣子之恳请屡格幸于去岁焕发德音欲于冠婚之时先行册立之礼圣见高明圣裁允当确如金石炳若日星九庙神灵万邦黎庶日望此举久矣乃典礼临近之言虽申于计部而选择吉期之旨未明示于春官臣等窃以天下有大本愿皇上早定之国家有大礼愿皇上早举之朝廷有大信愿皇上早践之勿更诿曰姑俟两宫之成也盖皇上所御即为紫宸发号施仁无所不可既不必候三殿又何必俟两宫若明春三礼既举待两宫落成之日皇上还御之时佳儿佳妇趋拜于前岂不尤为宫闈极乐之事哉臣等于二十六年题行各该衙门造办钱粮未知完备与否倘或耽延岂不有误吉礼伏望皇上特降明纶行臣等衙门早择吉期务及春和举此盛典宗社幸甚天下幸甚

火灾修省疏

为禁地火灾频发天心震怒未回恳乞圣明痛加修省以尽消弭之实事十一月二十七日尚宝司等衙门被灾一时焚毁无遗臣等不胜惊惧窃意我皇上敬畏事天必将遇灾而惧侧身修省以仰答仁爱乃伏候数日未见传示岂以为此常事不足以动圣心与夫人君事天如子事父母父母之怒大而发声小而征色人子皆当敬慎以承之安有两宫三殿之后余威犹震余怒未回复此谴告而恬不为意者臣等以为灾异可惧也灾异而不知惧则无可惧矣伏乞亟降明谕申飭大小臣工同加修省诸可以收拾人心挽回天意者望皇上俯赐施行则宗社生灵不胜幸甚臣等考之传记火之神曰鬻攸言火之不可鬻也火鬻则必燃犹民之情不可鬻也人情鬻则思乱皇上积年累岁不接见羣臣下之情欲達于上但凭章奏乃章奏又有时而不发上之情欲通于下惟凭批答而批答又有时而不下即皇上圣神孰敢有擅自稽留者然积久生玩积玩生奸万一有炆灶之夫酿成釜鬻之势则君臣之情得无有鬻而未畅者乎皇上之开矿也此不忍加派小民之心岂有貽累小民今无论供给之费奔走之劳令民失其农业即煎银不出至于卖沙卖沙不已至于包银日复一日俾富者贫贫者死彼其贫苦无聊之情欲仰诉于皇上而不可得也得无有鬻而未畅者乎有店则有货有货则有税是皇上欲稍取之于富商非欲取之于贫民也乃一官出而相随者至数百人此数百人者又各相随数十人奸民趋利如蝇聚腥引类呼朋布满宇内无一日而无抽税之人无一物而非可税之货即今

商贾不行百物腾贵贫民无所觅食束手待毙当今水旱灾伤之时何以堪此彼小民不堪情状欲仰诉于皇上而不可得也又无有鬱而未畅者乎巡抚者天子所使拊循一方者也巡按曰代巡所以代天子循行一方弹压奸邪肃清吏治者也议及矿税动被诘责此犹诘责而已至于百姓所以安于田里而无叹息愁苦之声惟恃有守令在乃一拂羣小即被诬奏皇上不察有无即累逮之囚系之诸臣力救而不听小民赴诉而不聽夫皇上之威雷霆也逮则逮系则系矣然逮不当其罪系不服其心彼其情得无有鬱而未畅者乎行取诸臣皆有功于地方皇上以为才而召之阙下者也乃以为可用而召之又不用于羈之诸臣疏请稽而不报彼既无民社之司又无官守之寄米珠薪桂进退维谷即人臣之义迟速惟命而諒其一念効忠之忱得无有鬱而未畅者乎夫匹妇含冤足动天意万人所鬱不火而燃所以通其鬱者是在我皇上而已伏望景然觉悟锐然改图于臣下章疏可行与否一一批发勿更留中以滋众人之疑于矿脉之细微者以渐封闭之于税货之琐屑者一切停免之于官民之不遵明旨生事害人如打死平民打死生员者按法而诛之假抚按以便宜之权勿轻损其体面待守令以付托之重勿轻至于折摧行取诸臣及时考选使各吐其胸中之奇以共济艰难之运则人心既鬯天意必回有不转祸为福者臣等并伏欺罔之罪矣

告病疏一

为久病陡发不能供职恳乞天恩怜准休致以延残喘事臣年来多病愈病愈衰愈衰愈病自本年六月感患痰嗽延医胗治服凉药不效服热药不效服发散之药亦不效然犹抱病视事未敢一日偷安注册其憔悴狼狈之状皆臣同官司属及满朝诸臣所共见者自十一月十七日遂支持不前始注册调理医官钱藩等皆谓自来痰嗽未有延至半年以后者此其病根已深非旦夕药饵所能取效见今痰涎壅盛昼夜不得眠卧以至脾虚不能化粥喉哑不能出声自卧病至今昏晕者二次矣虽视息仅存而肌肉全消伏枕窃念礼曹非养病之地尚书非病卧之官况今大礼在迩必得年力精壮者方可周旋臣病已深臣力已竭矣伏乞圣慈怜臣真病真情毫无假飾特准休致回籍安心医治俛得延一日之生皆我皇上天地大恩也奉圣旨卿偶疾准暂假调理痊可即出供职吏部知道

告病疏二

为痼病难痊治疗罔效仰恳天恩慈悲怜悯早放生还事先该臣以患病乞休奉圣旨卿偶疾准暂假调理痊可即出供职吏部知道钦此以臣病困之极皇上犹不肯遽弃赐以暂假望之供职臣伏枕诵读感激泣零誓当捐糜以答高厚旬日以来博访诸医加意调治緣臣自六月以来无日不服汤药药非对症脾久受伤今汤药到口旋即吐出夫使病而受药犹庶几望痊可也今不能受矣是臣病之愈无日臣命之尽有期仰惟我皇上至仁如天不忍使一民一物或失其所况臣旧侍讲读忍独令臣呻吟委顿坐毙于旅舍床蓐之间哉伏乞开天地之心怜准回籍调理俾臣少存视息不隕灭于道路臣即死

亦当效衔结于地下也臣不胜千万哀恳之至奉圣旨卿微恙易愈宜善加调理痊可即出供职不准

辞吏部知道辞印务疏

为天恩甚重臣病甚危恳乞圣慈准辞印务以便调理事该臣以患病再疏乞休奉圣旨卿微恙易愈宜善加调理痊可即出供职不准辞吏部知道钦此臣伏枕叩头感激流涕思皇上之恩如天如地而臣愚之病益热益深药饵不进粥食不消骨瘦如柴命危若露呻吟苦楚之中窃念臣卧病一日则废一日之职业患病日久旷废日多即今新春伊迩大礼举在目前臣病若斯安能勉强忧愁恐惧病势益增伏乞圣明垂怜准臣辞印务得专意调治倘得万一少痊当遵旨供职不敢负恩德也奉圣旨卿偶疾未痊宜加意调摄印务不必辞稍可即出供职吏部知道

告病疏四

为久病调治不痊势渐沉笃哀恳圣慈乞赐骸骨生还事臣于二十七年十二月内疏乞回籍养病与辞印调理俱未蒙我皇上俞允且谕臣加意调摄稍可即出臣即犬马亦知恋主乃臣安心静养又一月矣药饵满前入口即吐医人环视无计可施病日益沉粥日益减是臣典礼不效无力回天陛下幸宽臣之罚而天实降之罚也今已无痊可之望矣不得不忍死哀鸣于君父之前臣闻古者君之于臣也壮则用其力老则逸其身病则恤其私臣病甚矣惟陛下怜而惜之耳盖臣报主之心敢不自勉而趋事之力实已不支夫使臣力可驱驰当此多事之时曷敢言去今臣病势至此陛下即留臣亦不过呻吟床褥虚糜廩禄而已果何益哉伏乞天恩准臣回籍养病别简才贤代臣之任赞襄典礼勿因臣病废之身而久稽吉庆之典则臣感戴恩德生当效祝诵之忧歿当图衔结之报臣气结魂悸语词无伦不胜恐惧恳祈之至疏上不报

告病疏五

为患病日久职业日隳忧惧交并势渐危困恳乞天恩早放生还事该臣于本年正月二十四日以久病调理不痊具疏乞休未蒙我皇上批发臣窃自伤犬马之诚不能上达于天固其所也然天虽至高而凡人疾痛愁苦未有不吁天而诉者以万物皆覆于天舍天无所可诉耳使臣可以勉强支持何敢琐渎天聪第臣病根已痼难于遽痊瘦骨已枯难于复肉呻吟床褥旷废职业非人臣所宜是以既有性命之忧复有官守之虑中心烦灼痰火填壅饮食不思眩晕时发故敢复以真病真情仰诉于皇上之前查得先年原任本部尚书于慎行罗万化俱以患病乞归并蒙我皇上俞允慎行虽少延残喘万化竟殒身道途今臣病体实与二臣相同而势之狼狈尤为过之伏乞圣慈准照二臣前例将臣放归田里俾得遂首丘之愿臣即今生无以报陛下愿生生世世誓竭捐糜之报也臣不胜战栗陨越仰天祈恳之至奉圣旨卿疾不妨在任调理痊可即出供职不准辞吏部知道

辞俸疏

为遵例辞俸以便调理事昨臣以久病乞休奉圣旨卿疾不妨在任调理痊可即出供职不准辞吏部知道钦此臣伏枕捧读感激流涕盖恩为重命为轻敢惜狗马之躯不竭涓埃之报但臣查得大明隳典内一款凡内外文武官员患病三个月之上俸粮截日住支臣自万历二十七年十一月二十五日注籍扣至二十八年二月二十五日已满三月而臣身尚骨立不能离床伏乞勅下该部将臣俸粮照例住支使臣得少道虚糜之惧安心勉就医药万一尚望痊可之期也臣琐渎天威不胜惶恐战栗之至奉圣旨卿疾宜安心调理痊可供职俸不必辞该部知道

告病疏

为病体万分难支哀恳圣慈怜准致仕以保余息事臣于万历二十七年冬患病屡疏乞恩回籍调理俱未蒙我皇上俞允臣感激天恩义不忍愬于本年四月初三日扶病见朝初四日谢恩勉强进部理事然气血耗损痰嗽如初肌肤俱销精神太减行稍远必须掖持坐稍久即觉潦倒此举朝大小臣工所共见共怜者臣何能尽欺众人而敢上欺陛下也延至本年五月十四日忽感泄泻至今服药不效而臣二十七岁之子又复夭折情关骨肉宁不痛心疋羸病躯堪此摧剥因而神思恍惚语音失常委顿床帷时觉昏愦礼曹今当多事之日而臣病卧私室不能倡率司官以致诸务稽延间或舛错则臣之罪愈大臣之苦愈甚矣伏望皇上怜臣真病已久容臣致仕回籍别简名流以赞邦礼则臣生保残息死且不朽矣臣非病极势迫何敢轻渎天聪惟皇上俯赐俞允臣不胜恐惧战栗伏枕叩头千祈万恳之至奉圣旨览奏知卿感伤致疾宜宽心调理痊可即出供职不准辞吏部知道

淡然轩集卷二

●钦定四库全书

淡然轩集卷三

（明）余继登 撰

○序

送查绍亭叅藩山东序

不佞方束发时海宁绍亭查公已通籍为名司理窃意以彼其才自显庸也乃迟回者余二十年始以宪大夫备兵津门又二年始晋叅藩政督东方漕务夫才贤而偃蹇阻抑不得驯致高位则不能无少望往往传舍其官日冀得代去公沉抑久比再起家仅以次逶迤不越常调顾能屈能伸弥抑弥奋方其治津门也当南北舟楫往来之冲又水旱为灾能精心经画为一方图便计裁省驿传优恤穷檐奖进良吏禁戢靡宕妨生椎埋作奸之徒日鳃鳃然即理其家务无以踰此故两载间廉顽贞淫起敝维风俾下邑大夫行公之意得各举其职而无一切牵纆之患于公行依依不忍舍诣不佞请词窃按山东古齐地地连畿辅转山东粟由汶济而达京师其势甚便故国家之视齐犹外府然齐故大国即史所称车毂击人肩摩何其盛也当其时南支楚北支燕西支三晋军兴之费无

歲无之而犹号富强于天下今临菑琅琊犹故也山海鱼盐之利无改于昔也计歲所输县官费者不及昔之什一而户鲜盖藏民称凋敝安得所谓家殷人足如古昔者乎农民毕命耕作犹不能满歲额烦使者执簿书绳之比歲凶至捐内帑佐百姓之急而一二不逞尚嗷嗷以时拙为辞啸而过市掠富人粟此何以称外府也夫督赋者主在足赋赋税不充见谓溺职然以取盈之故而■〈修，虫代月〉■〈虫庸〉其民令颠顿沟壑若逋逃潢池此其忧不独无赋之患矣赋者不从天降鬲错所云生于地长于时而聚于民力者也蓄其力不违其时使人懷乐生之心则野无贫民国无逋赋故催科抚字两者势若相齧而机实相须也予独怪汉武帝日事征伐以虚海内于时诸臣不能轻徭薄税与天下休息顾希上意指笼天下盐鐵出告缙令以重困百姓卒之上未获其利而民不聊生至今令人于邑非之故治赋有道横征暴敛艺极无经者舛也織取倍计竭泽而渔者拙也促期烦会急如逋亡令贫民称贷商贾牟利计之左也驱游惰之民垦生穀之土出山泽之利适征会之宜如是而已昔人有言知取之为取而不知予之为取夫能知予之为取者可以富民可以富国可以操大柄而盈缩天下之元气是皆公之所素裕者方公守安庆也逆卒称乱大珣肆螫呼吸之间成败立见而公不难密谋显讼以熄其焰而折其威此其鎮定之才刚毅之气久有大过人者又何难从容持筹而调停均节于无事之时也

贈林大夫丹台三載考績序

今之校士者猥云吾取人以才耳不必尽以尺籒绳之予窃谓不然夫才者材也将以适用也不尺不籒何以适用不适于用何以言才此义不明而才之名为齐给为便利才之流为夸诞为荡悍晚近世士性能稍异往往溺其末流乐其名称薄经常而竞恢懦裂官常而恣胸臆曰吾非常之才安可绳以尺籒也夫信如才而可以齐给便利夸诞荡悍称也则古之宣慈惠和明允笃诚者何以称焉又何孔子之所叹以为难者而今滋多也故宣慈惠和明允笃诚才之质也齐给便利才之末也夸诞荡悍才之贼也予尝持是说以语同志独曾直卿氏以为然比直卿典试而所首举者为漳南林君林君之文固温醇尔雅守先民之尺籒者也予谓直卿能得才即直卿亦自诧林君才未几而林君以次出典深州直卿言州牧之职其率属也如守其亲民也如令筮仕而典畿内之州者尤难予谓直卿意难林君乎以林君之才何难恢懦其词以解于世俗之耳目薄而不为也夫不肯越尺籒而为文又安肯越尺籒而为政以尺以籒于治奚难焉深人杜君荣者予同年友也为予言君始莅事察謠俗问所疾苦搜积蠹省供亿罢法令之妨民者行之踰月吏抱牍受成无敢短长民不畏吏会歲饥君周行阡陌间发仓粟以賑之缓征弛役释禁轻刑一意与民休息行之踰年百姓安于田里无愁叹之声无流离转徙之志争相戒捐其小忿不以烦君爰书讼庭无事君乃进文学弟子与陈说经术剖析疑义俾不悖所闻归之大道又以月旦属诸父老为分别礼义科指出教民简易册颁布之俾归各训诲其

子弟以风易闻里行之三年民化其训乐其业讼狱衰止桴鼓不鸣青衿之子彬彬然质有其文举其乡者倍于往昔于是部使者疏君治状上之功曹主爵者奏君最按令甲得封其尊人如其官玺书既下会其尊人来省视君为具法服陈制词舂鞞为寿融融乐也予间以杜君语语直卿因共叹君之治大都在平法令振困乏清狂狱兴教化斯皆有司之尺篋无他奇也而君次第推行之期当于民心而止卒令事集民安名尊而亲显彼其并时之吏以才名自蓄者其精神之驰骛岂不欲陵君而出其上而一败僂辱岂独其性殊哉彼亦窥见世之一二扬诩为吏者用小治辨或好气敢往辄得意去故不胜苟且之心而缘铤伎俩以庶几于一快遂至此极也而耳食者犹然扼腕而惜其才以是为才才岂人崇耶国家亦奚頼若是才也者而用之也昔成弘之间禁罔疏阔居官者寃然行其志而毋务徇其名日计不足歲计有余民以太和海内殷富今能吏日多奸轨日起法网日密民生日穷至勤主上操三尺以申令之而宣慈惠和明允笃诚之士犹不得与齐给便利夸诞荡悍者较轩轻则才之名误之也治行如林君而以高等褒显其所风者大哉会杜君来征言以贺用次前语归之

送宪大夫彭秀南擢浙江大叅序

秀南彭公备兵津门几三载以治行最擢浙江叅政行有日矣郡邑诸大夫服习公训而惜其别也走使来征赠言予窃意津门在京师宇下为咽喉要地今倭夷猖獗阑入朝鲜破其国走其名王朝鲜不能支将乘矫汎而犯津门有急则京师恒扰公治津门久诸所擘画如恤民饥清狱讼诘奸宄饬武备一切出令布宪皆惠民实政故数歲以来旱蝗为灾民半菽不给而沟壑鲜瘠萑苻无警戎器既除卒伍不哗当此之时使公持筹于上诸大夫禀仰画诺循令而从事则人乐为兵兵乐为力沧瀛之间隐然藩篱之固奈之何移公而浙也浙与津门地有轻重势有缓急主爵者谓何令公释重而趋轻舍急而就缓乎已而自念主上天覆宇内何知南北即以轻重缓急言人情每难所重易所轻备所急畧所缓难则图备则无患易则弗虑畧则弗图弗虑弗图乃足虞矣公虽去津门而整齐振刷之具固在天子又偶然念重地之急也特置文武才干之臣广召募精训练以坐鎮之即有倭患而仓卒足恃浙故尝创于倭虜刘特甚虽其人勇悍能奋脰不顾然健者应募而北壮者老幼者生未尝见寇欲其闻战声顿足犯白刃断死于前难矣何者未尝训之无以作其气也公为监司能布恩信稽尺籍伍符得士卒心兹借公而南欲公即所已试者而効之南乎况我之所重敌或难之我之所轻敌或伺之我之所急敌或避之我之所缓敌或乘之公在津门而备其所急则重地重公在浙而备其所缓则轻者亦重轻者重而重者益重矣顾予之私忧过计而欲倚重于公者不在倭而在盗盖倭如豺虎然豺虎窥垣有垣可扼艘■〈舟且〉既备漂忽难前独今海内虚耗家鲜盖藏歲一不登枵腹待食者十室而九待食而无以得食则待毙不能坐而待毙则转而盗矣苍赤尽为蝨贼鉏■〈金忧〉悉化为戈鋌一夫■〈氏鸟〉张千人蚁聚万一有冀幸之夫乘间而用之此奸雄之资而乱之始也计浙与三辅何异正昔人所谓无乱形有乱萌是不

测之忧也予计诚过敢以质之于公愿公以叅伯之重南而销越之民萌旋复以中丞之节北而销三辅之民萌则南北长无事矣公有意乎予将计日俟之

饶阳令闵君考绩荣封叙

闵君汶令饶阳之二年通前令上高时计满三载当报政主爵者上君治行中赏率乃按令甲下玺书褒予之赠其两尊人暨其配如其官玺书下饶阳饶人士介同年王君来征赠言不佞窃惟士方未遇无不自意安有屈首受书而不能取显庸累岁月之劳以荣其亲者乎然今之资适逢世者何限至有纒青紫积歳时而父母不沾一命者则为吏之难也夫吏治难而令尤难令难而畿辅之令尤难畿辅密迩辇毂部使者数倍于郡国贤者易以腾声不贤者易以蒙诟无论不贤者请言贤者共事而吾处其名则不贤者忌共贤而吾处其上则贤者亦忌贤者忌则阳与而阴败之不贤者忌则浮慕而计壤之上意不吾向则因其不吾向而明言以毁其功上意吾向则因其吾向而微言以毁其名此犹其相与者请言其上者上有所欲急而吾偶缓之则指为废格上有所欲缓而吾偶急之则指为废令彼之所缓此或急之彼之所急此或缓之而吾以应此者应彼应彼者应此则一事而彼此之喜怒异民便于急上或缓之民便于缓上或急之而吾从上以拂民或从民以拂上则一事而上下之毁誉异微文小例动皆缠牵而欲三载之间孚下获上送往事居一无所失以完吾名难矣故曰畿辅之令尤难吾不知闵君治上高状乃王君则道君之治饶者矣君治饶竞綵刚柔一无所偏主而一主于至诚先民而后身先实而后名在饶再阅歳妻孥不以入官舍蔬食浣服萧然如旅人民有陷文罔者每曲意矜之不得已而后致之法即置之法而情常溢于法之外甚至狴狱累系亦歳给米糲生活之独胥役为奸利即穷治无少纵细至笔札之微亦日有程稽勿令得剥削吾民邑有三功臣田租额故轻于民赋猾民利其轻而擅其利数世矣比均田令行民赋稍寛矣复欲以其租窜入民田中百计经营至抱牒走阙下君力持不可为分别所以异卒令不得逞其奸邑故下湿水则田为沮洳水去则沮洳者为腴田田无定额豪者往往私其腴田而匿其赋以赋累穷畸民君廉得其状为大搜伏田凡得田若干顷邑常以水故卒移养济院于学宫之左而移演武场于邑数里外废而不讲者更数令君喟然曰兹胡以称右文而无忘武备哉乃捐月俸为择近善地易置之而又以其暇延礼逢掖士为剖析疑义校诸骑射于农隙以示威众销萌之意王君述君治状不具悉其大都若此夫邑故僻壤无行李之往来故君无境外之交以借资而钓誉其精神之注厝独孜孜于便民之事又巧宦之视以为不屑为者故民受其利而人不忌其名身居其实而上不疑其伪以日月得上功有司宠施其亲世之所难而公得之易兹可不谓荣幸哉汉世政尚综核吏治蒸蒸盛矣乃其所尊宠者不在赵京兆之流而在颍川渤海彼颍川渤海固敦本尚实崇礼厚俗无他竒也主上哀悯元元抑矫虔吏而痛绳其墨者其意指犹汉法也君既以举职当上意博荣施则无难于畿辅之令当无复有难君者华绂恩纶固未可量矣王君曰有是哉请书之为异日左券

邑侯马瑞河交獎叙

邑自清宇林侯之后缺无令者亦越三时握篆视事付之邻邑之貳盖数年之煦育不胜三时之腴削矣晚得马侯以赵博士擢令吾邑赵与吾邑俱畿内地侯固稔知邑之地瘠民贫赋重而役繁也而又当亢旱之后腴削之余百姓嗷嗷朝不及夕甫下车即问民疾苦竭心思求便计乃条为十八议上之郡守监司暨诸直指使者予之者十九不予者十一不佞闻而叹之此十八议者谓不便于民耶则民便之矣夫令也令一邑苟利于民专之可也矧论定而议议而复请请而复行顾犹然有不予也者此何以说也如必惠自上流令不得议则令可嘿嘿无事已乎又安所称令也卒之不予者不胜予者未半载而獎予之檄交至于是诸搢绅士洎父老子弟来征赠言不佞窃惟智者不逆上以任誉志士不尝试以徇名侯计以纾民之困而不计上之予否是令之职也非以博名高也不慕名高者不乐谄言不佞安敢以谀词进闻之圣人举事必藉于权而成于断权者事之干也断者事之机也权一者能制计定者难惑请言令令者如大将建旗鼓以令众而左右进退惟其指使而不敢越之谓也故令行则治否则废虽然亦难言矣令以一人坐堂上而利口机械之徒伺吾好恶而图以奇中欲兴利而言利者进欲除害而言害者进欲利害一切报罢而为无庸有事之说者进人情变态莫可究诘故能操利害之柄则令行科条烦芜书策稠杂而能不沉于辩不溺于辞则令行勿朝鼓瑟而夕改竽勿议事击鹯而当事首鼠则令行勿与知之者谋之与不知者败之则令行其言是其人非则用其言拙其人其言公其心私则察其心并拙其言则令行有擅行不顾击断无讳牟利于身而结怨于百姓者必无赦则令行夫丛藉人以神神去而十日枯矣虎藉狐以威威行而百兽畏矣是故其威内扶者不怒而民畏当机立断者不劳而成功故曰致治有常利民为本从政有经令行为上而上之知不知无与焉此劳人之特操而贤者之上愿也不佞又闻之竭言不让忠也听言不二明也忠无隱情明不拒物侯傥不以予言为过计繇此以议功名于世其所至非不佞所能量矣

邑三尹邢晋川交獎叙

今仕宦自长令而下若丞贰簿幕上之人即见以为冗琐而无当于用归功獎能十不一二而严谴苛责十常八九彼见上之凌折之也其廉者捋过不瞻碌碌奉其职其卑者幸旦夕无事为囊橐计耳此无论上之人薄视之即其人自视亦以吾冗琐耳恶能胜其任而愉快也嗟夫人之才品岂緣官秩而顾以崇卑为贤愚哉博平邢君既受牒为吾邑簿予识君邸舍君曰某有先人之敝庐足蔽风雨不腆薄业力耕其中足以自老必不敢以官为利以自点也予谓君曰夫才品在人有限不可强致而所可自靖者心此心不点则是非毁誉荣辱得失举无以挠其中执此以往即盘错重巨无足为难者况举一职效一官也君既视事而精勤举职廉平不苛能不媿其言盖簿緣河设职主河不主民事然署不在邑而在邑之别鎮鎮去邑远舟楫之所往来商民杂处于是有舍其职业不理而理閭閻之争讼者鎮有榷税输之郡者歲数百金皆簿为之征输缓急之间不能无所

染指故往往不为河决溺其职去则为豪奸挟其短长以败噫兹岂官之罪哉君至一切谢绝民事云自有主者独日夜行河率其徒役■〈牛骨〉■〈牛骨〉然视隙岸而缮治之每当秋夏之交至舍河上督畚鍤力与河敌河即暴发不至没禾稼为运道梗君又悉输税之苦曰古之税者廛而不征今有有其货而有其税者亦有无其货而有其税者甚至有无其货并无其人而有其税者吾力不能为商人请命忍渔之哉故年来市廛空虚而逃徙不至尽者君之惠也君所为精勤廉平类如此久之而部使者獎予之檄交至獎多媿词大都如前所称说者邑诸君子欲从予受词往贺予惟古人有言赏异等罚不肖舍是无以治天下然今赏罚之权提衡于部使者部使者在昔微行闾阎察吏治得失耳目皆以自任而后渐寄之监司郡守监司郡守倦于伺察而渐寄之私访之奸耳目自任则部使者为政寄之监司郡守则监司郡守为政寄之奸民则奸民为政部使者为政是是非非百无一失焉监司郡守为政十不失五奸民为政则是非淆乱不可知矣盖奸民而操上之权将睥睨长令阴诃而阳持之其视丞贰簿幕蔑如矣彼小民见其易危一不当即羣起而哓之廉近堂卑法日以削夫既树之秩庶务之所倚办而其势至使上之人轻之下之人又轻之以至不敢自重则安可不藉一赏以示吾之获上使人不敢狎视而思易踰也诸君子所为贺君之意其在斯乎若君之心则固不以官为利者而又何利其名也

赠学士陆敬承先生视留篆序

高皇帝定鼎金陵仿古弘文丽正遗意置翰林院延天下名儒若青田龙泉诸君子日侍左右相与辟草昧之路诸君子逢时遇主亦各输所志黼翼鸿猷树丰功而垂休问故虽宸极北御百数十年留院之长无所事事至比于隱丈人而天下视之如鼎彝鍾吕崇重而莫敢望焉岂非地以人重所从来久远哉予往歲偕宫谕陆君试士留都循故事燕于瀛洲之署升堂四顾恍然若有数君子者揖让于前而庶几遇之也君之言曰今天下诸司间旷幽寂无如留院最者吾得长是署吾意将甚适焉予漫应之曰君自适其适宜无不可第吾侪无乐君有此适也君曰何故予曰君朗识渊衷博闻雄辩与之高谈竝议挖古酌今纚纚洋洋靡不各究其指能令听者虚往而实还故吾侪视君为友为师为著为蔡安可令君一日图南而自适也盖又一歲君晋秩学士馆篆而南长留院事竟如往歲所言夫闲旷幽寂之司吾侪不欲处君乃世固不能舍君岂君意自适其适而主爵者莫能违耶抑君以前上书不报近有所陈说又未甚尊行其言遂欲屏迹而南自处于若进若退间耶君往矣勿以守空篆第坐私闕吟卧自如亦勿徒寻六朝遗迹蹶空觞咏以悠悠为愉快夫天下变故每若于卒来天下事功亦尝苦于卒办藏智蓄谋计当有待则当机应变用始有余方青田龙泉诸君子伏在田间世疑于不用然其心未尝不愿宰天下垂功名于竹帛也主上神圣何难步武高帝今适深居静摄未遑览君之疏耳如一旦清燕之暇取君先后所陈说者紬绎之而概于中有诏召君处以启沃赞襄之地君出所未用者以济艰定倾与青田龙泉诸君子比绩而争烈当自留院起矣君戊子所举江

右士某君某辛卯所举南畿士某君某来索赠言予不■〈女间〉于词姑述先与君语者稍次第而归之

贺刘谏议母胡太孺人贞节序

予贰礼曹主在褒扬海内妇人女子之节烈者以惇伦励世厚俗维风今国家道化所翔洽最久亡论郡国歳所上贞女节妇事后先相望即都门之内荐绅之家数月来有幽闺姱节者二焉一为冯太史母刘孺人一为刘谏议母胡孺人刘孺人别有序胡孺人者幼■〈女间〉女训十五而归赠君又三歳而举谏议君二十九而赠君死孺人于时不难以一死相殉而顾谏议君哉然也乃大痛曰死易耳谁其抚此者以续刘氏不絶之脉而报夫子于地下也于是谢妍华攻苦食贫日夕督谏议君于学比谏议君成进士读中秘书至今官台使者具孺人事疏闻于朝下之部部覆如其言得俞旨表厥宅里孺人益太息曰未亡人始望不及此其及此天也吾徼天之幸以报夫子足矣而忍自以为名哉闻者益贤孺人适李君苍泉将鸠里人为贺征言于予予惟妇节难在士夫家尤难田妇野女澹泊素甘心无二虑士夫闺合其于纷华靡丽狎目熏心一旦寂守空闺母子形影相吊悠悠歳月歴数十年而介然漠然无盛衰之感此非心坚金石者未可易言故曰难也孺人伯姒居尊官显荣赫奕独孺人单门弱息歴百艰以有今日人见其老绥禄养晚载荣名无弗为之艶羨者而詎知其至难至苦匪易致者哉夫天人之际交相为报天之报孺人惟谏议君孺人之藉以报国家亦惟谏议君孺人身兼教育之事彼其自幼至今家庭之间所为谆谆训诲者舍贞之一字当无他说矣夫从一靡忒不以生死易念妇之贞也纯一不二不以利害易操臣之贞也谏议君幸得身为近臣出入禁闥于天下事无所不可言且值多所可言时上至袞职下至民生利弊知无不言言无不尽勿抗厉以为高亦勿避忌以为能使吾不负言之名而天下受言之利此善行孺人之志而报主上之职分也审如是则所为光显孺人者又有出于贞节之外者矣

送冯用韞学士奉诏归省序

万厯癸巳秋冯君用韞晋宫詹学士视翰篆寢寢向用矣会其尊人仰芹先生以河南大叅入贺万寿还移疾乞致仕用韞闻之即具疏请归省视天子嘉其意予五月休沐加赐金币俾乘传以归予造用韞问曰君胡为乎归也曰家大人归矣吾安能勿归曰君家大人胡为乎归也曰病矣安能勿归予曰君家大人能自二千里外望阙而趋陛辞而往顷得一再奉觞见其饮食笑语不异往昔此不病明甚无亦谓君家累代仕宦而今又父为叅伯子为翰长德业声誉皆世所指目艶羨故鉴满盈之戒而为是止足之计乎予窃谓不然夫满盈若器器有可以斗升量者以斗升注之则满盈满盈则足足则止不止则溢江海之大利尽万物万物得之以滋以生故众流归之百川灌之不见其止亦不见其满盈人之器量亦犹是矣先生江海也昵而就之城府不设肺肝毕见徐而察之则瀕洞渊泓盖淳之无穷而资之无尽也夫天下无事即中材亦可以自効天下有事非卓犖之才难与应卒今饥馑荐臻羽檄交驰不可谓无事矣君家大人既身负其奇自宜毕智

竭力排难解纷以树尺寸报累叶之宠荣奈之何当五十有五之年抱十不一试之畧猥自托于止足之说遽求便安以自遂其私也夫世惟需才而才之用世各有所重才非大用者以退为世重知进而不知退则败名才可大用者以进为世重知退而不知进则无功君家大人果才尽而退乎抑有才而不尽用姑以退为名乎不挟其才而进以就功乃挟其才而退以就名岂以其所重在此所轻在彼也且君家大人进则君即欲归无可指以为名而国家于君父子两得其实用退则君之归适得借以为名而君家父子独享其荣名彼荣名之不可满盈也犹之禄位也欲以避禄位乃以就荣名与其退而就荣名有其名而无其功孰与进而就禄位有其名兼有其功也用韞曰子得其一耳穿杨之射百发百中犹贵善息吾弱冠登朝一蹴而至金紫即家大人不归吾犹惧弓拔矢钩也而况家大人病也予曰夫所谓弓拔矢钩者以末势言也君虽显庸乎而守闲曹弄柔翰虚言无用今渐柄用矣是方其调弓均矢时也而即虞其拔且钩乎且天之不易生者才也人之不易得者时也非功无所施才非时无以建功才如利刃不试则钝时如隙驹既往不复君行矣勿谓少壮为可常勿谓岁月为可愒奉诏而往奉诏而还俟君他日功成名遂然后奉身而退称君家大人百歲之觞为词林盛事当自有纪述之者无俟予言矣

奉赠梦翁李老先生荣晋南少司马序

梦池李公抚畿南久廷臣以公名贤屡推轂公屡报罢戊戌冬始晋少司马佐留枢事行有日矣真定徐令藁城钱令以予为公宇下士具公治畧来征赠言盖予反复公事而叹公之难服主上之明也蓟保晋三鎮为京师屏蔽自欵市至今独蓟鎮犹苦未宁耳晋不被兵保鎮益无患无患遂无备无备遂无兵公意敌可猝来而兵不可猝整备不可猝办故始至鎮即简将练卒补乘饬具节约浮冗修理亭障经营于久废之余而振起其积弱之势此公之难也赵魏六郡民鲜盖藏曠旱艰食不难转徙为盗纵之则乱急之则愈乱公为谕诸长吏察疾苦省劳役发仓廩勤賑恤不惊不扰徐为措画而萑苻无警田里皆安此又公之难也中使衔命开采戒令勿扰公禁之不得抗章攻之不得引身避之又不得力难坐制其横势难坐视其横一操一纵其道委蛇不令喜不令怒卒使我无其迹而民受其惠此又公之难也边臣守御三韩间兵连不解羽书狎至方调兵朝鲜又调兵津门兵固公所素练也然练之则足分之则不足自海上戒严敌且生心公以其足者分以备倭而以其不足者留以自备日讨军实日办军资以义激其行者而以恩抚其居者令行者无怨居者无虞此又公之难也贫民半菽不具而军兴转输百需取给焉百姓嗷嗷所在思乱公为躬歷郡邑拊循而慰安之减驲从损供亿未至咸不闻有公至者既至而德意所流温于挟纊乃始欢然幸公之至也故即力尽不胜役财尽不胜求而叹息愁苦之民卒无呼噪而起者此公之力也又公之难也方公疏上忤上意众谓且得罪去而上知公信公推心不貳委任不疑晋公副都御史再晋今官浮言不能摇谗言不能中盖海氛未靖畿辅重地不可一日无公故留公必海寇既平始晋公秩以酬公勩故曰主上之明也或谓知公不宜令之南置之散地予谓不然天下有变自外起即至猖獗有所

限隔而防御之易自内起即至微眇易于啸聚而削平之难防变于未变则从容暇豫而其图易防变于既变则仓皇舛错而其势难今倭虽去属国虽安而奸人以利事惑上听者纷纷四出此范文子所谓内忧不可谓无事也留都根本地长江上下悉为盗区数年来所为防倭计者其畧可睹已识者有隱忧焉公既身当其难而拮据于多事之日必能图难于易而计划于未事之先所为用公者意在斯乎则益服主上之明矣

赠刘斗墟叙

世之仕宦于时者孰不思自显庸也以显其亲此人情之必不能无者而豪杰之士或不然盖人不可徇则身有所不暇计法不可挠则荣亲有所不暇及若吾邑侯斗墟刘公其人也公守合州值有采木之役公主在集事而虞在扰民卒之民不扰而事集会忌者谗之子直指公见直指白所以不扰状无少逊谢直指恚甚何物守乃强项如是即以扰闻上怒逮公赴诏狱公毅然就逮缙骑卒冀赂稍折辱之公曰守惟无赂故逮逮则逮耳守故无赂也会州民数千百人随公攀号争醵金钱为道里费公悉却不受逮者为感动善视之比狱具不如直指言守得释仅醵三秩既而起黄安令再令吾邑一以爱利为治行比邑人有亡其马者谓吾邑人盗买也且指与盗通然邑人实不买马令某遣人逮邑人且急索贿邑人罄所有赂之不能满其欲计无复之遂雉经死令某怒未已复逮系其子并欲逮子家属公曰买马无左验而株连不已是吾民可鱼肉也父母之谓何执弗予令某愈怒为污蔑语中公或曰某豪有力能毁誉人公将满独不能忍一人以徼宠于先人公曰吾知有吾民耳终不以一命隳吾守卒不予两台监司即不惑于蜚语然无肯荐公者久之邻州获买马者并获盗事始白比邑所遣人论如律台使者益知公冤服公执争露章荐公遂得以考最追封其先大夫如其官余子曰当公之抗直指也虑不顾身矣而身卒以显其挠豪令也计亦不顾官矣而显卒逮亲事有因败而成功因毁而成誉者类如此总之公无心也公之心诚于为民而已善乎曾舜征之赠公也曰吾辈居恒抵掌谓天下事任真心为之靡有弗效即未必效也而真心终不可化夫惟真心也故不可化如可化是是非毁誉之心非真心矣予闻公在合州州民失火比屋延烧公直趋火所祝曰民无知勿灾民罪在守守当其灾民惧焚守争挽守去守固不去曰欲掇守当掇火民争呼掇火天为反风火乃熄歲甲午郡邑旱甚穀价翔涌人心皇皇公布衣蔬食行祈于郊会有言某所龙神是洪武初遡河而来者神最灵有祷辄应公为文礼请之将至郊公郊迎时从祷者数百人见有蛇盘伏道侧共提击之公以为神止勿击令左右盛水于盎祝之曰果神也入此水吾得礼奉之祝毕蛇蜿蜒入水中四顾鼻者无惊怖状既至郊坛置神座前有顷复蜿蜒绕神身据神两肩下视人移时乃去遂大雨远近沾足及境而止境以外旱如故嗟夫公之真诚至于格神天感风雨而乃不能动人犹令倏伏倏起也岂人胜天哉卒之天报善人非天卒胜也真心效也公今晋工曹入留都窃意天下之至蠹财至不可诘者无如工役之事彼闾阎脂膏出之民者十入之官者五出之官者十入之工者三夫出之民而入之官者此公所习知其出之官而入之工者不知公何以为计

而节缩之也公之行也予不能与邑之父老子弟攀卧留公特表公居官之槩以当輿人之诵不敢饰一词焉

送马瑞河邑侯擢守沾益叙

邑侯瑞河马公治吾邑几两考矣察三辅治行无如公最诸往来境上问谣俗者无弗知公贤两台诸使者无论獎予之檄即露章而荐无虚歲乃并时之吏率用积次得迁去而公独郁郁守一官不得调有疑之者间以问予予曰不调固宜夫仕尚巧而公拙是安得调问者请其状予曰巧吏尚严酷为能务以刑罚绳下而公依于岂弟日煦育之至笞捶不妄加人巧吏急于簿书期会缓于民所疾苦公所孜孜在为民兴利除害往来阡陌开通沟渎务多积贮以备恶歲广賑贷之本巧吏腴民为储峙以饰供亿或为境外之馈广交要誉而公独捐俸余新学宫置学田治涂建桥建久长之利巧吏多阳浮慕其属而阴把其罪冀移过以自解公一以至诚驭下吏务在成就安全有不当上意者调护之尤谨巧吏视上官意向有可中其欲者不难瘠下以肥之公屡迁当事忍于甘谄让而不忍厚算苛求以剥取锱铢之利巧吏或伪增戶口收取异等之效公再审编辄核寢耗减孱弱不惮损其戶数巧吏先文法后教化公按里为社社立三老羣乡之子弟训诲之表贞闡幽示民为善之路公之政不能具述要皆世所厌薄不为者大较拙矣问者曰如子言诚拙然巧者劳拙者逸劳者罔功逸者有成拙者竟胜久之公以积劳晋沾益守于是问者诧予谓拙胜言效予曰否以公之贤上之不得被征召为台諫次之不得入郎署纔得一州又万里外蛮夷之所错处是不免为巧吏所擲揄安与较胜哉问者曰不如子言沾益荒服非如畿辅在宇下也北望长安君门绵邈吏治得失非如三辅郡县朝布令而夕上闻也部使者两歲始得代文罔疏阔非如畿内直指持斧四出耳目繁视听广也而又货财之所出囊橐难厌部落易凌人有忿心往往起而捍吏则见谓夷人之性易动难安辄用斩杀束缚从事夫夷非易动也使民有不安其处者易动之势也主爵者计以为用武健吏不如用良吏公久以循良著称故推择为牧使安之耳矧沾益视建昌若东西家然在公实为便地何言拙宦不如巧且吾闻之巧者恃人拙者恃天人不胜天则巧不胜拙故拙者胜嗟夫仕宦之路如转毂然巧而拙乎拙而巧乎予不敢知然予偶览輿图见沾益之南有地曰交河者以盘江蜡溪合而名之也宇宙之为交河者无几乃公起家交河而今之典州又得交河则公于吾邑视若朱氏之桐乡恋恋不能忘而造物者又或若象公意择此地以畀公令顾名思旧不忘以交河之治治沾益也是天之置公抑又巧矣公之行也邑搢绅来征赠言予因论次与问者之说归之以质诸公而为公别

赠大中丞见泉魏老先生六载考绩序

魏公见泉抚晋以来满再考矣此近日抚臣所未有也朝臣以公名德廷推公可大廷尉可佐院务可南北卿貳者数数然也不报公念其尊人封中丞公年踰大耄疏乞归养苦情苦词即令伯之表不切于此亦数数然也不报或遂谓公素直道屡抗章言事上心恚公故以此羈公予曰非也公自西台蹶而复起屡迁而至今官此上知公也知而用

之用而羈之必不其然盖所为中格而不报自有羈公者非上意也然所为公计即未可知所以为晋人计则善矣晋故邊镇敌人昔所蹂躪自贡市以来寝戈息燧惟歛是恃士马日以凋残垣墉日以圯废转输日朘以供苞苴将吏日偷以待迁擢彼此相仿后先相袭若谓固然恬不知怪自公之镇而墨吏望风解印绶去不则改心易虑从公于道又不然则已露章弹之矣公以身律监司监司以律长令长令奉意指各治其郡邑各询疾苦各务节啬务本尚实兴废起敝闾阎有恬愉之乐田野无愁苦之声此公之有造于晋也烽烟虽不作而公防边愈至日讨将吏而训练之简其不任者易置之士马羸弱者易之器械朽敝者治之城堡墩墙之当创理者缮修之于是镇始有将将始有兵兵始有骑乘器具要地始有城边地始有墩堡垣墙无事则为桑土之图有事足为守御之备此又公之有造于晋也世之伪儒谬为诋说以钓奇炫世相习相煽自南而北俾新学小生日渐惶惑而沉溺公为创立三祠祠其乡之先哲羣诸士于中亲为论说勒之石示以惇伦尚实之是崇虚鹜诡之非谆谆谕其子弟令子弟归谕其父兄务使邪说以息学术以正教化以兴风俗以醇潜移默导而无其迹此又公之有造于晋也公刚肠疾恶见司饷之臣有以出纳干公议者不难按踪迹纪奏之怨有所独归而无所避势有所反噬而无所辞使此为覆辙后为殷鉴膏脂不屑越于贪人金钱得沾被于邊戍此又公之有造于晋也全晋课税名为公费实皆私蓄公意费一也用之公则公用之私则私故不以称使客而以饬武备不以资问遗而以充军实实树镇戍藩篱之固阴省帑藏征发之需此又公之有造于晋也予尝泛观天下之人才士十一清士五十之一直士百一然才者未必清清者未必直即清矣而或至絕物直矣而或至陵人是又譬之峻崖瀑泉无所用之矣公清操直节世所共信而为国为民一念发于真诚故所至举职不徒以亢厉为高即拜疏移疾闭阁待命而一切庶务不废经营自入晋至今无二虑此又人所不可及者公在晋久人多为公怏怏而晋人恋公如孺子之慕慈母惟恐失之故曰所以为晋人则善也予不善谀人公亦非受人谀者因晋藩臬诸君子之请而摭公抚晋之槩如此主上方励精理道与众更新诸沉抑外寮者渐以登进今司功氏列公治状必且褒劳加秩以驿书召公无疑予以为公在外能扼公之身而不能扼公之泽不下于民在内则谏有所不必听言有所不必行至于力所不能及不知公有何转移调剂之方予且观公之后矣

贈斗墟刘侯考最迁秩叙

古今谈吏治者莫盛于汉然观班史所载循吏如黄次公朱仲卿辈寥寥纔数人耳又皆以爱利教化为务噢咻如慈母然无它奇也其当时之吏如奉职尽节直法行治以摧折击断为名使豪强重足而不敢犯岂不称其任而愉快哉乃不得与前数人者比绩而并列以是知吏道所尚在彼不在此也今俗日趋于偷吏日竞于法即使民有所赴而然有所畏而不得不然亦非太平之原父母之谊矣吾邑刘侯聪敏识事发奸摘伏批郤导窾常有余才而不尽用其才一主于仁爱化导以安全愚民方下车时或有言邑吏舞文能上下其手以出入人罪者猾役与吏为奸没征税以自腴而责偿于善良者奸民飞

诡善隐田租者游民不能自食或鼠窃以幸旦夕之命者轻薄恶少无市籍商贩作务而鲜衣偷食不难聚党剽劫者左道之徒百千为羣以诳惑愚俗者侯曰以吾力去此如从灶上扫除耳第民者从教而不从令善治民者使民见德而不见刑于是每诣学宫与博士坐堂上羣诸弟子考德问业亲自飭厉间问民所疾苦及吏治得失有尽言相正者不为忤辄谢不及后当自改不以颜色拒人恐不复闻吾过也诸生有明经饬行者欣然獎借不啻己出以劝诱其余度邑之村聚为社社凡十八推长年有行者为之长取高皇帝谕俗六言而演其义俾聚其社之人训诲之即穷乡僻处亦时躬莅其社自为讲说劝以为善防奸节用殖财之意又乡置里正父老得平决讼词有讼者俾各就其父老平之其处议两造称平即听其决始而饰词相加既而内悔愿自省改者率置不问以是善者爱信之顽者瞿然而愿化向惟见利今知有理义矣向惟馱法今知耻矣裕于财者稍稍能出粟周其乡之贫乏矣羣盗大者就擒余渐戢而改虑矣言左道以恐喜人意者俗且疑信叅之矣嗟夫筐篋刀笔吏之所为兢兢也即弟子师且倚席不谈而侯独以礼义为簿书以教化为期会使民兴于行谊者日以众多是不当与次公仲卿诸君子埒哉诸君子遇汉盛时皆增秩赠金或入为公卿侯今亦以考最赠其先大夫如其秩而又新擢南水部郎寢以贵显不可谓不遇矣邑两学博暨诸弟子来征赠言侯之种种善政难具述兹特表其化民成俗者如此

赠郡丞杜充庵考绩叙

郡丞主郡国盗贼凡萑苻出没及椎剽为奸利者皆得督郡邑贼曹掾以时察之盖佐其守以禁奸销萌绥靖一方也而郡国大者则又置阃帅一人率其属以威不轨而备非常于以佐守丞之所不及吾瀛固畿辅大郡也楚充庵杜公丞吾郡三年矣行将具治状奏绩阙下而阃帅时君率诸武弁求所为华其行者以不佞郡人使为之词不佞窃叹古之弭盗易今之弭盗难汉神爵间渤海盗起命龚少卿治之移檄罢捕盗吏诸持鉏钩者皆为良民勿得问比解散则又假以仓廩以慰安牧养之用是盗贼悉平讼狱衰止异日秉政者用惨礲为务立捕盗条例盗起不发觉发觉而捕弗满品者以溺职论坐课累守上及监司当其时即欲罢捕盗吏不虞纵寇乎持文法者不以废格诏书议其后乎幸勿束以文法矣主钱穀者能听出仓粟假之乎即令许发廩矣又安所得粟乎故曰难也公四令大邑所至以廉平取効不愉快于武健以耀听睹盖成进士十余年始以积劳擢郡丞公亦无褊心不少望益修其廉平之政为条教颁行民间谕以劝善防奸之意下吏仰画诺奉约束无敢假徼游名恒扰百姓者百姓亦凛凛服从其教化即有不逞朝发而吏夕禽之数年来歲屡稔小民安于饥寒无作奸犯科以扞文罔者齐鲁晋魏中山之间民伤于旱所在蠡起无敢潜入郡地为寇掠者则以公之恩威所为誓服者素也于戲傥假公以便宜之权渤海之治奚难哉渤海政成汉主亲召见晋水衡都尉职亲近以示褒显主上数下恩泽诏书捐内帑分赈穷瘠又虑饥民去为盗贼患苦百姓惓惓严饬有司无使滋蔓其垂意吏治民艰何啻汉宣公以考最诣阙下傥按考功书见公精勤举职当

必有显擢以酬前功而责后效者矣昔王生教龚少卿即上问治状不可有所陈说宜止曰主上之德当其时吏民富实安于田里故所为对宜止此今郡中无所积蓄歲稍稔民犹食半菽一遇水旱不徙则死夫饥寒切于身慈父不能有其子此公所明知者万一陛见时得赐清问当极陈疾苦情状无徒如王生所置对矣

贺崔友泉荣荐叙

予同年易宪副君选尝言其邑侯崔公之贤也曰公通才朗识无隱弗晰当几能断然亦惟是利于民者始为之于民弗利不苟变常便于事者始为之于事弗便不轻易法威以束胥吏而不以槩齐民惠以寬悍嫠而不及奸宄色笑以礼诸生而不以假左右予尝一再会公于长安旅舍聆公言论丰采而知君选之言不妄也自公宰邑以来而悉公治行腾在荐剡者无歲无之久之以积劳晋秩郡倅分署予邑之別鎮未两月而巡按侍御陈公即露章荐之盖犹以肃宁日治效也鎮诸君子将称觴贺公而命予修词予谓公先主治民今主治河治民者尝苦其不足治河者尝苦其有余民不足则穷而有害河有余则溢而有害故治民者当抚摩之尝勿使至于穷而治河者当堤防之尝勿使至于溢至于顺其性则一也公既治民而效矣又奚难于治河哉或者言函牛之鼎不以醢鸡郡倅视令诚尊然令之职兼倅之职专兼则得游于职之内专则不得越于职之外以公之才而使束于行河一事他不得与焉是縛孟賁之手而观其鬪羈骐驎之足而观其走也无以自表见矣予闻徐沛淮泗间河水横流城邑为圯黎民其鱼督河者皇皇然无以为计倪晋公崇秩使主其事得以自见其奇当必有良策异谋成宣房之功以纪绩太常者又不止清一带之流为部使者所荐扬而已敬以是复诸君子之请且以俟之异日

淡然轩集卷三

●钦定四库全书

淡然轩集卷四

（明）余继登 撰

○序

寿陆年伯七袞叙

方小子登之读中秘书也海内兄弟执经而敬业者三十有一人又十四年为万厯庚寅而诸兄弟列在交戟内者纔六人耳此六人中两尊人称具庆者又纔三人三人者宫谕陆敬承冯用韞少司成杨贞复也贞复家东粤道里远故杨伯氏不能时来独陆冯两伯氏能来陆伯氏之来也以就养而冯伯氏之来以官予小子窃自意陆伯氏业儒不就而就敬承之封此其为人必恣心自恣放浪形骸之外冯伯氏少年登第数歲而至臬大夫为大夫者已十余年此必以体貌相加遗盱然峻也既而随诸兄弟修子弟礼谒见两伯氏则陆伯氏貌甚庄诸兄弟亦以庄见严问则诺对则起三爵而寿三揖而退俨然以宾礼遇之暨见冯伯氏则驩然若旧藹然若父子家人举白而浮信心而语盖畧分忘形而又能令诸兄弟畧分忘形也小子则退而私叹谓两伯氏者皆寿征焉何者以予私

视今之人未有不志于功名者也然有得有不得得之则操操则栗栗栗栗之形每睢睢而矜观听不得则侘傺而不平不平之发恢恹恹怪警乎其不可制此岂其性然哉遇以时异性随遇迁适人之适而不自适其适故态不同摠之滑和非长生安体乐意之道也陆伯氏以静为其性自为儒为封君贵人少而壮壮而老有得有不得而无适非静无适非静故无少年侘傺之情无警乎不可制之态无封君贵人之气势冯伯氏以动为其性升而沉沉而复升意无不得而亦无适非动无适非动故内忘得失外忘町畦两伯氏之性不同皆自适其适者也自适其适则性得性得则天全天全则和豫通而不失乎兑日夜无郗而与物为春故曰皆寿征也今年陆伯氏满七袞敬承将具舟楫迎养长安舍中诸门下士亦将介敬承为伯氏寿敬承所举武闾士若干人来乞言予小子何知长者姑述夙昔所为寿征者复之若冯伯氏长子小子五歲耳尚未及称寿则请俟九十为卿士时予小子然后为抑之诗以祝之

贺御史大夫带川刘公八十寿叙

庄皇帝临御之四年东西边期大举深入京师戒严有诏特开制府于通州起前左都御史兼兵部左侍郎带川刘公于家统诸路入援兵马公至明号令申约束壁垒旌旗精彩皆变故侦我有备逡巡退去诸援兵解散而公亦乞身归矣公归二十又二年为今万厯辛卯公春秋满八十乡之荐绅先生将饰羔鴈以贺而授简小子登使修酌者之词予小子发始燥时公已宣力疆场议功名于世今予小子发且种种亦窃妄意公老矣比戊子之夏予小子以使事过公里候公起居见公齿发形神无异壮夫又里中人言公每以歲时驰逐角射击狐兔以为娱因叹卓犖非常之才造物所独厚其精神意气与常人殊盖常人之精神意气常不足而非常之人常有余夫以不足而觊心于有余故用之而常见其不足惟有余故随其所用皆用其所余而不见其不足公生平跋歷十七治戎国家歲苦边则借公防边苦倭则借公剿倭其节旄所指东自辽海渔阳西北则上谷云中又西则榆林南则浙西七闽暨粤之东西大小百战亲执桴鼓立矢石间或躬擐甲胄身先士卒或以寡击众以弱卒抗方张之敌或弯弓横戈以殿大军众或股栗失色而公精神益壮意气益闲数遭口语或以功为过而公一不介意亦未始一语自明一闻诏命即怡然就道迹公所历无论南北山川风气燥湿异宜即驰骛于锋镝出没于波涛摇撼于是非毁誉成败利钝之中在常人不胜其憧扰忧劳之态而公处之夷然不因以滑和不因以亏其生则公之精神意气犹橐钥也岂非造物所独厚以为社稷之卫者哉肃皇帝最知公屡承特简两起公于衰经之中而授以兵柄故嘉靖之季公之勋庸最多自西敌欵闕边圉无事世无用于公而公亦无求于世今敌人败盟虔刘内地天子■〈卜间〉然西顾勤拊髀之思广罗才杰期以宣助国威安固疆圉予意求尝试之臣不若求已试之臣用新进之臣不若用老臣秦之伐楚不收功于信而收功于翦汉困先零廷臣无踰充国者公功在边疆名在天下今之敌国固耳闻而心摄之矣主上僥还公旧任令得用其所有余者一战成功班师奏凯着续王朝立威塞外此正公鹰扬时也何忧边患哉

诗人颂君子无期之寿而先之以邦家之基夫常人之精神意气不足故不得不敛之以自寿其身非常之人不直自有余每用其所余以建功立业令邦家奠安而身名俱泰此大臣之寿而诗人所谓无期者也予小子不■〈女间〉于词敬以是为公寿而复诸荐绅先生之请

寿甘母吴太孺人序

甘侍御维藩予礼闈所举士也侍御始为令满三载得封其母吴为太孺人又五载入为侍御史又三载而太孺人寿满六袞于时侍御方北按两闕南按楚王事鞅掌不及以时归为太孺人寿独心怵怵懷循陔陟岵之思焉今歲辛卯太孺人六十加一侍御方被命按吴得以其便抵里中称膝下之觴而侍御君同门友官都下者咸欲介侍御为寿从予受词予惟人子于母苟可自効其力无爱也然实无可効者何者子之愿亲不过曰福曰寿天下之寿考福祿视其亲之德耳则是福寿者亲之所自有也人子何所庸其力为人之子而于亲之福与寿一无所庸其力于是不得不兢兢然立身行道蕲以荣名奉其亲故人子之荣亲以名其寿亲亦以名昔隼京兆每行县有所平反则母喜不则怒不食京兆欲就母名故为政不残今去汉久远而隼母之贤人能道之此荣其亲以名者也鲁侯宜大夫庶士于是诗人歌燕喜而颂寿母今去鲁逾益久远而鲁寿母之名不衰此寿其亲以名者也夫曼倩为京兆即多所平反不能出京兆外鲁侯虽主一国然地不越数郡其所宜大夫士亦且有限而二母藉之声称当时荣施后世今侍御所按部自燕赵暨于吴楚大郡数十其身所平反何限藩臬之吏郡邑之长稟仰画诺其所宜者何限诸所宜所平反戴恩德而颂太孺人者又何限太孺人身不出闺阁而名闻九重德载制词举手加额祝千万年寿者半海内是侍御所得効于太孺人者以视古二母不知其何如然予私意曼倩贤者独史不载其母之年鲁母诚寿而诗所称率多媿词无事实侍御儁才今且駉駉向用其遵用慈训以膏泽苍生者日以益盛太孺人视履强健日见其子广锡类之孝锡庭闈之光者无已时即垂之史册播之歌颂恐又二母所不得兼者矣侍御归轡上寿其以予言为太孺人诵之太孺人将欣然举君之觴又将北向而举二三君子之觴

一昆李封君七十寿叙

曩予分校礼闈得永春李开芳伯东氏制义读之温醇尔雅甚爱其为文比见其人则温温大雅盖望之而知其为君子也夫文士之文直文耳考其人即如其文者百不一焉以此重其为人伯东官度支精勤举职司农胥役视诸庾为外府歲时私其余无常数伯东不欲以民之脂膏填溪壑节而弗与三载积羨几万石留以遗代者伯东不难以身为怨藪而名日起予以此益重其为官予既久与伯东交得悉其家世始叹伯东之砥行不独天性然也盖得其尊人一昆先生之教多焉先生博学工文词以明经久待铨次乃能絕意仕进独与其弟少昆先生日奉其母太夫人温清朝夕融融然适也先生家素裕为义田以贍族人至亲戚闈之寒欲衣饥欲食穷之欲周者皆归先生先生以缓急资

之无恹色至于自奉则简澹朴素结社觞咏之外无所纷华夫天道损有余益不足而人每席有余之资以求满其所不足先生辛勤铅槩即博一官未足以偿其初志顾重亲而轻功名輒弃去不就华衣美食极声色之娱亦富人常态乃俭于身而厚于人天以有余奉先生而先生欲然自处于不足之地故今伯东有声郎署先生以伯东贵冠服炜然称封君而太夫人犹健无恙仲子举于乡将与伯东接武竞爽庭闈燕喜福履融鬯则天所以益先生而先生不知也客歲秋伯东从里中来言先生今年满七袞盖予悉先生生平而后知伯东之所以能官因先生之教伯东而知先生之自为寿夫人之长生者非能续之使长也谓满其生之数也太仓之粟歲歲灌输至多矣然不积则不盈假令人人如伯东满三载积至万石又安有穷时财赋者国家之命脉也人身之精神命脉赋予有限以有涯随无涯则日靡日损而流贯有所不浹先生既以节啬之理为身又以节啬之理教子盖深于有余不足之说者形不劳曷敝精不用曷竭观今天之所为福先生知其所为寿先生者矣老氏云修之于家其德乃余由此言之先生之寿固未可量也请以是藉手伯东而佐先生之一觞

王母张太孺人八十寿叙

先是直隶按臣言臣所部有文安县孝子王某者生甫朞月其父某弃家去不返孝子长有识輒自伤曰天下岂有无父之人哉吾不难殉吾父独奈何无以奉吾母也既受室纔数月即辞其母往踪迹其父逾八年贫无资困者数矣頼有天幸不至殆卒感异梦得与其父俱归今事虽往宜旌之以励薄俗天子是其言为表其闾而孝子之名遂大显孝子有丈夫子六人其少者曰赠观城公观城公四子两举进士两进士者今户部郎中应霖尉氏令应期也户部君主度支久大司农以为才推择司辽左饷户部君有难色予谓君难辽左耶君曰臣子之职事不避难吾何有于辽左第辽边地去吾乡远势不得奉吾母偕行吾母老矣吾安能无陟屺之感也予甚服其孝因知君有太孺人云君去辽之明年为万厯辛卯太孺人春秋满八十太孺人有壻御史中丞蒲汀姜君语予曰自不佞为王氏壻与户部君兄弟同研席者十余年太孺人以子畜之今幸得以便归登堂为寿敢微一言于子予因问太孺人阃仪状姜君言太孺人性勤俭又至孝事其舅姑暨其继姑甚得其欢心予因叹妇人之德不难于勤俭而难于孝妇人之孝不难于事舅姑而难于事继姑彼子如伯奇贤如闵损不能得之于继母而太孺人能得之于继姑甚矣太孺人之孝也昔万石君驯行孝谨而诸子孙皆孝以孝闻于郡国王氏自孝子以孝为子孙率太孺人遵用其教以事其尊人而户部君兄弟皆化于孝夫孝之道可通于神明神明所佑则家其用昌身其用宁故太孺人行年八十坐视其子孙之成立而形神不少衰非偶获幸致也天生户部君兄弟立身扬名以报孝子生太孺人以生育训诲户部君兄弟而又使寿考康宁得身食其荣以报太孺人是太孺人之身天所保艾不限于司命者世之谈母仪者操一机杼吝一糲糶即斤斤焉侈其勤俭而冀寿考之来如持左券以方诸太孺人蔑如矣此大小之辨也太孺人之寿也户部君兄弟各从官所出禄余市甘脆纯

绮以进而伯季在膝下者率其诸孙曾舞彩于堂进百歲之觴又会中丞君过里中执爵而就子列煌煌乎华观哉使邑之父老子弟望庐而叹曰天之报施孝子如此则太孺人之寿所为风者大矣

封给谏双桥刘翁暨配范太孺人偕寿叙

双桥刘翁家世业儒翁少以儒名试辄利久乃弗利翁益下帷发愤诵读不问生业范孺人操作佐之至朝夕不给淡如也不为辍业翁性质直诸所为事亲交友一稟于至诚有田若干畝饘粥所资庚戌大蝗所过无遗穗翁整衣向蝗祀之蝗飞去不为害其至诚能动类如此翁有子今左给谏济沧君读父书颖悟过人翁抚之叹曰造物令吾售也不至今日至今日弗售也命也吾有子能竟吾志吾尚矻矻胡为乎会庄皇帝御极诏博士弟子年高有行谊者予冠服郡即以翁应诏牧伯为致章服如制翁既脱博士籍乃一意督给谏君于学而范孺人日从舆之给谏君遂成进士读中秘书有声于谏垣歲辛卯典试东方士便省其两尊人依依子舍不忍去翁孺人觉之促之行曰若起诸生歷清华居耳目之职官以谏为名当日取天下事为主上别白言之以庶几报万分一奈何以老人为念且两老人健善饭又吾家望长安如在宇下若第往吾当乘春和就养长安舍给谏君乃还报命今春仲遂具板舆迎翁孺人于邸舍会给谏君满一考最得封翁如其官母范为太孺人时翁七十加二孺人亦如之里中诸大夫宦于朝者欲介给谏君为寿而不佞修酌者之词予惟士方俛首占■〈卜〉未有不欲自致显庸者致之不得而求得于子则涉世久长故父母而食子之报者百一耳人情久抑而不得遂一旦得于其子不怙势以凌其乡人即聚物以自愉快其不然而不以是两者累其嗣人又百一耳为人父母而不得食子之报人子无可奈何于天食子之报而累及其子人子无可奈何于亲翁孺人双白同荣亲见其子之成立躬睹制词身披法服生平蒿目而不得致者自其子得之而意常有以自下郡大夫宾礼之学宫辞不往时或有所造请犹引诸生礼避匿之兢兢然若恐开罪于乡之人貽给谏君累者给谏君竭锺釜之入供为旨甘而翁斥甘旨之余周其闾里居处服御深自贬损无加于为诸生时是造物嗇翁之前丰翁之后而翁居嗇以嗇居丰亦以嗇老氏论嗇谓之重积德而要其归以为长生久视之道翁其得老氏之旨者乎老氏又言修之于身德乃真修之于乡德乃长修之于国德乃丰翁之居身若乡其大较可睹矣幸出其绪余以训诲给谏君使毋以貽父母忧而避德怨毋以避德怨故而讳蹇谔倡众正之风矫羣枉之路令服给谏之能者诵庭闈之教则翁之德嗇于为身而丰于为国其所为寿者大矣

李母程太宜人八十寿叙

纳言李君有母曰程太宜人者当君为令时封太孺人后为纳言晋今封封三年为万厯辛卯太宜人寿七十有九矣诸大夫与纳言君游者愿举百歲之觴而授简不佞登使为之辞不佞与太宜人同梓里闺合懿行知之颇详盖有合于寿理者四焉太宜人之归于赠叅议公也不及事其舅姑独得事其大母臧孺人当其时臧孺人春秋高而叅议

公有一弟一妹尚幼叅议公又为诸生习博士言不问家人生业阡以内咸倚办太宜人太宜人躬勤机杼操井臼上奉大母下瞻食指外佐叅议公于学内抚育其弟妹毕其婚嫁甚得臧孺人欢心臧孺人尝执其手谓曰孝哉妇也吾无以报妇愿妇有妇如妇孝也夫妇德莫先于孝孝者百顺之原而福之基也是宜寿叅议公博学能文一试辄受廩于庠然数上有司数不利心不能无少望太宜人常持时命之说宽释之叅议公学无辍业卒以明经入贡者太宜人力也夫为人妇者日望其夫子显庸耳安计其时有利有不利哉太宜人甘心隐约无缺望信命乐生外物不以滑其和故其天全而神无却是又宜寿太宜人仁心为质能恤穷赈急下至臧获大不至笞小不至詈纳言君始绾绶时即谆谆戒之曰若未仕时见吏务为严峻者每于邑非之意恨不自为也今若乃自为之矣其丽法求中勿令人更于邑非若哉纳言君遵用其教两宰剧邑严而不残两邑之人闻之亦无不举手加额诵太宜人仁祝太宜人寿者夫仁生理也人所歌舞天必从之是又宜寿太宜人生而端重幼习女红不妄笑语以此为妇则为母仪今老矣日惟静坐一室性尤简澹无所纷华即家人无敢以諠哗之色靡丽之服见者昔人有言端悫凝静者天福之夫天亦安能屑屑然日求端悫凝静之人而福之哉天下之理阳主动阴主静顺之则吉逆之则否太宜人之端重静之体也静则有常是又宜寿故曰有合于寿理者四焉故今行年八十而耳目聪明手足强健不杖不扶望之者知为寿征也诸大夫曰信如子言皆太宜人所自为寿矣纳言君独无所为太宜人寿者乎曰有之方纳言君之以治行征也宜入为台谏会有齟齬之者乃得郎署踰年而晋今官夫纳言诚尊重然宣德达情主在修故事胸臆约结有奇安施又迁转率不越其曹人或为君怏怏而君顾甚欢予间问其故君曰吾尝读靡盬之诗叹为人臣者之不能为人子也藉令吾得拜台谏东西南北惟主上所任使吾欲顺吾亲而举吾职吾又安得行吾志而奉吾亲哉今吾官不出长安长安望吾乡一水洋洋不数日可达吾思吾母即奉而北吾母思吾乡即奉而南吾母甚适也母心适吾愿足矣官之冷暖奚计焉予闻君之言若此此即君之所为太宜人寿也夫母之于子欲聚庐而处者情也欲违亲而仕者势也非其情也非其情而强抑之以令其子人子亦非其情而强抑之以从其亲于是有循陔之思有陟岵之怀犹泽雉蓄樊神虽全不王也纳言君之母子宁有是乎既以禄养又以志养故曰此君之所为太宜人寿也太宜人自为寿不逆其理纳言君之为太宜人寿不逆其情由此言之太宜人寿非不佞所能量也

奉贺李母程太宜人八十寿叙

凡人情有所德则思报报则祝祝愿不已则冀望以不可必得之福人思以此自报其所天报人者亦思以此报人之天母者子之天也诗曰欲报之德昊天罔极德无极报之心亦无极故子即至愚靡不欲其亲之千万年寿者夫人之寿以百岁为期其不能千万年亦明矣而人子必以冀其亲者心无穷也报人者亦然故诗人之颂鲁侯曰万有千岁眉寿无有害夫德鲁侯则亦祝鲁侯寿已耳而必及其寿母亦若欲其母之万寿无

害者何也则思报人之天者也友人纳言李公筮令于齐与校文之役所得齐鲁诸名儒往往辄成进士公亦辄以所得于慈训者教之仕则公于诸士师之乎实子畜之故诸士视公亦师之父之而其视公母程太宜人亦犹其大母也今年春二月太宜人春秋满八十时公门下士于君泰寰方为西台侍御史而何君干室适以大计至于是两君思为太宜人上万年之筹而过不佞使为之词予念两君皆姻于文奚不自为一言以发祝愿希望之心而顾俾予代为之言也又念鲁侯宜大夫庶士则感德而思报者惟大夫庶士为甚乃寿母之颂不出于大夫庶士而出于诗人之口岂以诗人之词能扬徽美备采择而垂无穷之问哉故诗虽不具言鲁母作如何寿而至今百千余年鲁寿母之名尚藉以不朽惭予小子何能为役独念当太宜人设帨之辰有闻人显者称门下士与诸子若孙鞠■〈月登〉奉觞祝寿考而颂万年则李寿母之名当藉二三君子而传之百千万年与鲁寿母并称燕喜矣予客岁之春曾从诸大夫后升堂而觞太宜人述太宜人母仪内则有合于寿理者甚备故兹不具论而论两君所为感德思报祝愿冀望之意如此以先诸酌人

贺姜母刘太孺人七十寿叙

世所指吉祥善事无越富贵寿考故人情于此罔弗希覬者然一有希覬即属非望惟人子举以冀其亲而人不议其非若曰此必至之情不容已者也独奈何亲之于子而亦以是冀之也子幸而成立日望其为达官贵人即贵矣日望其富厚以自腴又日望吾寿考安宁焉而久食其报见世有富贵熏灼者不胜其艳羨焉而举以责望其子子不得则闷闷然如农夫之望岁焉繇是不肖者率溺志其中即贤者亦不能不贬损其志以就亲心之所欲而蕲奉一日之欢则教之失而俗之靡也自予与蒲汀姜君并官交戟之内知君有母刘太孺人又知太孺人母仪甚备姜君无它兄弟独子耳妇人之情无弗怜爱独子者溺于爱则疎于教而太孺人兼用爱劳以佐义方之训君既释褐服官政又时时以约己便民之意砥砺其志节勿使沈于俗而浸淫于富贵利达之中不爱纷华以示意指而劝其廉故二十年来亦有禄入以给滑柔而甘旨无加味也用御史晋今封宠荣光大而翟褕不恒御也独闻君为长令能以爱利为行则喜闻君为御史惠文所至声称燁赫则喜闻君守廷尉辅法而行多所平反则喜闻君橐中萧然不以黄金归介寿则又益喜人见太孺人年开七袞髮不加皓而加泽貌不加癯而加腴以为是姜君能以禄养致然而不知其是能以职养者也君惟以职养不徒以禄养故能守其荣名厚禄以奉太孺人故能顺适太孺人之志令优游于荣名厚禄中而载其恬愉以究于高年夫曼倩由母为良吏而隼母以曼倩显孟博由母为贤人而范母以孟博显以太孺人方之奚媿焉此皆不爵而荣不禄而富不久视而寿而况太孺人又富贵寿考如此其备也恢乎天壤盖无几矣予不姻于词不能谈寿理姑因诸大夫之请而妄意太孺人所为寿与姜君所能为太孺人寿者如此

寿邢槐窓年伯七十

不佞之成进士也与文安邢公照同籍因公照识其尊人槐窓先生先生世以戴氏礼教授于乡乡之学礼者皆出先生之门先生赋质醇粹为文典贍自视取一第如取诸寄乃门下士多以资逢世公照亦举甲第官行人而先生犹然守博士籍也可不谓命哉公照为行人满三载例得勋荣先生先生不应守旧业如故久之乃以明经为博士又以博士高等为定陶令令定陶未朞月会意有所不可辄自免归郡守监司相与挽留之竟去不顾时公照方以度支郎督饷宁武闻先生归意或有它恙亦移疾归侍食饮而先生固无恙也又时时督公照出公照出之明年先生春秋满七十会公照奏最晋封先生如其官诸与公照厚善者欲以言贺先生而先生门下士大理少卿姜君来征言不佞窃闻古人有言人之性寿夫性者生也人生而具耳目心思口体则亦有耳目心思口体之用如耳之聪目之明心思之智虑口之言四体之便利皆性也然愚者不能用智者能而又极其用不能用者无所贵寿极其用者自汨其寿夫唯在用与不用之间者为能达生而年寿得长焉夫听不能聪视不能明心思不能虑口不能言四体不能便利此其与木石何异世亦奚赖若人者而用之也故无所贵寿智者聪明驰鹜意虑经营率足以从其所欲欲无涯而用亦无涯迷而不悟役而不休智殫力竭未老先衰然后鉴形羞貌兴啜嗟之思焉譬之大尊酌多而速尽此自汨其寿者也先生之才睥睨一世即不遇于时亦不欲因贵于公照志将有所用也卒之训士士服治民民安穷经之用庶乎见一斑矣悠悠世路曷其有极浓艳熏灼亦复如是故上不见齟齬内无所屈抑而一旦飘然挂冠如弃腐鼠兹可为庸俗道哉耳不极听乃有余聪目不极视乃有余明心思口体不极用乃有余间今称七十人古所稀矣发不加短而益泽形不加羸而益健此非有所增益也为能满其生之量也然先生以能用者自用以不极用者寄之公照与诸门下士以大其用自用者可以不极而寄诸人者则无所不极是先生以不极之用寿身而以无所不极之用寿天下也先生严不佞不敢以谀言进敬论先生所为寿者如此以先诸酌人

诚斋许公母邱太夫人九十寿叙

邱太夫人者宪大夫诚斋许公母也方公为侍御时真心直道侃侃不挠予心慕之然犹未悉其能孝比读公陈情疏而后知太夫人之贤与公之孝也太夫人举三子公为中子以嗣其仲父后久之嗣父举一子公为训植之底于成立为诸生而嗣父亦以公为令最封如公官嗣母称孺人太夫人固犹然未沾一命也既而公之昆季先后不禄太夫人无所恃以为养公乃疏言其状乞身侍太夫人上怜而许之公得复为太夫人子会公被新命备兵津门于是备板輿迎太夫人于宦舍而太夫人寿适满九襄郡伯陈公暨诸长令为公属吏者欲以时为寿而命予修酌者之词予惟人情向其利则见德见德则祝祝则欲其长久而安宁故人子思寿其亲德人者思寿人之亲其心曷极然寿非人力所致也天实司之天之所福在德所视听在人人孰不各爱其子而太夫人不难以其贤子为人后此其心天鉴之矣天以公界太夫人而太夫人乃俾其为人之子天终欲以公界太夫人乃复为公嗣父而生子公嗣父无子而有子然后太夫人无公而有公夫既与之

以贤子必与之寿考以食其子之报此天道也况公自为令至馘歷藩臬所至有惠爱为德于民民之戴德思报者靡不举手吁天祝公百年祝太夫人千年天之所报未有不永者也人之所愿未有不报者也今太夫人九十耄矣闻从關中来歷远道犯风日而起常蚤卧常迟无倦容无难色盖天之所厚气王神全寿考之征已见于此非可以寻常寿筭拘也予考古之奉母以养者在汉有隽曼倩曼倩为京兆每行县还其母輒问所活几何人即多所平反母喜笑为加食不则母怒为之不食彼隽母诚贤然喜怒之异情也加食与不食之异度也虽以训子不无滑和公之廉顽贞淫禁奸剔蠹惠每寓于威之内德常行于法之先出以饬治入以待食太夫人闻之当欣欣色喜日为加匕着甚适己此又公之感人格天而为太夫人寿者也太夫人坐邀纶命之责期頤当未艾矣予为公宇下士不敢以饰言进直述太夫人必得其寿之理如此以复诸大夫之请且以质之于公

甯封君六十寿序

昔人有言水之性清土者汨之故不得清人之性寿物者汨之故不得寿夫人生也有涯而物无涯贫思富贱思贵富贵思永久思而不得则戚得则复患失之于是相办相磨以至耳不可听目不可瞻筋骨沈滞六脏百骸抑郁失宜则汨之者之害也是故惑人弃生以徇物贤者节物以贵生节物者非能离物而能不汨于物则后泉先生是已先生少业农农之外无勤也暇则与野老田夫斗酒相欢自以为乐也有子登甲第官禁近歷水部大夫而业不迁也再沐恩纶官视其子称尊贵人不以为华也禄入得日具甘膳给穀纒而蔬素无改于旧也令子假道归问寒暄依依膝下则谯让之不欲以私恩稽王程也两具安车虚子舍以待则默不应以示不如田野之逸乐也世之遊心淫思艷冀而不可得者彼且为土苴彼且为浮云彼且为骈拇枝指而一不入其灵台则孰能汨之者嗟夫万物章章以害一生生无不伤以便一生生无不长故神不汨则王精不汨则凝气不汨则充耳目不汨则聪明筋骨不汨则坚强六脏不汨则赅而存今甲子既逾而志虑步履无异少壮则节物之功而贵生之效无异术也繇此以往即耄耄期頤犹近言之矣先生满六襄时令子方寿先生而不佞登则敬述先生之所为寿以授诸酌者

淡然轩集卷四

●钦定四库全书

淡然轩集卷五

（明）余继登 撰

○杂着

恩命録叙

纳言李君言其先大夫旧川公之贤也曰先大夫博学工文词每试辄冠诸生诸生治博士家言者皆推轂先大夫为盟主先大夫性严重督不佞光于学一语不合谯呵立至以是不佞俛首受书兢兢焉不敢自后于常人先大夫数竒数上有司数不售晚乃以明经荐阙下喟然谓不佞曰吾拮据诗书之业薪得一当以议功名于世而今已矣小子

勉之于时不佞已举于乡顾不利于春官暨博一第而先大夫不及见矣益用惴惴思所以报先大夫者惟庭训是遵是力两宰岩邑再徙而至今官天子不以奉职无状八载之间两承恩命皆先大夫遗教也古人以及亲而仕三釜为荣不佞既不及以升斗之禄奉先大夫又不及当先大夫之世微一命章服以华其躬所恃以为先大夫宠荣者惟是天子之训词在今将授之剗剗以光昭来嗣唯子一言以引其端某窃闻古昔之制父得贵子子不得贵父即有瑰意琦行之士不获资适逢世亦泯泯汶汶沕闇而名不彰当其时人子所为报其亲者亦至禄养而止不幸而仕不逮亲禄不逮养则终身怍怍抱风木之悲焉今制凡一命以上能其官者满一考皆得以其贵贵其所生故非甚不肖者未有不克自砥砺冀幸人主之一言以内遂其私今之人子未仕则奉亲以菽水仕则奉以禄不及禄则奉以荣名世之谈者猥以名非贤者所先昔者孔子论孝不越扬名以显父母至推本所由显扬者曰立身行道夫能行道而后能立身身立而后名扬名扬而后父母显名岂易易者哉上之人操其权而不以假人下之人藉上之权而不可以幸致上不假人而名始重下不可幸得于上而名愈重故凡为人父孰不思微子之重以为重而情或不能就乎其名凡为人子孰不思藉上所重以重乎亲而名或不能就乎其情纳言君为郎官即名其亲为郎官为大夫即名其亲为大夫旧川公身未离泉石而载观制词所褒予令人主惜才有生不同时之恨声照海宇光贲玄扃人父所不可必得者而公能得之于子人子所不可必得者而纳言君能致之于公即孔氏所称显扬者非耶夫人子之情至无已也然此身无可以自效者不能不有所假寿年假之天禄与名假之人主自天者非力所及而自人主者可以力致力所不及者末如之何矣力可致者愿与君共勗之

双寿荣封诗叙

洛阳孙子源成进士者十四载由邑令入为廷尉平为冬官尚书郎而其两尊人尚健无恙也子源又得以其贵贵其两尊人如其官子源既有淮上之役将归而修定省之仪诸与子源游者多声之歌诗介子源以献诸酌者予小子得受而读之短咏长言瑟瑟然累累然散如霏玉杂如繁弦铿鎗焉如出金石即意别调殊摠之征实以覃思按节而成响扬令德之辉而効齐年之祝也夫诗言志也言生于情则真情生于爱则驩驩爱之心不洽而欲歌以言之虽工不情不情不驩不情不驩之言孝子不以事其亲贞士不以赠其友盖言之难也子源洛人请言洛事夫以贾生之才又逢明主乃卒郁郁不得志吊屈赋鵬身且不胜其幽忧拂抑之悲安能娱亲苏季子绾金印拥车骑扬扬过里中气势燁赫称得意矣然始固不礼于亲故其言曰贫贱则亲戚轻易之其心岂尚有望乎由斯而谈藉令其时有播为歌诗以夸颂者父子之间未必融融乐也子源尊人故业儒即以儒督诲子源非如苏氏之亲好生业而厌薄经术子源弱冠举于乡才岂让贾生然不敢以才自豪意常有以自下者两为令人称其廉平为廷平时佐其长有所平反持身如持玉守职如守瓶子源服膺庭训犹然若是其尊人之质行可知已夫江海能下而百川归之人能下而百福归之故今年已望七而双白同荣躬食子源之报无已时昔人有言美

意延年此之谓矣即河洛当天地之中人生而淳朴宜其寿考然取与子源尊人比指当不多屈也故能令闻者爱若父母慕若芝兰爱慕之不足故咏之咏之不足又长言之忽出纵发皆出真致斯所谓言生于情情生于爱者耶子源行矣归而坐两尊人于堂发函出诸大夫所为诗歌一阅为上一觞生人乐事何以易此予小子既无能佐子源之觞又无能为歌诗以厕诸大夫之什姑述所为忻慕之意而引诸卷端如此

楚客唵稿真迹跋

赠侍御华景先生性嗜书博览载籍无所不窥尤究心骚雅之业及锺王书法片言只字务合矩度比自邓州挂冠归益与诸大夫觞咏自乐篇什日富先生歿三十余年而先生季子京兆质卿始检诸蠹蚀之余勒诸贞珉以传不朽间以一帙寄予方予与质卿读书秘馆见质卿工诗能作数尺字窃叹服谓质卿能乃今观于兹刻则质卿之能皆先生庭训之余也质卿有子方韶胤即能为俚语作字复矫健不俗则张氏之于诗于书亦若裘氏冶氏世专其业矣先生之诗调若笔法诸君子已有定评登不敢赘敬缀数语于末简如此

交河县志后序

万厯戊子予以使事过里中邑侯马公持所为邑志示予期相与订成之予数披阅见其搜罗今昔无间细大良工心诚苦矣第岁年既邈文献无征以三二君子之见闻而捃摭二百年之典故父老传闻不无疑误乃稍为删繁就简以庶几古史阙文之义卷列为七帙厘为二将授剞劂侯既为序矣复命予序之盖予览志感事而有杞人之忧三焉予闻诸长老云弘正以前俗尚敦朴士以质行相高野无惰农市无淫工商贾无绮靡之奉下不敢干上少不敢僭长今何如矣美衣偷食即诵法孔氏者犹然无论商贾农弃业为贾贾弃业为游食轻嫫之适声伎之娱即无担石者犹然无论豪富一语不合不难奋脰一朝生忿不难忘身贪伎好气即诗礼家犹然无论市井甚者子凌父弟凌兄小人凌君子富凌贫少凌长俗至无礼而恬不知怪转相效焉世变江河莫可挽也此一邑之田以畝为畝比邑之田或三之是以邑之一而当比邑之三或二之是以一而当其二按田以赋按赋以征贫者不得不鬻田富人邑无富人不得不鬻之比邑之富人今大较以邑田计之士著者十四寄籍者十六以腴田计之士著者十二寄籍者十八以赋役计之寄籍者十一土著十九比邑之豪日操其赢余以尽邑之腴田邑之腴田日尽于比邑之豪如百川之入闾尾不复返也此二邑诸色目生齿日繁用夏日难雄心渐炽少年无頼不作家人生业三五为曹游闲征逐或贯酒叫呼为欢而持左道以恐喜人意者能令人信其说而不信度忍背公而不忍背其师说诸色目与诸无頼合而党与盛诸无頼与诸左道合而党与愈盛故■〈氏鸟〉张之雄不以掇死而以作奸鼠窃之盗不于村落而于城市忽焉鸟散忽焉鸟合问之则众不可问不问则渐不可长久之将河决鱼烂而莫可收拾矣此三语曰明者睹未形故具独睹之识者多摧虺之计而弭未形之患者非骇鸟之机今观侯之治行如兴学校明教化以导民均田畝平赋役以惠民减课税以通商民

严保甲以禁奸民此其平易近人无赫然矫虔之奇率人所视以为不足为者而繇其道能使民安其业而闾阎无愁叹之声究其归将默化潜移扩然大变其俗而使民不可与为乱骤而举之不为急循而行之不为缓朝令夕效而人莫能名其利一时行之百世赖之而人莫能识其端又念此法行则民安此法不行则民不得安我为政则法行即我不为政而利害晷布明如列眉有能寻端而复故者焉则法行厚于惠下而薄于徼名周于计目前而深于虑久远此其意岂独成一邑旷阙之典而为是观美者哉家大人纘耑治生家政有经矣犹然稽其管钥籍其出纳以遗后之人为贻谋计侯之意亦若斯与昔人有言前事之不忘后事之师也予不佞妄意作者之志而漫缀数语末篇以告夫后之司牧者

寿萱图叙

世之至艰至苦者莫如人母矣彼男子得以经营四方衣食其妻子妇人以夫为天不幸而偕老之愿不终而又无素封之业丹穴之利则所恃以抚诸藐孤者舍机杼之外无勤焉即勤矣未能必其子之成立成立矣又未能必亲见其成而身食其报故曰至艰至苦也故人子于母念无可为报者惟有居则积学仕则奉公兢兢无敢踰越冀微升斗之禄尺寸之荣以奉母一日之欢既得遂其欢心则又惟有稽首吁天愿其母寿考康宁庶几得常沾禄养永享光荣而已予与崔侍御德严交知其母太孺人之贤若太孺人者所谓至艰至苦者也太孺人事封君甚谨封君自五十即善病病两载竟不起于时侍御纔弱冠又有四弟两女弟韶者龀者孩提者僂然也封君性故豪不治家人生产而药饵所需复减其产什三太孺人于时即欲以身殉封君而顾诸僂然者环膝下啼且号也辄又自度微未亡人谁其抚此者于是拭泪易虑攻苦茹荼日夜就机杼轧轧不休以督侍御于学而哺养其诸孤也盖又数年而德严为博士弟子以至成进士令渭南入为侍御其令渭南也得以考最晋太孺人今封而诸子女亦得以时毕其婚嫁两季复有声于黉校间太孺人喜而后可知也曰吾始望不及此此可藉手以报夫子矣而机杼之劳犹昔也盖昔以供衣食而今以供施予岂其有文伯母之思乎抑不以既贵而忘艰苦之习乎故曰贤也太孺人今春秋六十有三诸大夫有绘圖为寿者德严以示予中为萱旁翼以松以竹以桂夫萱有母道喻太孺人也松喻其操竹喻其节也桂有子道喻侍御兄弟也予既从诸大夫后得与称觞之役因略述太孺人之所宜寿者如此而复为四歌以佐酌人萱之歌曰旭日上兮扶桑照君家兮高堂堂有萱兮翠为衣萱有華兮金为妆挺孤莖兮特秀羗独异兮羣芳日映萱兮有曜萱永日兮无疆松之歌曰北堂有松兮何孤子劲色亭亭兮真奇絕新沾兮雨露旧歷兮冰雪鬼神护兮虬根深霹靂行兮霜皮裂君不见五大夫兮久摧残三贞女兮寒烟不灭竹之歌曰有竹有竹兮檀栾儿孙茂兮根孤盘声萧飒兮秋风急影凄清兮夜月寒五色丹书来彩凤千尺翠羽舞青鸾睽森森兮劲节报岁岁兮平安桂之歌曰有丛者桂甘露零兮枝分为五列萱庭兮言采其实栗以馨兮酌言荐之以永遐龄兮

吴氏荣恩录叙

南川吴君博综百氏于书无所不窥好攻古文词词组只字不袭今人口吻以是有声艺苑亦以是不利于南宫久之乃出倅边郡词人大都不屑吏事而君能竭心佐理治有异等之效两台使者交荐之满一考得以例赠其尊人如其官君将以所得制词授之剞劂题曰吴氏荣恩录而问序于予予惟人主不假人以名有以假之皆恩也人臣得假上之名以为名皆荣也然为人臣者不得以名为荣为人子者不得以名为荣何者为人臣而以名为荣则有希名之心有希名之心则有希名之事盖事至希名无所不至矣无论名不可以幸得即可以幸得奚荣焉若为人子而不得以禄及其亲则不得以名荣其亲彼仕宦而兢兢然洁身修业尺寸不敢踰者非独人臣之谊宜然亦冀徼天子之恩命以为其亲光荣也故人思自荣其亲必不肯自辱其身而家多荣亲之子则世多奉公之臣此其道两相成也吴君郡倅耳郡倅而徼荣于上者百不得一而吴君得之如操左券此无他无希名之心也心不希名则事不近名不近名而名随之故足荣也嗟夫今之吏治病在饕名而饕名之甚者莫甚于疆场之吏是往往饕伪为真以博天子之湛恩殊荣如取诸寄噫人孰无心彼其心不知遂以其荣为荣否彼其亲亦不知遂以其子之荣为荣否然使为人臣子而尽如吴君也人貌荣名当无媿矣

梓文昌戒言小引

易叅伯君选梓文昌化书于晋中以训晋人予观九十七化中有似有者有似无者似有者可信似无者可疑夫欲化民成俗而使观者谓有谓无半疑半信非所以示训也若曰姑为是神道设教以感动愚氓偕之大道则何若取其事之所必有理之所可信者明白告诏令人憬然觉悟而旷然一变其俗哉暇因采其中五章俾临令常君付之剞劂予与常君曾从舆李叅幕创建文昌祠于吾镇之南复为是梓布之亦以吾地士风浇漓俗尚薄恶仰愧神言俯多鬼责蘄縁是以牖之也于戲人各有心心各有主予与君聊尽其心耳是非从违则各在其人吾辈安能知之

广嗣一助小引

淡然子曰天地之大德曰生此天地之仁也亦天地之心也人得天地之心以为心故心即仁仁即人孟子曰仁者人也仁人心也人能保守此心使满腔子皆恻隐之仁则生理全具如穀之有种果之有核未有不生者也惟不胜其嗜欲之私瘠人以自肥戕人以自利则仁心丧失生理牯亡如种已腐核已坏即日培灌之而使之生不可得矣予观稗官小说见古之人有以仁心为质者生育之祥輒随以应彼其一念偶发何尝有心于求报此亦可验心即是仁仁即能生其机不爽也因录数十条梓之布之人人皆为广嗣者之一助

秋塘遗草小引

伯兄秋塘聪颖絶伦下笔言语妙天下善谈谑輒倾坐客坐无伯兄众即为之不欢其豪宕如此亦竟以此败予生也晚不及记伯兄颜色与其行事闻诸乡先生言犹历历

如睹一日过马君汝调语及伯兄汝调出其家所藏伯兄五言近体三首七言近体四首小令二首读之再过不觉潸然嗟夫以伯兄之才既不能涉文石之阶议功于世又不能修竹素之业流誉无穷而自令沦落以死盖不善用其才而反为才所用也亦足悲矣予因是欲索其余者校而辑之而二十余年不得一语久恐逸去乃出诸书笥缮写之以付梓人夫睹文豹之一斑者即知其大于狸故为数言引其端令吾后世子孙知有伯兄也

应天府乡试录后序

万历十九年秋八月复当比士于乡上命谕德臣可教往试应天士而以臣继登辍讲惟事副之既竣事当籍奏臣宜有言序诸末简臣窃自念臣可教所为训告诸士者至切矣臣即有言何加焉无已则请以人臣事君之义与诸士相正可乎诸士诵法孔子孔子语事君者多端而其言莫要于勿欺然勿欺亦甚难矣何者人臣受事职任不同自赞化调元暨展采错事有能谋国如家不爱其情处国如家不爱其力者是之谓忠世主愿以为臣矣若夫自赞化调元暨展采错事之间无一事不可与君言无一念不可与君知斯之谓勿欺非纯德不二心者不能也故曰难也臣尝谓天之生人材质有限不可强至而所可自靖者心原繁有言臣无二心天之制也无论君臣分义必不忍欺即儋君之爵食君之禄不能极身无二尽公不还私顾一心以计国家之利害复一心以计身之利害是二心也两心者不可以得一人殆难与事君矣此无他荣身肥妻子之念横于心而为国家之念分也主上勤求治理屡下责实之诏期与大小臣工一德一心共臻太平之路德意甚盛然谓今之世而无不欺之臣臣何敢过诬天下之士大夫谓今之世而尽不欺之臣臣又何敢过信天下之士大夫为人臣子而至以欺名自扞文罔则将开人主不信之端夫既无能积诚于下以感孚人主乃俾人主不信其臣是始焉自怀二心终令主臣二心也主臣二心其患有不可胜究者有臣如此罪滋大矣诸士方俛首受书也见古之人臣有敢为欺蔽者不扼腕而非之乎曰吾独不为耳闻今之人臣有务为欺蔽者又不扼腕而非之乎曰吾独不为耳诸士今离奥渫而与计偕行即登对大廷为天子使且身自为之矣其务精白乃心勿为丑饰勿为伪善勿令天下复有以诸士之非人者而非诸士也留都丰镐旧京其江山灵秀是地所自有无俟臣言都人士融浹棫朴之化文章藻丽为宇内嚆矢此诸士所长亦无俟臣言故臣直以人臣事君之义为诸士申告之臣非敢谓诸士独少此也惧涉世之始志趋弗坚荣身肥妻子之念或得以易其生平如是则见利必溺见便必夺是欺之阶也故先为不必然之说以坚其志而导之趋耳皇上明如日月威如雷霆臣下有隐情饰貌罔上行私者即远在数千里外犹如目见三尺之法时加警焉一时臣工涤心改虑凜然思易其弦辙此诸士所明知也藉令万有一得侥幸于文法之所不及生还乡里然令父老子弟指而目之曰夫夫也是为臣而欺其君者良士羞以为友肖子羞以为亲即戴面目视息于世诟弥甚耳宁死不愿诸士有此行也臣才品最下经术至踈又守在闲曹无所短长欺不欺何所可见独兢兢守勿欺之训时自检饬尚得趋步时贤厕执经之末况诸士才力十倍于臣有如当官効职去智与巧直立而

不挠素白而不污行不毁方守不易操一禀不欺以报主上圣主当自知之无忧弗任矣臣待罪词垣久行藏何敢预期然姑与诸士约自今日始有如臣之服官而或沉于欲涉于欺以干清议诸士无以见臣臣不佞愿与诸士共图之矣

武举录后序

臣继登往试士留都尝诵所闻人臣勿欺之义以盟诸士今上不以臣为不肖复命副左庶子臣琦典试郡国材武士臣念今西夏叛人诱敌内讧兵连三时不解而东南山海之隩衅伏朝鲜方思与大邦为雠主上深惟疆场多事俞司马请广制额薪得沈雄智畧士以布列行间收荡平之效德意甚盛顾臣竖儒也安所得方畧以训告诸士请即所盟留都士者与诸士盟臣闻舅犯有言繁礼君子不厌忠信战陈不厌诈伪斯言出而使诈之说倡介胄之士遂以欺为所不讳臣窃意忠信诈伪此不可两存不可两用者也若诈伪可用于战陈则是战陈之间无所用于忠信而君子之怀忠履信者独可用行礼不可用行师乎又何以云师贞吉也或者又言诈者诈敌非诈民也夫诈在心不在敌与民若于敌可诈于民可不诈遇民即不诈遇敌即诈则是一人之心乍伪乍忠两存两用此必不然之说不愿诸士之闻之也臣尝谓人心之欺至难制也而尤难制于功名之际然功名亦有分矣功为实名为虚实者难成虚者易就难成故人思以伪成易就故人率以伪就诸士试观草昧之初熊虎之士必不二心之臣彼岂独以法网不可欺为是凛凛哉豪杰之乘时翼运者志固以功为名不欲以名为功此其人即令之欺不欺也承平渐久刚毅之气销为懦熟懦熟之习化为谄诡谓不饰名则无以见功不见功则无以牟利智巧之夫于是有以名为功者以名为功有三端有举事微当伪而增之名曰功者有实无其事伪而饰之名曰功者有已僨其事伪而覆之亦名曰功者此三者皆得利去是以始而为其事者为尝试久而习其事者为固然始而受其欺者不能知久而知其欺者不能问臣足不履边陲何繇悉边事试以意与诸士度之自古有斩首捕虏数十百级而我士马所死亡十不及一者乎有敌众数万阑入边地浹旬矣我无能以一矢相加遗遂还军去不掳掠者乎无宁惟是方款市时固言乘闲暇修备也今既二十余年矣诸所修备能加于往昔乎尺籍伍符无减于昔司农按符籍而输饷不乏也何一有缓急而辄称召募岂卒伍遂空如是乎如是则内帑所岁输者又安所出入乎夫自上视下下或可以欺上自下视下下必不可以欺下诸士当明其不然矣以是心而欲应主上拊髀之思宣力疆场建天山瀚海之勲胡可得哉夫欺非愚人之所能为也其能为欺者必智者也智以决胜则无不胜智以料敌则无不敌乃心思智虑不用以胜敌而以罔上此臣之所未解也无论圣天子明见万里之外无所容欺即或念边臣苦暴露功疑惟重繇此而剖符延世亦为世所姗笑有余愧矣诸士执鞭弭而来也十六皆世胄也其先世皆所称豪杰翼运以功为名者也故名至今不衰而子孙亦世食其报此非食其名食其功也诗人言无念尔祖肇敏戎功故臣愿诸士之绎思矣且天下无事功或可以名圖天下有事功必不可以名立即今叛人据坚城不下何可欺曰已下东师覆没不返何可欺曰未覆此必不能

矣嗟乎爪牙士上所伏以固圉销萌安靖四方者也乃一旦东西顾皇皇然若无所可寄则三载一举士谓何臣实耻之此无他机械之智工而战守之畧踈也是欺之流弊也今天下积弱极矣所贵为材武士者谓能转弱为强也强弱在气厉气在心有如将以一心鼓士气士以一心自鼓其气则激水之势可以漂石射石之矢可以没羽而谓不能敌忾奏公臣不信也诸士慎勿欺哉宣力効忠纾皇上两顾之忧臣窃有厚望矣

汾阳县儒学记

万历二十有三载中丞魏公抚晋之明年请改汾州为府设汾阳县以附之移州学为府学而汾阳建学设官如制诏可于是中丞公檄冀南道分巡叅政麻君督同知白象知县蔡成已相郡东關巽隅得地一区阔八十丈长四之一一亩日鸠工饬材庀具中为大成殿五楹左右庑各二十楹南角房各四楹北角房各三楹大成门三楹外为名宦乡祠各三楹又外为棂星门坊者一门外东西坊各一右为明伦堂五楹其上为尊经阁东西斋房各七楹居仁由义门各一仪门一东西号房各十楹儒学门三楹后左为敬一亭三楹右为启圣祠三楹又后教谕训导宅各十六楹前为泮池其城雉对峙者为青云坊一费取诸抚院酒课暨修府支剩余银夫役取诸民壮于百姓无与焉计物与价计工与直价无溢值工无旷日经始于二十四年七月至明年三月而工成费金钱二千四百有奇役竣麻君以中丞公命征予为记予既纪其岁月而复申告多士曰学以明伦自三代至今未之有易非不欲易以穷理尽性此其本原化民成俗此其要务不可易也子夏老于西河非汾人所严事者乎彼以文学称于圣门而其所谓学者不越父子君臣朋友之事而后乃有高谈性命妄称顿悟者其流之弊至谓人伦为幻景谓惇伦为鄙事此学之大蠹而两观之诛所必不赦者汾士生于贤圣之域服习贤圣之训天性醇朴必不惑志于邪说此无足虑然不虑其有惑志而虑其无定志也以子夏之贤不免入闻圣道而悦出见纷华而悦而况于后之人孔子十五志学至三十始立四十始不惑不惑始定立未可以言不惑也是岂旋致而立效者也青衿之士羣聚学宫诵读孔孟其志孰不欲为孔为孟乃纷华靡丽与接为构又繭然靡执矣此不定志之故也故曰隱居以求其志求志者求定其志而已诸土方隱居之时学宜无先于此者志于道德志于功名原无两志盖道德虚位功名实用用之而正功名亦道德也孔子思东周颜子问为邦何尝厌薄功名彼以功名为可厌薄者为世之一切以就功名者言耳自予通籍而静观功名之士或趋势或趋名或朝附势而暮附名阴为势而阳为名此其人百巧百慧自俛必得卒之有得有不得总为世所指笑惟志定之士不然目无势心无名廉不言贫勤不言苦忠不言已效公不言已能世或信或疑或巧排而思中官或沉或升或齟齬而不通惟独立行一意而不不变若中丞公是也诸士观其训士与其服官者而其志可识矣夫士也既已俛首受书自异于凡民奈之何志不素定以至随时上下如波流草靡宛转无一特操哉此士之耻而教之不明也予谬典三礼职司教化愤邪说之汨士而士无真心一志为国家分猷念者故思与诸士共圖之诗曰视民不怵君子是则是效予不佞无足为视者诸士而思则效

有中丞公在矣中丞名允贞大名府南乐人麻君名溶宁国府宣城人及诸有事兹役者法得并书于后

忻州城记

忻州于古为阳曲外控云谷内蔽全晋最称要害而地势平旷无河山为之闾阨有警则凭城为守城仅筑土为之易于溃坏至嘉靖之季敌人无岁不至忻父老子弟时苦蹂躪萧然不支矣议者屡欲甃以砖石而蒿目疮痍之民不任力役又官无见缙议輒寝比和议成益复因循二十余年郊无垒州无城城无守御之备塙垣敝甲以待市而不虞其变万厯丙申巡抚中丞魏公行部至忻慨然太息亟令主者揣厚薄度崇卑量经费凡既具矣与督府王公合疏以闻报可则先斥酒税数千金为经费而部使者治兵使者暨郡守以下各搜其赎醵若大盈库粮银佐之力因戍卒食因月饷费出自公物给以直上不烦科征下不虞赔累经始于某年某月讫工于某年某月城高四丈二尺石基八尺周一千九百六十丈楼櫓埤堦靡弗壮丽役兵壮三千人糜金钱二万六千七百有奇工竣署宁武道事叅伯易君具始末请纪其事盖自予通籍见封疆之臣无岁不报修筑之功无人不受修筑之赏至于足称金汤足资保障者可指数何其饰名之易饰备之难也中丞公实心任事耻以虚名邀功其下吏亦实心应公罔敢以虚文塞责抚晋以来日寻隙漏日思补苴所为缮整堡修亭障者所在皆然岂但忻之城忻民頼之已哉敌奉约束边人释戈负耒孰不谓可幸无事独公凛凛焉设险固圉若敌旦夕且至者岂故过计众人之见常在事后忠臣之虑常在事先无事不知备事至不及备是终无备也有备无患与患至无备者功相万矣公之心敢自谓吾已兴起吏治拊循士民简练戎伍辑宁疆场可以不待城而固遂博安静之声遗后人以艰乎城中故有白鹤观昞自唐开元间每二月望羣鹤戾止因以得名见元遗山记中兵荒以后不复至者踰三百年城成而羣鹤如期复集观上中丞公纪异诗有胎禽候月雉堞连云之句夫羽族飞类得气之先则忻民获奠枕之安享缓带之乐此其一征已兹城为瑞当与和龙白鹿同符詎独可名其观哉古者庆祥即不必备述而一切工筑无巨细必登于国史予从史氏后当备书之是役也专理者为太原府同知贾一敬分理者为忻州同知邱允升太原右卫经歴柴贡总理者为太原府知府赵彦忻州知州张尧行法得并书

鄆陵令何君德政碑记

侍御陈君尝言鄆陵令何君之贤也其言曰予按中州岁大禭人相食鬻相鬻也主上忧念特发内帑賑之而有司且有私以自腴者独鄆陵所积穀至万余石何君又周行境内视民空乏者发仓穀为粥食之不足则继以帑金继以俸继以劝分矻矻然穷日夜力若视其家人子弟之阽于危亡也是岁豫之地道殣相望而鄆陵无野殍则何君之力也予心识之意其人必负有材谓者踰年而君以高等入为西台御史比与君晤则貌无过恭言无过词恂恂真诚君子也退而窃叹天下事惟真诚者为之而材谓自负者不与焉彼有所负必有所饰以自见上好耳则饰听上好目则饰观意无不饰则心无不用固

不若真诚者不自负亦不自饰而一心于民事者之有益于民也昔人谓救荒无奇策言用奇策者不可用以救荒而救荒者以实意行之固无所用奇耳则何君之谓也又踰年而鄢陵之士大夫父老子弟列君治状请为文勒石以垂不朽其言救荒大指如陈君言其它言君天性廉自奉无所纷华即鸡豚蔬菜至琐细也亦自蓄自植不以口腹烦民也讼者至庭谕而遣之再至再申谕之申谕不改而后加法焉悯其以无知罹宪网也榜岁赋之数使民周知之为匭于公使自输之恐猾役渔其利而民受其弊也决狱停法予掾吏轻平者其深文巧诋之夫輒斥不用惧奸吏伤官法也北之溱洧南之颍以邑为壑民苦不得耕君督民为堤防躬行畚鍤间卒变沮洳为良田贷种具俾以时耕作谓水不障则桑麻不植于野野荒旷民乃菅也新学宫周贫士置乡塾明教化勤恤孤寡表扬节孝谓此师帅之任所以端风化之原示导民之路也种种约己裕民诸政皆材谓之士所视以为不足为不肯为者而君殫心为之亦以令之职当如是而非以为德也彼其时民亦安之不见德也君既去而后知邑不可无君则思思之不己则思纪君往事之迹以为后事之师夫民心至神饰伪以动之则亦以伪应之其伪应也若感其既往也若亡固不若操其诚以托业于民者能使民之久而不忘也人有持饵以语孺子者曰若德我我饲若孺子必应既食而复欲其德我不可得也父母日乳哺之未有以为德者比离怀抱疾患痛痒切于身始呼父母而思也以舍父母无所可呼也思之至也鄢陵之于君何以异此今之吏治病在于不诚如积穀良法也乃取于民者金也而以之上闻则曰穀据其上闻不有穀也而比其散也则无穀下明知之不敢言上明知之而不言此以为利彼且复然前以为利后且复然至于民饥欲死即有金钱无所得穀坐视其流离颠踣而无策以苏其困则胡不引何君之事观之也陈君按部时一岁中斥镞金万三千为郡邑余本此诚心爱民者故于君之实政亟称之而亟荐之夫诚可以动人亦可以率人君且出按郡国矣有如以此心核羣吏某也诚某也否寓鼓舞于激扬人将洗心以象意指惠之所及者大矣岂独被于鄢陵之民何君某曹州人己丑进士陈君某唐山县人丁丑进士

光禄寺续题名记

光禄寺旧有题名石前光禄卿吴郡章公所置也岁月既久标题已遍今光禄卿维扬李公砦石续之而问记于予予惟光禄所司自郊庙飨祀王人膳羞暨于羣下廩食朝使燕赐盖重且巨亦烦且细矣人情恒谨于重巨而畧于烦细见谓清卿不当亲细事輒诿曰自有主者不知至难诘至不可诘至为弊窳者即在于至烦至细之中夫吾既为之长贰乃以清贵自逸令民脂民膏日屑越于弊窳而莫之省忧职守之谓何闻有蔚公者在光禄三十年无一事自诿无一物自私有弊必核有诘责必引咎自归当世贤之声称至今呜呼由前而观有不为蔚公者亦有不能为蔚公者可指数已然此其斤斤举职者耳昔屠蒯语晋侯曰味以行气气以实志彼人主斟酌元化调剂羣品者惟有此志而志实于气气行于味大哉味乎所養系之矣故周礼膳夫養王后世子饋食膳饮皆有定品而其式一掌于太宰又王日举食膳夫授祭品尝食王乃食以天子之玉食何所不足而

太宰乃为之式其左右便嬖岂曰乏人而膳夫乃为之主膳为之尝食古人所为防微杜渐意深遠矣此职渐废而大官膳羞至易为金钱说者遂谓金钱之可会也犹愈于膳羞之不可会是未達于古人之意者矣夫王人之馈食必有职之者不于外必于内内寺之爱君不如外臣彼且从君之欲安敢为之节彼且逢君之欲又安肯为之节无以节之而惟欲之适欲亦何厌之有诚令举周官之典修膳夫之职定品物之式明尝食之义甘醢醴鲜不纵其欲饮食醉饱必适其宜则以物養性不以性養物不鞅其中不滑其和君志清明君身强固由是执珪而飨上帝吉蠲而亲祖考御明廷而燕赐羣臣清庙明堂之颂作鳧鷖既醉之风洽叶气薰蒸宇内太和此其效岂独斤斤举职者比哉李公慷慨有大节方按畿辅时以直道结知人主再起而至今官盐梅之具其所素蓄兹举也倘亦有调鼎之思乎彼美恶惩劝之说前记已详不具论论其大者以望公并致望于同事诸君子林天迪榷税清源记

予荐乡书出大宗伯文恪公林先生之门先生伯子天迪能文章明今昔之故为民部大夫声藉甚甲午岁大禋司农告拙上诏廷臣策之天迪应诏陈便宜娓娓千余言天子以为辨令榷税清源踰年而清源族贾愿藏于市税入溢往额会得代乃更为圖歌颂之复谋镌之石为后事师以予善天迪介门人江选部请纪其事予惟清源海岱都会五方之辐辏而万货之藪也语云翡翠盛而贞姬惑士君子处泉货之境盖难言哉且其俗儂黠纖薄非若愚氓之可给也其狙佞佞夫影射干没非一耳目之所能及也榷斯地者亡论墨夫即自处洁矣而關市之征人各为政纵洁其身何裨国计故箕敛隕名薪束招谤所从来矣天迪何术而得此于清源哉江子曰鄙人何知向其利为有德彼熙熙攘攘以利来也以利来必以不利往往则见谓厉己而诟来则见谓利己而欢情固然耳使君之榷清源也甫下车即宣言于众凡吾所以来务在利若曹耳往昔清源榷额纔四万今已倍于昔化居萧条又十倍于昔岁有登耗必欲按籍而取盈人且望望然去之皮之不存毛将安傅今与若曹约第闕无阑入货无悖出法外无征已又宣言于众廉贾五之贪贾三之贪生奸奸生与其怨于既弊孰若禁于未然今而后阑入者罪无赦悖出者罚有差众闻而色喜复相戒使君神君乎无自速戾矣于是遠者近者推挽而至者錙錙铢铢罔敢作奸犯科竿牍不及门筐篚不及境称使君平者如出一口予习天迪不知其榷清源能若此刘劭曰清节之流不能弘恕大抵不廉者嗜利不平者嗜名廉以名取每以夷自视而以跽视人其究也民无所措手足故不平之害甚于不廉天迪世禄之家不患不廉患不平今能平矣予与天迪游见其含毫濡墨蔚为声诗意谓文士耳今乃为能吏说者每谓文人不习吏事授之握算不知纵横以今观于天迪非然哉

金龙四大王灵应记

万厯戊子予承乏祇役周藩四月二十六日偕大行林公寅宾陛辞南发五月二十一日抵大梁行册封礼二十三日北旋先是过封丘封丘疫甚至市空无人予不忍再经其地乃取道陈桥以归是日日晡见有孤舟维于野岸與人指曰此渡处也予登舟促之

解缆舟人漫应曰暮矣请俟明日再促之寂无应者仆人告予河滨故多盗此野渡非停泊处予曰可觅一民居予将寓宿焉既而日渐暮咫尺不辨东西数里内无居人左右益惴惴予解之曰盗者不过利人财耳予一介行李原非宦游在汴纔两日又馈遗无所受彼中役人当自知之奚虞盗为遂假寐舟中诘旦舟既发闻波涛撼舟舟与水敌澌然有声声渐猛如鐵骑千羣衔枚而疾趋也如万章之松怒飙吼而为涛也又如雷霆震发而岩崖摧裂也予异之以问仆人风乎曰恬无风也逆流乎曰顺流而下也予益异之问济乎曰未也数问对如前时舟已向危予讶问故仆人含泪而前曰事不济矣予曰何故曰舟已胶柁已折如斩诸维舟具俱沉波中矣予念舟之所恃以行者柁也急流中而柁折奚恃以济仆人将言而嗫嚅者三予诘之曰舟人祈予祷于神而未敢言也予笑曰孔子不云乎丘之祷久矣予生平有愧于神正宜投之浊流不然神与予何讎与鱼鳖何亲哉左右皆泣泣下沾襟予复笑曰若勿恐予为若祷乃具衣冠将望祷焉舟人曰此自有神无庸望祷也导予至神所神可尺许为武夫状而容甚雅予再拜祝曰予小子以使事既竣道于河以归逢神之怒舟胶不渡予小子罪也然以予小子之故而震惊龙节岂惟予小子之罚亦惟神之罚惟神其图利之祷毕坐舟中忆杜子美曾有诗云苍茫不晓神明意若为予今日设者因自检此心所繇以获谴于神者不可得独望汴中曾戏为二絶云驱车过夷门怀古三叹息可怜虚左宾独有窃符策又云朱亥诚勇士侠气薄秋云何事袖中椎不椎秦将军岂以口语遭二侠怒耶审若是神亦不能为之辞矣复意神者聪明正直而依人者也故非人不因遂召舟人谋之一舟人至年七十余与之语瞠甚不能辨予曰再召一人来曰尚有一人在河中拽舟矣予大讶之问他篙师何在曰舟人十二祥符令掇去其四五人疫一人病一人老其壮有力者一人即拽舟者也予令之上谓之曰汝鼻荡舟乎在中河何为其人叩头太息曰知无能为然不敢坐而待溺予问曰此中有他小舟可取以济乎曰有然甚远恐不能待予曰予不能待能飞渡乎第往取之其人浮水登岸而去时按中州者同年王公世扬所遣送役亦在舟中恐甚向予泣甚哀予慰之曰命也泣可济予将泣泣不可济即泣奚为其人拭泪而去予兀坐有顷舟忽震动座几倾予意此舟破矣恐怖顾左右问曰谁运舟者乎曰老者病者力不能执楫谁其运舟曰舟行乎曰行矣予起视之舟果望陈桥行如有挽之者前之水声不复闻矣舟中老人跪语予适祷于大王大王有灵舟今果不操而发予问大王何神曰金龙四大王也予地旧有此祠然不知其灵应若是此时操舟无人舟祇自运虽发而甚迟去岸不半里而中隔一洲洲长可八九里日将午前所遣舟人以小舟至予登小舟波浪顿息水平如掌鼓柁中流亦一奇观也湏臾抵岸岸侧维一巨舰旁繫一小舟乃宪副赵公耀所夙戒者其遣役言久已泊舟于此候渡奚为自上流发也既而诘其故乃祥符輿人令舣舟于彼以省陆行之劳而舟人不敢违也予既望陈桥进发因忆未出都门时每心念黄河之险比登途一二相知者言河当夏秋之交诚险而难渡今无难也暨至河果不踰时而渡心颇易之及归遂为数輿人所误几葬河鱼腹中天下事险不在难危不在大矣如此惛然自失

者久之既过里中乃伐石于山勒其事于祠下以纪神庥且以谗夫后之人使知易不可忽而小不可畧也

新建天津葛沽镇兵营记

万厯壬辰倭入朝鲜破其国走其名王杀掳其民人据其城邑狡焉有内讦之势议者谓津门咽喉要地倭乘汛扬帆则患首津门津门被患则畿内恒扰大司马竭心而谋博采羣议乃征诸近卫兵屯海上又奏遣大将京卿各一人募内地少年子弟可为兵者得数千人练习之以益壮军势时倭不犯东北者百数十年屯守不设营垒尽废宿兵于斥鹵之地又盛夏瘴热淫雨日侵众无所栖息疫疠时作人情大扰巡按侍御刘公疏言其状乃得罢遣诸卫兵独留募兵三千余人统以偏帅以备不虞于是巡抚大中丞刘公备兵副宪梁公郡守刘公愆前虑后议于天津近地勑立营堡屯诸募卒而推择予邑侯刘君俾经理其事守乃由天津而东往来海畔览其形势周视审度得地于所谓葛沽者东去海西去津门大约各五十里地既适中而形复高敞侯为相方画制命日量工以授诸佐者遂略基址称畚筑具财用费取诸抚院积扣民兵工食之余不以烦有司工役取诸饥民之应募者不以烦闾里始于癸巳仲春至季夏而讫工中为帅府左右翼为兵营稍上为中军厅事绕以长堤环以潮水而又演武有所观兵有台箭垛旗墩碁布星列巍然津门之支辅海邦之重镇矣事既竣邑侯以中丞公命俾继登纪其岁月盖窃叹诸大夫此役有数善焉可以赈饥可以省费可以圖目前之安可以免日后之扰可以为久远之计可以御外患可以销内患夫滨海之民频伤于岁至无以为生而春夏之交尤甚今悬直而招俾得以日工博日直以日直充日食比及终事麦已有秋是以数千金之费而活数百人之命也故曰可以赈饥凡役出于征派者五不当一出于平常召募者三不当一惟贫民则所余者力所急者食急于得食必不缓于用力彼因力以就食吾因食以就功役无旷日工不踰时故曰可以省费且新募之兵非贫无资即豪有力者可以猝聚而不可以猝散不可猝散而欲使之散不能猝散而又不能使之常聚此近忧也帅以训之营以聚之则虽未见聚之利而亦无散之害故曰可以圖目前之安今之倭夷尚伏海岛不能逆其必来不能逆其必不来彼如不来聚兵何为万一或来兵将复聚与其散而复聚毋宁聚而不散盖散而复聚者不习而扰聚而不散者不扰而习故曰可以免日后之扰夫营未建则安之难营既建则给之难今既已择海滨高敞之地立为屯营以妥其居何不择海滨闲旷之地画为屯田以为之业使彼时而耕耨时而畝渔时而肄习彼能自给庶不烦饷于官官不给饷庶几常得其用始为募兵渐为土著故曰可以为久远之计小人出力以卫公家必不如自卫其家诚令屯营之卒各有恒业以渐广其居室畜其妻子聯为什伍结为婚姻常则相亲变则相恤即一旦倭至将家与为敌人自为战非徒以德上也将以完室家而全其亲戚也此其与乌合之众谈敌而心怯望敌而色战者功相万矣故曰可以御外患今饿寒困穷之盗所在实繁假令奸人乘之以弄兵潢池则一夫大呼千人立致于时欲借见兵则急不可用欲募新兵则缓不及用孰与聚数千训练之

卒于近地将与卒相习卒与卒又相习用之即调发不用即罢遣犹足待缓急而慑奸宄乎故曰可以备内患嗟夫古之为备者常在事先今之为备者常在事后备在事后诚无益于事然先事之后后事之先也事未来而不能备事既过而不知备将何时而备乎备而无用不愈于用而无备乎今兹之役备之道也然亦难矣何者天下之事每难于创始而易于鲜终盖有事则有扰易人亦易虑故非前之人以后人之心为心将以事不在己也而倭之非下之人以上人之心为心将以事在己也而玩之非后之人以前人之心为心又将以事不由己也而败之如此则功何能立又何能立而不废哉予因纪其事之始末而抒一得之愚以告夫嗣来者中丞公名东星山西沁水人副宪公名云龙广东琼山人郡守公名敏寬山西安邑人侯名冠南江西庐陵人分委者为县丞秦应光魏鳌典史刘守学千户宋璞百户韩继业王守成吴承勳法得并书

饶阳令杨公遗爱记

饶阳当滹沱之冲滹沱善泛泛则东西所适无定势坏人庐舍没禾稼百姓患苦之嘉靖丙申大梁杨公为邑令喟然叹曰河可防防河河不可防吾其防邑居乎或谓公民不可与虑始泽门之讴公独不闻公曰大人举事劳民而利民则为之劳在一时利在百世则急为之等劳耳自我则事半而功倍自后人未可知也见民之害不能祛己不任其劳而以遗之后人令职之谓何乃以次第就役先为堤于隍之内而外为堤于郭门之外蜿蜒八里涧一丈高视涧加十之五堤既成督民杂树其上者以千计公役民以时均其力而不亟其成故民无怨公者而亦未有以德公也当其时所为德公而播诸輿人之诵者可指数已岁丁酉饶不雨自春徂夏禾尽槁公为斋沐步祷于方台龙祠祷毕雨大至槁者起岁以有年戊申秋大蝗食成禾立尽公谕民捕蝗发仓粟易之所发纔六百蝗遂灭不为灾饶故编有羣长诸费之所取给公自奉约减斥去不用岁所省常费凡数百缗饶十九社社长倚赋役为奸利公廉得其状召诸社长各按田而赋按丁而役按赋役而籍按籍而征诸长蹢躅无所售其奸饶民故食商盐富商挟货而结贵势挟贵势而撼有司有司散其盐于民厚其直而急其征期民大困公乃教民煎斥卤为盐盐既成遂为白之监司岁输盐课而罢诸商人邑无頼不治家人生事又不能仰食糠窃徃徃作奸犯科公令户为之长长得察其户之人户之人无常业者长以告治其人而长不以告治其长人无遊食盜贼屏息公之政不能具述即此种种岂不称便利哉然政之所以移风易俗者则利在目前而治堤防河则利在数十年之后目前为德显数十年后为德迟显则沐其惠即思歌颂其德迟则不见利故不见德也比公去饶十余年而岁饥民相聚伐堤树为薪食其皮始思公曰非公吾安所取资乎又二十年而河水大溢水嚙堤邑民日夜荷畚插集堤上力与水敌城得不损始大思公曰非公吾其鱼乎始思建祠祀公报公德则相与鳩金钱治材木月累岁积度费已具则列公治状暨所为祠公者言之今邑侯闵公闵公曰有功于民则祀之此长令事乃勤苦父老吾为若成之又明年公子今侍御廉峰公为畿内督学使者民又益喜其小人曰方公为吾民归也吾固祝天报公公果有

子其君子曰我有子弟公昔教之公今有子其世世有大造于吾邑盖公先治饶时时进诸生训诲以性命之学曾揭一聯于学宫期以参赞天地体认圣贤有不及者复为惜阴歌励之嘉靖乙未肃皇帝南狩道真定当道者才公檄公主诸供应诸中贵索例外不得大詢詈公正色拒却之公度忤中贵人或中以他事即拂衣归邑民卧辕下留之不可曰吾为尔民归无所恨故邑人言若此犹若以一邑私侍御公者而不知侍御公非一邑之私也未几侍御按部过饶饶父老故尝逮事公者争逆侍御公于堤下愿望见颜色指曰是先公所筑乎指堤之林木曰是先公所树者乎盖诸无能名公而所为名公者独以此言輒泣下侍御亦泣予同年王君为予道之如此呜呼盖公所为树德于民者今始见之亦犹之西门公之渠矣昔者邺苦河患西门豹发民治渠引河水灌田而杀其势民苦治渠之烦而不睹其利也百岁后害除利兴民以富足乃感而思之曰是贤君之法式不可更也鄙人有言己向其利为有德饶民于公何以异此然豹之治邺以术而公之治饶以实心史不载豹有贤子孙而侍御公能世公之业益恢而大焉则公实胜之矣孰谓古今不相及哉奈之何今之牧民者多不利民而自利即知利民率不能计久远而圖近利其心亦以有近利即有近名彼没世之名吾何利而为之故陂池沟渠之务阙焉不讲而屑屑然务于卓诡炫耀之迹民安所恃以攸暨哉而又奚惑乎去后之思寥寥也若公之不有其名而名与泽流无穷已时岂不毅然行古之道者而可概见耶语曰前事不忘后事之师予故因閔侯之请而采拾饶人之不忘公者志之贞石以谗夫后之君子公名东山閔侯名宗舜王君名命

重修河间府管河厅公署记

运河自山东入郡界逶迤而北至于天津上下盖数百里储峙之所灌输朝贡之所往来冠盖之所络绎至冲要也旧以郡倅一人专领其事然郡去河远不便临视故别设分署于郡东南百二十里交河县之属镇曰泊头者以其地临河且上下行河道里均也或曰此水部分司后司移张秋乃置府署焉无可稽已厅事大堂南向前为仪门门外折而东为鼓楼即为大门门前为董家店巷巷下为大河于义为宜于势为便自隆庆戊辰大同张公谓大门稍远不便肃客乃市民居拓其址别为大门于仪门外置寅宾馆于大门之北而鼓楼之门遂为虚设至万历戊寅凤翔袁公又谓天下公署未有为门不临街衢而居于楼之内者乃益市民居于鼓楼之南别为大门树棹楔于门之外而鼓楼遂塞矣至万历丁酉浙衢赵公以厅址久日渐低下淫雨之后水无所泄墙垣栋宇日就圯坏欲遂撤而新之乃出修宅岁费并请于部使者黄康两公又得河滩公费若干计可三百金度基市地鸠工饬材中为正厅三楹后为后堂三楹左右为胥役房前为仪门门右为土地祠左稍南为寅宾馆西向又前为大门门左为州县馆折而东移棹楔于临衢榜曰畿辅河防堂之西稍后前后为宅者三前为门其又西为书房者前后亦三或葺其旧或创而新力役于众费出于公经始于丁酉年六月至次年五月而讫工既落成具始末征言以纪岁月予窃叹近之仕宦者以奔走逢迎为能以筐篋刀笔为务玩岁愒月职务且

废不讲况官署乎公计以为自今为则材物未大敝坏尚可得什之五及今不为则存者愈少自我为则工力未大糜费尚可省什之五自后人为则糜者愈多故不惑羣议不避众喧而竭蹶为之卒之功成而民不扰身居其劳而居后人以逸公亦何所利哉公之先人中丞公以精勤举职为世名卿公习见家庭之训故居官所至不敢自暇自逸此其一事也观治居而所为治河者可知矣使世之仕者而皆视官如家视官事如家事若公也者则天下可几而理哉

淡然轩集卷五

●钦定四库全书

淡然轩集卷六

（明）余继登 撰

○志铭

明通奉大夫光禄寺卿少洲冯公墓志铭

庄皇帝之壬申岁三月二十又一日光禄寺卿致仕少洲冯公卒子子临辈以其年十一月二十日葬公于尧山之原越十五年公仲孙琦官太史始以公仲兄海浮先生状来请铭登谢不敏而重违太史之命乃按状志而铭之状称冯氏之先世为青临胸人高祖思忠徙家辽左自辽左复归于青则公父宪副公始也宪副公有丈夫子五人四登科第并以文章政事擅名于时东海冯氏遂有声称于天下公讳惟訥字汝言别号少洲正德癸酉宪副公为萧令生公于萧公生有奇质风神秀彻既长开敏沉毅辨悟絶伦名起齐鲁间一试辄受廩领嘉靖甲午乡荐登戊戌进士庚子除宜兴令宜兴多大猾持吏短长善逋赋有逋至数十年者公至刺诸猾抟击之按籍而摄逋者逋赋大集以数万计输之郡郡守大奇之谓令纔弱冠耳乃老吏不如邑中咸惴惴无敢以少年易公者矣公尝督诸生就试江阴巡江使者某以其间行县至邑阳怒不候已而阴有所覬公若为弗闻也者弗应也使者愈怒摭它事中公调魏令会边警沓至烽火彻郊关畿南震恐公计久远调经费为城双井鎮以备之未几迁蒲守魏人拥车下不得发乃为更定牧马法而去蒲剧州多宗室纷沓难治公治之甚容与暇尝晋博士弟子俾执经问难为剖疑义士争奋励举于乡者视昔三倍之乙巳晋丞维扬摄守事扬当孔道繫公是頼而公寻以外艰归服阙补松江迁南京户部员外郎郎中壬子丁内艰复补北驾部出为陝西佥事分巡陇右兼督学政在鎮五年武备文教种种毖飭边圉无事升河南右叅议分守河北壬戌擢浙江提学副使公念两浙士风为海内嚆矢广布条教以示左质右文之意士习翕然咸归于正癸亥升山西右叅政即自其省为按察使公既秉宪一以强明裁之吏民见者语次寻绎皆得其阴伏凜然无所受私三晋号曰神君丙寅升陝西右布政使秦中多豪强驰鹜闾阎锢屯田之利令籍不得稽公乃以法按其豪大搜诸伏田得万余顷事闻受白金文绮之赐戊辰转江西左布政使藩司总钱穀日入以巨万计吏弊猬集公为立抽名验收之法额外无毫髮余羨宿弊顿祛江右岁输诸瓷器及它经费甚伙皆当出于民

又吏縁为奸公私困耗公乃议令民畝出一钱以给诸务而诸絶簿书盗财物者率以轻
重受刑远近称便焉辛未入覲阙下精核下吏能否无所依违天官郎丞称之曰诸方伯
考核言事凿然有执不存两可者独冯伯也是岁诸方伯去位者过半公名益起缙绅大
夫咸以公辅期之而公请老之志坚不可挽矣疏上天子惜之特进光禄寺卿予致仕云
既归始构室垦田习静遠器为终老计而天不憖遗不踰年逝矣公天性孝友歴官所至
皆奉太夫人以行即倥偬夜归必徐候户外问寝食然后退其奔丧也徒跣数千里外柴
毀逾礼兄弟之间自相师友友爱备至教育诸孤无异所生以至宗戚闾党缓急皆以时
周之咸得其欢心交游遍天下悉当世闻人相与考德问业各取所长然性严重不可干
以私仕宦三十余年圖書诗卷外无长物无疆外之交束修之馈督浙学时大学士袁公
遣官致书谢而不发其介如此幼服庭训用廉平为理所至吏民畏而爱之在魏有德政
碑在蒲在陇右咸有去思碑在江右则士大夫叹服谓二百年所未见若小民又人人肖
像于室饮食必祝矣公虽精于吏治而雅志如儒生生平嗜书无所不读每政暇即手一
卷不置博涉而深思閎积而约取发为文章温醇尔雅古诗取则建安近体在天寶大厯
之间所著有风雅广逸楚辞旁注选诗约注汉魏六朝诗纪文献通考纂要唐音翼杜律
删注冯光禄诗集若干卷行于世公祖讳振父即宪副公讳裕并以公贵累赠通奉大夫
陝西布政使司右布政使祖母李氏母伏氏并累赠夫人配熊氏四川右布政使佑之孙
累赠夫人先公卒继魏氏肥乡县令升之孙累封夫人子三长子临县庠生娶李氏光禄
卿用敬女次子蒙县庠生早卒娶张氏凌川县簿鉴女继娶刘氏衡府引礼仲进女次子
节府庠生娶刘氏庠生生儒女继娶赵氏天佑女女二长适汉中府同知李尹耕之子一
本次适卫辉府知府李用和之子延綬子临熊出余俱侧出孙男二长珣临出县庠生娶
张氏庠生灿女次玮蒙出聘庠生周杜女孙女四长临出适开封府知府宋伯华之子庠
生绳武余尚幼俱蒙出曾孙一铨曾孙女一俱珣出史登曰立功立言古今胜事志士杰
人毕力而思趋者也然徇俗之士往往不顾才质之有限官无崇卑必蘄卓诡业无工拙
必蘄表炫至强役其心以争兼能之胜■〈牛骨〉■〈牛骨〉然用力日劳所至日拙
公少通仕籍循资累级数十年始长藩司而一旦弃去如脱屣结发攻文词凌厉作者而
冲雅和平无一切瓌竒竞胜之气举世所共艶羨者一不入其心故操之无所强而出之
常有余不求声而名我随不务胜而人我归可谓有道者矣是宜铭铭曰祠于闾碑于衢
是至德之孚而寔公之羸风雅既愈爰示之模是不朽之圖而寔公之余生与道俱歿与
化徂尧山之墟有阡而吁过之者趋曰明光禄大夫

庆府右长史棘亭王公墓志铭

棘亭王公以庆府右长史致仕归二年而卒卒三十年而公子大理左丞世扬以
侍御马公状谒继登请铭公墓道之石继登梓里后学又与大理君同奉轩对谊不敢辞
谨按状志而铭之状称王氏之先本山右人其先世有讳贵者自山右徙居广平之李排
营村遂为广平人贵生柔柔生玘玘生友友生臣臣攻文章有大志竟以诸生赍志而歿

娶于张有二子次即公也讳允武字殿邦别号棘亭公生而敏惠才质过人长厉志读其父书为文雋朗多奇气既隶学官每试辄冠其曹性严重不与羣曹伍即其曹亦帖然咸服之顾数试数不售晚乃以明经入太学嘉靖庚戌谒选铨曹除江西南康府通判南康地故瘠薄而俗善逋赋每郡吏督赋者至黠者辄醵金钱前为寿一入其贿即噤不敢复有所问以故赋恒逋多者或至八年公廉直不受私谒既视事前行金者徘徊门下不敢入公乃召诸逋者按缓急为期日而遣之诸黠凛凛以次输赋无敢后期者部使者奇其能疏闻于朝为下玺书褒予之会守缺即以公摄守事时粤西狼兵入内地剿倭者所过横甚百姓患苦之以次当至南康郡人甚恐公乃预为檄檄其渠率曰以尔剿倭奈何乃自为倭今与尔约馈饷不时罪在有司馈饷时而尔横如故惟尔罪三尺法具在吾知用吾法耳率已前闻公名既得檄颇惧而戢其下公亦勅属邑为具以待竟过南康无敢纵者郡濒湖盗贼之所出没旧有游徼船若干艘岁时缮治郡任其费而主者任其劳守备某匿其费而责缮治于郡公持不可某恚甚潜公于巡抚都御史都御史怒公废格为停公月俸公乃徐条故事暨所为侵匿状上之都御史内媿公卒褒公治行为江右第一饶万年令某以腴削机兵月粮为机兵所讼讞者受赇右令而重绳诸讼者众兵怒遂歃血以叛饶郡戒严时直指徐公方行部至饶仓卒无以为计适公以它务至徐公喜曰王别驾来事其济乎即令公停它务而抚乱兵诸乱兵闻公来亦相戒无动王公治我吾属当无患矣前讞者谒公为地公不应既绳诸乱首而令亦论如法众心始安直指益奇公即以公署万年事公更约束严稽核省一切烦费盐米琐屑一取给于南康壮兵某讼其队之长而所株连甚众公心察其冤为争之御史竟反其成狱万年民为歌以诵之详见翰编浮梁金公所为去思碑中公治万年凡六月以考绩赴阙下民攀留不可得则相与圉公像尸祝之公既以最闻名益起复移公景德镇董陶事公愈孤立行一意自贡额外诸造为淫巧以赂遗权贵人者槩从禁绝岁省工费数千百缗景德人德公如德父母浮梁尉某以巡徼至镇而纵其徼卒有所剽取于民民不胜忿鼓噪围尉将甘心焉尉恐避匿公署中公为尉慰民乃解散去庚申升两淮盐运司副使公日讲求利弊择通商惠民便利国家者佐其长次第举行之或有讽公为囊橐计者公峻词以谢其人惭而退都御史鄢某以严相私人得总海内盐政大以赂闻盐政壤乱淮商黄某鸠金数万将逆诸境上公廉得其实亟置诸法淮扬盐赋甲天下都御史视为外府比至无所得大恨公会公迁庆府右长史犹未释恨喉所厚善御史伺公隙无所得竟以老落公职致仕时年五十七耳公既归杜门谢客布袍蔬食无异寒士又踰年壬戌秋七月三十日以疾卒距生弘治甲子十月二十三日得年五十有九初配都氏嘉靖某年随公游太学卒于旅舍赠宜人继赵氏能以勤俭佐公廉者今封太宜人子男二长对扬娶胡氏都出次某即大理君娶某氏封孺人女一万秀适医官龐朴俱赵出孙男四三省三乐三槐三聘俱邑诸生孙女二人古人有言廉吏可为也而不可为夫廉者任气多亢厉不能忍人难与共理其不然者又无能引当否至耗废官事此安可为也公歷官所至常禄外毫不以自污非宾客

不御酒肉从敝陋不治郡人见前导不问而知为公也岂不廉然无务凌人常有以自下者蔽人之过且调护之甚厚推其廉平人不忍欺故能片词而销兵民之变此非可以口舌争也仕而俎豆于郡歿而俎豆于乡有由然矣呜呼若公者廉而可为者耶是宜铭铭曰廉于财或短于才公才恢恢以剗以裁如郟斯开廉于身或以矜人公则恂恂若芒若芑饮人以醇世竞于贪贪以趋炎而公独廉以廉见严故终仕而淹淹公之位不能淹公之世是生哲嗣为时廉吏以继公志摭公遗迹铭之贞石纳于幽宅俾子孙承藉世其清白

明资德大夫南京兵部尚书赠太子少保晋庵戴公暨配田夫人穆夫人合葬墓志铭

万历丙戌秋前资德大夫南京兵部尚书晋庵戴公卒于家守臣以闻天子为悼惜诏太宰予赠宗伯予祭司空子墓于是赠太子少保祭二坛遣官营墓如令甲公子太仆丞绍科鞏将以岁戊子四月二十日藏墓事而以纳言李公状来征志若铭按状公讳才字子需别号晋庵其先景州人五世祖曰荣者当文皇帝时以富民徙实沧州遂为沧州人荣生庆庆生宣宣生臣俱以公贵赠资政大夫都察院右都御史兼兵部右侍郎宣配冯臣配萧俱夫人戴自徙居以来世孝弟力田为德于闾而发祥于公公生而颖异沉静始就外傅即端重如成人年十二试于郡郡守姚江吴公大奇之曰此公辅器也声籍籍起嘉靖癸卯举于乡明年甲辰成进士授行人巳酉擢户科给事中庚戌之秋京师戒严时事起仓卒军需匮乏大司农请一切加诸道赋公抗言今畿辅山陝诸郡连岁苦募兵市马甚劳费矣而复议增马江南诸郡每先期输纳料银又豫输机兵民快一岁已皆目前权宜之计而复议增赋是竭泽而渔以重困吾民也部议竟格不行已巡视光禄纠核伏蠹条为四事上之岁省大官金钱十二壬子转史科右癸丑转本科左以内艰归服阙补工科左寻升兵科都公以倭夷猖獗闽广用兵无虚岁乃疏陈三事曰亟剿灭慎防守馭客兵言言中窾下所司行之公之在谏垣也毋务以鹰击毛举为名高然数引当否耻趋和承意久之升南京太仆寺少卿公亦无少望循行郡国精心牧政踰年以外艰归服除升都察院右佥都御史巡抚甘肃甘肃新用兵无见车骑即羸卒乘亭障者半菽不给公至抚其疮痍而乳哺之首为请帑饷垦荒田兴水利乃次第简兵将习击技饬烽埃敌至辄遭创去而红柳林鎗竿岭之捷甘镇向未尝有也敌既数不利遽去则以其间建学明教振废省刑种种具抚甘议中公抚甘五年斩首捕获数十百人修筑墩墙以千百计招徠降口若干夺获羊马器械无算而公亦以积劳晋副都御史巡抚陝西五郡父老及诸番夷卧辙攀留有詞者诵者感而泣下者肖像而尸祝者于戏此足以知公矣公甫至陝有秋防之役即移镇原州储刍粮守要害比及瓜期既撤防套敌兵忽入延绥杀总兵郭江执副总兵时銓以去科臣列失事状词连公夫敌所出入定边瓦楂诸路非公所辖地言者误及公耳公不自明也诏公归就核明年隆庆丁卯公事大白仍以原官巡抚河南三月入为大理卿己巳升刑部右侍郎寻转左公再为法官持法平亭所定买休卖休

诸律着为令庚午八月宣大总镇臣以谍者言东西诸番当大举入寇京师戒严庄皇帝飭大司马修战守具诏诸镇整兵待援乃起前都御史带川刘公守通州提督援兵而改公户部左侍郎兼都察院左佥都御史督理饷事公言敌情叵测征发贵豫请令密云诸处司计之臣悉心经画益广储蓄俾应援兵马在所關支如取诸寄此与辇輜重而追劳军者功相倍也既而敌侦我有备旋解散去然天子益心重公遂以其年冬升都察院右都御史兼兵部右侍郎总督陝西三边军务公三莅陝益熟其地利弊某帅勇某吏贤亟露章荐之某帅贪残若选懦不任事某吏墨亟劾罢之某费冗亟节之某饷宜增亟增之某屯田盐法可以佐军需者亟议之某路番众所窥伺亟檄镇兵防御之某城隍墩台可修浚者亟以时缮治之而其大者曰永安堡堡在靖虏之北中卫之南曰裴家川者腴田可万顷民苦乏不得田作公为相度地形筑墙建堡疏于朝更今名且请以固原守备某督兵营田以苑马寺少卿兼佥事某移靖虏整饬兵饷而秦陇之间屹然成巨镇矣会俺酋款關乞贡市庄皇帝采议臣言报可而河套吉能者俺酋枝属也援例以请下羣臣议公言东西各为雄长授职宜均通贡宜随俺酋进入为便若互市则陝西重镇既不可招之内地甘肃番回开市已久又不宜令强敌混入以滋祸阶惟延宁二镇颇为近边然阑出之禁甚严亦不宜因市启衅互市第可行之宣大不可槩陝西也有旨切责公公卒主延宁二市且疏改延绥市于红山闔门之外复宁夏清水营旧厂以备不虞乞桩朋马价以充市本列卒环市以摄众心故遠人爱如冬日而畏如怒霆竟公在事无敢一哗于市者天子亦以酬功之典进公兵部尚书兼都察院右副都御史总督如故两岁中又升俸者一白金文绮之锡六今上念公久劳边事乃命以原官掌南京都察院事未抵任改南刑部又改兵部参赞机务公按江防缓急为饬兵卒部署方畧巡盐御史某奏改浦子口五卫隶御史节制公言南畿各卫分列六营以藩篱根本统领则以内外守备巡视则以科道其来已久一旦改隶御史使堂堂六师下同郡伍非建制意也事遂寝蓋公习掌故持大体伉厉守高时方倚以为重而公以继妣刘夫人之忧归矣状言方公争互市时或讽公第开四市如贵人指延赏可立竣公正色曰市之利害筹之熟矣狗下而谩上便身圖而不计国是有臣如此将焉用之谢絕其人去公既去镇喜事者卒开甘肃之市令番部交恶为国家生一边隙蓋十余年而公之言竟成左券云嗟夫天下有任事之臣有喜事之臣喜事者机圓志銳见利而不见害故尝试暴施卒之利一而害百任事者老成持重审较利害每却顾重发故多利而少害若公者所谓任事者非耶公家居久督抚台省交章而推轂公者六七公大都言公经济长才不宜久弃林壑而公顾以老无意于世往岁西人内讧主上厯西顾忧未始不念公言效而公逝矣惜哉公长身岳立望者知为正人君子居常恂恂饮人以和至当大事决大议则天动星回而公不可夺也性至孝居丧柴毁过礼甘恬澹薄嗜欲仕宦四十年自奉甚约终其身无世俗声色之好闔门养重无一语挠守牧权亦无尺一走长安道中輿论高之先是太仆君念公老谋归侍食饮公贻书止之曰勉修职业老人善饭无恙勿以为念一日坐斋中室无人忽布几焚香嘿有所

祷俄呼四缣充犒左右惊入问故不答又某姓者梦羽旄鼓吹导从甚都公乘肩輿出翌日遂卒易箒时惟言生无益县官死勿请恤而已时万历丙戌九月二十五日也距生正德甲戌十一月十有三日得年七十有三配田氏佐公起诸生供养姑舅得其欢心篝灯侍公夜读比公贵身膺纶命而勤俭益甚独好施内外姻族以及臧获无弗戴德者事具维扬陈公尧志中先公三十五年卒卒于嘉靖壬子十二月初三日距生正德甲戌年八月初一日得年三十有九累赠夫人继穆氏凝重婉孌事继姑刘能先意承志抚太仆君如己出公驰驱王事而无内顾忧者亦以内德茂也先公十四年卒卒于万历癸酉九月三十日距生嘉靖甲午年五月十六日得年四十累封夫人两夫人之卒尚在浅土今将祔公于城东祖莹之次合葬焉官所营兆也子男二长即太仆君娶于常赠孺人继张封孺人田出次绍庭娶于刘穆出女四田出者适生员张继周吏部主事王显仁侧张出者适举人张惟曜儒士马惟断孙男三世懋世愈科出世惠庭出孙女三俱科出铭曰古之大臣谋不先身动不徇人维社稷是计用康乂民盖嘉隆之际若戴公者庶古大臣之伦矫矫戴公质有其文爰自琐垣暨于开府柔亦不茹刚亦不吐上帝曰咨维远人弗靖蹂我疆圉女其予抚女式遏乱畧以保厘西土公八载于征蹇蹇匪躬四方来同及彼蕃戎莫不率从帝用是大赉念兹戎功呜呼生而显庸歿而追崇匪私公以惠允德克终公之好述媿德俪美先公而归以身蓐蚁东城之原郁郁佳里以庇尔孙子百千万纪

明行人司行人赠承德郎兵部主事芹泉冯公暨配蒋太安人墓志铭

芹泉冯公讳惟重字汝威贵州副使闾山公仲子也冯氏之先青州临朐人洪武初有思忠者徙实辽左之广宁闾山公既显念生子当置齐鲁礼义之乡况家本齐也因携其五丈夫子复归临朐卜居郡城家焉公生而敏慧十岁能文有隽誉方居辽时已为广宁诸生既徙家即复为郡诸生郡诸生闻公名竞走问业公人人剖析疑义无弗满意去者闾山公官留都公从而南讲业青溪一时名公如许石城邢雉山辈与公游者皆逊谢以为不及名益日起嘉靖甲午举于乡归从家燕时广宁苦兵闾山公顾念先人丘垄临食而嗟谓诸子谁其展视者公请行间闕烽火中逾月始得达竟芟荆蔓筑垣立石而还戊戌举进士授行人会肃皇南狩简命公往告湖湘湖湘暑湿盛夏瘁热公日夜驰驱风雨罢劳不少休至庐而病疽发于背同年张公董公来视疾谓公宜急归就医药勿令卒有不可讳以忧子父母公毅然曰使臣不任及于踣顿废天子成命死不偿责懷首丘而亏死职之义滋貽吾父母忧耳疾且亟犹思经营役事遂卒于庐状称公丰頤修干望之俨然虽整峻自持不失尺寸而真率洞夷不为崕岸嶄巖之行工诗善书才睥睨一世而意尝有以自下者是皆不宜死胡遽死也公既死而蒋太安人以节显蒋太安人者故清河令蒋公女也初蒋公读公文奇之既见公矩步便旋益大喜谓此真快婿遂以太安人归公归逾月而闾山公将南迁独难太安人曰吾方谋归故乡独奈何令新妇长去其乡土太安人顾无难色急装为行于是归计遂决公之行役也太安人留守官邸生今宪副君子履遣使驰报公未至而公卒矣太安人闻讣一恸而絶絶而复苏苏而顾视宪副

公羸然襁褓也复大恸曰嗟乎死易耳如生者何又何以慰死者吾其为死者抚生者令死者复生生者不媿以明吾志耳乃勉就食饮携宪副以归闾山公廉吏家无余费而公之使也又一切馈遗谢不受比丧还发橐中装萧然无有也太安人乃斥簪珥藏葬事至自操作以给饘粥日抚宪副君而泣稍长遣就外傅归则躬秉机杼伴夜读一灯荧荧母子形影相吊也宪副君成进士太安人喜且泣谕之曰若大父若父以清节显吾与若几不能自存而卒再世官者若大父若父所遗也若毋以宦时忘吾与若几不能自存时则毋忘若大父若父所为矣宪副君泣受教故自令方城入为职方出备兵云中兢兢以廉平为理则太安人之教云太安人性简重自少无所纷华既称未亡人服食益自贬损与家人语未始不称先君而继以泣也宪副君既上书阙下言母守节状诏旌其门众方贺有令名太安人独泣曰夫子不幸吾忍而就此吾独何心忍以夫子之不幸为吾名乎宪副君为职方得赠父如其官太宜人如今封制法服以进太安人服之望阙谢辄却不再御及孙琦官太史以使过里中从宪副君拜堂下起率孙曾前为寿太安人喜为一举觞已而惨然不怿曰惜哉不使若父见也言与泣俱盖黄鹄之悲四十年如一日焉公生于弘治十七年正月七日卒于嘉靖十八年十月二十八日享年三十有六太安人生于弘治十六年十二月二十八日卒于万历十年十月五日享年八十有一父即闾山公裕祖振并以公弟惟讷贵赠布政使妣皆为夫人子即今整饬易州兵备山西按察司副使子履娶宋氏封恭人女二一适石太守继芳一适石茂才茂元孙二长琦右春坊右谕德兼翰林院侍讲娶姜氏封孺人次珂聘李氏孙女三许聘张元豸迟一梧蒋弘胤曾孙女一俱幼宪副君以太安人卒之明年正月二十二日启公兆合葬而以太守宋公状来乞铭予谓方公盛时兄弟四人俱以文章科第擅名海内公独未究其用以死死数十年而公子宪副君以才名为众所推毅行将秉钺建旄议功名于世而公孙太史氏方且执经

■〈施，冉代也〉厦负鼎铉之望此公诸兄弟所未有也或言太安人有余于年故能辛苦立门户长子孙盖天之报太安人如此呜呼太安人之余于年正天之报公所不足于年者也是为铭铭曰谓天有知乎公乃死谓天无知乎太安人乃不死公其死矣太安人可以无死太安人不死公可以死呜呼公有子子复有子昌公之绪百千万祀公乎太安人死而不死

明奉政大夫宁国府同知中里崔公墓志铭

中里崔公讳良贵字德卿安平人也安平故博陵地博陵崔氏有声于徃代明兴居邑西黄城里者谓之黄城崔氏八世祖有文明者生冈为岢岚学正冈生征征生翱翱生辅辅生儒儒生仲诚号河滨即公父也崔自学正以来世有隐德为乡里所推重邑大夫或宾之学宫以至于公生而颖秀少从其伯父学即能厉志诵读伯父喜曰此吾家千里驹也年十四补邑诸生学博李君奇之念其贫数却其馈遗且以岁时资给焉邑令王公有所善闽人吴生者以博学著称来省令令为立校舍俾正讲席选诸生高等通经术者受业其中公与焉学日益进每试辄冠其曹而数困于有司乃奋发曰夫士也安有不博

极载籍而能取高第者乎于是下帷专精经学旁及子史百家以至裨官星历无所不窥嘉靖甲子举于乡再试春官不第时公大父母父母并春秋高而公又贫至不能具甘旨因叹曰俟河之清人寿几何乃投牒铨曹得永寿谕永寿山邑俗薄于艺文先博士率倚席不谈朋徒偷怠公至为聚徒众陈敦学之宜诸抱坟策来就业者彬彬始盛既而视篆武功适有修城之役公为量功命日平板干程土物越月城成不愆于素又为定婚姻之礼旷然一变其俗适督学曾公过武功课诸生谈说经义无称者公从旁代说甚悉曾喜曰说书不当如是耶因命公主正学书院公益以奖进人材为志日次其程品而劖其德业曾公雅重公时倚公以校文之役所成全为多故一时丽正学者咸争自被濯号称多才岁庚午公分校留都士所甄录又独多才公名益起遂以其年冬升国子助教寻以病请告归既还职值今上临雍受金衣之赐公在太学数年能以精勤举职丁丑升户部四川司主事监督草场草场岁报纳数多商人擅为弊藪往往结猾胥与共为奸主者或不及知即知又格于中贵人为地不能问公视事首汰胥役馱法者塞诸弊窦干请者懐刺不敢入诸商凜凜无得虚入以牟利由是怨声哓哓至为飞语以恐喝公公曰吾求不溺吾职安得复恤吾私乎比终事行一意如故司农卿以公廉难干以私推择公榷清源關稅公既行怨者恨公不置嗾其乡人某给事疏公前督草场时受贿有迹有诏核实以闻核者言崔某实以严贾怨给事所指无事实然犹调公外任得卫辉通判主督賦公益自奋约已奉公旧所称常例咸谢絶之文诸邑田一稟于至公大搜伏匿郡人慑服署辉县事值岁旱公精心祈祷为民请命澍雨辄应人以为至诚所致又二载升宁国府同知会守缺以公摄守事一切公费悉为条记毫不入私橐癸未入计旌下吏能否酌去留錙铢不爽大吏某以私忿将甘心某令公持不可竟赖以全其介如此邻郡有大侠某前后二千石不能制操江吕都御史檄公治之立伏其辜公虽辅法而行然折狱平恕时称无枉部使者以为能诸司理所献有不当者即改属公公一一湔涤之无所顾于时大江以南称贤郡丞者首推公而共事者皆目摄之矣乙酉秋公入贺万寿圣节又满一考当报政会病留滞都门前摄公者于丙戌计吏时摭它事中公主爵吏素知公贤止镌公二秩而公遂拂衣归无意于世矣方公之病也予省公旅舍公言予病如斯惟有去耳予谓公心事磊落敷歷已久众方信向公何遽圖归计公曰如命何蓋公精于命数者未几卒如公言则人之成败利钝岂不有命哉公生于嘉靖丁酉八月十二日卒于万曆庚寅某月某日享年五十有四父河滨翁仲诚以公贵加封承德郎户部四川清吏司主事母王氏封太安人配王氏封安人子二长敏增广生娶庠生王嘉臣女次敬附学生娶庠生彭居安女孙男三广旭广昕广旦俱敏出孙女三二敏出一敬出公天性孝友禄入虽薄常倾囊以周其昆季自奉则食无重味室无侍姬既归日伏在床褥犹时课二子于学或召所善故人与对饮为歌诗相娱乐自少至老手不释卷所著有仕余稿中里遗草方公之家食也教授里中四方士从之游后多去为达官状公者太常王公亦其一也公二子将以公卒之明年某月某日葬公子某处而以公治命请铭于予予与公同举于乡知公颇详谨

按状志之而系以铭铭曰处己若愚抱璞以居处世若迂择地以趋家不必腴而志不逾仕不必臚而行不污是之谓君子儒而异于世之夸毗者欤

明贈中憲大夫大理寺右少卿青崗傅公墓志銘

萬曆癸巳春少司寇仁泉傅公以其先大夫中憲公狀請予志而銘之蓋中憲公生二十有五年而歿歿之日猶處士也歿後數十年始以司寇公貴累贈中憲大夫大理寺右少卿故稱中憲公云司寇為侍御時督畿輔學政適當路者欲汰海內士如永嘉故事令嚴甚而公不為動試士如故繇是郡國督學使者咸以公為式即有一二媚子欲奉意旨希寵榮者亦羞縮而不敢肆予心壯之乃今有命何敢辭按狀傅氏之先當唐季世有樞者為臨江教授始卜居清江之石頭七傳而生雱宋政和八年進士以工部侍郎充和金通問使授朝奉郎尚書考功員外郎又五傳而生棻建炎間為高安丞遂占籍易俗鄉之珠湖世多文學之士載在郡乘又十三傳而生偉洪偉洪生孔川孔川生崇聖崇聖生成號青崗翁娶于漆而生公公諱舜字汝華別號紹崗公幼而聰穎其族伯郡丞公嘗試以對句即應聲作對語語輒驚人郡丞公大奇之比就塾師受章句即奮志占畢至夜分不寐父母以公賦質孱弱每憐而誡之不欲竟其業會漆孺人善病病則日夕侍湯藥奉起居必安而後已緣是輟業又縣有繇次及青崗公公聞之曰吾即少幸識握筭奈何當吾身而勤吾父吾奚賴焉即挺身代往轉輸吳城時族叔敖朋役以疾歸公兼理其事既竣役解橐中羨金分之無私藏焉其質行如此從伯質早卒三子幼不任管鑰以付其仆仆有黠者匿其籍而盜鬻其田田鬻而稅存公廉得其狀發其奸仆乃懾服公復校其產而籍錄之諸仆遂縮趾不敢肆三孤成立公之力也公內行修飭事諸父昆弟恭謹孝友情意篤摯而少年負奇不難以其身為人解紛排難舅氏漆翁其人長者為宗人所陵構公曰我在而人皆藉吾舅可視其魚肉之乎即往居間眾素知公曲聽其請事乃釋聞族人里人有空乏者輒請于中憲公各以緩急周恤之有貸子錢者量力所能辦假予之未嘗以無為解諸所假予者又薄其息而緩其入以是人皆向之司寇公言生也晚不幸不睹公之行事其得于傳述者僅僅若此意若重自傷者嗟乎睹一斑而知豹即前所云為德于閭者足以知公矣公卧病三月不起乃執劉恭人手以兩尊人弱子為托而卒時嘉靖己丑秋八月也生在弘治乙丑四月十八日配劉旌表節婦以司寇公貴累封太恭人自有志子一即司寇公萬曆乙丑進士歷官刑部右侍郎娶廖處士啟熙女封孺人贈恭人繼娶胡通判汝融女封恭人女一貞仲適來蘇劉孟仲栢舟之操不愧其母孫男四鉉縣學生娶庠生吳一性女鉞縣學生娶吳汝振女繼娶胡顯楚女鉞娶文通判似韓女鉞國子生娶劉廷用女繼娶吳知府一惺女故大宗伯文端公孫也孫女三菊貞適敖訓導鏗子庠生淺常貞適王金憲許之子庠生淑俱廖出金貞字陳侍御邦科子某胡出曾孫庆鉉子甘鉞子聘陳主事良材女曾孫女洁貞史氏曰書載傳岩之叟為時霖雨有功于生民甚大珠湖之傅豈其苗裔耶何千余年而代有聞人也以中憲公之賢假令資適逢世當必有表見者即涉世不长而迹其行誼亦可以長世矣太恭人抚五月孤竟底成立

又能诵其先人之义以训诲之俾守遗范着功名于当代积德于六十年之前而食报于六十年之后若左券然修之于乡其德乃长人可不务修德哉万历己丑九月卜葬公于烟霞祖莹先是太恭人之卒司寇公为疏请于朝得并予祭至是司寇公请告归始欲备闾幽之典乃始为志而铭之铭曰人亦有言唯义尽齿斯言而信公胡以夭死人亦有言唯德及世斯言不信公乃昌其嗣呜呼齿所寄也嗣所庇也尽其齿弗及其世毋宁嗣也公之嗣人为时名臣宠命三申贲公之窀是不死者存而何必于其身

明奉政大夫南京刑部郎中丰溪闵君墓志铭

盖正嘉间吾郡以仕宦显于时者任原闵氏为最着自予通籍己不及见闵氏之显者独于稠人中识丰溪君君仪貌闲雅进退不失尺寸前问之知为水东先生子也心窃自念古称世禄之家鲜克由礼不尽然哉既而君移官留都又移疾家居荏苒数载而君以讦闻矣异哉予虽不深知君然以所睹君之外岂遽若是已哉又越岁君之子鉴介同年友张选部以状来请铭按状闵氏之先上海人由上海徙家任丘自宗礼始宗礼生彝彝生琦琦生定定生槐槐官南京礼部尚书琦定皆赠尚书琦配王定配卞皆赠太夫人槐举弘治乙丑进士官按察副使以子煦贵赠通议大夫兵部侍郎配颜氏封太淑人煦即水东先生君之父也累官资政大夫刑部尚书配李夫人以嘉靖壬寅五月十四日生君讳升字思充别号丰溪君生而朗慧始就外傅即勤于诵习众咸以大器期之会水东先生巡抚山西时有斩首捕虏功诏进一阶予世赏即以君受荫时君年十有四耳君虽就荫而诵习不辍博览载籍尤工书法为时所重隆庆辛未除后军都督府都事五府惟后府号为烦剧君名家子习今昔之故凡一切门卫之闕防符验之稽发文移之考核若其所素习者日以精力佐其长事无停阁壬申督饷于边便省其两尊人万历甲戌晋右军都督府经历闻其母李夫人病即以病自免归日侍食饮尝汤药踰年夫人卒哀毁骨立丧葬如礼既禫除当赴阙念水东先生春秋高依依不忍离子舍乃疏请终养陪杖屨晨昏温清者又三年而水东先生卒方先生之疾也君每夜祈天愿以身代比卒哀毁如丧李夫人时人服其孝壬午服阕复除后军都督府盖君先佐后府有声故主爵者以幕篆畀之君益为厘奸剔蠹积弊一清君虽一意効职然念其先大夫尚藁葬乃从阙下上书以请上嘉其有边功予恤典如制于是君乞恩归启李夫人之兆合葬焉丙戌正月晋宗人府经历四月晋南京刑部广东司员外郎明年丁亥晋四川司郎中南中诸曹多称闲局独爽鸠之属主谳狱或时治爰书君所受谏咸辅法而行不任己喜怒为重轻不徇人爱憎为出入一时称明允焉南土卑湿入夏瘴热君北人久居为所中遂以疾乞休庚寅春疾复作忽召鉴等语之曰吾生平无以踰人但谨慎廉勤不忝先人耳若輩勉之毋墮家声也诸子异其言然谓君方壮年又素健可期勿药而君竟不起矣是年七月廿八日也距生得年四十有九娶谢氏都御史淮女赠孺人先卒继李氏叅政玳女封孺人子男五铨官生娶冯氏知县治孙女早卒鉴廩生娶屈氏都给事中伸孙女继王氏监生良翰女钦娶韩氏同知埧女俱谢孺人出铖聘田氏叅政乐女李孺人出盞侧室李氏出

女三长适通判胡思恭子庠生守寅次适举人于登龙子知章俱谢孺人出次字前兵部尚书郭公干孙茂然李孺人出孙男二洛济俱铨出状称君恬淡寡嗜欲自少不亲声妓与人燕饮未尝及于沉酣于族人之贫者能以缓急周之有纷辄为之解故其卒也远近亲疎无不悼惜嗟夫以君之才行岂不能自致青云而所得乃仅仅若此如天道何然鉴也多才而诸子竞爽则天之报君者尚未艾也鉴等将以壬辰二月某日葬君于勅建祖莹之次予为志其大而系以铭曰禄以世乎君乃仕仕浮于禄乎视君履位弗当才胡以止寿弗配德胡以死公侯之后复其始不于君乎于君子

茂才槐征王生墓志铭

王生卒其父鹤程君走书于予圖所为不朽生者嗟乎嗟乎予方冀待生以不朽而生乃待予以不朽哉悲哉盖每想象生生平而泪淫淫交睫笔阁而不得下也悲哉悲哉造物者何以生生又何以死生哉生之先为饶阳着姓奕世载德以至于今其先有名让者得遗金于路携以适市大呼里巷中卒得其人归之人服其义祖文学举嘉靖庚子乡荐令延津清介方严有惠政延人俎豆于学宫官行太仆丞父即鹤程君命嘉靖甲子与予同举于乡者刚毅有其父风生幼时祖太仆公奇之曰此子神情雅亮当是后来之儒因名曰亮芳字以槐征盖取王氏槐堂之意也万厯戊寅鹤程为生求婚于予予许以次女字之时生纔八龄耳岁丙戌予女归生生亦时时过予舍择言而发择地而蹈粹衷雅致有先民之矩焉久而察之即造次未见其有疾言遽色者予心异之戊子试有司为博士弟子庚寅鹤程遣生来受学于贞复杨先生由是恒止予宦舍每自杨先生所来輒充然若有得者日坐斗室中手一编伊吾不辍予尝谓生流水不腐户枢不朽久坐久视皆能伤人非所以疏鬯形神而导引和气也生颌之然亦饱食后散步中庭而止其沉静如此生家饶裕而自奉甚简澹食无兼味衣不重帛一切声色不入其心质任自然无所矫饰性至孝母李卧病阅岁生日侍起居奉汤药寒暑无倦容比卒朝夕哭奠号踊数絶寒犹寝苦呕血不已思慕之极至默祷于母期以梦寐相见而自屏于静室以俟闻者悲伤其志焉生资性聪敏为文多奇气而居尝恂恂意有以自下者接人以礼遇臧获有恩即宗人至桀傲者亦望之而内愧折服也语曰天道与善人以生行事所谓善人非耶乃素强无疾一疾而逝遂不可掇药所举三子相继而夭今所存者两弱女耳嗟乎既促其生又絶其世天之报施何如哉痛哉痛哉生生于隆庆辛未五月十有五日卒于万厯壬辰十月六日得年二十有一耳卒之日识与不识无弗流涕即村妇羽流亦且有凭棺而哭者呜呼此可以知生矣鹤程将以癸巳岁三月十五日葬生于祖莹之次因志其槩而系以铭铭曰谓仁不匮而祖良吏谓才必试而生国器岂造物兮忌完胡大命之奄至吁嗟乎倏来若寄倏去若弃閭閻重泉千秋永閟俾也不亡太史之志

潼川守桥南胡公暨配周宜人墓志铭

潼川守桥南胡公以嘉靖戊午卒于官后十年隆庆丁卯而公子应辰举于乡至十五年万厯壬申始卜地于冯家冈葺葬事明年癸未应辰举进士官户部主事满考赠公

为奉直大夫配周为宜人既而应辰由户部晋四川按察司副使乃手叅伯吴公明卿状请志公暨宜人墓而铭之宪副君子礼闈所举士也谊不得辞按状公讳希瑗字子翼别号桥南其先世有烈者仕元为襄阳守占籍通城之白马乡后由通城徙居大冶自寿二始寿二生道贵道贵生守高守高生文瓚文瓚生玉堂玉堂生遠是为公父东泉公胡氏世隱于农自东泉公始业儒以儒名娶于孙而生公公生而美丰仪颖异秀发比就塾师日记常数百言邑有宜山令周公者见而竒之许字以女即周宜人也周公有人伦鉴公以此喜自负益肆力于学为文有竒气补邑诸生每试辄冠其曹名大起嘉靖丁酉举于乡明年试南宫不第去游太学诸海内名士交驩公者咸自引以为弗及即公自视亦不出诸名士下也归而愈自奋周宜人复从舆之乃深入白雉山中携其弟常州公希寅与宜人弟宪副公大烈以经术相授受无间寒暑比两公先后得隲而公犹不第壬子当计偕东泉公语之曰若第也不至今日至今日不第命也若不能俟若命又安能俟吾年乎公跪受教明年癸丑复不第乃投牒铨曹授四川巴州知州公为具冠服谋奉两尊人就养宦舍比归而东泉公已先逝矣公大恸曰儿所以隱忍徼一命者谓何而翁弗逮也号而絕絕而苏哀毀骨立人服其孝服闋补四川潼川州潼川地冲而土磽民贫甚苦供应公曰吾安能瘠吾民以称过使客也厨传廩饩一从节缩民甚便之俗故善讼吏緣爰书为奸利公列两造于庭词组辄得其隱情是非立决吏抱牍受成事无能上下其手黠民懷讼牒徘徊公门不敢入讼为之清州有盐井盐有税课富者擅其井而匿其课贫者井已前废无所得课课岁以逋公里设一长俾按里而稽井按井而赋课逋课乃集时重建三殿采木使者期会甚严有谋伐孔庙前数百年大木以应令者公持不可择胥吏有干局者董其役庙木不毀而所得材木较比邑独先御史某者罢家居势张甚诸豪奴怙势凌轹其乡挠守牧权公察其尤黠者绳以法无所假借诸奴遂戢公在潼川踰岁其善政不可殫述其槩如此两台使者交荐其贤期大用而公病病三月而卒卒之日州人为罢市巷哭涕泣送輿衬还此足以知公矣周本宦族宜人祖父皆仕宦于时其归公也资送颇饶宜人顾淡泊无所纷华若素居约然者性柔惠处诸姒间下逮臧获无尊卑少长各得其宜公上春官游成均读书山中宜人洁醴精饌以奉其两尊人能顺适其意如公之在侧也即公亦谓吾有妇在犹吾在两尊人侧也其一意本业不以家累分其念则宜人之力多矣宜人既以身任子妇之事又诸所举子女皆躬亲乳哺之劳积瘁成疴遂疾作乃谋为公置副室公不许第广延医药竟不起先公三年卒公生于正德癸酉卒嘉靖戊午得年四十有六宜人生正德丙子卒嘉靖乙卯得年四十子男五人宾廩生娶尹氏曹氏继汪氏廩早卒定娶许氏宸即宪副君今更名应辰娶袁氏封安人窠廩生娶黄氏女四一适尹榛余殇孙男四允淳定出允忠允恂窠出同祖应辰出孙女十人向露刘子楨吴正经尹士翹向日鸣萧世聘李胜荐其婿也余尚幼铭曰学也而时不能待禄也而亲不能待仕也而身不能待噫嘻胡公其真不能待耶抑将有所待耶有子而昌先德用光三十年后双玉偕藏噫嘻此公之所为有待者耶

南京刑部尚书行庵陈公志铭

大司寇陈公讳其学字某别号行庵登州蓬莱人也陈之先为宁国宣城人其五世祖靖献公迪当建文时为太子少保礼部尚书靖难兵起抗节不屈与其配管夫人并六子七孙同日死幼子珠生甫五月乳母芮潜置沟中得免至八岁为怨家所讐文皇帝特宥其死诏戍抚宁寻徙登州遂为登州人又三传而生鼎即公父大竹公也登弘治乙丑进士为给事中以疏劾权珰系诏狱嘉靖初用言官起家累官应天府尹廉介刚正所至有声称以公贵赠都御史母某氏赠夫人公生有异质博闻强记为文切理一铲浮靡之习嘉靖某年举于乡甲辰成进士授行人诸士或广交修名公独沉静自守闭门不事趋谒太宰许公松皋尝语人此君悻直大有乃父风节丁未选湖广道监察御史纠弹不避权贵缙帅陆炳倚势作威纵诸校乘涂绎骚道路以日至自立钱法禁民间钱不得行民为罢市又使其私人徐某结京山侯元专擅盐利以挠鹺政人无敢言者公数其罪亟攻之有诏下徐某狱而责炳元各对状事虽得释而权奸凜然敬惮之戊申巡按两淮盐法两淮盐利甲天下弊窦百出公廉得其窳要为四事上之悉报可公在维扬职以内无言不行职以外无事不言如请增通泰之堰清过淮之税减余盐之价值禁江滁之私贩种种皆一时实政而总兵李某纵容羣盗则有疏奉御王某骚扰驿递则有疏于吕梁二洪夫则疏其额设之滥于河漕二大臣则疏其迁转之非诏皆允之庚戌升陝西按察司僉事镇庆阳复升榆林叅议敌人惮公威名敛不敢纵公亦严为之备五载秋防边境无事而所缮修边堡两镇赖之某年升兵备肃州副使时哈密诸夷倡乱公躬擐甲胄出嘉峪關三百里直抵炖煌防其猖獗边關恃以无虞升本省叅政守花马池秋防者三无饮马之寇其为敌所慑服若此寻升山西按察使晋左僉都御史巡抚大同是年适谿达乌绅入犯左卫公督将军刘汉等亲冒矢石并授方畧斩首捕获甚多遂遁去癸亥升右副都御史巡抚陝西适北兵入中部洛川等处公督叅将孟鸾大败之斩首百余人先是韩藩初建岁禄纔六万而宗室日繁渐增至十二万岁额不及其半积逋至六十万至是奉国将军融燿等百四十人至会城大噪公不为动徐檄藩司借帑金四万七千分给之又疏请留贖罚盐钞年例课税诸银以賑其急并列其状得旨悉如公议而废融燿为庶人既而融燿不受诏逐逮者且执平凉知府祈天叙毆之百姓恒扰竟言诸王子反卒之不动声色戢乱而正法者公之力也某年以本官总督南京粮储公条上三事皆切漕务至请本折兼收民尤以为便寻升户部右侍郎兵部左侍郎总督陝西军务以考绩升右都御史兼兵部左侍郎总督如故敌兵大举入花马池等处号二十万公提兵御之斩获三百七十余人会别部偏将有亡失士马者词连公公归待勘事既白即以原官总督宣大诸军务适丘富等入犯宏赐堡公督赵总兵迎战败之斩首一百七十有八议者以公久歴封疆乃诏理京营戎政复升南京刑部尚书以积劳三上疏乞罢政上悯其劳特予致仕公自藩臬至制府身不离塞垣先后擒获至九百有奇招降二千三百余人夺获马牛器械甚众修完墩台凡二千四百余座缮修濠墙凡八十四里又五万四千余丈修筑营舍

凡六千余间加一品俸荫子侄各一人赐金币者九声闻敌国名在海隅而退归田里絶口不言兵事门巷萧然课耕课读之外无一切声色之奉若初未尝显贵者耕入有余则倡族人剏大忠祠以祀靖献京兆两公其又余则市学田以周士清风笃行望庐者式焉两台使者荐剡无虚岁天子嘉之予月米特赐诏存问万厯二十一年正月十日以疾终于正寝距其生某年得年八十有奇配王氏封夫人先公卒子一人登庚午举人真定府枣强县知县娶梁氏封孺人孙男九梦琛官生娶王氏梦玮庠生娶郭氏梦璵梦珍梦琦梦璘梦珑梦璟梦珩咸业儒孙女四诸所嫁娶皆名家先王夫人之卒也已诏司空营墓公讣闻天子悼惜俞宗伯请命合墓致祭如例仍赠溢恭靖哀荣之典终始有加焉人登将以某年月日开王夫人之圻庀丧事而手公行状俾予志之予与公素昧生平而高山在前久切仰止敬广询故老博采故实志其大者如此而系之以铭铭曰矫矫靖献壮节凌虚一死自誓百口为屠天遗其胤帝悯其孤再迁海上以备执殳公侯之后必复其初亦越三世陈宗以吁直哉京兆舍命不渝司寇继之益弘令圖猗欤司寇蹈道而趋守高似拙直己若迂峩峩冠豸触彼城狐风生白简勇伏青蒲于藩于臬载驰载驱望高分陝功着防胡获丑执讯獬豸于除一月三捷王恂用紆崇墉言言边陲宴如公不言劳敛而若无维帝念功晋理戎枢爰正八座于彼留都人期秉轴公志悬车东山归卧奚以自娱朝耕暮读左圖右书醇源既竭维醑则醕畴哉边臣身不处腴畴其若公家无赢余畴哉世宦众不苦渔谁其若公为德于闾先民矩矱后世楷模哲人其萎天子悼吁易名营兆皇恩载敷寂寂玄堂妥公之軀史氏有铭用比钟鐻以阐丰功以敦薄夫

叶梦林暨配常合墓志铭

嘉靖之初德郡洞庵叶先生以进士为名谏议而吾邑中水常先生亦以进士为侍御史两先生举同籍仕同朝相得至驩也谏议有子梦林公者今阳城令敬愿父也生而颖异年十四即补博士弟子有声称谏议最怜爱之而是时侍御长女亦以婉孌贞静为戚党所重谏议为梦林公委禽焉是为常孺人公固名家子乎而雅自敛饬躬素士之业闻常富于财心不谓善比孺人归服御简淡无所纷华始喜曰此真吾妇也公性沉重居室无惰容与常孺人相敬如宾事谏议及母张备极孝养遇疾病相与调汤饵浣厕踰或共祷于天祈以身代以是危疾辄安比先后歿执丧哀戚甚悼敛墓如礼人服其孝公一兄四庶弟兄歿遗两孤侄事寡嫂谨抚二孤如所生各随其质而成立之与诸弟极友爱每以岁时相聚会饮食笑语欢洽弥日名其会曰天伦而孺人为具醪糈丰俭适宜且处诸媵姁间人人得其欢心无后言公处己庄而遇人恭谨意常有以自下者故与物无忤即下至臧获不加譙呵曰彼亦人子也公既久蹕有司而阳城令兄弟试辄利公进而语之曰夫立身行道扬名以显父母孝之大也吾叶自上世以功名显至予而中衰命也夫孺子勉之是当续若祖矣乃谢去举子业钥键纲纪之司一委诸常孺人兀坐一室发古今载籍读之遇格言懿训即书揭于壁久之壁皆满而常孺人亦乐闻古孝妇贞女之行以自淑及阳城令举进士公喜曰是竟予志已晚年冲夷闲旷慕陶靖节之为人其所作

梦林漫稿亦畧似之阳城令奉庭训治邑多惠爱几满一考行且有恩命逮公而公不逮矣疾且革执孺人手若永诀者孺人先抱微恙公既卒哀痛特甚越三日亦卒公生于嘉靖三年五月二十日卒于万历二十三年十二月十六日孺人生于嘉靖三年六月十五日卒于万历二十三年十二月二十日享年俱七十有二子敬愿即阳城令万历壬辰进士娶曾氏陝西苑马寺少卿鉴女继石氏黄州知事岱女程氏江西右布政使珣女堵氏处士一松女敬思廩生娶王氏武安簿窠女女三一适庠生张近思一适赵守基一适鸿胪序班丁庚荐孙女五敬愿生者一许聘庠生赵见熊敬思生者四长适庠生李之盛次适瞿胤荣其二尚幼敬愿輩将以万历二十五年某月某日合葬公夫妇于州南祖莹之次而以方伯静泉程公状来请铭程公举嘉靖壬辰进士耆年硕德海内无两所言当不妄予谨按状志其畧而系之以铭曰父为大諫青琐趋于繇高第宰名都维公韶年读父书居丰履约恬以愉内行谨备称醇儒亦有淑配名家姝如宾之敬老不渝生也同室死同徂玄堂郁郁风气殊双玉偕藏妥其居我铭于石词匪谀昭德阐幽为世模

嘉议大夫巡抚山西都察院右副都御史临江李公墓志铭

大中丞临江李公卒之明年其子重光輩以公弟西江公所为状诣予言先大夫仕宦几三十年其治行在人耳目卒以微文诿吏议至不得徼恤死之典为地下光荣惟先生志而铭之先大夫死且不朽予辱交公兄弟不敢辞公讳采菲字君采别号临江其先江西新喻人永乐中有戍沈阳中屯卫者遂家于河间高祖荣荣生琼琼生平定知州锐琼锐俱以公伯父叅戎公贵赠昭勇将军都指挥僉事琼配张锐配高董俱淑人锐两子长即叅戎公某次涵即公父也公生而警敏十岁能属文总角为弟子员明年廩于庠嘉靖辛酉举乡试第八人与其祖锐先后辛酉同名第又同人咸异之乙丑成进士授行人丙寅册封德藩隆庆丁卯赉庄皇帝即位诏于留都江右及广之东西戊辰今上为太子复赉诏于畿之南山之西车辙几半天下于馈遗无所受事竣丁内艰庚午服阕选四川道监察御史辛未清戎關中万历甲戌巡按西域所至俱以风裁称而在粤尤表节义兴学校不独用威严也丁丑掌河南道大计外吏汰斥惟精既乃升陝西副使分巡河西河西地邻敌公所为安边固圉计者甚备戊寅升山西行太仆寺卿兼整饬宁武兵备踰年以外艰归公之行也两地人皆遮道泣留其得人如此壬午起甘肃行太仆寺卿未几升山西布政司叅政分守冀南道越四日改冀北时款议久疆事剗敝公为积刍饷简卒乘常若有意外缓急之虞者从容愉愉边境无事屡荷金币之赐乙酉以积劳升按察使视事如故丙戌升本省右布政使戊子晋左布政使巳丑以考最得赠其祖父如其官祖妣妣皆夫人即以其年升都察院右副都御史巡抚山西公在晋久于閭阎疾苦长吏贤不肖边關隘塞夷情向背如烛照数计故诸所措注无弗当机宜协輿情者先是矿徒张守清聚众豪里中公恐其久而犷悍也编其众而什伍之会大瑯祀五台者有所要求于张意弗■〈厌外足内〉归为上言守清作奸状上间以语辅臣闻者因劾公纵寇殃民诏公归公归而代者捕守清于狱讦之无事实竟死狱中又二年行边者复言公抚晋时曾

以公帑充私遗坐是落公职夫抚臣握兵柄力可以制强敌顾难一矿徒哉第抚臣以抚为职者也业已抚之而复殲之此喜事之臣公不为也至于以境外之交束修之馈为公罪则其罪益薄矣盖事有所不可已而罪有所欲加势有所必至而谤无所与分公亦安之而已公家居日惟教耕教读一觞一咏以自适若初未尝显仕者又数载而卒是乙未八月二十四日也距生嘉靖癸未三月二十八日得年六十有三配赵氏累封夫人子男四重光娶段氏诸生承光女重庆庠生娶伏氏安阳簿士毅女重熙庠生娶王氏万泉令菴臣女重华庠生娶朱氏庐州司理世禄女先公卒孙男一人道基重光出孙女八人重光辈将以丙申年某月某日葬公于新卜之阡予既志其畧而复微着其事于铭铭曰李氏之先出自江右北迁于瀛遂称华胄李起戎籍后兴于文谁其兴者曰平定君平定有子仍奋厥武桓桓参戎阃如虓虎至公兄弟益振厥宗巍科接武公则其龙筮仕太行敷宣王命暨冠惠文能平其政清戎秦徼按部粤方绣斧所指春雨秋霜丁丑之春大计吏治公核羣品众受成事遂为怨府遂为祸梯一麾而出分宪河西延邠之区是循是拊饷盈于庾士腾于伍既迁宁武则以冏卿备兵兵饬考牧牧成再起仆臣于彼张掖世需公才乃晋参伯两冀之任维公宜之两冀之民惟公绥之酬公之庸进公于位秩长宪台宦仍朔地终畀公晋以慰晋人右辖左辖锡命重申三载承宣曰民父母升华中丞保厘西土人望方系烦言载兴为市之虎为樊之蝇公曰噫嘻惟有归耳以微罪行臣愿足矣优游容与乐彼林泉欣欣易箒终其天年公生矫矫长身玉立人言台鼎需次以入抚臣尊贵未究公才方期论定遽返泉台郁郁佳城于瀛之野我铭公石俟知公者

明太子太保平江伯赠少保谥武靖万峰陈公墓志铭

万峰陈公卒之明年其子胤征暨长孙启嗣以太原守徐君维楫所为状来请铭状称陈氏之先系出有虞自胡公封陈以国为姓陈公子入齐遂雄山东六朝时有入金陵者复为金陵人后从金陵迁濡须坞又卜葬神龙乡大蜀山之阳故又为合肥人始祖瑄以功封奉天翊运宣力武臣特进荣禄大夫柱国平江伯卒赠平江侯谥恭襄五传至太保兼太子太傅赠太傅谥武襄公圭即公父也娶张夫人而生公公生而英迈不羣自武襄镇粤即随侍行间习兵事及地里险易声望蔚起嘉靖乙卯袭祖爵丙辰金书后军都督府事戊午管禁兵侍直庚申充总兵官镇守两广时逆贼张璉伪称号所至攻城屠邑杀掠甚惨三省绎骚公会提督张都御史臬调发汉达兵及诸土目十余万约江西南赣福建三巡抚兵为犄角躬擐甲胄亲抵贼巢前后擒斩璉等一万四千三百八十名级获贼属一千九百夺回被虏男妇八百八十招降一万五千余人得伪飞龙传国之寶一器械马牛甚众露布岁凡十二上肃皇帝嘉之赐白金文绮晋太子太保荫一子锦衣百户公用兵务在明号令严法纪使人不敢犯有土兵强市人物者即馘以徇土酋凜凜至斩其兵以谢过乃已贼既平议者谓近贼之民阳顺阴逆不除之无以善后公力持不可议乃寝所全活凡数万人是时倭势张甚诸将遇者往往不战而溃公先所擒斩倭至七百七十余名颧倭畏之比兵行度岭倭有前据岭者众谓此残寇也胜之不武不胜且损威

公曰吾提大兵荡巨寇顾避小丑不击耶麾其兵进距岭一舍止令诸军蓐食接战倭侦知为宵遁去隆庆庚午命左军都督府事旋提督神机营时营制新定公请置协理立备兵所为区画甚悉未几复充总兵官提督漕运镇守淮安万历甲戌掌前军都督府事方公之镇粤讨贼也深入山箐为瘴疠所中遂患痹疾每举发至废朝谒因请假调理又十年以疾终于正寝是戊戌八月二十七日也距生嘉靖壬辰三月二十四日得年六十有七讣闻天子为辍朝治丧葬予祭十五坛赠少保谥武靖盖备典也公性孝每公退必先诣张太夫人问起居始就私室凡赐予及岁禄租入悉以归太夫人室无私藏待诸弟妹亲族恩义笃至俟公举火者至数百人元配崔夫人驸马都尉京山侯元女继柴夫人太医院吏目英女子十四人胤兆勲卫娶张氏英国公溶女继吴氏恭顺侯继爵女崔出先公卒胤征锦衣卫指挥僉事娶李氏安国公伟女胤嘉娶孙氏恩荣官清女胤芳娶柳氏安远侯震女俱柴出胤望胤暉胤美胤光胤大胤丰胤隆胤禧胤祉胤吉俱侧室出女十一人宁晋伯刘应元锦衣卫百户徐维扬成山伯勲卫王允廉锦衣卫千户黄时谦锦衣卫百户王椿顺天府生员王懋赏真人应袭张显祖其壻也余未字孙男五人启嗣袭封平江伯启奕兆出启善启庆启德征出女孙十四人孙壻则新宁伯勲卫谭懋勋武定侯勲卫郭应麒锦衣卫千户蒋绍周庆都伯子杜惟孝宁远伯仲孙李懋忠余尚幼胤征辈将以某年某月某日归葬应天府钦赐大宁山祖莹之侧启崔夫人兆合葬予为叙其大者而系以铭铭曰陈自恭襄起江东开土肇建平江封联蝉奕叶称亢宗公也绍之业弥隆桓桓武畧如鬲熊入典禁旅出总戎创倭灭寇成肤功捷书飞奏愜宸衷骈蕃三锡酬其庸俾公灌输佐司农长河巨舰泛秋风千仓万庾靡弗充维公所至咸靖共蛮烟瘴雨瘁厥躬十年抱疴頤天冲优游返真归太空天子闻之为悼恫赠赙易名恩始终大宁赐域形穹窿官与营之祁连同史臣载笔铭公宫千秋万■〈衤 冀〉无终穷

明文林郎河南道监察御史南滨陈君墓志铭

陈君讳登云字从龙别号南滨顺德府之唐山县人万历丙子举于乡明年丁丑成进士与予同籍予始识君于侑人中见其论议慷慨有烈丈夫风谓此少年英气耳徐叩其中则古今善败犁然毕具下笔滚滚数千言可立就问何以能尔君曰吾少病痞百疗罔效为家大人忧窃自念痞者否也可以通否惟穷理乎因下帷日发诸载籍读之更无他念盖二载而病如失遂有今日予笑曰固不闻书能疗疾君既以此治身矣今渐服官可以此治人乎君亦笑曰吾志也誓必不负予壮其言戊寅除鄢陵令君至鄢见细民苦于豪强文法舞于奸吏冗费无节赋役不均田野荒芜学校颓废河水为患流亡载涂叹曰此一邑之病也首黜积役数十人捕所谓五虎者置之法躬履畎亩度境内田为三等赋役以是为差变大班坐月为会银岁所省以若干计令讼者得以垦田赎罪所垦岁百余顷为建屋宇置器具牛种以招复业者来者既众复教以种植桑榆以益其生业洪沟青泥诸河为扶沟所壅岁溢为灾即力争于部使者卒令邻封毋得壅激而河患顿息斥俸余捐赎醵新学宫给学田兴除之外一意以教化为务详见绘德吟仁编及政事纪畧

中癸未拜监察御史君为御史初按辽左次按晋后按中州按辽时适当大阅上罢遣大臣以属君君为悉心稽核条上安边十事而其所特疏者在议赏功之典大畧言首功之赏给发不时贫军不能枵腹以待不得不鬻之富人富人挟其赀以冒功累级多贵至叅游者此其人力不能御敌智不能谋敌而冒滥名器混淆体统役占军士糜费俸给边镇之蠹无大于此在晋在中州值岁大饥晋人犹以木皮草根杂土为食中州则父食子夫食妻以人肉为市以鴈粪为粮矣君皇皇然为请蠲请赈请弛山泽之禁请借留都之储天子手其疏惻然动念为发帑金数十万以至宫闈寮寀咸捐赀捐俸佐之而君亦自清赎金得万三千为郡邑余本至今为豫人利盖辽左之冒功如人有痼疾牢不可破而晋与中州则譬人病疴羸奄奄待尽非急扶其元气不可复生故君先其要者如此若夫约己率属激浊扬清则君丰裁尝有余勇不能殫纪焉矣君居西台先后侍经筵监会试主计吏筦京畿壮懷直气霜肃风行有触必言有言必尽如疏论陆冢宰罗宗伯徐冏卿胡都谏郑戚畹多人所不肯言不敢言者无所避忌予谓君立朝以正直忠厚为本兹不太甚乎君曰不见吾冠乎触邪吾职也若事關宗社祸伏隱微吾知而不言则吾瘡将复作死矣岂必机穽之间斧钺之下能死人哉君独立行一意大率若此信阳王太史素不识君见其祈天永命疏嗟嗟叹赏谓为隆万以来名臣奏章第一忌君者争欲甘心于君而主上明圣竟无微谴加君者君几满九载推少京兆廷尉丞俱不报君度不为世所容即以假自劾归君所居当孔道行李往来慕君名多就问者君虽抱疾犹喜肃客每语及时事意有所不可辄不胜愤至强起坐榻上语刺刺不能休以是病转增予尝贻书戒之谓身既隱矣自宜杜门谢客不当复问理乱黜陟事君是之而不能从也病剧犹口占云一死宁堪惜终懷世道忧谤从直上起官耻曲中求因索竹叶茶啜其半以其半酬地曰天下事尽付此杯中矣遂卒是万曆丁酉六月二十五日也距其生嘉靖庚戌七月二十八日得年四十有八耳君严于饬吏治而厚于恤民隱急于崇节义而勇于折奸雄使竟其用则其敢为敢当之才不回不挠之气将大有所树立而有志未就竟郁郁以死盖君之少也瘡在一身通塞之权自己操之故塞者能通而君病已君之仕也瘡在世道通塞之权不自己操故塞者卒不能通而君病死柱石王君状君谓君忧国忧民死而后已信哉君性孝友闻太公讣水浆不入口者三日哭泣几至丧明事太孺人能先意承志陈之先本柏乡人张姓其姑有适陈氏者无子以太公为子遂从今姓君既通籍言于太公请归其宗太公以受陈父恩不许君不敢复言乃构祠堂一区置祭田二百亩择近属二人主祀事又割腴田百亩贍其族以报陈复置田三百亩付工本牛只银百以报张匾其堂曰景范蓋慕文正公而思效之也至其所置义仓置学田置义塚种种厚施不可枚举呜呼君岂一于謇谔者哉君父志大封文林郎鄢陵县知县母施氏封太孺人配张氏封孺人子二诰廩生娶柏乡魏上舍大用女司马槐川公之孙女也诏娶内丘庠生乔国英女女二俱夭孙女一许聘南宫周太守友程子某诰辈将以岁己亥某月某日葬君于泝水之阳而以状来请铭予谨拭泪为志其大者而系以铭曰矫矫陈君雄才迈众性惟伉直心

则空洞志厉鹰鹞政成鸾凤鸾凤伊何加惠穷民视彼痍瘵不啻切身冬日比爱乳哺称仁鹰鹞伊何澄清揽辔有轮斯埋无器可忌白简生风乌台树帜世尚媿阿疑君若刻读君之疏孰不动色太史有评可称遗直上竞贪残下苦雕瘵以拊以循繄君是赖小民有编何惭遗爱道之将行君瘡乃痊道之将废君命弗延于人何尤行止惟天自君大还时政日秣使君而在徒益其瘡吁嗟陈君可以死矣

陝西布政使司左布政使云田甯公墓志铭

甯公卒其子元桂以大司马懷棘王公状来请铭予与公同举进士同宦于朝公齿少于予而一旦溘焉已矣反复公状盖泫然陨涕焉公讳化龙字文明别号云田保定新安人祖志本父节俱以公贵赠封中大夫山西布政使司右叅政祖母龐张母吴俱淑人公生五岁始能言比就外傅一意问学十一能文十四补弟子贡十八廩于庠万厯丙子举于乡丁丑第进士戊寅授中书舍人已卯册封周藩辛巳以考最封其两尊人壬午升工部都水司贡外郎视慈宁宫养心殿诸工程夙夜勤事有上方膳醴之赐旋以大庆恩加封其尊人如其官甲申督理京城街道卽以其年榷税荆州公至荆主在禁奸节费通商惠民比得代课无溢额橐无私装荆之人士为诗歌以颂之丁亥督修胡良巨马二桥日与中贵人处调停节缩不激不随工竣赐白金文绮晋虞衡司郎中加俸一级公主虞衡一切规画厝注诚心为质为大司空所倚办声称藉甚己丑升山西按察司副使备兵赤城赤城密迩边疆青巴图安图诸部环其外而史车二夷处其内为边陲重地公为明约束严号令惩偷惰之习清虚耗之蠹凡所经理悉绸缪大计谓龙门要衡独石隔遠裨将一人难于兼制白于部使者增叅将一人分守其地庚寅史车二部逸出塞议者纷纷遂至易置诸将吏乃移公潼关公无几微见于词色卽候代犹日督将士严兵保境若寇至者未几史酋率所部寇龙门公督游击杭大才与战于唐子冲擒酋女所捕擄斩获甚众详见督抚疏中公既至潼关念关地据黄河上游控制三省秦之襟喉急以暇日塹山堙谷练兵积饷关若益雄而盗贼屏息壬辰升山西布政司右叅政理屯粮核逋负满三载升陝西按察使适当计吏其臧否一裁以至公盟于神誓不欲以爱憎为毁誉戊戌升山西右布政使己亥升陝西左布政使以便归省抵家而疾作遂卒时己亥年又四月四日也距生嘉靖己酉十二月一日得年五十有一耳公小心勤慎所至以精勤举职敷厯藩臬不越秦晋熟知其民风吏弊邊事敌情使其不死卽当秉中丞之节以大造于彼民也而公不逮矣惜哉先配王氏累赠淑人继杨氏累封淑人子元桂生员娶杨氏元材殇女二一适戶部尚书高公耀子某其一殤元桂将以其年十二月某日葬公于邑西三台之原启王淑人兆合窆焉予为志其畧而系以铭曰宦非不達厥施未究年不称天未为公寿胡赋之良胡折之驟胡是厚积而乃俭受三台之原郁然灵秀以妥公神以昌公后

明交河簿秋潭孔先生墓志铭

先生讳宏绵字某别号秋潭宣圣七十三代孙也父廩生承布母某以正德己卯十二月初七日生先生始就外傅俨如成人稍长一意攻举子业居常不见有媠褻之容声

称藉甚顾数试数不利久乃以明经贡阙下游太学太学诸士皆严重先生多乐与交者隆庆壬申投牒铨曹除吾邑簿簿为河设其分署在邑东五十里泊头镇河运之滨故自行河外一切钱穀刑名事皆不得与旧官是地者厌其闲曹往往取民间细事讯之责其贖缓又镇在往昔犹有商贾贸易歲输郡税者数百金皆簿司征纳而征收之际率多取其羨金以为常然非其职矣先生莅事日惟以河为务春勤修筑秋谨堤防闲则闭门习静不越俎以自润诸浅夫役故有例金悉谢絶之人服其清邑志谓其器宇清雅内行修洁不受民词不取商货不受常例盖实录也然性端方不能为媵阿之态邑令某喜人谀已谓先生亢恨之遂以大计落职一时士民嗷然为之不平先生归年日益长家日益贫至不能继饗殮予每为宦东土者道其廉亦间有凋之者不数数然也然先生处困而亨犹日手一编以终其身云先生卒于万历戊戌十二月廿五日春秋八十配王氏继颜氏再继王氏子闻博娶张氏闻贯娶某氏皆先卒女一适岁贡生王云鹏孙贞宪娶孟氏贞惠生员娶任氏贞恣娶孟氏曾孙男尚宾一尚幼贞宪等将以卒之明年四月某日葬先生于祖莹之次而以其遗言走京师征予为铭予读其书而悲之为志其概复系以铭曰潭之水清以洁秋之潭清且冽吁嗟乎先生之号实先生之节世人巧宦先生守拙洙泗之裔其流自别吁嗟乎水可饮蔬可啜先生之名不可灭

抚治郟阳都察院右佥都御史蒲汀姜公墓志铭

中丞姜公讳璧字完卿别号蒲汀顺天文安人世以孝弟力田为德于里里长老言此其后当有兴者及公生而驯谨长而笃学以三礼起家领隆庆庚午乡荐明年辛未成进士即以其年令乐安万历丁丑入为河南道监察御史戊寅出按两淮盐法既报命以外艰归癸未服阕出按中州以疾归丙戌起原官巡视京营戎政复巡视京畿兼掌河南道事大计羣吏公在西台先后十三年始进大理右丞寻转左晋左右少卿辛卯春晋佥都御史抚治郟阳壬辰秋有言公速化者诏改公留都公以太夫人老不复出又三年疾卒于正寝是万历丙申七月三十日也距生嘉靖庚子二月一日得年五十有七初乐安有大侠王彦飞者聚党横里中操赤白丸报讎以睚眦杀人它令莫敢问备兵使者行县索之弗能得公至召诸贼曹语之曰若輩受赇纵奸辜当死能縛王自赎当贷若辜众愿自効即共为具饮王中酒伏健儿急縛之公度已得王又虞有道劫者预勅尉率徼卒逆之劫者猝遇尉悉骇走遂逮彦飞至庭论既具立毙狱中而为教散遣其曹悉勿问众咸凛凛在邑五载威惠大着详见去思碑中其按淮上也主在杜干请剔积蠹富商倚请托为奸利者无所容其私奸商张国用刘威輩各以轻重伏罪时淮扬饥奸民以其间竟为私铸钱法大阻商贩不通百姓嗷嗷几酿大乱公檄所司禁私铸而亟发金钱万余仓粟数千賑之始以事闻所全活甚众于时黄水入淮淮大溢总河大臣与抚臣相掣肘而有司行河者率委之倖贰又有议罢范公旧堤勿修而别开支河者公疏言倖贰权轻不如专任守令大臣事权不一难责成功宜罢总河以其事归抚臣便又河口外高内下开支河则引倒流之潮辟私贩之路不若修范公废堤使内水不出外水不入外不损盐灶

之地内不伤耕植之田疏凡数百言皆凿凿可行者部覆如公言后事竣有白金之赉中州宗室最众而禄最不给或有言宜开宗学以恤贫宗者下有司议悍宗■〈木壺〉櫛輩指是为宗正■〈木壺〉■〈木挈〉罪鳩其党羣击之因聚众称乱人情汹汹公时方在道闻之即疾驰入大梁捕其谋主袁东鲁数人令武卒列伍备非常始疏陈其状有诏梟首恶而释其党中州宴然公尝言治大猾宜缓急则谋泄而易脱平大众宜急缓则党固而难安真名言也河南赎醵歲額四千后渐倍之公曰此膏脂也非刑罚严峻何至是卒疏如旧額睢陈东连曹徐西接亳颍故设有兵巡道弹压盗贼久而罢至是有议复者公言增官则增费若改清军道兼屯盐而以屯盐道移驻睢陈则事专而费省议虽寢识者是之公之主大计也疏言五事曰急先务精考核禁营馈惩贪酷慎委署虽未尽其言而无私毁誉无徇造请时服其公矣开府郟阳当恒扰之后推诚布公寬之如理乱绳而不欲操之如束湿薪地方方赖公救宁而公中口语归矣公既归犹有踪迹公抚郟时事者见一切醵金皆储以待饷议者始息公事既白念太夫人春秋高坚不复出实欲承欢膝下以娱其余年乃公卒而太夫人犹无恙也公之卒也太夫人伤之踰月亦卒呜呼痛哉公丰仪伟貌须髯如张望之者以严见惮而中无城府饮人以和盖油然其可亲也不如其貌公尝诵伯淳言掇拾短长以希直名有所不能盖终身以为则焉父师吕封河南道监察御史前母董贈太孺人母刘封太孺人配王氏即状公者王少叅夢岩妹子四绳武国子生娶王氏扬武廩生娶王氏俱按察使緘孙女经武娶马氏叅政允登女俱王出允武聘杨氏宪副应中女侧张出女五一适井郡丞济博子国子生拱极一适王大尹惟几子举人升一适郭都事可桢男庠生茂勋一适纪宪副緘孙生员于彝俱王出一许聘緘孙元翰张出孙男五长铨绳武出聘緘曾孙女次鎬鏞扬武出鎬聘杜金宪允继女次鏗铎经武出孙女五尚幼绳武輩将以二十六年二月二十九日葬公于祖莹予为次公之生平志之而系之以铭曰古人言治奉职循理何必鷹击乃称豸史夸者死职深文巧诋烈士徇名沾沾自喜公之为令父母孔迯执简西台开府南纪所至轻平务持大体不竞不絀毋随毋诡毋或馭法以纵厥宄毋或洗垢以索厥瘡公不陵人人乃公毀人之毀公公运之否以公厚积俭受乃尔于人何尤天固若此鬱鬱佳城公焉宁止太史有铭公其无死

贈懷遠將軍后泉王君墓志銘

王君后泉卒之明年其子国正畧述君生平求铭君墓道之石君予郡人国正又予武闈所举士不能辞按状君讳宗威字子重后泉其别号也其先吴常熟人有忠者从高皇帝于行间以功升正千戶后隶籍于河间沈阳中屯卫之前所忠生瑁瑁生铨铨生大海大海生机机生椿椿生燁娶于张生二子长即君也自君高祖以下世袭其职咸有能声而产渐落寞君气禀刚方任事几四十年生事益減而介然不易性孝友弱冠失怙事母曲尽色养乡里称之少孤废学恒以此为恨督其子于学国正遂举辛卯乡试第一壬辰举武进士授指挥同知把总乌龙沟君就养子舍以疾归终于正寢卒之日但云吾家

世清贫有儿幸成立其令以清白持身勿负国恩也语不及他是万历二十四年三月十四日也距生嘉靖十年五月廿三日得年六十有六初授武德将军以子贵进怀远将军配崔氏继黄氏子二长即国正今为旧州守备娶程氏次国祚娶刘氏女一适千户曹世勲俱黄出孙男五绍元维元纶元绪元胤元孙女一国正将以二十五年八月二十二日葬君于祖莹之次予为志其大凡而三叹息焉士大夫博极载籍名能文者视武胄为麤人之极致然徃徃利令智昏官以赂败辱其身及其子孙者不少矣君目不知书而能以贫苦自将俭于身克昌厥后岂独武夫即文士有厚愧哉是宜铭铭曰世之武弁借言使贪人罔极嗜利若甘徒令世秩败于贪婪君之户侯传之先世居官守法罔敢或替以暨于君自守弥励操其清白以启嗣人能俾世业愈远愈振美哉君子慎勿厌贫哲嗣矫坚持清操怀远耻荣食贫之报我铭君石为贪者告

明锦衣卫户侯连山王公墓志铭

连山王公卒其子朝英輩以乡进士胡君状来请铭按状王氏之先世为应天江宁人有政者当高皇帝时累功至宣府左卫正千户遂为宣府人政生顺顺生谦谦生鳳鳳生琳俱世其爵琳生纪纪生铎即公父也母孙氏生子三公其季也讳元春字文明别号连山公生有慧质聪敏嗜书为博士弟子文多奇气有声黉校间籍甚王氏世以武顯而公父隱于贾治产积居与时逐视诸贾人最为饶益嘉靖中歲苦兵帑藏告匱大司农计令诸富民出粟以佐军兴无应者公父慨然曰国家方用兵吾以为有力者当从事行间富者当输财如此而后事可济也乃捐貲以佐军费久之益厌薄贾道挟公走京师入粟为锦衣户侯而公亦入太学得交海内知名士相与问业名益起顾以数奇数试数不利锦衣公卒仲兄鸿胪公秉家政公益得肆力于学未几鸿胪公亦卒公以身拮据门户颇废业会恭妃诞生皇长子以覃恩授公锦衣卫百户公叹曰士固有志今已矣岂非命哉始辍业博览稗官小说习音律或与乡先生结社为诗以自娱以消其卓犖雄奇之气状又称公事亲孝能以色养病为侍药为请祷目不交睫衣不解带没而哀毀柴瘠人咸称之公即久益富而不矜夸势能之荣好行其德数散所积与贫交疏昆弟服药而效即按方制剂施之人人见野有暴骨即为立义冢埋骨掩骼闻民间痘为厉即修神祠以祈福佑其趋人之急振人之困类豪侠者而范身矩矱少或踰检即终夜不能安寝其谨畏又若此公素健偶病痰治疗罔效遂卒时万历戊戌正月二十五日也距生嘉靖己亥四月十一日得年六十配杨氏封安人先公卒子三长朝英保安州廩生娶胡氏举人守讓妹继都氏次朝携娶潘氏举人大纶女继周氏长治丞万金女次朝彦娶景氏四川副使嵩女俱杨安人出女二长适遊击李同子继祖杨出次聘总兵董一元子用贤侧室戴出孙男五长道正余俱幼朝英輩将以其年七月十有三日启安人之兆合葬焉而予为之志其槩如此因系以铭曰公幼业儒志在公交车卒業太学才杰相于荷天之宠拜命金吾有志未竟诗酒是娱富不自雄为德于闾非礼勿履择地而趋公之嗣子能读父书意公食报其在斯与鬱鬱佳兆帝城之隅百千斯年公妥其居

封工部主事龙川公墓志铭

封工部主事龙川先生姓易氏讳经文字济甫世为河间之肃宁人先生大父晟父琚皆隐处弗耀然世有质行人称长者琚三子长即先生先生生而天性孝友稍成立两尊人老二弟幼弱家益素俯仰咸倚办先生先生又业儒计无所为养者乃开乡塾抗颜严规条训诲里中弟子藉其修脯以供甘膳给飭粥又屡值岁稔脱粟之食日或不继至损张安人衣钏佐之先生犹旦暮持一编与诸生相磨切晏如也先生博学强记为文一禀于濂洛闾闽之说雅不欲猎异钓奇以趋时好故每试有司輒不售即不售而先生志愈锐学愈力暨先生有子登瀛成进士官虞部郎迎养子舍而先生犹守博士籍习故业孜孜不辍曰吾不欲以儿子贵贵我也又阅岁先生得风疾手足少废始喟然叹曰吾卒阨至此乎吾无如吾命何乃辍业受今封日进虞部君戒之曰吾荷国恩无以报汝勉之吾性甘食贫毋以乃翁故败官常也虞部君奉命惟谨故兢兢守三尺数载如一日云先生与张安人相敬如宾先生疾安人日侍汤药不少懈万历甲申冬安人卒先生意忽忽不乐比归襄安人葬事不数月先生不起矣时乙酉年十月十六日也距其生正德辛巳六月一日得寿六十有五先生有丈夫子四人长登云蚤卒次即虞部君登瀛次登高武学生次登仕邑诸生孙男七知简能亨健通从孙女二先生卒之明年登瀛等将以二月十九日启张安人之兆合葬焉而以状来征铭状称先生真率坦夷与人交油油然无崖岸崭截之态而行履矜然不为非义自少及壮曾一距奔女再距嫠妇独抱鲁男子之行乡人至今诵之呜呼先生其有隐德者耶固宜其子孙之振振盛也是宜铭铭曰先生于于行与道俱貌则若癯中则甚腴芒如醇如玄览条除世好者竽弗贬以趋美色可娱而志弗渝抱一若迂守贞若愚于戏此先民之芳矩而世之醇儒也欤

鳳翔令王君墓志铭

王君讳命字钦甫别号鹤程真定饶阳人嘉靖甲子与予同举于乡然而未识也万历丁丑予读中秘书始识君于长安见君壮懷慷慨有烈丈夫之风焉明年君求予次女为子妇予以地里辽远未应而同年刘君两峯辈关说百端至卧予寓所要之不得已许其请自是会君愈数愈悉其为人君负气自豪意不可一世予谓君君子知天下之不可上也而下之时举礼自卑尊人之道砭君君始不谓然而后乃折服也君善饮饮如长鲸之吸川大白数十可立尽予谓君烂肠之药胡可常也久之而君亦不复雄饮矣君家颇裕而自奉甚简淡然亦恹不以施人予谓君损有余以补不足天之道也行道有福君深有味于予言渐损费以周其乡人若君者可与并为仁者也丙戌春予女归君之子王生亮芳未几君遣生来予宦舍从学于贞复杨先生生聪明沉静日兀坐一室读书之外无所嗜好予笑谓君此千里驹也当不至如君久淹公交车矣戊子生入为博士弟子踰年君继配李孺人卒娶赵氏女为妾赵慧而善媚既蛊君遂恃宠无忌间窃君所藏金赂诸臧获既久而中外臧获无非为赵者生惧伤君意不敢以告但乘间言古云朽木不可为柱卑人不可为主父何不立继也君颌之旋以语赵赵大恚恨始厚赂诸臧获为魇镇符

不效则市毒置食中以毒生与予子女食少但病卧得不死生食多病遂甚不能言然犹能于床褥间顿首指口求饮赵禁不与饮遂死既死而君不悟也赵喜得计益以厚赂潜纳他人弥月子为子而君不悟也君弟顺庵君为君备道其事而君犹不悟也比赵死前事悉露检视藏金悉归乌有盖君始悟而悔恨已无及矣先是君举三孙皆相继夭至是遂无嗣君才高既不售亦无意仕进会有言惟积德可以育子惟仕宦可以积德者君欣然投牒铨曹除鳳翔令因搜其家余金橐而之官比履任一主于节爱尽减诸供应不以烦民直指行部至仅具廩饩且自言邑民贫甚令不能加赋以饰厨传令当罢去直指大駭既而廉君治状语诸守巡曰令古人吾侪当共调护之俾行其志君以此益展意自信邑之驿骑每为往来者所倍取或倍索其直折辱之君乃置籍于座右按牒而给竟无敢多索一马者岁所省凡若干金郡邑岁时公宴旧皆倚办里甲猾胥因而干没其中君省见年诸役悉令归农而计费授直平市之民所省复若干金公用器具一切出入司之者不敢问时苦赔累君白于守自掌其籍计籍以出计籍以入终岁不损一物所省复若干金而站粮之新派丁力之加派者悉从豁除矣两造具君但判其曲直不科赎醵薪俸所入别贮之日询民之耕不能具牛种织不能具机杼者贫不能婚嫁者逋官租久系不能偿者咸以多寡周给之俾各安其生业邑有尼以妖淫败俗君为逐之出境而询问风俗表扬贞节礼敬士夫作新学校以端导民之路邑之审编旧必浹月既竣而告者纷纭以为常君裹粮躬歷诸郊随民所聚以次审之八日而毕民不费一钱无不欢然服其公者郡东雍水所注每暴涨行旅阻絶君出橐中金办材鸠工旦暮往督之未两月而石梁成详见剡桥碑中大都君视民如子稍有痛痒即思为爬搔之抚摩之视官事如家事靡利弗兴靡害弗除薄于为身而劳于为民苦于厚下而俭于奉上蓋三载如一日关以西语循良者必举君为高第戊戌入计即骑乘皆自其家备之萧然仆隶数人而已既而镌君秩一等陝之藩臬士人皆错愕从役为之号泣予诣君问故君曰吾不能善事上官负罪实多大人长者时或见原独恤刑使者移檄治衣费可五十余金吾妄意使者奉命恤民非以剥民也未有以应不意其不大人长者也今牒具在疏言于朝当与两败矣然宁人伤我吾无伤人吾实以拮据病困緣是得归幸矣予闻而喜曰君心如是当有佳儿君既归竟不能遣诸胥中意忽忽不乐疾遂作予闻遗书慰君曰君勿以功名介意夫利泽及人之谓功声闻长世之谓名此两者君已得之于凤民无庸介意也比书至而疾已笃至八月六日遂卒距其生嘉靖癸巳享年六十有六耳伤哉予闻君家食时溇沱大溢水没城城不浸者数版饶民皇皇无以为计有妇人呼于市曰必王春元祭之时饶有两王春元问主名指曰君也君闻杀牲为文登城望祭祭毕而水落迄不为灾或以问故妇曰渠东斗星也翼日复问其妇懵然不复忆矣人咸异之又君治鳳时秋禾正茂忽有虫如蚕而微小色正黑綠苗食之徧四境皆然百姓奔告君祈君极救君即为文率众祷于神诘朝而虫迹如扫竟亦莫知所徃鳳士民为图颂之君尝以治邑劳瘁成危病医药罔效夜梦梓潼神告之曰服补心丹乃愈觉以语医医言非对症药已之既复梦如前即和而

服之遂愈嗟乎精能感神而不免惑于一妇诚至格昆虫而不能称过使客岂非命耶君父文学举嘉靖庚子乡荐令延津有惠民至今尸祝之母胡孺人先配李氏继李氏子一即予壻亮芳娶予次女女二一适翟县簿子生员复初一适李县簿子生员一翰先君卒孙男三皆先君夭孙女二君之疾也君侄亮芬日侍汤药兹将其年十月十八日葬君而以易叅伯状来请铭予为拭泪志其畧而系以铭曰君先大夫作宰延津大有惠泽洽于延民穆兮庙貌崇祀方新君世其学家声益振行务修洁心秉真醇高标特植杰士之伦筮仕疲邑覃布深仁室无鱼悬野有雉驯夙夜况瘁民尔忘身民之怙之如慕慈亲彼人恭哉乃逢其嗔西子匪妍隋珠匪珍徒令循吏赍志沉沦呜呼人世石火轻尘富贵有极孰能千春君今已矣不愧苍旻甘棠遗爱爰有贞珉我铭君石告彼譖人

赠观城县知县友溪王公暨配张孺人志铭

赠观城王公卒于嘉靖四十一年卒二十余年始以仲子应霖考最赠今官又十余年而公配张孺人卒时应霖已入为户部郎中而季子应期亦以进士令尉氏于是二子谋于某年月日启公之兆以孺人合葬而以公壻都御史姜公状请志与铭按状王氏文安故姓世居邑西之孙存铺七世祖敬贤生彦礼彦礼赘于相公庄某氏遂移家居焉彦礼生珣珣生原以孝行称自有传原生甫全即公父也以正德九年某月某日而生公讳宗寶字国重别号友溪性端谨幼如成人不妄笑语长而苍颜修髯望之知为长者家颇饶裕然自奉简淡独好予乐施出于天性宗族多赖以举火者壬子岁饥出粟百余石赈其乡人庚申再饥再赈如前县令为表其门曰阴德学博徐宗尧者清谨士也以迁秩去至不能具资斧浼公为贷子钱二十金竟出息代偿之盖好行其德类如此庚戌敌入近畿邑令温君欲缮城隍为守御计而檄公董其事公为量日程工度功与费日行诸筑者而扶其不率者三尹某因役兴意欲有所侵渔公执不可比竣事费以大省役不后时而人无于思之歌咸惮其执且服其才云公尝语人自吾先世以行谊着闻而数传以来无显者吾视诸子才其将兴吾宗乎乃为择良师督之学时都御史方困诸生中公见而奇之曰世安有如生而长困阨者乎即延与诸子共研席时时资给其费竟以女归之张孺人素嫻姆训贞静有妇德及笄归公事姑赵及继姑刘能承顺无违咸得其欢心公有所欲施或时不给不难斥簪珥以佐其意即诸子就外傅孺人实从舆之公既卒孺人进诸子诲之曰毋以汝父故废汝学一切家务吾当拮据为汝任之汝辈能稍自树立吾将藉手以报汝父于地下诸子跪受教争自淬砺兄弟并举高科为循吏俾没者存者被其荣光享有禄养皆孺人力也孺人之疾也仲子适以督饷过家率诸兄弟暨孙曾男女环列榻前视汤药躬含敛者数十人呜呼此积德之报亦希觐哉公生卒已前具享年五十有二孺人生正德十三年某月某日卒万历二十二年某月某日享年八十有三子男四应云冠带把总官娶赵氏应霖庚辰进士户部山东司郎中娶纪氏继娶时氏应期己丑进士河南尉氏县知县娶罗氏应兆武生娶邢氏女四长适省祭官裴松次适姜公璧即状公者卒未进士巡抚郟阳右佥都御史次适武生纪铢次适邑廩生张邦治孙男七体干

军门劬劳官体恒体升武生应云出笏国子生策邑庠生应霖出箴邑庠生应期出简应兆出孙女十人曾孙男六人曾孙女十二人聘字不具述铭曰相庄之王为德于乡厥修既良厥祚乃长妇也寿康子孙繁昌煜煜龙章以阐幽光郁彼玄堂此焉偕臧太史有志没世不忘

封承德郎户部主事方公墓志铭

封户部主事方公卒其子金宪君端既葬公于邑南原祖莹之次暨入都乃手一状授其同年友登曰端生而愚直不善狗世善忤世两官遐荒又以严命不遑宁子舍以至亲老不及养没不及诀端得为子哉而犹人哉幸子志而铭之庶几不朽者以少纾人子终天之恨予怜其志许之状称固始之方所从来久远矣唐末自固始徙闽之莆田入国朝自闽复还固始者则其祖指挥使胜也五传而至贡士赠户部郎中完完三子仕进士都转运使仲举人伸诸生即公父也母范孺人梦有金甲神人冉冉至其室者红光随之觉而生公公讳志充字某别号某以端贵封今官公幼孤从其伯父转运公学日记数百言试以联对口占响应无穷者如声彻九天归北鴈啼残午夜度南鹃月印中天风雨信凤翔千仞帝王征兄弟奏埙箎君臣作征角皆非童稚语其聪颖若此转运公大奇之曰而父宜第以夭其天年不及第竟其志者在孺子乎公益自负下帷发愤无暇晷为弟子员有声黉校中然为文自出意见不欲局曲守经生言且意气激烈出于天性读史至秦丞相桡戟手大詈言我当武穆时必拥兵长驱复两京还二帝安肯俛首班师受制于贼臣偶督学使者试武穆论即奋笔言桡者宋之贼臣天之顺子也武穆者宋之忠臣天之逆子也其议论种种类是以此屡上有司屡不第晚始得廩于庠公虽不售而愈益发舒人有过必面折之又不能忍不平之事有詹某者为群盗主邑人畏而避之公直白于令君按治如法贾禄辈若干人法不当重坐为吏所故入不能自理公为昭雪之卒从未减邑有旧军户绝而尺籍存者岁苦勾摄以公陈其害得减其额河北民有乞洒粮于河之南者抚台主其议公上十疏极言不可状议遂寝公故倜傥而内行醇备事孀母以色养至九十龄如一日推负郭田与其弟姊妹有嫁而贫者夭者生为之养歿为之葬抚其遗孤而教之成立族人有贫不能自食者出粟周之岁以为常公不自殖生出子母钱择善贾者使逐什一之利而时入其息以供施予曾以倍直市危贡士居后危卒公给之棺复迎入故居而殓之公力健能投石超距尝遇盗发即奋长矛鸠众逐之盗骇走终公之世无敢窃发其乡者乡人德之向其利者至为生祠祀公部使移檄奖予先后无虚岁岁已殁公以明经需次将贡阙下时端为行人会以大庆恩当赐封公非公志也让不欲居或有劝之者乃就封叹曰大丈夫不能资适逢世议功名于时而顾因儿子以为荣荣亦辱矣其立志如此嗟夫以公之志令得出入禁闼何难以谏死职不然而当疆场一面马革裹尸其素所蓄积也又不然而膺民社之司亦必能抑强扶弱俾百姓安于田里而无叹息愁苦之声乃令泯泯汶汶以老胡以生之又胡以抑之金宪君习于庭训居官爱植节即百折不易古云是父是子不诬矣公生于正德十一年二月十八日卒于万历二十三

年二月十二日享年七十有九配熊孺人有妇德详具别志子二靖鸿庐寺序班次端即
金宪君今起官广东孙四一魁靖出一元一宁一清俱端出一元邑诸生铭曰文如豹兮
力如虎睥睨一世凌千古壮志未伸气未吐吁嗟所就竟如许越有仲子扩其绪慷慨耻
与喁喁伍天其以是笃公祐南原佳城封若斧千秋万■〈衤冀〉于此处后有知公视
斯语

淡然轩集卷六

●钦定四库全书

淡然轩集卷七

（明）余继登 撰

○志铭 墓表 墓碑 行状 传述 赞议 策问

封安人易母张氏墓志铭

张安人者封工部主事龙川易公之配工部主事易君选之母也安人生而沉静端
重不妄笑语自垂髫如老成人女红外无他嗜好父母心异之为择佳婿乃归封公易故
宦族封公又日占毕习博士言不问家人生业家益索事无巨细倚办安人安人躬机杼
操井臼拮据奉舅姑下逮两叔姒为捐嫁时衣妆以佐凶岁至并日而食无恹色人皆难
之两赞封公襄舅若姑之丧含敛如礼封公数上有司数不售或不胜愤恚安人色益恭
意愈和徐指君选谓曰君屈首受书穷年兀兀卒厄若此竟君志者其在是乎因日夜从
旁督君选于学每篝灯夜作与俱勤苦君选遂成进士拜今官迎安人于宦舍未几天子
霈大庆恩安人得封今号君选乃治法服加縠纒然安人不恒御蔬食布素无异畴昔见
之者不知为贵人也独性好施君选既贵诸凡俸入咸置安人橐中以顺其意赈贫恤孤
常若不及安人素强无疾先是封公病痿安人日夕供汤药侍起居至目不交睫无怨色
诸戚党以请贷至者又人人设食饮给道里费以厌其欲竟以是委顿不支矣时君选
方有大石窞之役忽心动急治装归之日而安人疾作君选为问医药祷神祠求以身
代竟不起君选哭甚哀水浆不入口者数日哭輒絶絶而苏苏而复哭久之乃收泪谓曰
登瀛不孝天降割于先安人已矣无可言矣惟是潜德之光不可泯敬以累君乃口授始
末娓娓数百言不具志志其可述者安人生嘉靖壬午年十一月十三日卒万历十二年
十二月初十日得寿六十有三子四登云蚤卒娶王斗女登瀛即君选丁丑进士娶胡忠
女登高武学生娶饶阳庠生李希曾女登仕邑庠生娶饶阳庠生刘郊女孙男六知聘饶
阳庠生郭周南女简聘邑庠生赵天柱女能亨健通孙女二一适扬仲举一尚幼并知能
皆登云出简健登瀛出亨通登高出君选将以安人卒之明年乙酉三月念五日葬于城
之东郭祖莹之次遣使来督铭嗟夫风之下也俗日以浇世有起家寒贱者不殖货以耀
闾闾则席势而报睚眦彼好行其德以亡其业者即丈夫不数数然也而安人养舅姑顺
夫子且至周人之急以殒其身呜呼仁矣是宜铭铭曰子为王臣身沐恩纶宜其组紃维
此组紃匪曰华身以佐吾仁安人之仁靡疎靡亲靡施弗均施予则均身则食贫噫嘻安

人

明勅封安人方母熊氏墓志铭

宪大夫方君手其母熊安人状以授史登曰伤哉端之奉母命违亲而仕也母健无恙也乃端备员贵竹纚一岁而母歿矣母歿而汤药含敛弗及亲也端犹称人子哉伤哉母歿矣其苦心贞行有不可歿者愿得子言以志而铭之夫志者识也识载闺美以阐往烈而垂来训史氏职也何敢辞状称方氏自固适莆繇莆复入于固祖有登景泰癸酉乡书官宁州守讳兴者有举戊辰进士官都转运使讳仕者有乡进士讳仲者簪纓不絕为固始着姓而熊安人家亦以科第节义相望于时安人父讳杰邑诸生博学能文为督学使者所器重娶于甯生安人安人生而婉孌有慧性幼即端重不好戏见诸弟妹戏者輒正色责之诸弟妹畏而事之如事甯孺人稍长授以内则輒记不忘父心竒之以语甯此吾才女也当为择婿熊之父时教授于乡诸从游者甚众封主事公亦执经在弟子列日诵常数百言颖悟过人熊私谓甯欲觅佳婿无如方氏子才者甯前问之知为主事公曰君常欲竒贵此女何自乃与方氏子方氏母蚤寡家又贫不可熊曰安有才如方子而常贫贱者乎因自以其意语主事公公归告其母范孺人范曰人各有耦吾寡妇人家四壁立彼熊名阀非若耦也熊闻之笑曰吾妻才子耳非妻贫子也贫亦何病范不能具六礼独出二钗为聘遂委禽焉年十五而归主事公一意食贫自操作以佐缓急旦夕执馈事范孺人甚谨篝灯勤女红伴主事公夜读主事公即以是年为弟子员肆力于学安人复从舆之凡七试有司七报罢年四十始廩于庠时公伯叔成进士荐乡书者先后逝去公以身为门户累稍废业遂蓄姬妾厚自奉养以纾其抑郁不平之气安人不忍伤其意曰苟巾栉有侍酒醴无乏夫子之爱吾之爱也无几微见于词色退而独处一室日日督两子于学每诲之曰若辈不能竟乃父之志是大负若外祖熊而吾无所望于方氏矣两子跪受教竞相砥砺宪大夫遂举万厯丙子乡荐登丁丑进士官行人即封主事公为行人已又晋今封母得称安人云安人即受封而意念愈自下终其身无滑柔之奉锦绮之服其天性勤俭盖如此宪大夫之官两京也每奉安人以从及陟贵竹恋恋子舍不能去安人以大义督过遣之比行而安人卒遂不及诀此宪大夫所为抱终天之恨者也余子曰予尝读诗而有感于栢舟之妇云以彼心不可转仪不可选不知何以遭闵于时而其发为诗歌者不过以古人自勗而止焉圣人以为贞静之极也故识之变风之首以示天下后世之为人妇者安人非栢舟之妇而有其苦以身训子以人事夫不专夫室之爱者四十年不及于怨诗曰我思古人实获我心非幼习内则有概于中能然哉是可以风矣安人生于正德己卯二月四日卒于万厯己丑四月十日享年七十子男二人靖太学生娶某氏端即宪大夫端贵州按察司僉事娶易氏封安人孙男二人一甲靖出娶某氏一元端出邑诸生娶某氏孙女三人长适傅寿官子某次适彭鸿胪子国学生某次适李方伯孙国学生某俱某人出宪大夫将以卒之明年正月某日葬于邑附郭之南阡从其姑范孺人之墓也铭曰胡誉之芳维妇顺之章胡嗣之昌惟母德之良猗欤安人于归于方和

鸣锵锵无胥伎胥戕于何不臧郁郁崇冈闾闾玄堂以俟而夫子百岁之后庶几偕藏

明封太孺人刘母张氏墓志铭

刘母张太孺人卒于家其子大理丞士行闻而拊膺大恸曰天乎吾独不得与母氏永诀亲含襚藉干之事乎为位以哭伏地而不能起也方大理为御史按部郡国每得以其便归视两尊人最后遂恋子舍不忍去太孺人让之曰吾与汝父披章服优游禄养秋毫皆上恩也汝不以时効尺寸报主上恩德顾依依为儿女态意何为乎且吾两老人健又有汝兄弟五人在居者以色养仕者以名养汝其行矣大理君跪受教乃北上独时时遣问起居比闻太孺人病方杜门图请告而讣音至矣太孺人病亟时命诸子舁之中庭视衣被复进诸子妇各为诚词已而名呼大理君曰儿乎令儿全忠令儿不得全孝矣意若悔督其出者故士行闻之而重自伤也既奔归憑棺长号如不欲生封公晓之曰古之孝者毁不灭性汝不计窀穸事而过自摧毁不念吾老人乎大理君乃稍就飭粥以次庀丧事而走状来请铭状称张氏为东明着姓父某娶于某而生太孺人太孺人生而简重父母怜爱之为择佳配既归封公事舅姑小心婉顺甚得其欢心时刘食指渐繁家渐落太孺人自计舅姑老矣岂可使有米盐琐屑之虑乃身自操作而前计口授食拮据应之不遗余力比诸子知向学则佐封公督教之励其勤者而扶其不率者不專以煦煦为爱时或篝灯治丝枲伴其夜读曰自予为汝家妇见汝家好行其德是数当有显者汝辈勉之隆庆庚午大理君举于乡喜而后可知己万厯丁丑大理君成进士授长洲令奉太孺人以行或以俸余置珍错輒却不尝曰吾性甘蔬食不习此味也稍欲为市烝穀輒止不许曰吾身安布素不习此服也时大理君莅任未几大有能声太孺人乃谓之曰吾老人遠来视汝治状耳汝能其官吾复何忧吾当去汝勿以饗殮故久溷汝也大理君不能强遂归吴中锦绮衣被天下诸戚娅闻太孺人归谓当有竒异饰玩争来聚观则犹去时装耳乃皆相顾叹服大理君以清白自矢处膏脂而不以自润者固义方有素实慈训力也壬午冬大理君以计吏入长安会三载考最得封其父如其官太孺人受今封于是函制词制法服过里中为寿太孺人为一举觞即緘之笥中不再御亲执筦钥督课臧获不异畴昔或有言太孺人今贵人何为久自劳苦则应之曰若不闻文伯母之言乎且吾乐此不知劳也大理君既拜御史南按淮扬西按晋太孺人每诫之曰御史奉天子三尺不患无威患过威耳威过则伤人必多昔隗母闻其子多所平反即喜不即怒不食汝其有意俾吾为不疑母乎吾当为汝加匕箸矣大理君唯唯承命故所至辅法而行得以称名监察者则以太孺人为之母也太孺人信鬼神报应之说不悛施予日焚香拜天者三暇则诵佛号以为常盖数十年不倦也至其晚年寿愷多子孙或以为事神之应然由前而观固不在是矣太孺人生于正德己卯某月某日卒于万厯癸己某月某日享年七十有五子男六人懷恩娶陈氏继李氏懷惠娶某氏继李氏懷恕即大理君娶张氏贈孺人继赵氏封孺人贺氏懷志娶王氏继苗氏怀愚娶孙氏继李氏怀慈娶王氏继盛氏女三适邑人唐惟精韩进国郝九皋孙男十三人某某出孙女若人曾孙男若人大理君将以某年

月日葬太孺人于某予为志其大凡而系之以铭曰予闻之志富贵不与骄奢期而骄奢至嗟太孺人处贵若寄处富若赋内则既备乃俾哲嗣一行作吏惟母仪是视比敬姜与隳母其德靡愧郁郁高原芳灵所閟太史有铭用彰厥懿

明陝西临洮府通判贈承德郎户部河南司主事平村陈公暨配李太安人合葬墓表

大名守陈君守大名之数月或有言太安人不禄者讹传至都下主爵者已推择他姓代君而太安人实无恙也君闻大不恚意非吉征即欲投劾归侍太安人主爵者旋觉其误乃上章谢而慰留君太安人闻之亦遣人谓君若勿归吾当就若以观若之治郡也太守君闻太安人来喜则为具板輿迎之郡出理郡事入上食驩然乐也又数月而太安人疾作竟卒于魏嗟乎彼言者讹耳乃竟信耶岂非数哉太守既扶榭归将开贈户部主事平村公之兆合葬焉而走使谓登俾表其墓道之石按平村公之先山西屯留人父曰仓仓父甫甫父骧世载其德为乡人所信向公生而赋质不羣始就外傅即端重如成人不与羣儿伍里人李公明遠者有女心奇贵之不轻以字人闻陈氏子贤乃以归于陈即太安人也太安人为陈氏妇以婉孌事舅姑得其欢心公读书好深沉之思每手一编下帷潛心不问家人生业闺以内外皆倚办太安人太安人昼总家务暮篝灯辟纁佐公夜读以为常公为文根极理道不剽取模拟以逐时好蚤以文雄里中然上有司輒不利太安人常持义命之说寬解之公八试八不就而学无辍业者太安人从輿力也久之以明经入选除陝西巩昌府通判太安人随而西公居官廉太安人即操作以助其廉公性峭直日询民所疾苦而耻媵媚于上治巩昌三年竟以失上官欢调临洮临洮邊郡郡与诸番部以茶马为市贾人徃徃用利啖郡监者监者受赇则噤莫敢短长闻公至悼其廉直怀金钱勿敢入则又啖诸猾胥与为计公伺得其状悉置诸法于是胥吏人人惴恐即番夷咸嚙指称神君矣然公在临洮所为事上官者如巩昌无加礼以故先后佐郡七年不得调公喟然谓太安人曰吾其归矣能从吾隐乎太安人即日制隐居服以进力赞公归部民争攀辕留之不能得公既归杜门养重造请干谒一切谢絕布袍蔬食与太安人甘之独日夕督诸子于学太守君遂以丁卯举于乡丁丑成进士方试政司农署中闻公疾急以转饷归图省视既归公立譙让之曰柰何委质之初即以內顾分公家念也命以孥行既行未及受篆而公卒比禫除授户部主事满三载乃贈公如其官太安人封如今称云陈君之官户部也太安人不徃守大名又不徃久乃以讹言故徃徃未几而卒异哉讹言盖若或启之令太安人得终子舍太守君得躬含敛乎予与陈君同出少宗伯富顺李先生之门习其人行不取合义不苟容予每肃然严事之比其守大名予适以使事徃来其境则候人不夙戒厨传不加饰此其廉方质直何讓平村公然平村公坎轍而君显者时有利有不利也陈君守魏魏方大侵饿孳枕藉于路太安人时戒君发仓粟賑其饥者掩其鬻魏人德太安人如慈母比其卒也咸号呼如丧厥妣焉噫假使平村公而在所为训诲太守君者亦如斯而已盖太安人习见平村公所为服官者故犹能遵用遗训

以迪成太守之治哉凡此皆其大者予故因陈君之请而表之曰此明循良吏陈公夫妇墓若嫩言细行生卒世家志所具载者可无论矣

明处士张君暨配叶氏合葬墓表

嘉靖丙午蜀内江张处士汝茂卒越四十四年为万历己丑而配叶卒于时处士有孙应庆试春官不第投牒铨曹得饶阳学博闻叶讷谊不得还视丧则为位哭既而手其从兄给諫应登状诣登请表其墓道之石按张自楚亭徙内江数传有文习者富而好行其德乡人称之文习生旻旻生自简自简生洪粹洪粹三子长俊早卒仲杰即处士汝茂其字云季位张氏业至文习而大至洪粹而中落乃逐什一之利贾于江油之平夷遂家平夷时处士已嶄然露头角当就外傅而平夷故僻地无所受学乃入粟为什邡功曹处士性伉直不能俛首事上官上官有所苛责即自奋曰丈夫志四方安能役役牛马走耶遂弃去仍之贾率诸贾人凿山取铅引水为溪以通铅木至今人赖之处士又自计夷地僻陋俗以费相雄长不事诗书不可以训诲子孙乃复自平夷归内江内江故业已为里豪所得处士欲复取之乃为具召诸豪言所欲诸豪故难之曰能倍与我直即可得处士曰诺即倍出直诸豪相顾愕然无以应故业复完会弟位贫不能自给即割所复业予之处士有二子全念念尚幼乃督全于学全既补弟子员而处士遘疾不起执全手与诀曰尔母有丈夫志能其家尔亦能自立吾无所恨独尔弟幼耳处士既歿全治举子业不问家人生事而先所积贮又为前倍值取业故日空虚叶力秉家务以織嗇治生自奉甚薄而岁时宾祭则务为丰腆婚嫁丧葬仅取成礼而娣姒宗党有急即不吝倾囊周之待诸子若孙严而视诸臧获有恩念卒复收其遗孤抚育之盖诸子妇孙曾数十人莫不兢兢一稟于勤俭者皆叶之教也先是处士在平夷时建大士庙于山间庙成夜梦大士遗以羣鲤至是孙应庆试有司叶复梦大士庙中一鲤化龙冲霄去寤而喜曰兹其在庆孙乎是岁应庆果举于乡戊子应庆当与计偕叶觴而送之命以早沾一命以慰吾老人时叶已踰九十然健善饮应庆既行为己丑元日子孙犹上椒酒为寿共娱乐入夜而疾作逾五日逝矣方处士之贾平夷也折券弃责平夷人德之故处士没而相率千里匍匐来会丧暨叶没而平夷人之子孙亦如之呜呼兹非人富而仁义附焉者能然哉世言鬼神报应之说皆空虚无事实而大士之梦若影响不爽此何以称然载观处士夫妇之士行女德则张氏所为振振多贤子孙者又在此不在彼予因表之曰此明处士张君暨其配叶氏墓俾张之后人有所观感砥砺而不坠其先德云家世生卒已备志中兹不具

明通议大夫户部左侍郎及公墓表

往嘉靖中吾邑盖有户部左侍郎及公云公名宦字士显别号二河予为童子时犹忆邑诸父老子弟啧啧称公长者若走卒之诵司马君实也自公捐馆舍且四十年矣比予与公仲子户部君同官于朝见公所旧游处其荐绅先生问知公有子咸津津然述公功德愿交驩户部君则又窃叹公之长者盖不直为德于闾而已万历戊子予以使事过里中会户部君先已致其事归与予言因叹公饰终之典阙焉弗备以予典纪载乃授予

以状使表其墓道之石予受状读之则皆童所习闻暨缙绅所称述者种种当实不爽也状称及氏为交河着姓上世以来率孝弟力田含采弗耀自齐东丞善始通仕籍由齐东而下又四世始生公公生而警敏授书塾师一再目輒成诵既授廩益肆力于学不问生业名日起正德癸酉举于乡明年甲戌成进士会简诸进士茂异者为省台公与焉授兵科给事中公即未试理人而明习时务之要诸所条上引当否指切利弊都御史甯杲讨贼无功惧严谴乃掠细民为贼欲因以为功公劾罢之敌入邊邊将某亡失过多公疏其状因言御敌之道要在选将练兵罢债帅杜幸进之路娓娓数百言为时论所翫嘉靖改元言者请遣廷臣核诸邊镇钱粮侵盗者已得请寻诏止宣大二镇使者勿遣众论哗然谓二镇侵冒视诸郡独多不宜废诏长奸以累平明之治宜简诸臣有才望者急往按之乃共推择公偕侍御俞君集往公先后疏劾朔州总兵张輓报中引盐亏纳数多故令人潜毁永宁场一百一十余万委小民脂膏为煨烬大同镇守太监马锡监仓刘景前总兵朱振侵费不貲都御史杨志学曲法徇人耗损边计于是下輓等御史逮问籍振等没产偿赃请托不行声震中外然竟用是不得久在禁闕以兵科左给事中出为宁国府知府宁国俗故浮诡公用爱利为行而一稟于至诚民不忍欺先是巡抚应天副都御史吴廷举言高淳故困养马今又代养蒙城马三百有奇宣城五县无高淳养马之苦而岁侵高淳荡田之利宜均役以苏民困既得俞旨而五县豪何隆辈鸠众大噪至二万余人公以身当之开陈祸福且急白都御史御史移檄省谕众乃解散时微公则众怒叵测流祸未已卒定养马议正隆等诛治诸臣首事之罚而公亦调守怀庆然宁国人德公至比屋尸祝之公至怀庆以外艰归起补凤阳公治两郡如治宁国状壬辰升浙江按察司副使时海寇劫掠并海诸郡县官军御之多失利惟公檄指挥杨淮并勅诸贼曹所擒斩八十余人会有为俘寇居间者公执不可其人大恨恚嗾御史谢君兰列诸路玩寇状连公诏公解职听核久之核者言公实有斩获功御史所指无事实起公陝西副使寻为其省参政以内艰归服阙补湖广参政歷山西按察使左右布政使公勤于举职而拙于取名厚于恤民而薄于养交入仕三十余年两遭口语循资累级不越恒调岁乙巳始入为光禄卿未几以副都御史提督操江长江盗区徃徃伤败行旅公诸所擘画皆饬备销萌要计又广募射师分教材官健儿而时以身督肄之江淮戍卒多善射自公始丁未晋户部右侍郎寻转左会邊地用兵诸岁饷若军兴诸费一切取资内帑又祷祝土木岁费不貲大司农金钱不能给公佐其长综核均节盈缩有度诸属咸倚以受事公在戶郡久天子器重公将大用之而公以疾乞归疏再上始允其请比归四日而卒讣闻诏予墓祭如例公虽公廉不可干以私然性醇厚笃于故旧身为列卿犹步行里中与乡里卑贱者钧礼居处节俭禄入以分给族党歿之日家无余财呜呼此公所由以永终誉而歿世不忘也俗之敝也士有起奥溲躋通显者率凌轹其乡人甚或鱼肉之卑人以自尊瘠人以自肥卒之骨未寒而讎者起子孙不得聚庐而处者比比矣闻公之风宁无媿乎予故表之以告乡人期与后进之士继公而兴者有所则效而砥砺焉公家世生卒已具少宗伯孙公志

中若长男万言官大兴主簿仲万祺南京户部主事季万祥有声诸生中将继公起诸孙十人谦讷朴皆邑诸生让慎恪检楨櫓枢曾孙六人受益昌运传芳景运承芳翊运玄孙远森森未艾则志所未载者故特列之以见天之报施善人如此

冯仰芹墓表

予初与今少宗伯冯公用韞读中秘书闻其尊人仰芹公负高世才睥睨宇内时公以副宪侍养蒋太安人居也窃妄意是必负气难近比公再起入都门侍公于其子舍则一见如旧识久而杯酒相洽出肺腑相示遂定为忘分之交自是公去为臬为藩不常遇然遇未尝不饮饮未尝不欢最后公以河南参伯入贺万寿至则已决去志矣因侍酒从容言世方需才岂可令公有留才公笑曰盈而溢天之道吾惧其盈也未几以病自免归于时宗伯方以宫詹翰长侍上于讲帟疏请归视上予假五月宗伯归日为具侍公与宾客诸故人饮意甚适不欲出再疏乞侍养上不许又见公健善饮无恙乃北上独时时使人伺公安否越岁闻公戒饮则怵怵心动又数月闻病卧遽以急请上允之濒行复为公请封上复允之盖异数也宗伯乘传昼夜驰五日抵家而恩命亦以是日至宗伯视公于榻前道上恩德父子相对感泣公时疾已笃然犹笑语如平时又三日逝矣是万历丙申岁八月十八日也得年五十有八耳公天才纵横无所不可文不烦思而数千百言援笔立就未习为吏而初令固安当畿辅大邑理繁剧迎刃而解目无留牍庭无滞讼者不得尽其辞猾吏不敢缘以为奸治邑有暇乐延见士大夫问民所疾苦或晋诸儒生论析疑义第以私请则无所假借久之亦无敢干以私者轻裘缓带温然儒生而胷中甲兵有韬铃之士所不敢望者固安素苦盗捕盗又苦无兵公曰是不难为盗何难为兵乃籍良家子悬赏格令捕盗以故盗发辄得所稍不得或失之旁邑终公在邑桴鼓不鸣其为大同金宪也值敌新款以公主市所为操纵张弛动中机宜岁时犒赏不如式则责主者如额则止额以外即敌百索百不应敌首有以裘马来角射者公连发连中尽入其裘马敌骇愧又徐出其所负者以计还之敌又大喜过望以是公在事数年为少参为副宪敌终誓伏不敢动溱沔易水之间畿南重镇久无警士卒销以供役使屯输糜以称过使客公备兵其地省费节冗简兵清饷士始有尺籍伍符兵视诸军独壮而镇为益雄生平不离杯酌于天下事若不经意者而排难应卒决疑定倾当机立断方在大同奸吏有缘法马新旧间减军饷以自私者一军尽讙甲而噪于司饷者之门公闻故呵殿入顾曰此罪在吏吾为若治之足矣即抵吏于法出新法马以给军军乃安其在秦州盗啸聚山谷间以数百计公曰是不制将不可制先驰檄谕之而遣兵随其后盗大骇为解散去岁辛卯彗星见讹者言主在易州有王气上且举兵加诛焉争相恐动一日哗曰兵至矣皆出走不可禁司空郎项公惧就公问计公不应第呼酒与饮吏民见公无他转相告语走者始归束鹿人有以妖言聚众者众且千人吏索贿不得给令曰此相聚谋反耳令恐请兵往讨之公曰何至是为檄逮其渠首而散遣其徒各归农竟不烦兵奸民有疏言易州矿金之利者章下两台两台檄公议公曰生财有道未有取给地下者且采而不得则为费

大采之而得则为害大况凿山坑谷不能无伤地脉陵寝在近谁敢任之事遂已公自为令以至大吏所至务举其职独居家则不问生业好行其德出于天性为诸生试于临淄雪夜归有侯生者迷失道堕谷中呼众求援众若弗闻也者公独援之出乘以已骑而徒步掖之生得毋死长安周媪醉遗所鬻珠于公舍旦日召而还之岁饥斥所藏粟以周贫者曰吾不能使路无饥人能不使廩有余粟也严驭仆隶不令横里中而尝宽其所不及所系玉绦环颇爱重为吏所触碎所蓄善马日行可数百里为卒毙悉置不问其襟量又若此盖公坦中旷度如溪如谷探之无迹出之无尽取则若逢过则若化仕宦七年至宪大夫不为速以非罪被纠弹不为恚定变故于顷刻谈笑间不为功勇退于急流之时不为慕恋能圆能方能劳能逸不以一善自执而人亦无能执一以名公者孔子曰鸟吾知其能飞鱼吾知其能游兽吾知其能走至于龙吾不能知其乘风云而上天公其犹龙乎夫世之人徃徃强其才所不逮以求满其心所欲至及其不竞而后悔其弗胜也晚矣惟豪杰之士尝操其有余于身而遗其所未足者于后公父芹泉公官行人而歿百不一试而余所未足者于公公固有所用之矣然亦十不一试而余其所未足者于宗伯公宗伯公以异才蜚声词林以正学结知明主其用公所未足以裨福生民当未可量矣公讳子履字礼甫阅始末已详载状志不具论谨述其槩表之贞石曰此明庆历间才大夫仰芹冯公之墓以俟后之欲知公者考焉

勅封太孺人崔母刘氏墓表

侍御崔君豪爽不羣官西台侃侃自许弹劾无所避其母刘孺人心念之侍御因自计居官而溺其职与举其职而忧父母无一可者乃以病自免归归三年孺人促之出侍御不得已为强起既起而孺人病病渐危复令其伯子趋侍御归时侍御已有中州之命闻之心动即陛辞欲南驰会有事当建言者为留三日比归而太孺人已先卒遂不及诀矣侍御抚棺大恸绝而苏曰吾竟以一官累抱终天之恨也悲哉侍御兄弟既藏葬事乃以状来乞表其墓按状孺人本马姓先世从其外氏姓因称刘然刘与马皆长垣右族也孺人始习女红即爱惜筐篋遗丝弃缕无弗掇而藏之者生而端重然智识过人家人事有不可了者立能决之父喜抚之曰令汝而男也吾无忧矣年十八适崔封君封君大父母父母俱在堂其丘嫂李氏又蚤逝孺人以次妇秉家政执妇道恭谨无违礼祖姑若姑呼之未尝不在侧也孺人侍姑侧即幼叔幼娣勿敢以狎侮见也旦暮滫瀡必具具必洁也篝灯侍封君夜读无少倦也封君既入邑庠为诸生有友问业者未尝不为具以俟也崔之食指繁俯而畜之各如其意所欲得无后言也岁饥至自操作以给食用或脱簪珥继之人弗知也封君每不能忍不平之事輒从旁解之勿令宿怒也侍舅姑疾废寝与食汤药非亲尝不进也比相继卒缘毁成疾力疾襄事以至感掉眩之症终其身弗瘳也姑所遗子女暨嫂氏所遗女抚育婚嫁不啻已出也视伯子次子当贾俾就贾侍御当学俾就学贾者不课其入学者则时督课之不少纵也侍御以壬午举于乡癸未成进士孺人曰是能竟乃父之志已喜而后可知也侍御司理平阳奉孺人如平阳每语以矜得情戒

任情即隼母之训不加严也司理随部使者按部十九在外孺人自执管钥不使外言入内言出也侍御入为今官再按郡国复戒以问民疾苦而利养之察吏臧否而激扬之毋徒自为威重为众所駮视也孺人仁亲戚有急不恡施予且时佐封君出赢余以贷里人不责其息也自少勤力即贵犹日经理诸米盐琐屑之务或劝之当逸者曰我自乐此不为劳也性简淡无论冠帔华服不以自御即高髻长衣为时俗妆者不敢见也时以善恶决人成败信天道于人报应不爽故每诵天长人长之语训诫子孙即毫髮锱铢毋令负人若曰逆人■〈讠羊〉天恐其为自作之孽也大都孺人为妇则身兼子妇之事故能与封君以逸其为母以心兼爱劳之念故能贻侍御以名封君大父尝叹曰有妇若此吾家其兴乎由今以观孺人真有大造于崔者也状所载凡数千百言兹独表其槩如此曰是崔贤母刘孺人之墓以为后之女士法焉侍御名景荣其它家世生卒志已悉可勿载矣

明勅封承德郎吏部验封主事近山成公墓碑

魏有积德累善君子曰封吏部主事近山公者姓成氏名宦字缙甫近山其别号云近山隱于市而称吏部公者从其子宪副君贵也宪副君既以万曆乙酉葬公再越岁始请言铭公墓道之石予与宪副同举于乡颇知公者曷敢辞按成氏之先山西泽州人祖朴始迁长垣其后子姓讹而为程公命宪副君请于朝乃复为成朴二子长者曰磊磊八子最少者曰岱是为公父凝所公凝所有大志嗜酒不问生事人有负者相习为具饮凝所凝所饮輒醉醉即曼声长歌不问所负以为常以是业益落乃督三子于学三子者公及伯官季宰也公始学书不成去学贾贾于齐鲁陈杞宋赵之间贾輒售家人俯仰暨季学皆倚办于公公一无所恡又比岁水漂没生业资斧遂空然公倜傥不侵为然诺四方贾者皆信向公須公画便计争利于市者得公一言立解游道日广费用渐饶公既渐饶于货又再膺封命乃益厌薄什一之利买田为富人力耕其中度有余则益为德于闾察亲识诸党贫者以次衣食之歿则为给槽榘又好建桥梁葺神祠于是淶河有桥姑妇有庙它治涂修像无虚日顾躬自俭约岁时伏腊宾宴之外无一切华衣偷食之奉泊如也宪副君言嘉靖乙卯秋公收责济宁适季荐贤书报到即取所收券焚之比宪副君举于甲子又悉焚家所藏券两地之人至今诵义夫受大者不取小天之道也世顾多藉子弟之势以腴己而瘠人若公之折券弃责庶几知道者矣宪副君又言公事亲孝待昆弟友奉凝所公及母文继陈得一佳味必躬至膝前跪而进之藜藿自甘而滑柔未始不备也每遭大丧身自经营不以累伯季而棺敛含襚无弗如礼就养都门未越月闻陈疾冒暑兼程而归归而陈已病困谓公曩母钱安在盖陈曾脱簪珥令公出息人多不时与息公即代偿其息曰息具在请以周陈宗陈笑而颌之从父佐醉忤尉尉怒将笞之公时垂髻即诣尉言伯老不任笞请代受笞尉壮其言为释去后佐与凝所阅于墙众莫能解公往泣涕解之佐感悟遂为兄弟如初诸生李某任诞数窘季公往争之强李卒不能有加于季而罢伯寝疾公时病痿犹强起问疾及经理其丧不少勑嗟夫公之敦伦睦族盖天性

然哉何少而能然老而弥笃如此也宪副君又言王生某者挟禁方惑人云能使药物为黄金公独不为动久之术不售客死宪副君令南阳豪杨某数为奸利扞文罔惮令严阴行千金为公寿公大怒将捕豪豪惧而逃去终令时不敢归南阳贾客某以金若干寄公贾他所期来则偿之比至封识宛然客叹服而去宪副君两为令入为天官郎出为藩臬公每戒之曰尔为清白吏我有余荣不怨尔贫也宪副守其庭训居官所至兢兢羔羊素丝之节语曰明明求财利惟恐不足者庶人之事也乃公见利若惊视不义若浼即懷独行之掺者犹或难之矧服贾者哉邑博士高公行谊宾之乡社固谢不往守相长吏鸣驺而至者咸愿交欢公公逡巡退让语不及私独闻有隶罪籍者或为脱之而人不能知冯丞者侮诸生诸生言其不法于使者使者欲斥去丞公言去丞如诸生何使者悟而止盖公性仁厚即臧获小夫不譙讓人或加以横逆如弗闻也者而过之独面折不能容人之过里中无赖至不敢见公或因而改行比公卒至有为位以哭者呜呼岂古所称王彦方之流欤宪副君当备兵北平过里中谋请告侍公公曰疆场事重吾且以是观尔之能趣之北上明年公忽夢邑大夫召之饮又田间佣某亦夢有谒公者车骑甚都比晚发于足竟不起易箦之际正襟危坐诸子环泣请命曰人生夢境耳吾已得其佳者夫何言时万厯甲申十一月十三日也距生正德丁丑七月十二日得年六十有八配朱贈安人继王封安人俱有妇德朱安人先公四十年卒卒于嘉靖乙巳得年二十有八子三人长即宪副君逊朱出娶赵守才女封安人卒继娶武尚严女封安人次蘧廩生娶灵寿教谕侯华女次道己卯举人娶省祭官陈守时女俱王出女二适李■〈木祭〉陈光范孙男六逊出者其德邑庠生娶生员陈应瑞女其行邑庠生娶稷山尹殷炼女其节聘举人李槿女其业聘户部主事夏潜女蘧出者其学聘河南学宪李化龙女道出者其功孙女三一许聘沂水尹宋炯子某逊出一适生员苏民慕子延祚蘧出一许聘稷山尹殷炼子某道出曾孙男一士彦聘生员李和行女曾孙女一许聘生员苏延祐子俱其德出予闻古今善计然之术者推陶朱公彼其能聚能散变化不居故足述也公身自治生或伏或起而能不责于人分散于贫文族党此何让朱公乃朱公衰老听子孙修业徒能累息巨万耳宪副方为国家树鸿巨之业而其它子若孙或待诏公交车或占籍博士济济有声于艺苑寢以向用后禄未艾此亦听息于子孙而所就业弘遠矣铭曰贾操利权其事戈戈公贾而廉廉贾五之积居任时业日以滋公富不溢处厚居实为闾里率若芒若屯内行则醇弥老弥惇好行其德而无德色望庐者式自公发祥子孙其昌莫之与京龙章有耀身食其报仁义斯效魏博之间有丘岿然曰成公阡

明封文林郎河南彰德府安阳县知县北冈刘公墓碑

新城刘给諫在谏垣伉直不阿遇上有秕政下有私党不难纠举而厘正之声称藉甚予以为吾燕赵士天性固然也比得约斋傅公所为封君刘公状读之则知刘君之为名谏议者盖庭训之力焉状称公讳宗伋字子中别号北冈其王大父英生大贤大贤生钺娶于王而举丈夫子三公其长也刘世以力田贲雄里中然未有业儒者比公生岐嶷

不羣始令就外傅能为文即多奇气倾其畴伍以数奇屡试有司不售忽愤曰雕虫小技壮夫不为遂弃去学武武通孙吴兵法骑射絶人尝试武闱步骑九矢皆破的以所对策有忤时语竟不录公益愤曰以语言文字弃壮士世事可知已复弃去闻房山有异人治黄老家言遂往从之问修心炼性之旨每跣趺上方山云居诸寺虽家务不废功亦不辍时给諫君已有声黉校间公喜尽发所藏书畀之复令从海内诸名家游考德问业以益其所不逮隆庆改元给諫君以庄皇帝登极恩贡阙下丙子领顺天乡荐丙戌成进士公益喜曰吾不做知吾子必做也给諫除安阳令欲奉公往公固不往久乃跨蹇入邺从田父野老问令治行何若既得其循良状始至宦舍慰之曰汝以此治安阳是不负君父不负所学矣安阳岁派旧多寬于势要而倍于小民给諫君审其弊悉更正之公闻益大喜曰为民父母欲其锄豪强而利民非欲其畏豪强而病民也汝能如是吾复何忧吾当去汝勿久溷乃翁为也遂归安阳令满三载封公如其官岁壬辰令以高第入为给諫给諫悯时事之多艰也愤言责之不得其职也数抗章言事纔数月以田孺人忧归再起入吏垣署科事愈益发愤诸人所不能言所不敢言者极言不让或者曰直木先伐子不虞忧子大人乎给諫曰此家大人意也吾不言溺吾职矣何以见家大人会给事某者意有所阿奉疏指正人为邪给諫忿曰邪正之淆治乱之關也遂极诋其背公徇私状以此忤执政已而大发执政诸不法人咸危之赖主上圣明仅镌秩调外任便过省公公迎谓曰汝不愧諫职真吾子也何官不可为勿以乃翁为念人以此益服公嗟夫忠臣烈士何时无之其以父非刘公徃徃牵于内顾之私不得行其志者多矣若公真能为父者故曰刘君之为名諫议皆庭训力也公伟貌修髯童颜鹤发饮于乡据宾席望之俨然若仙性刚直每面折不能容人之过见强有力者务以气陵之出其上至良弱则善遇之或捐貲以周其困乏或和药以救其疾苦晚年敬神崇祀玄帝暨關真君若谓人有愧于心即有愧于神明其志操如此公生卒世系状已详不再具谨摭其生平之槩书诸丽牲之石而系之以铭曰新昌城督亢里吁嗟刘公生于此慷慨慕义古杰士有志不就老以死公之不死在公子

寿官槐庵霍公行状

同年友霍君云程出守卫源纔两月其大父槐庵公卒于家公长子赠南京比部郎美资先公九年卒太守君为嫡长孙承父之重闻讣徒跣归将其年四月二十六日藏葬事乃手叙公生平乞铭于立言君子使史某为之状按霍在春秋为姬姓之国其后以国为氏西汉时两司马最显后世子孙散处三晋靡得而详已在井陘者自螯始螯生友刚友刚生英英生尚德尚德生朝用以输粟拜爵朝用三子初娶于部生岳继娶于杨生岱及昆岱字邦镇即槐庵公也公甫二岁父朝用卒母杨弱龄而寡孱然抚前孤携两孺子日呱呱泣含冰茹荼朝春夜纺力持门户公稍长使就外傅又为娶于张生比部公而公业犹未就乃叹曰人生荣进有命安能俛首受书以薪水劳吾亲乎去贷子钱为贾贾清源间积居与时逐贾辄售息三倍家用益饶上奉杨孺人下资比部公于学比部公为

诸生有声称试辄高等时太守君虽婴孺已崭然露头角公大喜谓张孺人曰显亲扬名不于吾身其于吾子孙乎益斥其余为德于闾族人寔者以非罪系有司贫不能自理公为出贖营解之竟得末减又族人某者窃公财逸去公若为弗知也者不问也里人蔡强孙定辈或贷公粟或负公租公度不能偿皆召至对众折券焚之曰诸公强食吾不尔责也里有贫不能葬及无子孙可任葬者公为立义塚给槽楛葬之由公而葬者高万岳宗仁辈凡若干人公出游见有被髮而过其前者熟视曰若非郝氏子耶是奚为者追尾之比出郭已雉经林木中矣急为解脱慰而遣之邑城西当晋孔道每秋水至行李为梗公曰此不堤防后其沼乎立出粟百余石钱五万募工为长堤百数十丈行者便之公好行其德类如此万厯改元以恩诏拜高年爵一级邑大夫采士论宾公乡社公不数数往日惟课诸孙学或弄其曾孙以自娱乐晚好奕客有过从者即对奕穷日夜力尝曰奕之为用大矣动静无定形强弱无定势得失无定局善奕者以奇胜智不足与权变勇不足以决断者难与言奕呜呼公岂独精奕哉通于理矣公性俭约惟事母杨孺人时时击鲜刺肥上食余非奉宾客不具鸡酒蔬食自安澹如也每太守君宦游即多予金钱曰以助尔廉太守君兢兢奉意指所在以清白称太守君由南中报政阙下南中诸名公闻公行谊多声之诗歌因太守君为公寿者太守君归寿公见公老意留侍食饮适会有卫源之命公曰孺子仕益进报称益难乃公即老尚健善饭柰何以老人故缓王事哉急行毋留太守君跪请所由治卫者公曰若不忆孔子适卫所以语冉子者乎执此以往即所为报国也太守君遂行公庭中故有古槐大五围枝叶扶疎公爱之时偃息其下因自号槐庵一日至其下顾而太息曰树犹如此吾其老矣时公无恙众不谓异也未几而疾作且疾且愈愈而复疾子孙为致医药却不尝疾革之日语不及私惟丁宁子孙无废耕读无忘忠孝及戒慎无厚葬而已是万厯庚寅正月二十八日距生正德壬申四月十四日享年七十有九娶张氏治家勤俭严而有礼于隆庆乙巳卒继娶梁氏子男四人长即美资廩生以子鹏贵赠南京刑部署郎中事主事娶李氏封孺人美中寿官娶许氏美才武生娶郝氏美珠娶郝氏继王氏孙男七人女五人美资出者鹏即太守君万厯丁丑进士任河南卫辉知府娶李氏赠孺人继康氏封孺人■〈明鸟〉武生娶梁氏继卢氏女一适徽州府同知于翰男县学生克念美中出者鹤鹑俱诸生鹤娶吴氏鹑娶李氏继毕氏女三适于第卢志吴邦祥美才出者鹭娶高氏女一适许遇美珠出者鹊娶卢氏鹑未娶孙男二人鹏生者仲熊鹭生者伯龙曾孙女七人一适李教明一适高维岳一适武之柱余尚幼太史公有言天道报施善人夫报施之理至微渺矣然徃徃有之杨孺人秉节植孤茕茕耳施不及捫外槐庵公即躬行仁义至死不倦然积着有限德不越于闾閭乃天报之以多子孙且贵显矧大人资适逢世利泽加于海内者哉由此言之太守君方再世而昌霍氏之泽未艾矣

明通议大夫巡抚顺天都察院右副都御史凤山王公行状

大中丞王公卒其嗣子继先将乞铭于立言君子而俾子为之状予与公同举于乡

颇知公者安敢以不文辞公讳致祥字德征别号鳳山其先山西忻州人祖斌戍上谷因占籍于龙门卫数传至镇以拳勇闻从昌平侯行邊陷阵先登用斩首捕虏功累官指挥僉事阶明威将军再传而生永永三子其仲曰司勳公懋懋生磁州同知金即公父也以公贵封文林郎兵科都给事中娶于张封太孺人举四子公其季也感异夢而生故命名曰祥公生而奇异幼而聪颖再周岁能诵书七岁能属文十二岁补弟子员廿而举于乡是嘉靖甲子岁也辛未登进士第壬申授鳳阳府推官每獻狱必列两造于庭推求其情不独以笞捶定之爰书成手中吏抱案受事无不凜凜耆服者全椒人罗鉴家井有四尸莫详所由死凡易五主垂四十年以罗织抵法者甚众公一讯立雪其冤江北称神在郡五年其所平反大都若此矣万厯丁丑征为兵科给事中时谄达款塞邊臣无繇徼捕获功而竟以修筑为功上急就以博名下虚应而脱罪旋修旋报旋报旋圯甚有未报而圯圯而复报者甲兵化为畚鍤士卒疲于力役公疏言其状请戒邊臣毋塞责毋贪功毋废肄习毋减粮饷娓娓数百言上嘉纳之戊寅升工科右给事中己卯奉勅阅视薊辽等处邊务于一切邊吏之能否邊备之修废无弗精核诸所糾举咸当輿情详在公奏疏中庚辰升本科左给事中册封宣宁藩府以便过里中为两尊人寿依依不忍离子舍会升兵科都给事中两尊人督之曰此岂尔家居时耶公不得已乃就官公既周歷邊關习知情伪居职知无不言言皆中窾壬午以外艰归甲申服闋复补兵科盖以公练习邊事也公再入兵垣首疏諫止内操极陈可忧四事大畧言宸居严密不当使刑余小人日操干戈习为战鬪万一悍夫失驭震惊乘輿如高庙太后何又非所以端好尚也奏虽寢然未几内操旋罢公与有力焉会张都御史请罢互市以省大费公疏言中国既许之和必许之市既许之市必予之价此羈縻之术非如市道交易相与区区较锱铢也今通市十五年矣一旦无故而罢不顾今日之利而预忧后日之害以后日未萌之害而弃今日已效之利于计非便上是之他如议增西河之饷议析土司之争议内殿叙功之滥议思顺抚剿之宜词多不具载丙戌升太仆寺少卿戊子春升本寺卿禁奸剔弊罔政肃清是年秋升都察院右僉都御史整饬薊州邊备巡抚顺天公念薊昌畿辅重镇内卫京师外控强敌悉心经营事事为备长昂伯晕大等入犯石门即发兵邀击创其渠帅史夷掣出頼等慕田峪戕杀官军即发兵奋击多所斩获以故北山伏寇日窥伺而不敢纵暇则量工计费繕完缺废计在镇凡修筑新旧邊墙一万四千六百余丈墩台四十余座积省工价诸费六千五百余两辛卯报政以母老身病陈情乞休当事者重公劳积久不报会有言者公求去益力乃加右副都御史致仕公既去而总府都御史蹇公阅视右通政穆公先后疏公经文纬武省费筹邊有抚绥保障之绩诏赏银三十两纒丝二表里时西事甫宁东师复出识者方欲委公以鎖钥之寄公乃于癸巳正月而病病数月逝矣予闻诸易医官云公在镇时得奇疾每早坐堂皇上擘画诸务比已退食兀坐一小斋见四壁皆奇神异鬼跳伏万状公默念此静室安得此是吾疾也及午漏下呼茶茶已輒愈申刻复坐堂皇上擘画诸务至暮归卧丙夜即寒颤颤已輒汗汗已复愈蓋十二时中已亥病余则动履如

平常病一年而人不觉其病亦无能名其病者予问易云此何病易云病在肝心二经此神魂不交故也盖公生平小心周慎极思审虑故及于此予尝贻书戒公去机心省烦念以养天和而蕃后嗣公不以为忤且有知己之感比公勇退予意可以息心长年矣竟不三载而卒则犹以前疾也惜哉公生于嘉靖甲辰十二月廿二日寅时卒于万历癸巳五月六日巳时得年五十先配刘氏礼官志诚女赠孺人继马氏大同府通判宗孝女封孺人公无子以仲兄遂平令之子继先为嗣娶张氏监察御史濂之孙宜兴县丞廷松女也女一未聘公既卒继先疏闻于朝天子念其有封疆劳诏予祭葬如例继先将以甲午年某月某日葬公于宣城北柳河川祖莹之次而具公行实予为之状其畧如此继先又言公事亲孝事无巨细无不禀命饮食衣物时请所与务得其欢心与伯仲共爨终身怡怡人无间言御家严训诸犹子以礼俭于自奉而乐于周施此皆善事而乃嗇其年又嗇其后何也当公疾革时嘱太孺人两兄以继嗣事犹能勉举三爵俄呼左右促装若将赴召者遂瞑呜呼异哉并状

沈库部传

库部沈公讳某字邦重别号鹅山学者称为鹅山先生其先浙之德清人后隶武功籍为都人公生有慧性聪颖絶人八岁能属文文多奇思十三廩于庠名动京师一时学士先生号有人伦鉴者靡不以国士目之矣嘉靖丁酉举乡试第六人甲辰上春官闕西王怀野先生得其文大奇之拟为举首比阅所试卷先后不相应例不得举盖忌公者当糊名时故错乱其号以扼公故耳王先生抱卷扼腕者久之始以瞿文懿公为举首是时公虽未举而声名籍甚顾重于举者越癸丑公成进士乃竟为文懿公所得文懿见公即以公徧赞诸同举者曰此名士吾愧先之是不当在弟子列是年秋除夏县令至即揭一聯于门屏以清节自厉邑当省会孔道旧令民蓄马以资传送往来者多虐驰之毙则责偿于民不给则僦民马或从民贯马费愈烦而民愈扰公曰官马则官蓄之安能疲吾民以称过使客也更令蓄之官岁省民财以数千计诸邑赎缓岁入率以金钱公曰金钱易干没耳不如积穀便两台是其议下其法于诸路遵行之比岁祲所在有粟所活饥民凡数万人奸商有为宗室讞请徙解州盐课于内地者众知其非是莫能抗两台下公议公曰是欲凭借宗室以挠国课也为极陈所以不便状事竟寢乙卯冬山西地大震壞城郭暨官民庐舍几尽奸人因为讹语民日数惊皇惑靡定公为绳其讹言者而抚慰其惊者人心稍安乃始鳩工度材裁其缓急而先后葺治之民不知劳夏得复为完邑时严相墨诸计吏因以馈遗为名而厚取以自润公独无所染有行李萧萧一担轻无人知是覲京行之句闻者高之公治邑屡以治行荐屡报闻久乃入为武库司主事夏人相与轶车扳留不得则相与尸祝之武库职司出纳最为弊窳最难核甚乃有私其奇贏以为利者公为精心毕志察其隐而剔其蠹大司马方倚公为重而公逝矣入仕仅五岁耳得年四十有三公歿十五年而长公涵举进士又五年拜侍御史出按云谷秦闽有声称又数年迁守归德数月自引谢病归归十余年而都人士列公行谊上之督学使者使者下所司核

之如所言乃涓吉祀公于学宫又明年而史某为之传史氏曰沈公以文章政事著称世见其显者也予稽之月旦乃知公惇伦睦族折券弃责盖廩廩笃行君子焉顾晚第而蚤逝未竟厥施其建立虽足称述纔一斑耳长公冠惠文威行郡国不可谓不遇矣亦方壮而伏十不一试岁月渐迈尚未得用其所未足岂天道哉然向使当长公为待御时俎豆公于宫墙即曰事非势成谁其信之今屏居林壑久势无所可倚矣而舆论诵公者如出一口此足以知公矣古人有言名不虚立士不虚附观于沈公益信于戏士安可不务修德哉

瀘石唐先生传

古人重行谊故士生其时斤斤以孝弟为务澣洒羣脩细事也而郎中令躬为之兄弟让封至于违诏逃疾而不顾今之治博士者不然谈经术而骛高旷习虚华而薄本根一不得志于时其佗僚不平之气直欲举身世弃捐焉语以家庭父子兄弟之常徂以为儿女子事鄙夷而姗诮之矣然古人所重乃在彼不在此幸而有质行如瀘石唐先生者安可以弗传也先生讳乔选字彰能闽之莆田人生有异质长而博闻弘记嫻于文词为弟子高等每试輒冠其曹先生虽以文名闽中而不以文自雄介介然以绳墨自律醇谨无与比事父榕原公暨母黄孺人百劬不倦务得其欢心原榕公晚有目眚先生旦夕侍饮食扶杖履呼之未尝不在左右盖十余年而忘其疾也则以先生为之目也伯兄某早卒事其嫂朱甚谨抚其侄遇恩如所生祖所遗腴田悉推以与之嫂与遇相继卒又抚其孤建建父子得底于成立者先生力也先生之内行醇备大都若此嘉靖丁酉岁先生试于乡宪大夫刘公得其文大奇之拟为举首会直指嫌其不出于己也欲稍后其次刘持不可曰不第一者还生文竟携以出先生即不魁省试而名日益起反重于魁省试者诸大夫争识先生履屣到门愿与交欢或延致为弟子师先生教人必先之以德行而后与辨析经义一时请业者无论文学彬彬率多砥行士矣先生尝客郑宪副所有富人子抵法当坐携金钱私遗先生求为地道先生惊曰某岂有遗行耶何至此其人惭惧逸去闻者益严重先生先生十上有司不售会伯子今宪副君守钦举于乡先生谓曰使吾当售也不后孺子孺子勉之吾将隐矣遂谢博士籍更号曰涧松而益饬躬端范以训诲其诸子率其乡之人盖先生歿十三年而宪副君成进士又一年得赠先生承德郎户部主事又四年晋奉直大夫户部员外郎宪副君居官所至奉三尺法廉顽贞淫无敢越尺寸者皆先生之庭训也予与宪副同对南宫知先生颇详故述其生平之槩作瀘石先生传以着先民之行事如此以觉夫世之浇漓者若家世生卒别具志中不具载

大父处士公述

大父处士公讳信其先越人永乐中有祖士贤北宦于燕始占籍于河间之交河家于县东五十里所谓泊头镇者士贤生珉珉生诚诚三子大父其嫡长也大父祖父皆仕宦而身独隐于贾贾而廉名闻远近大父面多麻人因以麻子称之闻其名者无不争就贸易大父好客客至人人各如其意所欲得以是人益附之货日饶裕然自奉俭布衣蔬

食无所纷华独好施予出于天性见人饥不啻己饥也见人寒不啻己寒也食饮钱布随所见輒施甚至解衣衣人以为常其施也不知倦其既施也不知德有指挥某者以袭官待次都门久资用竭鬻衣装为道里费行至镇贫不能前大父见而怜之曰安有人若此而贫贱者乎招之至食之衣之为资给而遣之不问其为谁氏也踰数载有达官驸从至门者大父惊以为误比入门向大父拜大父愕然迎拜曰公不吾识乎大父噤不能应曰吾昔公所济嫠人也今为指挥使转运道此一谢徃施耳陈品物于庭甚盛大父逊谢不敢当为治具欸之厚犒其从者饮至暮卒不能致一物叹息而去竟亦不问其为谁氏也其施不求报大都类此大父二子伯恩博学工文名振一时扼于数不得第第以选贡生为东昌幕居职五年清苦如一日尽减父产卒于官遗孤继登纔八龄越三十年而继登官太史乃作而叹曰予幸袭大父余庇官以史为名主纪载善人君子以垂世立教顾独令先人之德闇没而不彰岂不悲哉恨生也晚不及大父之世且早孤不及详讯先大夫以大父之行事第闻诸乡长老稍道其百一如此又不敢饰一词以诬吾祖谨次所闻为处士公述以传示我子孙俾知所考而感动取法焉

大中丞汤公小像赞

而貌则颀而度则祗而金玉其姿赤芾朱衣端居逶迤意瑰而行琦变化维时虽则维时而无诡随三吴而绥三楚而厘所去见思知公者犹云未究其施呜呼噫嘻

程太常像赞

黄金烂如朱服灿如止则于于行则徐徐尔其外腴而中虚者耶尔其夙夜匪懈尺寸不逾者耶尔其八年将作功成而不居者耶尔其九载京卿栖迟三署处世其若迂者耶世竞名而弗趋世竞巧而独愚于戲兹其为聚所先生吾将以之为模者耶

春秋议

准礼部手本该兵科给事中王士昌题为麟经离析多歧圣学几晦恳乞圣明亟行厘正以范后学以光同文盛治事移文本院要行词局专门春秋精研校勘一切传注令后学作何遵守其牵合附会引用非旨者应何删革主司命题应否拟定等因到院准此议得春秋一书圣人垂劝戒于万年严褒贬于一字即及门高弟莫赞其辞岂后世俗儒可异其说况国家既以明经取士自当以经文命题主司不宜因题有限舍圣经而别为传题合题以难士子士子亦不宜因题立意背圣经而姑习传题合题以合主司且传以说经非经也不可为经即不可为题况合之义不过曰比合曰牵合比合成题已非立言之意牵合成题益失作者之心又甚而搜罗隐僻杜撰新诡使治经者以滥漫之功妨正业典文者以疑似之旨失真才即在当时众谓无据传之后世人将谓何合无以后试士只以圣经为主其传题合题尽行禁革以昭圣世章表至意或者谓属词比事春秋本教传题合题相沿已久未可骤革至于近所穿凿如与传句影响相似实不干涉者传本两语相合却摘一语搭两股或四股者传本正说却乃捏增反说一股配合者本论春秋前后事却强引春秋时事当之者隐两本股却暗出两传搭股者两股无胡传从左氏及他

说合者诸如此类必宜痛加禁革使主司无逞臆于经之外士人得精心于经之内其于经术不为无补若试题拟定一节恐非事体未敢轻议

倭事议

人臣处国家之事当合众人之闻见酌敌人之情形不可专信一人之言专执一人之见今东封之事试虚心以思倭既受封何以无谢恩之使册使方还何遽有渡海之倭清正曾言已杀矣何以又云提兵釜山曾言已焚矣何以又云屯聚倭封之后与朝鲜俱我属国即朝鲜失礼何不请命天朝而遽兴问罪之师均此海也我册使之往来何难倭众之往来何易均此倭也今之来何易昔之撤何难既屯釜山又据梁山不掳掠不杀戮意将何为则沈遯击之不足信昭然矣而又试思倭能再来我兵不能再出不惟有始终孤小国之望且自示虚弱令远人有轻中国之心非策也是宜急图桑榆之功蚤为尸牖之计除各镇边防之兵不可调各省防海之兵不可调各处防矿之兵不可调此外有某兵可以应援某将可以将兵先调六千人或万人分为二枝每枝选正副将之谋勇俱备者领之储半年粮往为声援总设监司一人以察其勤惰而禁其骚扰又明谕朝鲜使臣云天朝已许发兵矣可归语尔国王亟集尔精锐聚尔粮饷期以半年之后当因粮于尔国以训练尔国将士则朝鲜闻我之不弃其国也必奋发之恐后倭众闻我之不弃朝鲜也当疑畏而不前以后倭如恭顺亦可逆杜其异日窥伺之心倭果跳梁即可少防其目前侵陵之患若曰少发兵不足以创倭然战虽不足守则有余况又可陆续征调以俟进发也不然兵非一时可发粮非一时可办朝鲜非一时可到日复一日动倭曰会议曰行勘缓则任己急则责人中外异心旦夕易虑万一骄倭觐我无谋乘彼无备蚕食而进则朝鲜之疆土日蹙兵力愈弱全仗中国以威四方令兵宿于无用之地财殫于无尽之溪猝有不虞从中而起萧墙之忧忧方大矣

东征议

朝廷之典莫重于赏罚赏罚之行当明其功罪今东征之役在经理杨镐方报以为功在赞书丁应泰又劾以为罪事系军情地隔异国既难遥度安可臆言将欲大服其心必湏详核其事合无遣风力科臣一员往同监军司道诸臣吊取各项文册逐一清查原兵若干见在若干损失若干原马若干见在若干倒损若干阵死若干病亡若干陆续运到粮料若干用过若干见在若干陆续解到金钱若干费过若干见在若干攻战有无劳绩斩获有无诈冒将吏有无逗遛功次有无攘夺粮刍有无冒破饷银有无侵欺讲和有无实迹军机有无失误身至其地面亲见其情形真伪莫逃耳目难掩众既公证其是谁敢独饰其非功罪既明赏罚必当惟允惟平不枉不纵赏一人而千万人知劝罚一人而千万人知惩内可以鼓舞边臣之气外可以慑服倭众之心矣谨议

东事议

功疑惟重罪疑惟轻所以慰安将士之劳振扬朝廷之威者圣意已定然必特遣科臣查勘者亦以功罪明而后可以议轻重且令提功罪之衡操轻重之权者在上不在下

也据督臣抚臣二疏则科臣徐观澜已回矣夫呪词乃呪丁应泰者与科臣无干何为而遽回哉且呪词不揭于赞画初奏之时而揭于会勘之日科臣不回于久居王京之日而回于将勘之时此其中必有缘故但事在异国势难遥断科臣虽回谅亦非遽似当仍令科臣随所驻之处会同总督经理监军诸臣各秉公心勿执偏见速为勘明具奏至于有功当从优叙有罪当以功赎宜静听皇上处分无滋烦议以耽日时则人心自服国体不褻士马早得解散免致他虞朝鲜蚤得安全无所顾虑矣

朝鲜撤兵议

窃惟人臣于国家事知之必真然后议之斯当见之必亲而后知之斯真况兵事至重尤非可以冥冥决者今督臣经理在朝鲜有年矣其倭之再来与否兵之应撤与否见之既亲知之亦真自当究利害之归剖可否之宜为明主别白言之若徒引其端而使皇上自决诿其责而令九卿会议使他日无事则已有事则曰此主上所裁决我何罪也又曰此某人所会议彼自有任其责者我无罪也逆计巧图以求免后咎余责此工于谋身非忠于谋国者古人有言兵难踰度百闻不如一见故臣愚以为撤兵一事只宜外决于督臣内决于枢臣而不当决之于九卿至于供饷则臣愚以为此必不可者自东事军兴畿辅齐鲁之民岁加饷银数十万椎骨剥髓剜肉医疮即奉明诏停征有司尚有不奉行者百姓之苦极矣又加以旱灾虫灾助人为虐闾阎罄罄无所得食木皮草根一时俱尽流离转死不忍见闻即我皇上发粟赈之稍为苏息而至今村无人室无烟如此景象皇上以为尚可加征以给异国否也况数年以来朝鲜之众死于倭者不啻强半以其半而耕一国之田自有余粟何烦中国兵士留戍者无所事事且戍且屯亦足自给又何烦中国汉赵充国将万人屯湟中而坐困先零班超请兵护西域不湏中国斗粮而咸服诸国彼独非人臣乎何古今遂不相及也若必欲腴贫民之膏血以转输于藩篱之外恐财尽不能胜其求力疲不能胜其后此孔子所谓季孙之忧不在颛臾而在萧墙之内者故臣愚以为此必不可也谨议

策问

问古称天地生财只有此数不在官则在民今闾阎穷乏帑藏空虚将以为在官耶在民耶不在官不在民将何所在耶夫在官则散之在民则敛之不在官不在民不知大司农又何以为计也朝廷之上如漏卮不堪岁出而不得不散百姓之家如悬磬不堪岁入而不得不敛敛者不能越子例之外而散者日闻增于例之中无事既发帑金为粮刍之用有事又请帑金为召募之资夫须粮须刍则有兵有马临时何为又烦召募待召待募则无兵无马平时何为屑越粮刍乃下之请发于上也则必得上之清核乎下也则必不得岁复一歲长此安穷汉时文学诸生议盐鐵均输持论甚正则理财之策亦诸生所宜留意也其各陈所见尽言以对

问古者四民各安其事不易其业故道德一而风俗同末世则有三游之民矣可指而言之与此三游者荀子所谓德之贼而乱之首也至孟子所深距力辟者乃又不在三

游而在杨墨岂惑世诬民三游浅而杨墨深与汉兴表章六经罢黜百家似矣前数家者果悉黜与否与汉晋以后佛氏转盛比之三游杨墨其害又孰为浅深与唐之韩子宋之程子朱子或昌言攻击身任祸殃或辨析毫芒推极流弊是犹能闲先圣之道以异端排之也至于今而不然矣治佛氏者高持其说而欲踞吾儒之上业儒术者卑视其学而甘出佛氏之下岂以圣学大明之世海内之广竟无有如孟如荀如韩如程朱其人者哉又何以令后之视今也夫崇正辟邪其责在士君子其事在师儒诸士行将为士子师矣所以回既倒之澜辟既榛之路者何道而可其究言之以观所学问周礼大司徒以荒政十二聚万民而又有廩人诏谷以治岁之丰凶其为民计者至详矣其略亦可言与今不幸有方二三百千里之水旱民即转死流离甚者人且相食岂荒政之未讲而廩人之职犹有所未备与抑或有他故与天灾流行无代无之汉臣有矫制发仓以济饥民者今即有其人亦有粟可发否宋臣有知青州而活流民至五十万者未闻烦内帑也今一有赈济动请帑金岂古人之法不可行于今而舍请赈外无可为计与幸主上天覆不爱金钱漕粟以活沟中之瘠而销潢池之变然说者谓饥而后请请而后赈枵腹之民不能忍须臾勿死以沾德意故揀荒不若备荒备之之说无如古常平仓法义仓法社仓法此数者亦可行于今否与数者之外抑或有他道与诸士之来也于饥民情状亦既耳而目之矣兹欲使海内黎庶乐岁终身饱凶年免于死亡何策而可其酌古度今各以意详着于篇以覘济时之畧

淡然轩集卷七

●钦定四库全书

淡然轩集卷八

（明）余继登 撰

○诗

送邢小槐户部

寒蝉吟落叶凉秋忽已徂鸿鴈纷南飞游子怀故庐如何我故人严装方戒涂忆昔结殷勤与子两相于披心见情愫慷慨意有余何以喻绸缪譬彼双飞鳧天风起苹末同心而异趋一鳧厉羽翰翱翔向天隅一鳧悲其羣翘首相鸣呼岂无盈樽酒迟子以须臾对之不能饮涕下沾我裾会合知有时柰此音徽疎千里若比邻斯言安得如愿言加餐食努力恢良图上以报天子下以慰离居

独酌

花下倒新篘明月来相对醉忘花影重却疑月影碎

寿米坤泉户侯七十米二子伯举武进士仲举进士

秦陇推名族燕京领饮非家贫缘爱客宦薄为知机旷达今谁并寿年古亦稀仙郎文武彦榆景自光辉

寿少司徒王见峯公七十公原以终养家居者

葵藿原倾日桑榆转慕亲祇缘寸草意早乞老莱身静久忘簪绂情恬爱角巾朝端曾让德闾里尽归仁叅伯夸难弟中丞有嗣人无营神自王不竞性弥醇骏誉推三达鹤龄始七旬莫言今白髮遂尔厌红尘世事多新态君王忆旧臣应知虚鼎席仁见下蒲轮致主心仍壮匡时道益振东山高卧起曳履上星辰

瀛洲亭对雨

五月苦炎热瀛洲亭亦然千林忽过雨双溜看飞泉萍翠无停梗荷珠不定圆新凉生坐席庭草尽堪怜

短歌送廉庵之狄道

少年与君友君气薄青云胸藏六甲术书着五千文壮年慕君义与君结婚姻君志不得遂坎坷难具陈近日共君醉燕市知君磊落犹如此晚拜一官狄道丞西去乡关数千里前年敌骑入临洮杀气惨淡阵云高鬼火磷磷遍原野至今谈者犹魂销惟君闻之气转豪壮懷直欲凌云霄请缨宁肯让终子大将或恐非嫖姚送君行饮君酒丈夫金印须悬肘马头皂盖且辉光腰下吴钩正鸣吼饮君酒赠君诗一语一杯君莫辞金城迢迢在何处日行日远遥相思相思但望关山月犹似长安对酒时

读史【二首】

王孙昔未遇垂钓在江干腰下鹿卢剑夜夜冲星寒朝受丞相知暮登大将坛坛上隆準公回席愿交欢嗟哉绛灌徒怒髮自冲冠拔城始授邑捕寇方拜官譬彼南溟翼万里振羽翰枋榆有斥鷃抢地但仰观世事良若斯志士空长叹

公孙年六十犹是孝廉身射策偶见收遂为侍从臣主爱诈亦忠赫赫侯平津长孺不解事区区论积薪淮阳久不调壮志竟沉沦空令千载下为尔泪沾巾

哭泊阳王丈【六絶】

君是当年王子乔忽乘鸾鹤上云霄蓬壶自有神仙侣空为英魂赋大招
湛湛清心玉不如姓名蚤已荐贤书可怜九待公交车诏依旧青衫未破除
与君偕计上燕台裘马纵横亦壮哉君志未酬今已矣坝篴独奏不胜哀
楼成白玉白嵯峨欲借修文君柰何回首乡园频洒泪故人零落已无多
恠君日日拚沉醉只爱沉酣不爱醒今日浇君君醉否悲风吹雨昼冥冥

白马青袍事事新君家兄弟更无伦那堪一夜西风恶鸿鴈行中少二人【君仲弟先君数月卒】

上巳日崔侍御招饮东郊同刘太常涉河游览时李太仆王给谏病不能从侍御索诗戏成二十韵

三月天正和良辰当上已有客期修禊招携几知己连轡出东郊顿觉异城市高亭何岿然盘石下礧礧野旷天欲低雨过林如洗极目众峯青入座羣芳紫林鸟惊窥人睨睨良可喜春光倏强半好景能复几当杯且莫辞不见王与李感此三叹息浮白更酌醴欲济无方舟肩輿涉河水水上敞高轩孤峙河之浹轩侧闻流泉可以漱醉齿何处送行

人笙歌乱人耳行者君自行止者吾仍止去住亦何常悲欢竟谁是游览未终竟斜阳已移晷策马怅还归高兴殊未已停杯问主人何日重来此

山中

遥望西山岑白云日归去驱马向山中不见云宿处

游荷花池【二绝】

一雨过荷池池花娇于女莫便轻折却或恐作人语

白鹭白于银独立池荷下风吹叶乍翻疑是弄珠者

赠用韞

以予送子意知子别予心嘿嘿两无语黄鹂鸣上林数日不见君疑似经年别忽道别经年相思浑欲结行云岂不驶何如车上轮征轮已不见犹自望行尘予歌皇华章子咏停云什问子来时期何似行时急

甘紫亭侍御买妾戏赠【二首】

明珠买丽质光映使君家试问闺中貌何如槛外花无惭金是字偏称玉为珈宠极无人妬良宵自破瓜

才子近乘鸾深闺比合欢醉怜眉月映舞爱鬓云残倦倚鸳鸯枕娇扶獬豸冠喜闻夫婿道昨夜梦征兰

魏见泉中丞寄诗见怀书此奉答

怀人西望隔天涯喜得缄书慰所思纸上韬铃方叔畧【公寄有抚晋事宜】扇头珠玉惠连诗羨君指画消烽燧顾我蹉跎感岁时心事渐为知己道年来双鬓欲成丝

夏日病中得家信【二首】

近得南来信园林已就荒有星犹是客无日不思乡檐树夏偏茂茅轩午正凉何能生羽翼一枕卧羲皇

日日说归去蹉跎直至今宦情谳始淡乡思病逾深不羨桓生马宁须疏傅金一樽堪自适花下可长吟

许少薇奉常请告归寿尊人赋赠

东阳有逸老雅尚在沉冥狂咏曾讥凤贫帷每聚萤瓢声犹厌聒鼠味肯知腥愤发穷三传谋贻但一经仙郎真汉俊高步涉虞廷起草推长策伏蒲犯怒霆奉常酬壮绩朝宁仰仪刑岂敢薄鸿路其如恋鲤庭陈情频抗疏予告喜扬舲子以卿为月亲看寿是星椿萱荣暮景冈阜祝遐龄茎掌携金露华筵倒玉瓶齐年俱鹤髮双杖并鸠形诰下鸾新紫符来乌自青循陔思久渴舞彩意方宁菰米秋偏美莼羹晚更馨君侯夸养志明主待祈灵海内况多事能容爱独醒

送郑大夫晋明备兵川南

岷峨西南一片石巉岩久与人寰隔洛泸滴泊万仞流岚烟瘴雨纷相射汉家丞相曾廓清至今梟獍犹充斥两川幕府称骄兵一夫裂眦争脱帻驱逐大将如婴儿妖氛黯

澹天无色纵横漫说釜鱼游跳梁尚惧莽蜂螫灭寇虚言壮士规借筹还仗书生力大夫
胸中富硕画司马署中声甚籍朝来受诏明光宫慷慨夕出长安陌春明门外罗祖席大夫
此行何赫奕腰下雕弧月一弯袖中宝剑霜三尺马蹄踏徧栈云黄岭■〈彳 员〉啼
彻江天白虎符应令魑魅愁神羊坐使豺狼辟吁嗟乎巴人夷女盈路侧满眼疮痍尽苍
赤标柱休言汉将功理绳且效龚生策何时刀剑易犊牛顿见干戈易麻麦

戏柬刘効忠兵宪

当年意气请长缨笑领铜符徼外行朔漠烽烟朝入塞汉家都护夜谈兵荒城日映
旌旗色古戍风传刁斗声回首空闺人寂寞流黄机上月华明

宫怨

屏帷向月夜窗幽坐对星河黯自愁独有齐纨伴寂寞凉风又到殿西头

送霁云田往荆州

青丝双控五花骢遥指荆南意气雄两岸晓烟迷远树片帆落日挂晴空云连吴会
千山合水入巴江一派通君去正逢秋色好仲宣楼在月明中

送丁勺原侍御左迁潞安司理【二首】

樽酒论心日怜君意气賒一麾辞汉阙五月向天涯匹马孤城暮荒村落日斜贾生
余涕泪空自洒长沙

春明门外路去去复盘桓不是悲行役其如吾道难风尘双客鬓道路一征鞍独有
青龙铗时时马上弹

题沈节妇卷侍御钦华大母也

轟轟山上石青青石上松托根既以异贞干凌苍穹不随春色荣肯随秋风靡春去
秋来自歲年年年劲节常如此吁嗟乎沈母之操无乃是结髮事良人夙夜奉姑嫜灿灿
红罗襦上结双鸳鸯殷勤不惜理苹藻此生自分能偕老人事从来错迕多连理摧残何
太蚤上有垂白亲下有呱呱子嗟哉夫子心九原应不死夫君死兮何敢生夫心不死何
敢死朝供菽水暮和丸一旦红颜为君毁有儿作赋能凌云自言持此报夫君平原未竟
生前志长吉忽修地下文独抚遗孙心最苦指点遗经泪如雨凉月娟娟照素帏严霜片
片栖寒杼黄鹄歌成倍惨然夜夜愁闻绿树鹃幽谷倏回白日照玺书赢得君王怜六十
年前相永诀记得托孤言更切儿今有子已高骞鹄立中朝称俊杰豸服归来称寿觞北
堂大母年方耄赭然颜上丹犹是盈盈双眼血皦然心上冰飞作萧萧双鬓雪三春桃李
竞妍华后雕惟有贞松节吁嗟乎石可泐松可折沈母之名不可灭

纪梦【万曆丙戌六月初九日梦中所得句不知何谓漫录于此】

相望潮水阔相思潮水深相思不相见愁杀望潮心

十月一日

满天霜露下平芜累累荒坟入望孤一陌纸钱空堕泪寒衣知到九泉无

春日郊游

连骑出郊甸翛然林壑间开樽依绿树移坐对青山晴色当杯堕孤云与意闲尘襟聊自适薄暮更忘还

题费国聘市隐园【四首】

避宠辞燕市为园在汉阴剪茅旋结屋种竹已成林泉石生幽兴琴樽惬隐心风尘吾愧汝空自说知音

大隐在城市清幽独羨君凿池堪受月架栋欲栖云冠挂神羊影身藏雾豹文偶谙心所好不是为离羣

幽意谁能识闲门且自扃荒凉仲蔚圃寂寞子云亭以尔心能远因地亦灵骚人时间字太史漫占星

十年井澹泊三亩隔灌叟拙难招隐文成半解嘲才名高汉署心事足衡茅前代称禽向怜予独系匏

九日柬用韞

为问梁园客其如佳节何繁花当户好秋色向人多忽动龙山兴高吟蓝水歌倘君能汗漫载酒欲相过

陆敬承有台曰来爽暇日登之漫赋【四首】

登君来爽台直北见宫树春条敷其华鞞鞞团朝露秋风撼霜柯零落非其故倏忽阴阳移荣悴犹朝暮人命良若斯胡为苦驰骛不如饮君酒豁然抒情愫志士爱修名达人贵真趣

登君来爽台东望平津宅高门临交衢轩车填广陌大命忽以徂寥落非畴昔芳树摧为薪空庭惟鸟迹盛衰更何常华豪竟奚益不如饮君酒长歌浮大白世事难具陈壮士腕空搯

登君来爽台南望长安道车马何纷纷鞞路无宿草怀璧意自衒弹铗食难饱名利无终极红颜郁枯槁攘攘竞岁时凄凄伤怀抱不如饮君酒与君共倾倒一醉空百忧当生以为宝

登君来爽台西望西山岑飞泉流阴壑初日照阳林岩栖者谁子容与山之浔蝉蜕遗世累放志独高吟我欲徃从之云溪阻且深不如饮君酒洗盥更复斟古人有遗言金门堪陆沉

寄李汝培太仆【四首】

怅别春明路忽惊歲月除龙门何日御鴈字近来踈慷慨汲公疏寂寥杨子居巫咸凭借问天意竟何如

西去风尘恶南归道路賒主恩怜太傅不遣到长沙江上秋涛水琼台春日花知君能自适无梦到京华

自是天难问谁云宦易工红颜辞露冕白日卧秋风蹙跨扬州鹤聊闲鲍氏骢君身非阮籍肯复泣途穷

君已将身隐谁能为国谋投珠悲按剑积羽谗沉舟莫叹塞翁马恐惊海上鸥难兄
有令弟相对可忘忧

赠道士

玉皇香案吏貌古带烟霞世上应无住壶中别有家扫松烹白石和露煮黄芽绝胜
风尘客依依老岁华

杨公亮出叅闽藩歌以送之

杨公亮磊磊落落伟丈夫修眉大颡仍虎须一日千里名家驹胸中奇字几千卷片
言落纸纷明珠三十挟笏上公交车赋成咄咄凌子虚平明簪笔直金马午夜燃藜校石
渠昂藏难入今人格肮脏不受时名趋自向人间并匏落懒从天上借吹嘘吁嗟杨生亦
太迂生也工瑟世好竽世人何贤生何愚汉庭谁复怜才子风尘直向天一隅青丝双挽
白玉壶送君醉君三百觚酒酣慷慨歌乌乌浮云黯淡天模糊欲行且复留须臾劝君更
勿赋归欤有舌尚存亦足矣有腰不折胡为乎男儿堕地蓬桑弧南北东西惟所如况君
有手龙可屠春霖一洒七闽苏流波不返白日徂容易白髮生头颅试乘六传清炎海犹
胜扁舟老鉴湖吁嗟乎若雌若黄何时无为牛为马从人呼安知此行非良图豫章之材
廊庙需竟看还子承明庐

李夫人

魂耶梦耶迫而察之恍忽兮其不可即

近耶远耶予实要汝奚徘徊其若疑

泣耶诉耶胡不前令予心其转悲

休洗红

休洗红洗红红不鲜休弃妾弃妾妾堪怜妾命薄如水嫁得游侠子游子夜夜游不
归贱妾独上流黄机织成袿服与郎着殷勤愿得郎心乐郎心不乐妾安托

长歌行

舞腰细歌声长调缓闻激羽音飞绕画梁玳瑁席翡翠妆斗转银河乐未央

短歌行

洗大白歌短歌歌短调更促乐极哀转多白日暮朱颜皤曦轮不回君柰何

送萧以台使秦兼归省

君家仲氏昔校文蹶履曾凌华岳云华山道士久云卧月明彷彿挹清芬君今持节
秦中去此去经行华岳路白社原分大国茅青骢遥度长安树华下王生心相知燕市曾
为华岳期携手应知能汗漫振衣宁复畏嵌巖玉女盆头香雾缈仙人掌上祥烟绕翠嶽
谁夸众岳雄顾瞻顿觉三秦小羨君兄弟真壮游洞天福地足夷犹应有新诗纪胜迹风
雨夜夜山灵愁金马嗟予久寂寞关门虚负王生约自怜斥鷃本卑栖何以大鹏游寥廓
太华削成势独尊诸峯罗列似儿孙遥望乡关杳何在汉江亲舍白云屯十丈莲花如船
藕昔日灵根今在否君携几片为亲寿令亲寿比华山久

临高台

临高台高台高嵒岑前临大道俯瞰长林谁其筑者千黄金我来眺望恻焉伤心西
不见乐毅南不见剧辛但见浮云蔽白日日华黯淡为之阴长空谁布云为阵我欲问天
不可问怒拭宝剑拂尘埃划然一映阴云开

送萧桃源【二首】

君才宁一尉飘泊此微官为吏折腰苦逢人强项难谁怜辕下骏真是棘中鸾别后
桃源路春风走马看

黄河天上至淮甸此浮沉怒浪羣峯小惊涛大壑阴此行聊荷锄漫道解鸣琴何日
宣房曲长歌嗣汉音

午日梦公亮

自向樽前别纔于梦里逢嗟君归海峽忽已届天中旧俗看悬艾浮生叹转蓬长安
当令节惆怅忆扬雄

君马黄

君马黄臣马青二马交驰君马停臣骑青马间以骊逐电横行向安西为君臣呼韩
破郅支斩楼兰灭龟兹十年踏遍阴山雪万里归来汗流血马上将军成大功闲饱苜蓿
嘶秋风

送张洪阳宗伯请告还公有闲云馆盖旧业也【六首】

去住原无系行藏意独真乞身归白社挥手谢红尘济世慵为楫涉江聊采苹秋风
张翰兴端不为鲈莼

抱疴甘涧壑久客厌承明丛桂宜招隐沧浪好濯缨云光檐际落山色座中清何限
云山意堪轻世上名

世事何须问真心但不违闲云如有约此日幸同归薜荔裁初服鳧鸥共钓矶故乡
风物好转觉宦情微

选胜章江侧聊开仲蔚园烟笼南浦树日永北堂萱倚槛风生户当樽月满轩幽期
谁与共野老共忘言

直气千秋壮高风百世师此行真独往何日是前期萝径堪龙卧梧冈想凤仪莫将
报国志容易逐年衰

世买燕王骏公焚学士鱼物情今若此天意竟何如歲月青阳逝年华白髮疎空令
芸阁吏寂寞赋闲居

陈肖平擢守大名且得长孙短言赠行兼以志喜【二首】

邢台今辅郡此去况专城人望使君至当如澶水清何心萦紫绶雅志在苍生肯让
循良传独高汉吏名

为郡恩光重充闾乐事繁人方思杜母君喜抱兰孙五马原称骏一毛亦是鹤于公
有德政应大里中门

题栢溪沈翁画竹大宗伯龙江公尊人也

袅袅淇园竹青青岁寒后世上繁花岂不妍此君真与栢为友栢溪老翁标格奇爱竹爱栢仍爱溪溪边栢下一壶酒醉墨写出琅玕枝琅玕枝墨花落一竿两竿势如削潇洒团栾何太工神品不与凡竹同风雨一夜化龙去随翁直上蓬莱峯长留数茎化不得至今日日生清风清宵明月当轩堕寒影逼人侵四座凉飕飕入帘间隐几静听声珊珊渭川千亩转觉俗只此数竿看亦足恠来宗伯彻骨清朝回对之豁心目尚书省近太微垣天边雨露滋灵根迩来生意泼泼发春深或恐长龙孙

赠王四槐宪长【四首】

北风烈烈声怒号寒天满目飞蓬蒿健儿鞞瘡马猬毛书生那有封侯骨都护休言出塞劳

岁暮阴云黯欲奔黄沙涨天白日昏天关虎豹如云屯莫言长别辞金阙且喜生还入玉门

男儿出身常事边何如归种洛阳田宝刀卸却但高眠且喜手中银不律羞杀跨下铁连钱

寒风吹折蓟门柳劝君但尽杯中酒赤胆空言大如斗向来枉费张君舌此去好闭陈生口

方扩甫至涿鹿闻贵阳之命不及一晤而去书此道怅惘之怀

黔岭盘江客路长君才岂合老风霜上书北阙忠为胆驱马南天瘴是乡铜柱何时标粤地竹符此日走蛮王相逢咫尺还相别离恨应随到夜郎

奉送少司空李棠翁老师之金陵【四首】

留都吴建业常伯古司空礼乐归宗匠经纶属国工晓云随去马秋月听征鸿时有怀君梦清宵入汉宫

众望归台鼎王言作朕虞积薪嗟自汉乘传且游吴胜可探三岛闲堪赋两都秣陵余王气怀古见雄图

去去辞金马行行向石头台高曾宿凤官古旧名鸞南北皆荣遇江山足壮游独令桃李士日夜望仙舟

昔校陪京士曾看吴苑花今叅玄武部还泛大江槎世路疲行役风尘老岁华栖筠原重望日下看宣麻

送史应之给事使汴【二首】

暂辍明光草遥分大国桐双旌来日下四牡向天中寶剑含秋水金函耀彩虹梁园如有赋枚叔未为工

去矣游何壮嵩墟本帝京河山千古胜带砺万年盟芳草迷周泽祥云拥汴城夷门久寂寞何处问侯生

送方户部之金陵【二首】

十月燕山道潇潇风正寒故人从此去偃蹇寄微官世事凭谁论天涯好自宽相看
惟涕泪聊尔劝加餐

官是度支吏人称画省郎此行非落莫吾道足徜徉地胜当龙虎台高有凤凰知君
能汗漫赋就莫相忘

费国聘入贺还蜀【二首】

别久情偏洽欢多别转难风尘堪堕泪霜露好加餐路入蚕丛杳山当鸟道盘锦官
千万里何处望长安

吾党论英妙惟君意气雄入朝歌燕镐献寿竞呼嵩名以游燕大文从谕蜀工怜才
明主意迟尔建章宫

重修干清宫奉慈驾还御制题

闾阖重新接紫微九重天子奉慈闈云连画栋开金殿日射雕楹敞玉扉仙鸟翩翩
迎彩仗炉烟缭绕上霞衣遥知定省承欢处寿曜弧南映晓辉

过燕子矶

燕子矶头山色幽燕子矶前江水流矶上老僧无一事年年此地看行舟

登凤凰台台上有石甚奇前为陈光禄移去竟沉江中

李白游白下曾为凤台吟凤去几千载台名直至今我来登此台秋色亦已深高台
久荒凉古木尚阴森但对骢马客不闻彩凤音游览未终竟斜日下高岑好雨从西来凉
气袭我襟台上有奇石闻向江中沉利令石可移恻焉感予心

恭题玄兔卷应制

玄霜捣就化仙姿跃跃今看在圃时喜向天门标上瑞还从月窟应昌期精涵水德
由来异色借烟光觉更奇染素知逾千岁质披图拟荐万年枝

恭题大阅图应制

我皇神圣能绳祖威灵赫奕超千古岭表烽销瀚海清犹自忧危思耀武三月三日
天气和五云高捧翠华过地动轰雷奔铁骑丽天晴日照金戈辕门此际军威震伐鼓鸣
钲闻远近七校争夸貔虎姿十干正演龙蛇阵纵横叱咤逞豪雄角射当场技尽工健儿
惯使千斤弩侠少能开六石弓健儿侠少纷驰逐夹道旁观俱誓服冠军原不让嫖姚扛
鼎何须羨贲育桓桓赳赳壮皇威妙畧英风播九围久闻关塞饶歌唱坐见边庭羽檄稀
太平日日谋桑土战士人人沾雨露天下虽安未可忘吾王一豫真为度只今将卒如云
屯御敌年年更苦辛九边愿普投醪惠万载常歌挟纩仁

恭题画鹿应制

匹练开仙籞良工赋象奇牲牲看逸态麇麇见灵姿太液泉明处长杨木茂时试观
町疃迹知是恋恩私

玄圃深钟瑞宜春旧擅名异毫留墨润黝质照人明饮溲形何适眠荃性不惊宛然
灵囿里神物表休祲

曾见白环异仍留宝绘传锡名征百禄阅世已千年莘野娱嘉客蓬山伴列仙衔花
金令爽献寿傍琳筵

本是仙家畜今归册府藏冰纨呈宝篆星毳散瑶光晴树纷供翠秋芝细吐芳上林
无羽猎羣友任徜徉

送卢东麓祠部廷杖为民南还

燕山雪花大如手层冰欲裂阴风吼车轮摧折马不前卢郎此日东南走卢郎尔去
莫销魂尔力犹能叩天阍幽谷不回白日照星辰乱落红尘昏红尘昏浮云驰嗟哉世事
竟堪疑精诚自分山可移山鬼窃笑精灵窥汉庭不闻贾生痛泽畔谁怜屈子悲卢郎卢
郎尔何为上帝待尔以不死尔归且韬胸中竒慎勿狂歌叹五噫

吴太华宪佥买燕姬赴蜀赋赠【二首】

燕姬年十五弱质不胜春得侍吴郎寝何言宋氏邻舞余娇欲尽妆罢态逾新行路
应相问几家疑姓秦

别母辞乡国踌躇谁忍分愁看桃叶渡泪点石榴裙月貌娇夫婿风流属使君若经
巫峡路或恐化行云

游崇真观

偶来游玉宇不为觅金丹尘世纷拏苦人生休暇难聊同羽客话暂卸侍臣冠石窦
流泉出泠泠入座寒

有感

皇都色未曙车马已喧阗侠客纷携弹妖姬惯数钱王侯罗甲第戚里鬪繁弦不似
股肱郡萧条絶暮烟

过江陵故宅

高门余故宅荒径但新萝巷僻无车马庭空散绮罗树残微有叶池浅不生荷富贵
皆尘土豪华那足多

病中

病多偏易懒独坐漫踌躇即死不称夭倘生真是余一身原自幻万相总成虚何事
拚微命依依老校书

长门怨

长门寂寂不胜春忍听君恩处处新亦有黄金堪买赋羞将宠爱托词臣

村居

寂寞村斋里春深日觉迟药残呼仆鬪背倦倩儿捶户外鸟啼树井边犬护篱地幽
无客至闲检杜公诗

长信宫

可怜长信已春回总是无人花亦开莫道天街常寂寞帘犹喜燕飞来

闻蝉【二首】

高槐遥借隔林青
树里鸣蝉乍可听
记得年年当此日
一般流响过闲庭
午夜枝头时饮露
斜阳叶底惯吟风
儿童最爱声清切
愁杀悲秋白发翁
自君之出矣

自君之出矣
罗幔为谁熏
忍见博山上
蛛丝结网文
恭题百子图应制

宫中多乐事
百子竞欢趋
知是燕谋应
欣看龙种殊
人人阶下玉
队队掌中珠
共讶冰为骨
还疑玉作肤
娇痴原不妬
游戏总堪娱
约臂黄金串
缠身锦绣襦
螽斯征瑞庆
麟趾叶祯符
长信浑无事
闲听歌凤雏

寿徐封君翰检端铭之父

忆昔年当韶齿时
与君诸弟相游嬉
君时文章光陆离
凌云有赋众所竒
投分未登孺子榻
论交已受季方知
三十余年疾如驶
予髮种种已如此
君今头颅可知矣
闻君年开六袞余
骨格清竒鹤不如
教儿已作风池客
携室同向鹿门居
君今不乐将安须
春花发繁红秋樽
湛芳绿鸠杖双携
灵寿筇紫箫共度
长生曲何必怀金
纒紫谒帝庐又何必
求仙问道访茅屋
如此五年愿亦足

送高仪部谪中部令

聊沽燕市酒
送子向延安
南省名逾重
西人胆欲寒
一鸣成斥马
百里暂栖鸾
但保丹心在
无嗟行路难

元夕送常廉庵北上

浮名驱子去
慷慨向瑶京
宝月照离思
春星伴客程
绿樽聊共醉
青眼定谁明
自愧杨中侍
无能荐长卿

送甯云田备兵独石

中朝节使行边日
犹是单于款塞年
剑气夜寒青海月
笳声秋断赤城烟
北门尺堠遥连晋
上谷层关迥抱燕
闻说汉庭论保障
黄金雀印待君悬

寿何封君

罢郡归来二十年
采芝劔药老林泉
斑衣亦是山中相
野服真成河上仙
驯鹤时看陪杖履
冥鸿久已破云烟
嵩峯尚有王乔在
明月应来证太玄

送易君选守兖州

驂驪宝马逐风尘
喜报除书歲歲新
北阙双符分紫绶
东方千骑拥朱轮
人从水部知何逊
帝为名邦借寇恂
有日黄金飞汉诏
看君露冕自行春

望夷门【二絶】

驱车上夷门
怀古三叹息
可怜虚左宾
独有窃符策
朱亥诚勇士
侠气凌秋云
何事袖中椎
不椎秦将军
赋得双塔寺

寶塔参差插帝都
琳宫对耸玉浮图
慈云拥处轮疑转
明月悬时影不孤
白马双双

来异域黄金叠叠起灵枢莫言久已成灰劫犹有胡僧夜拜膜

送徐肖及请告南还

去年我别君河桥樽酒醉斜曛今年君别我古道双旌纷婀娜欢会何少别离多把袂相看泪交堕君厌承明庐翻然赋闲居归云一万片片随君车白云亲舍知不远游子天涯今始返十年曳裾亦已迟一旦抽簪未为晚与君交结与君亲仲氏吹篪伯氏埧羊质笑我终难达龙性知君不易驯长安华毂者谁子尽教繁盛常如此岂无肝胆向人倾世路悠悠几知己君嗤腐鼠腥高步入青冥顿觉客游恶能使客心醒亦知富贵等朝露可柰兄弟如晨星世间万事无不了白日红颜空自老君辞荣禄何其早茎露调来并旨清■〈革芒〉鞮踏破云林晓送君行为君道君归预把山石扫有日寻君易水滨十日平原共倾倒

送慈溪潘学博

薄宦向何处东南甬水边春风开絳帐寒色上青毡博士原潘岳诸生得郑虔广文官舍静明月好谈玄

寿石介峯母太夫人时介峯新有操江之命

凤诰翟褕出汉庭慈云冉冉护輜駟金仙原注长生策寶婺今连执法星春色喜看萱草绿东风频想荔枝青中丞新领吴门节大有江鱼荐醢■〈酉灵〉

送许静峯备兵清源

古人最明德今人惜离居离居岂不惜明德良足图烈风吹征衣送君城南隅君行向清源坐拥双熊车清源何壮哉交交名利途帆樯下大河车马纷长衢厨传日丰盈田野日荒芜昔予疲行役过此长太吁对食不能餐单车屏前驱今岂异昔时民或益以愈宪府自崇邃安能顾田庐谁为洒春霖一使劳者苏君负彩凤姿况握竹虎符行当念穷黎寧复甘华腴先哲有遗言示我以良谟诗人戒戎作大易谨衣衲君行慎勉旃于以慰区区

遇斋毅庵文所小饮敝居遇斋能谈玄修赋赠

天涯宦迹许谁亲且喜开樽对故人浮白尚余年少兴谈玄欲驻老来身须知尘世生原幻莫道丹经诀是真今日与君聊尽醉仙家几见有词臣

刘効忠再起备兵阳和

不有唐冯在谁论魏尚功君才堪秉钺此去复临戎尘净龙城月烟消狐塞风亦知燕颌相未合老隆中

送张端叔大叅之大梁【四首】

何意明光客驱车出蓟门汉庭谁补阙梁地尔叅藩中外皆王事风尘总圣恩寸心期不负此去更奚论

河桥三月暮春色晓氤氲黄鸟方求友青樽却送君魂销燕市酒心折太行云兄弟飘零甚天涯忍更分

无以赠行役看君空泪垂向来惟令德此后但相思古道存交谊深情怅别离连床风雨夜何日是前期

苍茫望不极天上落黄河君向中原去应从此地过孤身真浪迹九曲尽风波莫仗怀忠信艰危世路多

寿陈太常母夫人

青青堂上萱郁郁堂前桂萱兮正芬蓝桂生何蔽芾秋风生桂枝馨香为国瑞托根在天墀雨露时其霈双承雨露恩持以献堂背雨露日以繁萱花日以蔚孤根比大椿挺挺八千岁

朱太史养淳册封周藩

昔予祇行役驱车向中原中原饥馑余氛侵日以烦白骨乱如麻黯然销神魂朱门郁萧条哀哀诸王孙君今复持节翩翩过夷门不知周遗民今有几家存况今早为虐五月黄尘昏知君负经济雅志念黎元当其授简时应为废朝殄莫以董贾笔虚负邹枚言愿赓云汉篇归来达至尊

元日饮用韞宅遇雪兼赴刘工部之约【四绝】

子云拙可嗤佳节甘萧索喜得同心人相招共相乐
故人交如兰故人酒为蕙交深酒更佳何妨为君醉
醉来兴太狂六博闲笑语风雪解留人门外深几许
踏雪觅刘郎相看成一笑不如王子猷空返剡溪棹

寄友人鲁生同原【四首】

独爱同原子昂藏一丈夫蚤迹博士籍急返步兵厨六袞身方健百年事易徂鹤裘何用惜好付酒家胡

不受儒冠误知君意颇真心能识故我名已让他人谢傅登山屐陶公漉酒中只今吾愧汝碌碌尚风尘

生事今何若栖迟林壑间有时或药圃无日不禅关谋任巢鸠拙身同野鹤闲已堪称大隐何用觅商山

试问清狂兴年来更有无花前曾索饮醉后更呼卢惟我论交态从人诧酒徒何时重把袂肯使社盟孤

邹南皋给事之金陵【二首】

万里投荒后孤忠自许时君恩犹未报直道竟谁移谏廿匡生疏封章贾傅词倘能存国是敢惜此身危

牢落风尘里艰危此一官薊门春色暮白下法星寒何意时名大翻悲吾道难逐臣双涕泪不为别离弹

寿俞进士父

六十龔眉叟雅如陈太丘闲情看畏垒生事独沧洲自是形疑鹤何须杖有鸠君家

邻海峽歲歲自添筹

君有谢家玉新弹汉吏冠一经今若此百歲总为欢涉履江天阔开樽云水寬自应
常驻世何事问还丹

寄敖嘉猷

近得山中使遥传锦字书云披莱子服肯问蒋生庐菽水贫非病莺花乐不虞安仁
耽寂寞一意赋闲居

送黄层城先生还蜀李座师壻也【二首】

翩翩黄叔度潇洒絕尘襟自是风流况兼之兰蕙心标清疑片玉价重愧双金无柰
别离急相思锦水深

君年方弱冠万里事游燕去矣乘龙客飘然跨凤旋壮怀凌北冀归兴落西川别后
如相忆春风待着鞭

送张伯任都谏阅视

开城古雍州汉家朝那地迢迢控番夷可断匈奴臂一从和议成关门久不闭无复
念军兴祇闻增歲币壮士卧干戈边城罢烽燧岂不息战争难免销精銳藩篱不复施边
人日窥伺去年戎马来纵横太凌厉酸风卷寒云三军同日毙所过无鸡豚哀哉肆吞噬
天子频西顾疆吏尽更置君从掖垣中叩阍数言事刺刺悉边情一一当上意藉尔青琐
贤出作行边使行视昔战场白骨尚委弃四野无人烟那能不陨涕誓将廓兵氛何以壮
军势君其贾余勇时方待高议好上金城畧永垂秦川利并学汲公戇寧顾汉庭忌国论
寄通塞仕途随险易得君借前筹肤公奏今歲

送王孝甫大理阅视延绥【二首】

黄金装宝剑白羽借兵符知尔多边畧终能赞庙谟榆关空筑塞铁骑不捐躯试问
延州将嫖姚今有无

自昔成和议于今二十秋祇闻增市马谁复问椎牛月色临关迥笳声入暮愁君行
看塞上何处有貔貅

何克斋侍御谪武昌

何君生人秀意气本豪宕通达类贾谊伉直似刘向排云叩天阍一日章三上鸣马
辄见斥安得复立仗谪宦向三湘犹胜居一障君王自明圣小臣罪当放但愿袞无阙无
令灶有爨自合走踈踈敢云心怏怏春日春明门开筵设祖帐武昌形胜地此行游亦壮
近闻饥饉余民物半凋丧君到若行春应为心凄怆监门图流民兹事谁能量志士恋禁
闥达人多慨慷直木忌先伐愿君慎所向

范太史册封

承明使者汉仙郎金简遥浮汉署香兰社分茅开胙遠萝河如带指盟长陇云晓动
旌旗色磧月宵生剑佩光闻道边庭资保障好将德意结贤王

顾实甫宫赞予告南还

五月下潞河轻帆渡淮水如何莼鲈思不待秋风起劝君一杯酒聊以永今夕明日见云停天涯望行迹折柳听啼莺莺声坐来歇酒罢惨无欢孤舟向天末君来何太迟君归何太早祇恐再见君容易各衰老相如惯消渴常此乞闲身好携金掌露归醉玉山春解骖日已暮归舟夜半昏舟中闻吴语疑是到阊门岂不欲留君留君君不住翻羨橹上乌日得逐君去君真无罣碍我自愧尘俗誓将结芒屨从君踏盘谷

田夫謠送马瑞河父母之沾益

田夫无外事惟有佃其田腰鎌与荷鋤两两相比肩偶尔理田器相携向市廛忽闻城市言官长近已迁行当舍我去不复久留连仓忙到县门车马已骈阗惊愕语同聾兹事良已然自从官长来于今五六年年年纳租后家家饱粥饘鸡犬夜不惊村舍常安眠积谷为我赈逋赋为我蠲时有三老来化诲为我宣儿童各长成恩德及悖■〈疒冂〉信是田家乐赖得官长贤自谓长若斯闻里得生全今去欲何之惆怅心若煎去从官长去不知何时还来时不预料囊无送刘钱徒尔卧辕下相将车牵牵闻说官长去行行向南滇滇南万余里道路太绵延中复经巫峡崦嵫摩苍天况当五月时赤日赫如燁田夫有圆笠不敢献君前但愿加餐食以慰心拳拳尚来福吾民勿此长弃捐仆夫早严驾五马何翩翩云树隔行踪有泪如迸泉

送杨贞复宫洗请告南还贞复闻乃弟之变

十年强半卧林丘又向君王乞书游六月炎蒸愁客路一帆烟雨送行舟鸰原梦断悲青草鷓鴣吟成叹白头万里瞻云情自切承明肯为故人留

魏懋忠开府晋中

当年直谏几人存此日偏承明主恩开府北来熊作轼大藩西去鴈为门青萍晓拂霜全落赤羽朝飞檄正繁千里塞垣归保障一身多病更休论

婉儿怨戏为敬承作

妆成泣秋风含情泪如雨不信妖艳姿空房翻独处挥泪问新人双蛾今几许何事郎怜新新人能越语新人能越语旧人能燕歌燕歌音调悲宛转叶云和不惜玉交枝劝君金叵罗君恩别处新贱妾当如何皎皎河汉侧离离秋月影扬辉出海峤流光照金井卷帘望月色月斜知夜永夜月为谁明幽怀自耿耿幽怀自耿耿愁思郁不发长叹倚屏帷坐见双星没八絶红颜能几时歲月去倏忽有宠莫令极宠极爱将歇

放歌

余云衢汝亦堂堂七尺躯二十脱颖荐乡书三十挟策上公交车玉堂金马此何地容汝久玷承明庐从汝执经已三载天子不肯临石渠吁嗟乎汝既无封侯骨拜相须汝又不能投笔遠击西月氏请纓生縛左单于漫言虎可绣龙可屠屠龙绣虎竟何益况汝冥顽一技无逐队随行成底事羞作昂藏一丈夫汝不见海上駉辕下驹一旦受君牧与刍为君万里争驰驱少府金钱原膏血太仓粟米烦征输念汝何功敢窃食十六年来真如鼯如此素餐神所忌去夏一病几长徂即今不死亦借住鬢髮衰残成朽株汝今不去

将安需岂合中朝偶权贵好归田畔逐樵渔卫河之浒茅可诛且营菟裘为汝居贵何须夸赵孟富何须羨陶朱过眼富贵总石火从今且自脱樊笈三家市里堪沽酒五亩园中可荷锄免使短才污齿颊肯教乌帽笑头颅诸公自是时稷契懒人但放歌唐虞归去乎归去乎不然天厌人亦厌临崖勒马将焉如

饮张质卿太仆宅和质卿韵【二首】

七载君高卧频年我梦思云霄今再合樽酒得相随故态醉仍见深情恒不疑传来白雪调非是四愁诗

百年能几别一别动经时此会真当醉那能常若兹兴缘诸子发衰自二毛知惭愧赓高唱君言尽色丝

和敖嘉猷雨中仍用质卿韵【二首】

经旬雨不绝兀坐郁愁思溜断声方歇云来阵复随沼深容我濼天漏令人疑何事君高兴挥毫犹赋诗

身衰逢乱日官冷是闲时行止今难定干戈复若兹壮怀逐岁尽归梦有谁知雨共穷愁泪潇潇拟散丝

和敖嘉猷夜坐仍用质卿韵【二首】

暝色归庭树蝉声逗客思澹云行欲尽明月坐相随肉食惭何补珠投暗自疑君恩无可报深愧素餐诗

炎蒸愁夏日独爱夜凉时闻有阆风苑冷然当若兹闲身孤鹤伴秋意草虫知久坐生情思援琴理废丝

夏日张质卿招饮有诗见示次韵奉答

故人良燕会欢乐惬素心所以冲炎热连骑相追寻满斟不能辞感君情意深酒酣发雄谈琅然金石音人生有离合譬彼晴与阴会合不尽欢离后思难任

闻警【四首】

烽火传西夏干戈又早秋已闻百万尽未解九重忧战血腥原草笳声咽戍楼贾生余涕泪独向塞垣流

输挽千羣至年年说饷师魂飞直北羽心折海东麾六郡良家子三河侠少儿匆匆烦召募祈父亦何为

权总周连帅爵悬汉彻侯疮痍犹未复征战几时休已仗上方剑须臾回纥头王师今老矣空抱杞人忧

天兵疲塞外敌骑满秦中已歷夏秋月能无尺寸功前军谁破虏大将只和戎何日妖星落捷书报汉宫

曾直卿敖嘉猷张质卿冯用韞过小斋夜坐质卿有诗见示次韵奉答

久雨清烦暑新凉入小斋偶然逢上客相与话幽怀酒换东西市泥深前后街且堪留一醉谈笑杂齐谐

敖嘉猷以诗索饮次韵招之

君如时问字不惮往来频斗酒家藏久园蔬市取新正堪同酩酊无复叹沉沦聚散
吾生事那能长比邻

代敬承悲婉儿

日长命何促秋霜殒修嫠孀婉方及辰幽明忽异路以兹去倏忽翻恨来迟暮花落
不重荣佳人难再遇亦知粉黛姿原非金石固无奈死别离泉台永不寤谁能召冥魂一
为话情愫独立盼庭柯无言怨芳树

袁太史封楚藩

为衔恩命出明光驿路迢迢向武昌礼乐共瞻周太史声名曾冠汉贤良楚筵酒设
黄金缕郢曲吟成白雪章何事锦云随地落乘流知欲赋潇湘

敖嘉猷以诗招饮次韵奉答

景物悲摇落凉风又报秋偶逢仙客召同散旅人愁绿泼皆新酿白头总旧游殷勤
莫惜醉明月在西楼

又次嘉猷韵

逢君不惜醉非是酒肠宽屈指怜吾党晨星渐渐残有怀聊共适相慰且加餐追忆
当年别能无此日欢

嘉猷赋得明月过斋头次韵

以我相思渴对君怀抱倾十年惟此夜万籁复秋声况有斋头月照人冠上纓此时
不共醉忧国浪如醒

七月七日八日敬承用韞招饮时敬承将有留院之行同诸丈赋

当日追欢处依然花满亭只今惟七子河畔看双星月色浮樽白林光入座青兴来
浑欲醉谁忍独为醒秋风随步履樽酒日相亲祇以离情恶翻令欢会频暂留惟促席不
忍是征轮借问长江水何如天汉津

和用韞七夕二首【五絶】

歲歲天孙此合欢月明双照泪痕干深情已自托云雨翻向灵禽借羽翰
秋净云霄冷绛河黄姑织女夜相过鹊桥渺渺平如掌不似人间风浪多
露冷天高榆影秋纤纤新月上帘钩无端云汉看牛斗添作深闺一夜愁
星桥云拥彩鸾归莫遣龙梭罢夜机闻道西征诸将士秋风犹着旧时衣
斗转天街夜渐深从他男女自穿针拙人懒乞人间巧且向良宵醉二参
九日同魏懋忠冯用韞登显灵宫玉皇阁【三首】

祈灵汉帝有仙坛阆苑秋阴碧殿寒宦海几人同对酒天涯九日此凭栏黄金台向
荒城没白玉珂从古陌看回首红尘悲莽荡紫云深处欲骖鸾

琼宫故是仙家地佳节相招此共游古木萧萧松露冷长空片片海云秋风尘忽老
陶潜菊樽酒聊登庾亮楼秩散正宜同汗漫何妨落日更淹留

玉皇高阁俯人寰画栋丹梯静可攀双阙参差连汉殿千峯迢递接燕关楼头秋色
当杯堕槛外晴云入座闲松菊故园何处是萧条三径未能还

彭太史册封便道归省

駉駉四牡咏皇华河朔逶迤驿路賒已自西清分使节还从南斗度仙槎金函衔凤
疑青鸟彩袖携云映紫霞恠得高堂人并健彭年原自是君家

唐太史封郑藩

青门柳色散晴烟太史风流拥节年恩诏晓从三殿出使星高傍两河悬虎牢狐岭
开怀句豹袖羔裘忆郑贤到处王侯应授简诗成不让栢梁篇

七夕

新月依稀夜向阑女牛此夕若为欢人间漫道相逢易天上犹然会合难河水盈盈
情脉脉机声轧轧露溥溥可怜何限别离者遥望仙桥掩泪看

送张质卿太仆【二首】

北风吹大陆此去蹶层冰忽断羣中鴈其如棘上蝇别筵频劝酒深夜共挑灯仕路
从来恶嶠岨真可憎

驄马经行处曾清海上氛人犹谈往迹名乃挂弹文心事凭苍昊闲情付白云送君
无限意聊与醉斜曛

刘柱翁双寿

廿载人高大隱名鹿门紫气映东瀛灵萱特并庄椿茂玉树双聯窈桂荣伯氏南宮
行曳履仲方北阙正持衡金陵江鲤仙茎露并入琼筵佐寿觥

陈南滨侍御奉母南还

浮云西北驰越鸟东南飞壮士各有怀何为常依依况有白髮亲日夕望庭闈陈情
叩天闈君恩许暂归板輿亲扶将满路生光辉到日敞华堂开燕及芳菲春风发朱英照
君舞时衣君良悦情意其奈心知违嗟我同门友渐看云会稀今复惜君别何以効涓微
处士忌硠硠愿君聊息机珍重报国身努力奉春晖

送冯用韞学士归省

君王方问道学士乃宁亲绿野看云近黄金结绶新更缘瞻岵意得慰倚闈人彩服
皆宫锦犹余汉苑春

壮年能解绶拜命即辞荣盛事归桥梓私心忆弟兄传符明主赐樽酒故人情别后
长安道应增鸣鴈声

自与君为友知君真可师亦慚非遠志谬欲托深期握手忍分去停杯怅别离无由
生羽翼相望但相思

知君非久别无柰亦分违从此风期阻渐看云会稀南邻想高士东壁望余晖莫向
碧山去依依恋舞衣

送王太初之金陵

匹马西风出禁闾皇恩新拜大鸿胪有官何必中丞节无地不堪君子居南北那非
明主赐往来可柰故人踈秣陵旧迹时登眺慷慨应伤六代余

芝阳丈候补都门赋赠

孤臣来絶徼久客滞长安酒典鸛鹑服尘生獬豸冠途穷感慨易金尽结交难惟有
匣中剑西风洒泪弹

芝阳被谤后抚臣疏其有功于滇仍乞补滇以酬其绩乃竟得郁林书此为别

凄凉伤歳暮飘泊又春初裘敝因除目骨销是谤书莫缘臣节苦便与世情疏迢递
苍梧道新恩未可虚

寿葢吏部母

高堂为寿日游子在京华岂不荣鸾诰谁其侍凤珈见萱即忆母陟屺倍思家遥望
称觞处白云映紫霞

山行

初晴山路滑涧水正泠泠秋老树多紫雨余峦倍青参差高下寺迤迤短长亭村酒
不能醉寒风吹更醒

送王伯桢叅晋藩

世事真堪喙王生又外藩浮沉原宦迹陟黜总君恩霄汉天谁问风尘道自存所怜
白首别黯矣各销魂

得续桥社长书寄赠【二首】

相离当岁晚相忆又秋初闻鴈悲游宦怀人念索居客情无复道清兴近何如自是
嵇康懒年来音信踈

近得缄来信怜君生事闲楸枰敲落月桐韵志高山旧帖临池补新诗闭户删堪嗟
为客者碌碌鬓毛斑

题江长信雾灵山图

玄武之精化为石堕地幻作雾灵山去地不知几千仞巉巖破砢絶人寰中有广礪
之水黑峪之关天为薊门设屏蔽不令边人饮马于其间谁哉当关胡乃失守藁厌人血
溪量人首妖氛惨淡塞垣墟敌骑凭陵壮士走一战深惭正正旗三捷敢欺明明后西台
御史李汝培铁面皂囊何雄哉封书暮入明光殿战地朝看骢马来江君故是埋轮者乘
骢直抵关山下空壁萧条余釜鬻藏尸纵横遍原野怒气勃勃起神羊寒威凛凛入弹章
至今六月山头雪犹是当年简上霜于戏江君谁貌汝豸冠绣服猛如虎只今东有倭西
有虜潢池处处鸣桴鼓愿君揽辔一澄清扫尽欃枪报明主

赠唐宪副母夫人寿

君家慈亲世难得白髮萧萧仍健食江鸥海鹤比精神霞帔云冠照颜色有子今为
外台臣黄金为带朱为轮已向虞廷称万寿还从孟母祝千春

送刘効忠巡抚延绥【四首】

开府须人杰维垣属列卿符分竹虎去轼拥画熊行号令严刁斗威名变旆旌羨君还自愧白首竟儒生

宦是刘生拙崇阶亦渐跻廿年淹塞北千骑向延西小范谁堪并大名君与齐丈夫多远畧早晚破回奚

谁云边塞地城郭近来空闻道延州将犹称列郡雄此行期破敌慎勿但和戎好使麟台上书君第一功

青油明虎帐紫塞控龙庭汉马嘶卿月边人识将星英雄头未白事业简须青莫道书生老犹堪一勒铭

五十口号【二首】

五十今朝是凄凉感歳时浮荣仗马似生事蠹鱼知老觉年来甚病惟归去宜主恩惭未报容易鬓成丝

初度逢摇落庭柯叶正飞歳华已不待心事复多违久宦惭金马应还理石砚生平何者是敢道去年非

逐妇行送陈从龙侍御

莫逐妇逐妇令妇悲试问妇何悲妾亦有所悲不缘寳帐闲鸳枕不愁艳质妬蛾眉妾有一寸丹日织五丈素织作不辞劳何事君不顾君不顾兮妾无缘妾无缘兮妾何言当初拟与同生死寧知弃掷今如此妾岂愿学随风花妾岂愿作覆盆水随风花逐水流覆盆水不再收妾意与君相绸缪何无何有为君求君不悟兮妾心忧出君门沾妾臆欲行不行长叹息莫言去妇无颜色倘君尚欲当窻织应知去后能相忆

送常对水【二首】

三十年前曾聚萤与君清夜坐谈经蹉跎愧我头先白濩落看君绶始青此会且

■ 〈才弃〉 酩酊醉明朝何处短长亭天涯朋旧怜星散厌对骊歌不忍听

太原亦是先王地质朴犹余太古风君去好携循吏传政成寧让晋阳公桑麻处处深山里弦诵家家明月中何日仙鳧飞汉室都人应避五花骢

甲午元旦忆用韞

他日逢元旦开樽我对君此时吾谢客翻恠尔离羣懒醉长安酒空瞻海峽云弟兄寥落甚嗒矣坐宵分

王伯桢入都志喜

世间万事难具陈伯桢乃作外台臣仰天大笑去不顾抛却金紫如埃尘吾辈亦是奇男子肯令行止由他人世间万事谁能保伯桢复走长安道囊中白简久模糊腰下黄金尚美好光阴去去如流水六七年来复如是当日英雄安在哉空令姓字污人齿路人共指关西子七尺肮脏犹如此春花正发玄都观暮云空鎖平津里伯桢与君别来久穷交醉汝一杯酒胸中磊块能浇否陶令当年懒折腰陈生有日终开口饮君酒为君歌所得漫言比仲多西夏豺狼虽授首北海鱼龙未偃波中原白骨莽相望赤子恐弄池潢戈

丈夫报国须少壮问君意气今如何

戏柬用韞

问君山中何者好君言无事常却扫朝看小妇理新妆暮督侍儿寻旧草有时舞彩
奉亲欢频沾余沥醉更阑锦帐酣眠不觉曙何能清梦到长安

纯之丈以予十六年官六品贻诗见笑次韵解嘲

宦久成衰相官闲趣病身方惭赵氏璧敢叹汉家薪愚拙应输我才名实让人浮荣
今已足有志在垂纶

寿谭中丞母

慈母丸熊旧仙郎符虎新去持开府节归慰倚门人榴火当樽艳荷香入酒醇添筹
从汉沔献祝指峨岷早逐潘家驭休回王子轮愿将称寿意散作锦江春

客有说予学禅者戏答

不谙贝叶编且倾竹叶酒醉中有真趣真言吾何有

闻四槐丈至

纔凭尺素慰相思忽报輶轩已在兹握手乍看疑是梦论心久语却成悲君才岂合
长林壑此意聊将付酒卮南北于今多战伐即看明主问非臆

连日同四槐丈饮沈御史园有感

昨日看花花满枝今朝花已半离披因怜聚散浑如此始信衰荣亦若斯令节正当
三月候相逢况是七年时共君痛饮不沉醉即使重来未有期

夜月同伯桢饮直卿宅兼订会期

弟兄三十辈今得几人存偶逐罔卿骑同倾学士樽人占星聚里吾喜月当轩此后
经旬约期君不负言

题李纳言萱庭日永卷

沧洲缥缈接青冥中有仙家萱为庭庭前一夜春风起春日曛曛照阶庀森森萱叶
何青葱裊裊萱花吐金紫共道此花应有神托根日与松芝邻松柯如石芝如菌芝为颜
色松为身可比昆仑老桃树一度花开三千春

送庄太史册封

楚客才名天下闻封茅直向粤南分千年带砺归宗子万里莺花属使君独秀峯含
桐叶色七星岩动剑锋纹壮游处处堪乘兴赋就应凌五岭云

寄王清泉刺史

故人多远识早已宦情微林壑但寥落酒樽无是非心轻五马贵人羨一鸿归予亦
风尘倦秋来思振衣

五忆诗

鲁应绍

应绍忘年友怜君老一经兴酣时卜夜谈剧每移星昔诧玄言白今嗟坟草青望庐

思笑语双泪为君零

王公招

旅邸相逢日开樽尚自亲谁知生别后遂作死离人疾病工为祟文章竟误身故园
台榭尽零落不胜春

常子仁

子仁吾党彦雅志在公交车词赋金同掷丰标玉不如龙年忽冉冉鹤梦竟遽遽幸
有佳儿在犹能读父书

克孝

吾宗老伯氏今世葛天民有酒即拚醉无财不厌贫可怜泉壤下犹是孝廉身诸子
近萧索相看更怆神

克敬

最怜克敬弟戇直无它肠不恋儒为籍却耽酒是乡醉能消日月病乃入膏肓谁复
为吾益思之倍惨伤

淡然轩集卷八